




ex dono domini  
Libri aut. Gori.

N<sup>o</sup> 106  
page

G. 1/6

Ex



Ex libris  
Lejeune



Robert Huyssens dan s'older  
faict & xijm<sup>e</sup> & Fuite 1606  
~~de Conft. de G. de M. & M.~~

me in in chael

veelp in

21213





# REMARQUES

DES BLASPHEMES, ER-

REURS, ET IMPOSTURES CON-

tenus au liure du Ministre Loque, de  
n'agueres publié sous tiltre des  
Abus de la Messe.

Par M<sup>r</sup>. *HUGUES BURLAT* Docteur de  
la Sorbonne de Paris, Chanoine Theologal  
& Penitencier de l'Eglise d'Orleans.

*Ex libris Michaelis*

*Lejeune*

*Curator*

A PARIS,

Par CLAUDE DE MONSTROEIL,

ET

JEAN RICHER.

1598.

---

*Avec Privilege du Roy.*

THE NEW YORK

LIBRARY

OF THE CITY OF NEW YORK

ASTOR LENOX TILDEN FOUNDATION

150 N. 5TH ST. NEW YORK, N.Y.

1928

1928

1928

1928

1928

1928

1928

1928

1928

1928

1928

1928

1928

1928

1928

1928

1928

1928

1928

1928

1928

1928

1928

1928

1928

1928

1928



## *Extraict du Priuilege du Roy.*

**P**AR grace & Priuilege du Roy, il est permis à **JEAN RICHER**, Maistre Imprimeur & Marchant Libraire, d'imprimer ou faire imprimer vn liure intitulé, *Les Remarques des erreurs, blasphemés, & impostures contenus au liure de n'augures publié par le Ministre Loque, sous riltre des Abus de la Messe.* Fait par M<sup>e</sup>. **Hugues Burlat**, Docteur en Theologie, faculté de Paris: Veu & approuué par deux Docteurs de la mesme faculté. Et sont faites deffences à tous Imprimeurs & Libraires de n'imprimer, ne faire imprimer ledit liure, vendre ny distribuer en ses pays, terres & seigneururies de son obeissance, iusques au temps & terme de six ans, à compter du iour que ledict liure sera paracheué d'imprimer, sur peine de confiscation des exemplaires & d'amende arbitraire. Et qu'en mettant au commencement ou à la fin l'Extraict dudit Priuilege, il soit tenu pour suffisamment signifié & venu à la cognoissance de tous. Comme plus amplement est contenu audict Prinilege. Donnée à Paris le dernier iour de Septembre 1598.

Signé,

DE LAVETZ.

**N**ous sous-signez Docteurs en Theologie, faculté de Paris, certifions auoir leu & examiné ce present liure intitulé, Remarques des pretendus abus de la S. Messe. Lequel nous auons trouué conforme à la doctrine del'Eglise Catholique Apostolique-Romaine, & auons iugé pouuoir seruir beaucoup au Lecteur Chrestien pour le maintenir en icelle. En foy dequoy auons signé de nos mains ce present tesmoignage, ce vingtiesme iour de Novembre, mil cinq cents quatre-vingts dix sept.

F. CHAMPCHEVRYEVLX.

F. C. VAQUEREL.

BOUCHIER.





A MONSEIGNEVR

MONSEIGNEVR DE

LA CHASTRE, MARESSCHAL  
de France, Cheuallier des deux Or-  
dres du Roy, & Conseiller en ses Con-  
seils, Capitaine de cent hommes d'ar-  
mes, Gouverneur pour sa Majesté en  
la ville d'Orleans, pays & Duché de  
Berry.

MONSEIGNEVR,

**M**L'experience & vsage des  
actions humaines nous faict  
cognoistre que la vergongne du peché est  
telle, que l'auteur d'iceluy veut tousiours  
estre incogneu, encores que son œuure  
soit publié par tout. Les larrecins, vols,  
meurtres, saccagements se recognoissent  
fort facilement où ils aduiennent; mais

## EPISTRE.

personne ne s'en veut dire autheur. Cecy nous a esté signifié par nos premiers parents, lesquels apres auoir transgressé l'ordonnance de Dieu en m̃ageant du fruit qui leur estoit deffendu, receurent vne grande honte & confusion en eux mesmes, & se cachèrent entre les arbres du paradis terrestre. Il ny a si detestable pecheur qui ne blasme de sa bouche propre le peché duquel il est accusé, sçachāt bien que l'opinion commune le reprouue. C'est pourquoy le Prophete royal David a dit ces mots, *Dixit insipiens in corde suo non est Deus*, le fol a dit en son cœur (non pas en sa bouche) qu'il ny a point de Dieu : Car, comme dit saint Augustin, Si quelqu'un estoit si outrecuidé & oublié de son deuoir, de dire publiquemēt qu'il n'y eut point de Dieu, chacun le reprendroit & contrediroit. Or la difference des pecheurs est telle, qu'aucuns d'iceux ayants offensé ne veulent pas persister; ains ils se conuertissent à Dieu par vne vraye repentance qu'ils prennent de leurs fautes, sans aucunemēt resister à ceux qui les conuient de se recognoistre. Tels sont les vrays Chrestiens qui ont esté bien instruits de leur ieunesse, dit Clemens Ale-

*Gen. 3.*

*Psal. 52.*

*to. 8. mar.  
in Ps. 52.*

*Lib. 1. Pa-  
dag. c. 1.*



## EPISTRE.

xandrinus. Les autres ne peuvent aimer ceux qui leur remonstrent leurs fautes, & ne veulent point ouyr parler d'amander leur vie : au contraire ils font gloire de leurs meschancetez, *letantur cum malefecerint*, dit l'escriture, & *exultant in rebus pessimis. Peccatum suum quasi Sodoma predicauerunt*: ils se resiouissent d'auoir mal fait, & mesmes d'auoir commis des fautes plus enormes : & publient leurs pechez, comme ont faict autresfois les habitans de Sodome. Prouer 2. Esa. 3.

Tels ont esté entre tous les pecheurs de nostre temps les heretiques, lesquels poussez de passion, & desnuez de raison & de iugement, ont suiuy leurs opinions particulieres, contreuenant à l'autorité publique de l'eglise de Dieu, & se sont esudié de iour en iour à inuenter quelque nouueauté contraire à la saine doctrine: Lesquels de leur commencement se sont contretez de semer par petits liurets leurs meschantes opinions qu'ils ont inuenté, ou bien de renoueler les erreurs de leurs anciens, sans se faire cognoistre par leur nom, & sans exprimer le lieu de l'impression, ny le temps, ny le nom de l'imprimeur : & ont trouué prou de simples

## EPISTRE.

*Ephes. 4.  
Heb. 13.*

gents qui se sont laissé aller à leurs appas, & s'y sont d'autant opiniastrez qu'ils estoient ignorants, n'ayants esgard au conseil de saint Paul, lequel nous aduertit de ne nous laisser pas aller à tout vêt de nouvelle doctrine par la piperie des hommes qui sont cauteleux à seduire.

*Iul. Soli-  
mus in po-  
lyhist. ca.  
53.*

Or par ces simples gents qu'ils ont seduit, ils ont fait paroître au public le mal que de lōg temps ils ont couvé en leur estomach, les faisant ministres & executeurs de leurs meschants & pernicieux conseils; si que le mal s'est tost veu sans que l'auteur ait esté recogneu; iusques à ce qu'aucuns d'iceux, enflés de vaine gloire, & voulans se faire cognoître par quelque œuvre signalé (comme fait Erostrate quand il mit le feu au temple de Diane en Ephese) ont esté d'aduis de publier leur nom par leurs liures blasphematoires qu'ils ont mis en lumiere; par le moyen desquels ils ont donné leurs noms à leurs sectes qui ont embrassé & tenu leurs erreurs; s'efforçants ainsi de planter & établir leurs faulsetez & mensonges en lieu de la verité de nostre Seigneur, & de sa sainte Eglise. C'est ce que dict Saint Athanase, *Hæretici omnium sectarum à suo*

*Ora. 2. cō-  
tra Ar-  
rianos.*



## EPISTRE.

*capite appellationem sumunt, & nomen saluatoris nostri reliquerunt. Christiani autem semper Christiani remanserunt.* Que les heretiques de toutes sectes, ont tousiours tiré leurs noms de leur chef, & ont delaisié & quitté le nō de nostre Sauueur, & les Chrestiens, ont tousiours retenu le nō de Chrestiens: ainsi anciennement les heretiques Valētiniens ont tiré leur nō de Valentin, les Marcionites, de Marcion; les Ebionites, d'Ebion; les Montanistes, de Montanus; les Sabelliōs, de Sabellius; les Manicheens de Manichee: Et de nostre siecle, les Lutheriens de Luther: les Zuingliens de Zuingle: les Caluinistes, de Caluin. Tous ces chefs d'heresies ont affecté quelque nouvelle doctrine, contraire à celle de nostre Seigneur Iesus-Christ, & de sa sainte Eglise. Et comme si les siecles precedents n'eussent pas assez agité & troublé l'Eglise de Dieu: Ces derniers iours c'est esleué vn monstre d'heresie cōtre le principal point de nostre foy, qui est le saint sacrifice de la Messe, duquel le nom & la chose mesme s'est trouué si odieux aux enfans de diuision (foy disants de la religion) qu'ils n'ont cessé d'importuner leurs Ministres, iusques à ce que quelqu'un di-

## EPISTRE.

ceux qui ne s'estoit faict encores cognoistre par son nom, ayt entrepris ce chef d'œuvre pour se faire valoir, & acquérir vn nom immortel entre les amateurs de nouveauté. Il impute vingt deux abus à la Messe, & les desduit fort à son aduantage. Il ne s'est iamais trouué homme qui ayt tant crié contre la Messe qu'il faict en son discours: S'il auoit si bien fueilleté l'escriture comme il en faict triomphe, il y auroit trouué le nom de la Messe & la chose mesme. Car quand au nom de *Missa* qui signifie Messe, il n'est ny grec ny latin, ains purement hebreu, & de l'imposition Apostolique pris du Deuteronomie: Et comme dit Reuclin *significat oblationem quæ fit superiori domino propter debitum personale*, Il signifie vne oblation qui est faicte au grand & au vray Dieu, à cause d'une obligation personelle: Qui est-ce qui ne veoit par là l'intention de la Messe toute declaree selon l'usage qui en est en l'Eglise? S'il faut venir à la chose mesme, c'est à dire à la celebration de la Messe, Hesichius Prestre de Hierusalem, Disciple de saint Gregoire Nazianzene, & par consequent condisciple de Saint Hierosme, escrit que les Apostres (en gene-

*Dent. 16.  
lib. 2. rud.  
bebraicor.*

*lib. 4. in  
lect. c. 9.  
et lib. 10  
c. 13.*



## EPISTRE.

ral) ont accompli le iour de la Pentecoste, ce qui estoit escrit au. Leuitique & au Deuteronomie, *de la nouvelle oblation volontaire*, pour lors qu'ils celebriēt les saints misteres: Ce qu'ils feirent par le ministere de saint Iacques, non seulement à cause qu'il estoit l'un d'eux, mais aussi pour ce qu'il estoit Euesque dudit lieu, & auoit esté esleu tel, par les autres Apostres, lors mesme (comme il est vray semblable) qu'ils feirent eslection de saint Mathias pour le substituer en la place de Iudas: Voilà la premiere celebration solennelle de la Messe qui fut faite apres la consecration que feit nostre Seigneur le iour de deuant sa passion. Et a tousiours esté continuee ceste celebration de siecle en siecle, & sera encores iusques à la consommation du monde, ainsi comme le remarque par l'Euangile & par les promesses de nostre Seigneur, Hyppolitus martyr.

*Leuit. 23.  
Deut. 19.*

*E. scilicet lib.  
2. hys. ccl.  
c. 1.*

*1. Cor. 11*

*Orat. de  
consum.  
mundi.*

Il est certain qu'en ce siecle, la Messe a eu plusieurs contredisans, lesquels luy ont baillé quelques attaques particulieres: Mais il ne s'en est trouué aucun qui ayt mis en auant vn liure expres pour la deschiffrer par articles, & reduire en nombre aucuns abus qu'il ayt pretendu cot-

## ÉPISTRE.

ter contre icelle, sinon l'auteur du libelle blasphematoire auquel ce liure respondra, pour luy faire cognoistre qu'il n'a pas tant estonné le monde par ses calomnies & impostures, qu'il n'ayt bien deu estimer qu'il y auoit dequoy luy respondre. C'est Auteur est B. de Loque, qui escrit de Castel-geloux du 25. Ianuier 1596. Son liure est imprimé à la Rochelle. Par ces circonstances, il depose la honte & vergongne naturelle qu'ont eu par le passé autres furieux heretiques, ou bien il se veut faire chef des ennemis de la Messe, leur mettant en main par son libelle, les armes pour la combattre. C'est donc raison qu'à l'imitation des anciens Heresiarches il face honneur à ses sectaires qui se voudront pretaloir de son liure contre la Messe, en les qualifiant de son nom: & qu'eux reciproquement pour luy rendre l'honneur qu'ils luy doiuent, ne rougissent point de faire valloir son nom & de le porter deuant le monde: Il est donc Loque, grand ennemy de la Messe: Et eux comme tenants ceste belle doctrine de luy, & s'affectionnants à son exemple cōtre la Messe, seront Loqueteux. Ainsi sera reconnu le maistre par ses affectionnez Disciples, &



## EPISTRE.

eux reciproquement par luy.

Au surplus pour la fidelité de bon interprete des obscuritez & difficultez qu'il dit garder en cest oeuvre, il se trouue qu'il impose aux Docteurs & Peres de l'Eglise beaucoup de passages qu'il dit tirer d'eux, desquels aucuns ne s'y trouuent point du tout, les autres il ne les prend pas selon leur sens & intention, mais il les desguise du tout, les prenant à contrepoil : Et d'autres il les cote fort mal. Choses qui nous signifient qu'il n'y est pas si versé comme il s'en vante, & qu'il y apporté vne intention digne de son oeuvre. Dauantage pour bien consommer son oeuvre, il dit en la conclusion d'iceluy apres son 22<sup>e</sup>. pretendu abus, que si quelqu'un replique à son escrit il y remettra la main. Ce fera donc pour augmenter le nōbre de ses blasphemmes & impietez, ausquels ayant suffisamment respondu pour les auoir descouuert, ie proteste dés maintenant comme pour lors qu'il aura repliqué, ne vouloir faire autre responce; attendu que (comme dit saint Hierosme) *hæreticorum sententias prodidisse refutasse est*. Auoir descouuert les mauuaises opinions des heretiques, c'est les auoir renuersé. Il ne falloit

*Ad Pam-  
machium*


## EPISTRE.

que ce poison marcha en public sans son antidote ou contrepoison. Et d'autant qu'il s'est glissé subtilement en ceste province, en laquelle vous avez grand pou- uoir & autorité (Monseigneur) j'ay pen- sé qu'il estoit tres-raisonnable de vous de- dier cest antidote, afin que sous l'autho- rité de vostre nom, il puisse estre recueilli des vrais enfans de Dieu, & de sa sainte Eglise, & marcher en toute seureté en ce lieu mesme auquel son aduersaire a vou- lu auoir cours. Je sçay de combien & de- quelle affection vous m'aymez: Pour toute recognoissance ie ne vous puis of- frir maintenant que ce mien petit labeur, & vous assurer que pour tout le reste de ma vie ie me tiens vostre obligé, à prier Dieu le Createur pour vostre santé & prosperité, & de toute vostre noble mai- son. Du 10. de Decembre, 1598. à Orleans.  
Par le tout

*Vostre humble & affe-  
ctionné seruiteur,*

HVGVES BVRLAT.





## ADVERTISSEMENT AV

LECTEUR CHRESTIEN SVS LES  
pretendus abus de la Messe , n'agueres  
publiez par B. Loque, Ministre, en for-  
me de Preface.

**L**E vray Chrestien & Catholique reconnoistra  
par l'Epistre liminaire du liure des pretendus  
abus de la Messe, imposez à l'Eglise Catholique,  
Apostolique, Romaine. par le Ministre Loque, de Ca-  
stel-geloux, imprimé à la Rochelle par Haultin Impri-  
meur le 25. Iannier 1596. Qu'iceluy Loque s'est imagi-  
né auoir esté conuié & provoqué par aucuns de l'Egli-  
se Romaine, & nommement par aucuns Iesuites, d'en-  
trer en dispute avec eux. Et sur ce deffi il se donne car-  
riere; disant, auoir eu tousiours tres-grande volonté d'y  
entrer, en luy accordant deux conditions: L'une, que les  
parties s'accordassent de Iuges agreables pour moderer  
la dispute, & mesme imposer silence quand besoin en  
seroit: L'autre, qu'on eut sur la table la sainte Bible  
en Hebrieu, Grec, Latin, & François, pour y auoir re-  
cours & vuidier tous differents. Desirant outre plus  
qu'il y eut deux Greffiers de bonne foy, & non suspects  
pour rediger par escrit toute la dispute: & que les plus  
apparens de l'une & l'autre religion y assistassent,  
pour rendre la dispute plus celebre, & tesmoigner du  
resultat d'icelle. Et pour rendre encore son affection plus  
louable, dit iceluy Loque auoir laissé le choix des points  
desquels on disputeroit, & donné aussi aux Catholi-

## PREFACE.

ques la liberté de l'interroger ou de souffrir l'interrogatoire de luy, pour luy répondre: Et quand au lieu auquel se feroit la dispute, disoit s'en rapporter à la volonté des Arbitres & Juges, qui seroient receus de part & d'autre. Voilà des conditions fort belles & raisonnables en apparence, mais en effet, de beaux appas pour séduire les simples, qui n'auroient iamaïs eu communication ou connoissance de l'intention mauuaise des nouveaux sectaires, & nommement des Caluiniſtes. Car en premier lieu, c'est vne chose fort difficile entre les enfans de lumiere & des tenebres de conuenir ensemble de Juges idoynes & capables de les accorder en leurs disputes de la foy, puis qu'ils sont formellemēt contraires & de religion & d'intention, attendu que (selon

1. Cor. 6. saint Paul) Non est conuentio Christi ad Belial, lucis ad tenebras, Il n'y a point de moyen d'accord entre Dieu & le diable, entre la lumiere & les tenebres. Et ne se peut bonnement iuger qu'aucun homme d'honneur, craignant Dieu & sa conscience, ose presumer de mettre accord entre la foy & l'heresie, la verité & le blasphemisme mensonger, veu que en l'Apocalypse de saint Iean, l'Ange ou Euesque de Laodicee est condamné pour conuiuer & se monſtrer indifferant entre deux choses contraires, & luy est dit, Scio opera tua

2. Apoc. 3. quia neque frigidus es neque calidus. Vtinam frigidus esses aut calidus: Sed quia tepidus es, & neque frigidus neque calidus, incipiam te euomere ex ore meo. Je cognois tes œuures, & que tu n'es ny chault ny froit: A la miennne volonté que tu fusses du tout chault ou froit: mais pour ce que tu es tiede, & que tu n'es ny chault ny froit, ie commenceray à te vomir hors de ma bouche: C'est à dire (selō la Glose



## PREFACE.

ordinaire) hors de la société & compagnee des Esleus. Les Cōciles, decrets des saints Peres & autoritez des anciens doiuent seruir de loy à tout Chrestien, sans qu'il s'addonne à chercher telles voyes d'accord, lesquelles n'ont iamais r'amené les desuoyez au droit chemin de salut, ains plustost les ont rendu plus entiers en leurs mauuaises opinions, comme les Arriens en leurs faulx cōciles, & les Calvinistes en leur Colloque de Poissy. Et pour le second point, ledit Loque desire la Bible Hebrayque, Grecque, Latine & Françoisse, pour y auoir recours en tout differēt: Mais il ne dit pas par qui il veut qu'elle soit approuuee, & s'il veut qu'elle soit tenue en l'Eglise Catholique, Apostolique, & Romaine, ou en la synagogue de Geneue. Il desire aussi n'approuuer les anciens Docteurs sinon entant qu'ils seront trouuez conformes à la parolle de Dieu: En quoy il nous met encores en plus grande difficulté, d'autant qu'il veut mesurer à son cerueau ceste conformité des Docteurs & de la parolle de Dieu, & nō à la pratique de l'Eglise, laquelle a esté tenue de tout tēps depuis l'Ascension de nostre Seigneur, cōme l'experience nous l'a enseigné. Et quand aux Scribes ou Greffiers qu'il veut estre appelez pour rediger fidelement par actes la dispute, & aux plus apparets des deux partis cōtraires qu'il desire y employer pour tesmoigner du resultat d'icelle dispute, la difficulté de l'accord n'en sera iamais moindre qu'en la cōuenāce de ceux qu'il a desiré premierement estre appelez de part & d'autre pour moderer la dispute.

Or se plaint ledit Loque qu'ayant donné se deffi aux Catholiques, il n'en a eu aucune responce. Et que n'ayant peu communiquer verbalement avec eux, il a esté contraint auoir recours à l'escrit, pour veoir s'il y

## P R E F A C E.

respondront . Et dit qu'il a choisi pour libre discours, la Messe, qu'il appelle par derision (leur plus haute piece): mais bien dirons nous avec verité, le principal & plus noble subiet de nostre Eglise, sans nous arrester d'auantage aux enormes blasphemes qu'il prononce en cest endroit contre la sainte Messe, odieuse à Satan & à ses Anges, cest à dire aux heretiques ses principaux supposts . Protestant neantmoins en ce mesme endroit ne vouloir vser d'aucunes iniures ou attaques mesdisantes, comme estans trop estoignees d'un Chrestien. C'est vne chose ordinaire aux heretiques (comme dit Saint Hierosme, *Pacem voce pretendere, & opere destruere, aliud niti, aliud demonstrare, verbis sonare concordiam, re exigere seruitutem* . Faire protestation d'aymer la paix, & en effet la destruire: Pretendre à un but, & tesmoigner en apparence autre chose toute contraire: Promettre & iurer amitié aux hommes, & en effet les rendre serfs & comme esclaves. Pourneant donc le Ministre Loque proteste (comme Chrestien qu'il se dit) ne vouloir vser en conference ou en son esprit d'aucunes iniures ou attaques mesdisantes, apres auoir outrageusement appelé la sainte Messe, la plus haute piece des Catholiques, & l'ayant comparé à un colosse esleué.

*Ad Theop  
philum,  
aduersus  
erro. Ioā.  
Hierosol.*

Il se resoult en apres en ceste mesme Epistre liminaire de traiter ceste matiere de la Messe par syllogismes à la mode des Dialecticiens, comme ignorant que les Arriens qui estoient braues Dialecticiens, & les Philosophes aussi qui disputèrent contre sainte Catherine, ne se trouuerent iamais au dessus de leurs entreprises par les syllogismes, & que si d'iceux aucuns sont venus à la foy, ils n'y sont venus par la voye des syllogismes,



# PREFACE.

ains y ont renoncé du tout, & ont embrassé ce beau mot des Apostres, Credo, apres estre entrez en repentance de leur mauuaise vie, selon ce que disoit le Prophete Ps. 118.

Royal, A mandatis tuis intellexi, propterea omnem viam iniquam odio habui, l'ay commencé à entendre & comprendre par l'accomplissement de vostre volonté Seigneur Dieu, & pour ceste cause i'ay eu en horreur toute voye d'iniquité. A quoy conuient fort bien ceste sentence de Tertullian, Quid Athenis & Hierosolymis? Quid Academiae & Ecclesiae?

Quid Christianis & Haereticis? Nostra institutio de porticu Salomonis est: Qui & ipse traderat dominum in simplicitate cordis quaerendum esse. Viderint qui Stoicum, Platicum & Dialecticum Christianis praeulerunt. in praesentia  
aduers.  
haeretic.

Quelle conuenance y a il entre l'Vniuersité ou escole, & l'Eglise? entre Athenes & Hierusalem? entre les Chrestiens & les heretiques? Nostre institution vient du temple de Salomon, lequel a enseigné qu'il faut chercher Dieu avec vne simplicité de cœur & d'affection:

Ce que peuuent aysement recognoistre ceux lesquels ont préféré les Stoiciens, Platoniciens & Dialecticiens aux Chrestiens. Sap. 1.

Il dit d'auantage, Nobis curiositate opus non est post Christum Iesum, nec inquisitione post Euangelium: Cum credimus, nihil desideramus ultra credere. Hoc enim prius credimus, non esse quod ultra credere debemus,

Nous ne deuons point estre addonné à curiosité depuis que nous auons fait profession du nom de Iesus Christ.

Nous ne deuons point estre addonné aux questions depuis que nous auons receu l'Euangile. Quand nous croyons, nous ne souhaitons rien croire d'auantage. Car

# PREFACE.

*Math. 7.*  
*Joan. 5.*  
*Ibidem*  
*Serm. 35.*

avant que de croire, nous croyons qu'après la croiance  
 que l'Eglise nous ordonne, il n'y a plus rien à croire.  
 L'heretique alleguera, l'écriture dit, *Quærite & in-*  
*uenietis, Scrutamini scripturas, &c.* Mais cela  
 s'est dit au commencement que la foy commençoit à e-  
 stre plantee, & quand le nom de Iesus-Christ n'estoit  
 encores suffisamment publié, dit le mesme Tertullian.  
 Les discours humains donc se peuuent proposer & en-  
 tendre par la voye des syllogismes, mais non les matie-  
 res de la foy Chrestienne, ou articles de la religion ex-  
 traits de l'écriture sainte, laquelle Dieu (comme sou-  
 uerain maistre & Seigneur de nous tous) nous a ordon-  
 né pour nostre bien & salut, sans la soubmettre à no-  
 stre iugement ou discussion, comme étant trop atta-  
 chée à la nature, sans auoir esgard à Dieu. Et si les Es-  
 coliers du Philosophe Pythagoras n'osoient discuter ny  
 débattre sa doctrine, quelle temerité est-ce au Chre-  
 stien de vouloir débattre les ordonnances de Dieu & sa  
 sainte écriture? Le fondement donc du Ministre Lo-  
 que se trouuera trop defectueux, par lequel il submet à  
 la doctrine des Dialecticiens, ou à la loy des syllogismes  
 ce qui despend de l'ordonnance & volonté absolue de  
 Dieu, & nous est proposé par son Eglise, pour reigle as-  
 surée de nostre salut. *Noli quærere Philosophiam,*  
*quoniam ad Philosophiam factus non es, Ne*  
*cherche point la Philosophie, puis que tu n'es point fait*  
*pour la philosophie, dit saint Augustin aux freres Her-*  
*mites.*

En sa peface, en la 14. page du liure: La premiere  
 attaque qu'il donne à la sainte Messe, est, *Que la Messe*  
*est ordonnee de l'Eglise Romaine, & y est continuelle-*  
*ment celebree, & que ladite Eglise Romaine n'est pas*  
*saine*



## PREFACE.

saine, d'autant que son chef & ses membres sont malades. Mais puis qu'il a protesté en son Epistre liminaire de se servir de syllogismes, & de suivre la voye des Dialecticiens en son discours: Quand on luy auroit accordé generalement (ce qui ne se peut) que le chef & les membres de l'Eglise Romaine fussent malades, est-il à conclure de là que l'Eglise Romaine ne soit pas saine, & par consequent que la celebration de la Messe en icelle, ne soit receuable? Qui diroit en consequence semblable, le chef & tous les membres du corps humain sont malades, & partant l'homme n'est pas sain n'y receuable en faits & dits? Car qu'est-ce autre chose dire l'Eglise n'est pas saine, partant aussi sa doctrine, comme la doctrine de la Messe n'est pas receuable? L'homme malade de corps peut il pas estre sain d'esprit, & tesmoigner par visue voix & par œuvres louables que Dieu accomplit en luy, ce que disoit saint Paul de soy mesme: Tunc potens sum cum infirmor? Je suis 2 Cor., 12.  
fort & bien libre de mon esprit, quand ie suis debilitéé de mon corps? Semblablement, où est-ce que l'Eglise s'esuertue davantage qu'en ses tribulations qui luy sont suscitées par sathan & par ses membres? n'est-ce pas là que se verifie la promesse de nostre Seigneur disant, Portæ inferi non præualebunt aduersus Math. 16.  
eam, Que les portes d'enfer ne feront rien contre icelle? Quand donc ainsi seroit (ce qui n'est) que le chef & les membres de l'Eglise Romaine ne feussent pas sains, pour quelque defectuosité de mœurs, laisseroit elle pour cela d'estre saine? laisseroit elle d'estre guidée & conduite par le saint Esprit, que nostre Seigneur luy a enuoyé & donné pour guide? sa doctrine, qui est si ancienne, Ioan. 16.  
Act. 1.  
qui nous a esté preschée & delaissee par escrit, tant par

## P R E F A C E.

luy que par ses Apostres, & par les Peres anciens, & qui nous a esté donnee de pere en fils depuis son Ascension, laisseroit elle d'estre bonne? Et nostre Seigneur

*Math. 18.* lequel a dit, Vbi duo vel tres congregati sunt in nomine meo ibi sum in medio eorum: La où deux ou trois sont assemblez en mon nom, ie suis au milieu d'eux: peut il tellement abandonner son Eglise, qu'il la laisse malade & destituee de la perfection qu'il luy a donné? Loque nous dit (selon le dire de Bias) que la pire part est la plus grande: Or la pire part est celle des mescroians & desuoiez; elle est la plus grande en nombre d'ames: car multi vocati, pauci vero electi: beaucoup sont appelez, & peu sont esleus. Mais il s'ensuit donc qu'il y en a quelque petite portio de vrais fideles & gens de bien: & celle là sera la mellleure part non en nombre, mais pour le moins pour le regard du merite. Et l'integrité & perfection d'icelle fait que l'Eglise Romaine, de laquelle ils sont membres, doit estre reputée pour bonne & saine. Car puis que Dieu

*Gen. 18.* ne perd pas les bons avec les meschants, il ne veut pas aussi que le petit nombre des bons qui sont en son Eglise militante, perde son merite par le grand nombre des meschants: ny que l'Eglise soit reputée mal saine pour la maladie spirituelle qui est en iceux. C'est donc mal conclure à un Dialecticien, La plus part des membres de l'Eglise sont mal sains, partant l'Eglise n'est pas saine, Veu que la santé & integrité de l'Eglise ne despend pas de ses supposts, mais du saint Esprit lequel la conduit, & de sa bonne & saine doctrine qu'il luy a reuelé depuis l'Ascension de nostre Seigneur, lequel a commandé que sa doctrine fut preschee & manifestée par toute les contrees de la terre,



# PREFACE.

quand il dit à ses Apostres, Euntes in mundum  
vniuersum, docete omnes gentes, &c. *Allez par* Math. 28.  
*tout le monde & enseignez toutes nations, pour accom-*  
*plir la Prophetie de Dauid disant : In omnem terram* Psal. 18.  
*exiuit sonus eorum, & in fines orbis terræ ver-*  
*ba eorum, Leur voix s'est estendue par toute la terre,*  
*& leur parolle a retenti par tous les endroits de la*  
*terre.*

Après auoir ainsi descrié l'Eglise Romaine il vient à  
desnigrer aussi la sainte Messe, laquelle est celebree  
par ordonnance d'icelle Eglise. Et compare la Messe aux  
compositions des charlatans & empoisonneurs (voilà  
comment apres sa protestation, il se garde de mesdisan-  
ces & attaques iniurieuses) disant que tout ainsi que  
leurs ordonnances sont bien composées de drogues, de  
simples, & d'ingrédiens salutaires, lesquels neantmoins  
sont autant de poisons pour tuer ceux qui sont si credu-  
les de s'y fier, ainsi ont fait ceux qui ont composé &  
dressé la Messe, par la croyance de diuers articles qui  
s'y remarquent, comme l'appliquants à la remission des  
pechez des viuants & des morts, à la deliurance des  
ames du feu de purgatoire, se mocquant cependant des  
habits & ornemens desquels se sert le Prestre en la cele-  
bration de la Messe, & de toutes les ceremonies que l'on  
garde en icelle, & les appelant ceremonies Pompiliannes  
ou Iudaïques ou d'idololatrie: Voilà comment il se gar-  
de de mesdire, & en semblables propos consiste la plus  
grande partie de son discours, qui est la voye ordinaire  
des heretiques, n'ayans aucune raison de quoy payer, se-  
lon le dire saint Hierosme, *Istæ sunt machinæ hæ-*  
*reticorum vt conuicti de perfidia ad maledicta*  
*ie conferant, & cum foris sint, tamen se nomi-*

*Apol. 3.  
aduer.  
Ruff.*

## PREFACE.


nant Christianos, Les desseins & ruses des heretiques sont telles, que quand leur perfidie est descouverte, ils ont recours aux mesdisances & iniures: & encores qu'ils soient hors de l'Eglise de Dieu, ils veulent estre toute fois reputé Chrestiens. Si Loque estoit homme d'entendement & non passionné en ses opinions particulieres, il deuoit disputer à bon escient contre la chose qui luy deblaist, & non pas l'attaquer d'iniure. Et sus ce qu'il mesdit des habits du Prestre celebrant à l'autel, nous le renuoyons seulement au traitté par cy deuant imprimé à Paris, rue saint Iean de Latran à l'arbre verdoyant chez Richer, en l'annee 1596. intitulé Respōce aux raisons de ceux qui ne veulent participer à la Messe, auquel il verra amplement les raisons de chacun ornement que porte le Prestre celebrant la sainte Messe.

Le lecteur Catholique, notera outre plus la contrariété en laquelle s'est enuelpé ledit Loque en sa preface & susdite Epistre liminaire, protestant premierement de disposer tous ses arguments en bonne forme ou syllogismes: puis disant que tout homme de bonne conscience doit auoir la sainte escriture pour adresse de son arrest, & pour son but la gloire de Dieu, qui sont deux beaux appasts pour gagner les cœurs des simples, lesquels toutes fois en ceste contrariété de Loque, recognoistront ce que dit saint Athanase, Vnaquæ que hæresis sui commenti parentem habet diabolum: scripturam enim vsurpat, & veram sententiam ex ea suffuratur, & intellectu inumbrato errores efficit. In singulis hæresibus iam transfiguratus est diabolus, dictiones subiicit plenas dolo. *Que* chacune heresie a pour pere de son inuention le diable,



## P R E F A C E.

par ce qu'elle se sert de l'écriture, tirant d'icelle des vraies sentences, & desguise la iuste & droite intelligence d'icelles. En toutes heresies il recognoist le diable transfiguré & masqué de beau subiet & pretexte, par ce qu'en toute exposition de l'écriture il met & employe des mots chatouilleux & ne seruaus qu'à tromper. Loué soit Dieu de ce que dès le commencement du liure de Loque ceste contrariété soit descouuerte, pour nous assurer que le reste de sa doctrine ne vaut guere mieux, & qu'il ne faut pas esperer d'auantage de la suite de son dit liure que ce qui s'y est trouué dès son commencement.



### Επίγραμμα.

Α'γνοεῖς λόχον, λοχέε φάπς ὧπνι ἦλθε,  
 Τέννομα ἔσταθμῶ, τέννομα δειγμα νόε,  
 Ἐστὶν ἐνεδρα λόχῳ, λοχόα ἔργω τε λόγῳ τε,  
 Δαιμων αὐτὸς ἔων αὐτῷ ὀπιχθονιῷ,  
 Αὐτὸς δὴ τοκέας πρῶτος πότε ἐξαπάτησεν  
 Ἀγρεσφὰς κήπε ἐξέλασάς τε βίε  
 Αὐτὸς κ' υἱὸν ἐθέλει νῦν σφάλλεμεν ἡμας  
 Πισέῳ ἐκ κελητῆρ, πάτρίδ' ἐκ' ἐλάσαι  
 Ὡδε λόχῳ, λύκῳ ὧδε ὁλῶς ξύμπαντι λοχίζων  
 Ποιμνίῳ ἔδ' ἔτ' ὅσα λοχέε χόλῳ,  
 Ἐδλή φάγε λόχον, λόκον ἐδλή φάγε τε ποίμνη  
 Φάγε ὄρεν πρῶτος ἐξαπατῶντα γονεῖς,  
 Σέμνω μάλλον ἐπέδ' τῷ βερλάτῳ, εἰς ὄρεν οἷο  
 Ευθενὲς αὐτοδοπον εἰς λόχον εἰς τε λύκον.

# IN LOQVÆVM HÆRETICVM, Hendecasyllabi.

**A**ffertor fidei nouæ, nothæque  
Caluini dubio editi parente,  
Quî non esse potes nouus nothusque,  
Quî non vana tibi fides Loquæ?  
Nam qui nuper, aui malâ, receptam  
Cœnam Calue tuam fouet magister,  
Et qui more pio tot hinc ab annis  
Recepta, abnegat eruitque Christi  
Vano non monumenta vana nisu:  
Is tam *νενοβιλ* & nouus nothusque est,  
Cœna quàm noua, quàm nouus nothusque es  
Cœnæ nobilis arbiter nefandæ.

*I. le Vasseur Iur. Vir. licent.*

## *Tralatio seu Paraphrasis precedentium.*

**I**mpuri si fortè recens te fama Loquæi  
Imbuit, hocque hominis quid sit habere velis,  
Despicio in nomen, facilè est de nomine nosse  
Et studium & mores ingeniumque viri:  
Est *λόγ* & insidiæ, quâ ductus voce Loquæus  
Nomine quas monstrat, re probat insidias:  
Lumine qui primùm radians, dein factus Alastor,  
Custodes sacri lusit in angue loci,  
Qui veluti læta deduxit sede parentes,  
Quos hominum primos vidit in orbe dies:  
Hic quoque nec Gallos leuiori fraude nepotes,  
Vel sacris curat vel viduare focis.  
Nempe, Loquæ, dolis instructus & arte Pelasga  
Retia sic placido tendis vbique gregi,  
Et sacrum domini lustras nocturnus ouile  
Ceulupus, accedunt tam *λόγ* & atque *λύκ*.  
At tu grex sincere fidem ne protinus adde,  
Verbis, queis primùm captus vterque parens,  
Pestibus at tantis adhibe tantisque venenis,  
Vnum Burlati certius antidotum.

*Verrebat idem Vasseri.*



## IN LOQVÆVM.

**Q**U<sup>i</sup>(cedò) conueniunt Ridere & Rudere? docte  
 Burlati: Virtus illud tibi, Virus Afello hoc:  
 Huic Laurus lorum, tua Laus fraus, Fama fames huic.  
 MISSAM blasphemus missam facit & Styge damnat,  
 Caluere Calunum cal-VINVM cando refellit:  
 MISSA at missa polo, VERBIS quò mysta remittit,  
 Hæretici cæno cæna est obscæna Loquæi.  
 Ad cytharam heu Asinus! pergat si rudere, ride,  
 Ore Lycambæam restim nec texe deserto:  
 Iam pelle abreptus, Phrygius ceu Marsia, palmæ  
 Vsquè triumphalis claram tibi suggerit ansam.  
 CAR. ROCHÆVS, Ambia. L. I. C.

## ALIVD.

Fædi fragine fidem facerent mala verba Loquæi?  
 Haud fide digna fides finem dans fune sed ardo.  
 Eiusd.

**H**Æc noua diuersis quid tot ceruicibus hydra  
 Pullulat, & rabidum voluit in ore nefas?  
 Quidve iterù stygio toties demersa profundo,  
 Erigit, & varium tollit in astra caput?  
 Num quid vt iniustæ patiatur robora claræ,  
 Diuinumque tuæ sentiat artis opus?  
 Credo equidem: nec enim densas Latonius ymbras,  
 Nec melius nigræ noctis opaca fugat:  
 Quam tua supremo doctrina afflata fauore,  
 Detegit infidis scripta nefanda libris:  
 Erroresque sacra detectos voce refellit,  
 Et necat inuicta monstra cruenta manu.  
 Pro tantis meritis, (magni velut herculis) altus  
 Burlati, æterno nomine, viuet honos.

NIC. GUYETVS. S. A. A. C.

DOCTISSIMO VIRO D. HVGONI  
 BURLATO, Doctōri Sorbonico, & in Ec-  
 clesia Aurel. Theologo, DAVID CHOP-  
 PIN eiusdem Eccleſ. Canon. & in ea Pi-  
 thuerenſis Archidiaconus, necnon in Aurel-  
 curia Senator. S. D.

*Luthera-  
ni.* **I**N nos multa vibrant † inimici ſpicula noſtræ  
*offendū.* *Vt ſtratus iaceat religionis honos:*  
*redunt.* *Nec tamen † officiunt; ſiquidem Burlatus in illos*  
*veram.* *Tela retorquendo, vertere terga facit.*  
*vera.* *Sacra † petunt miſſæ ſolemnia dente canino,*  
*Vincere cum nulla nos ratione queant:*  
*Et † claram certant tenebris inuoluere lucem,*  
*Quæ tamen æthereo purior igne micat.*  
*Hoc ſatis expreſſit noſter Burlatus ad vnguem,*  
*Et † ſanctæ fidei dogmata vera dedit,*  
*Queis tuti, ſummo miſſam generamur honore,*  
*Et noſtra ſæuos pellimus arce lupos.*

Ad Caluiniſtam Diſtichon.

*ſcito tua cœna nihil eſſe obſcœnius, ergo*  
*Conuerſus Miſſam tu venerare ſacram.*





# RESPONSE

## AV LIVRE

### INTITVLE'

*Les vingtdeux Abbus de  
la Messe.*

**E**N premier lieu le Ministre Lo-  
que impute pour erreur à l'E-  
glise Romaine la façon & ma-  
niere de cōmencer la celebra-  
tion d'icelle Messe par les mots extraits du  
Psal. 42. *Et introibo ad altare dei.* Disant, que  
dire ces mots, n'est autre chose que renou-  
ueler la memoire des autels ou sacrifices  
de Numa Pompilius payen, ou resenter la  
pratique des ceremonies iudaïques par  
les autels qui y estoient en vſage: Et que  
l'vſage des autels ne se peut recognoistre  
en la loy Euangelique, comme estant en  
tout differente des ceremonies payennes

## Responce au I.

& iudaïques. Nous accordōs bien qu'il n'y a aucune conuenance entre l'Euangile & le paganisme; comme il n'y a aucun accord entre Dieu & le Diable, entre la recognoissance du vray Dieu & l'idolatrie: Mais dire qu'il n'y ayt non plus de conuenance entre l'Euangile & la loy mosaïque ou iudaïque qu'il y en a entre le mesme Euangile, & le paganisme, c'est trop s'esloigner de verité, attendu que nostre Seigneur mesme declarant la fin de son premier aduenement, a dict, *non veni soluere* Math. s. *legem, sed adimplere*, ie ne suis pas venu enfreindre & transgresser la loy, ains pour l'accomplir & parfaire. Partant ce n'est pas conclure en bon dialecticien, Les autels ont esté en vsage en la loy iudaïque, Dont ils ne sont pas receuables en la loy Euangelique. C'est ce que pretend Loque conclure, cōme disant, Les autels ne sont receuables en la loy Euangelique, Partant pour neant les Prestres de l'Eglise Romaine commencēt leurs messes par ces mots du psalmiste, *Et introibo ad altare dei*. Mais, Tsal. 43. si pour la difference qui doit estre recogneuë entre la loy de Moyse & l'Euāgile, les autels (qui ont esté en vsage entre les Iuifs) ne doiuent estre vsitez en l'Eglise Catho-

lique, Apostolique-Romaine: de mesme consequence nous pourons dire, les dix commandemens de la loy ont esté pour loy aux Iuifs, ils ne doiuent donc point auoir de lieu entre les Chrestiens. Les prieres, les ieufnes, les haires, les penitences, les festes, les abstinences ont esté en vsage entre les Iuifs, & sont declarez expressement en leur loy, & recōmandez de Dieu mesme, partant ils ne doiuent auoir lieu en l'Euangile. Autant en diront les adherents de Loque, des lampes, cierges, & autres luminaires, de la predication de la parolle de Dieu, des orgues, chants & instrumens armonieux, pource que l'vsage en a esté tout commun en l'ancien testament. Brief, ils auront plus d'autorité a resoudre des choses saintes, en abolissant dutout ce qui se peut tirer à edification, de l'ancien testament, que n'aura pas nostre Seigneur mesme qui est venu y adiouster ce qui appartenoit à la perfection d'iceluy, suiuant ce qu'il adict, *scrutaminj scripturas: Ipsa testimonium perhibent de me.* Recherchez les escritures & vous verrez qu'elles donnent tesmoignage de moy, c'est manifestement de l'ancien testament qu'il entend parler. On voit par là le mauuais & foible fonde-

*Ioan. 5.*



## Responce au I.

ment que les heretiques de nostre temps ont pris pour renuerfer ceste maniere accoustumee de commencer la celebration de la sainte Messe en l'Eglise par ces mots, & *introibo ad altare dei.*

*Psal. 41.* Il poursuit plus outre, & dit qu'il ne faut point d'autel materiel en la loy Euangelique,

*lib. 10. de  
ciuit. dei  
cap. 4.  
lib. 7.  
Serm.*

alleguant pour autheurs Sainct Augustin, Sainct Clement Alexandrin, disans que l'autel des fideles est leur cœur ou vne ame sainte: C'est à sçauoir d'autant qu'en vne ame sainte & en vn cœur deuot reside la volonté ou habitude de bien faire. Mais ceste exposition de ce mot, d'autel, (bien que vraye & receuable) est elle bastante pour prouuer qu'en l'Eglise Catholique Apostolique & Romaine il ny faille point d'autel materiel? Il y a en l'Eglise militante deux sortes de sacrifice & deux sortes d'autel. Il y a sacrifice moral par lequel la volōté & intention de l'homme est entierement desdiee à Dieu, par ces mots du

*Psal. 50.*

psalmiste, *sacrificium deo spiritus contribulatus.* Disant, que c'est vn vray sacrifice à Dieu que le cœur contrit & desplaisant de l'auoir offēcé. Et en ceste mesme sorte, l'ame ou le cœur qui est rui en l'amour de Dieu peut estre appellé l'autel de Dieu, c'est à di-

*pretendu abus de la S. Messe.* 3

re moralement. Il y a aussi sacrifice ministerial, cest à sçauoir le sacrifice reel & materiel, lequel doit estre offert à Dieu par le Ministre, expressement choisi & député à cest effect, qui est le prestre sequestre du commun populaire, & dedié au seruice de Dieu & ministere du sacrifice & de l'autel. Or ces trois choses sont inseparablement vnies & coniointes, l'autel, le sacrifice & le Prestre, qui est le sacrificateur. Le premier Prestre de la loy Euangelique est nostre Seigneur, lequel est appelé en l'escriture, *sacerdos in eternum secundum ordinem Melchisedech*: & apres luy les Prestres ont esté les Apostres & Disciples & leur successeurs, auxquels il a dict apres la consecration & communiõ de son precieux corps & sang, *hoc facite in meam commemorationem*, & ces mots, *quorum remiseritis peccata remittuntur eis*. Leur donnant pouuoir sus son vray corps & sang, cest à sçauoir, de le consacrer, de le communier & distribuer à son exemple & imitation. Et sus son corps mistique pareillement qui est son Eglise, par la puissance de lier & deslier les pechez des hommes. Or nous demandons puisque nostre Seigneur est Prestre selon l'ordre de Melchisedech, & a commandé aux pre-

*Psal. 110.*

*Math. 26.*

*L. c. 22.*

*Mar. 14.*

*Ioan. 20.*

## *Responce au 1.*

stres qu'il a institué, & lesquels par succession sont maintenus en son Eglise, qu'ils eussent à consacrer, communier & distribuer à son exemple son precieux corps & sang sous les especes de pain & de vin, n'est ce pas en l'oblation de pain & de vin que sa prestrise se trouue conforme à celle de Melchisedech, puis que l'escriture faict foy qu'il est Prestre selon l'ordre de Melchisedech? Et qui voudroit penser que Melchisedech eut offert pain & vin sans autel? Qui sera aussi si outrecuidé que de desnier que l'oblation de pain & de vin qu'il a faict, aye esté vray sacrifice, & que par consequent l'oblation qui est faicte du vray corps & sang de nostre Seigneur sous les especes de pain & vin soit sacrifice? Car si cela n'est, la verité ne rapportera pas à la figure. Si l'aduersaire est d'accord que Melchisedech aye offert pain & vin en vn autel, & desnie neantmoins que pour cela il soit loisible en la loy Euangelique d'auoir des autels materiels, pource que nostre Seigneur (duquel l'exemple nous est pour loy) n'a pas consacré en vn autel, ains sus vne table, sçauoir eût sus celle mesme en laquelle il auoit pris sa refection, & mangé l'agneau paschal avec ses Apostres, ne



descouure il pas ou sa meschanceté, ou sa lourdisse d'esprit : disant, que l'Eglise ne doit point vser d'autel, puis que nostre Seigneur en sa consecration n'en a point vsé? Voudroit il point dire que nostre Seigneur voulant consacrer deuoit preallablement en toute diligence bastir vn autel pour n'estre en rien discordant de la figure recongneüe au sacrifice de Melchisedech, ou bien qu'il faut consacrer à son exemple & imitation, sus vne table, sans auoir esgard au sacrifice de Melchisedech? c'est trop controller l'action de nostre Seigneur, & trop temerairement limiter l'autorité & puissance de l'Eglise, dire qu'elle n'a deu introduire l'usage des autels pour la bienfiance qui est requise en la celebration d'vn si hault mistere, à cause que nostre Seigneur mesme n'en a pas vsé. Il n'a ny defendu, ny empesché, ny improuué l'usage de l'autel, veu que tant de fois qu'il a esté au temple de Hierusalem, il n'a pas ignoré qu'il y eut vn autel. Il a laissé beaucoup de choses à la liberté & puissance de son Eglise, lesquelles il n'a voulu décider en presence de ses Apostres, ne les trouuant pas capables de ses secrets. Et a bien voulu (pour l'aduancemēt de son Eglise, & pour

*Responce au 1.*

la reuerence deuë à ses misteres) que ce qu'il pouuoit de sa part manifester & rendre clair auant son Ascension, soit demeuré incogneu à ses Apostres, pour estre descouuert avec longueur & succession de temps, afin que l'homme recogneut que le Sainct Esprit opere tousiours, & que par les choses obscures qui se descouurēt tous les iours, il se monstre conducteur de l'Eglise. Les Hebreux (comme remarque Sainct Hierosme) tiennent que Melchisedech estoit Sem, fils aîné de Noë, & qu'il a duré iusques au temps d'Isaac fils d'Abraham: & tiennent d'auantage que les aînez de la race de Noë ont eu la prerogative de la prestrise par dessus tous leurs freres iusques au temps de Aaron frere de Moyse. Or l'escriture nous certifie que Noë leur pere incontinent apres que le deluge fut cessé, bastit vn autel & sacrifia à Dieu en action de grace: ce qui rend probable nostre dire, que les enfans & successeurs de Noë lesquels ont esté honorés de la prestrise, n'auront voulu negliger l'exemple de leur pere Noë, & qu'à son imitation, en leurs sacrifices ils ont retenu l'usage des autels. La raison est (selon Sainct Augustin) l'autel visible signifie spirituel-

*quest. seu  
tradit.  
hebr. in  
gen.*

*Gen. 8.*

*to. 4.  
lib. 1. de  
ser. do.  
in monte.*

*pretendu abus de la S. Messe.* S

lement la foy inuisible de l'homme, d'autant que tout ce que l'homme peut offrir à Dieu, ne luy peut agreer, s'il ne procede d'une pure, vraye & sincere foy ; soit prophetique, doctrine, oraison, hymne, psalme, ou autre chose quelconque. Et les heretiques (comme dict le mesme authœur) en ce qu'ils n'ont point, & ne veulēt point d'autels, ils monstrēt qu'ils n'ont point la vraye foy & religion, & que en leur bouche ils n'ont que des blasphemes en lieu de louange qu'ils deuroient rendre à Dieu, comme gēs trop adōnez à leurs opinions, & ayans ataché leurs vœux en terre, & en tout ce qui est de la terre. Et si le tesmoignage de la foy est l'autel materiel, nous ne devons pas (en tāt que Chrestiens) avoir moins de foy en la loy Euangelique à nostre Iesus Christ, qu'en ont eu au vray Dieu les peres anciēs tant de la loy de nature que de la loy mosaïque. Pourquoi n'aurons nous pas l'usage des autels en l'oblation & sacrifice ordinaire du corps & sang de nostre Seigneur, comme l'ont eu les anciēs en leurs sacrifices qui n'estoient que l'ombre ou figure d'iceluy ? Venons donc au fillogisme de nostre dialecticien Loque, ennemy des autels. Il dict, Ibid.



## *Responce au 1.*

Nul sacrifice spirituel n'a besoin d'aucun autel materiel & visible.

Tous les vrais sacrifices des Chrestiens sont spirituels.

Parquoy nul vray sacrifice des Chrestiens n'a besoin d'aucun autel materiel & visible.

Nous tenons la maieure ou premiere proposition pour faulse, par tous les sacrifices anciens, lesquels pour estre spirituels ne laissoient pas de se faire ez autels materiels. Si donc le sacrifice spirituel est materiel comme est celuy du precieux corps & sang de nostre Seigneur, duquel la matiere est le pain & le vin, & la forme est ez paroles de la consecration, faut il dire que en tant qu'il se faiët en memoire de la passion ou oblation sanglante de nostre Seigneur, il soit puremēt spirituel & non materiel? Et s'il n'est materiel, en quoy se trouuera il correspondant au sacrifice de Melchisedech, duquel la matiere estoit le pain & le vin? Quand à la mineure ou seconde proposition du mesme sillogisme, elle est captieuse, & est couuee & esclose en vn esprit maling. Car en ce qu'elle dict, *tous les vrais sacrifices des Chrestiens sont spirituels*, elle suppose deux faulsetez. La premiere,

que les Chrestiens aient quelques sacrifices inuentez en leur cerueau & non ordonné de Dieu. La seconde que les sacrifices spirituels ne puissent estre materiels & visibles, en quoy Loque semble ignorer qu'en toute composition soit requise la matiere & la forme; Or le Caluiniste n'ignore point que tout sacrement doive auoir sa matiere & sa forme, comme (pour exemple) la matiere du sacrement du baptesme est l'eauë, la forme est en ces mots, *ego te baptizo in nomine patris & filij & spiritus-sancti*. Ainsi en ce sacremēt du precieux corps & sang de nostre Seigneur, la matiere est le pain & le vin qui est preparé pour la consecration; & la forme est & consiste ez paroles sacramentales. De traiter icy ceste question si l'eucharistie est sacremēt, ce seroit chose superflue, attendu que l'aduersaire ou Caluiniste ne le debat point, ains en a esté tousiours d'accord avec nous: Partant, à ce beau sillogisme par lequel le Dialecticien Loque a tiré de deux propositions faulses, vne conclusion de mesme estoffe, nous opposerons cestuy cy pour maintenir la doctrine des autels cōtre nos nouveaux Euangelistes.

Tout sacrifice visible & materiel (bien

## Response au 1.

que spirituel) se peut & se doit faire en autel visible & materiel.

Le sacrifice du precieux corps & sang de nostre Seigneur est visible & materiel.

Il se peut donc & se doit faire en autel visible & materiel.

La mineure ou seconde proposition se preuue par l'action de nostre Seigneur, lequel pour consacrer, print du pain & du vin visible & materiel.

L'aduersaire dira que ceste consecration n'est sacrifice, & partant que nostre syllogisme procede d'une supposition faulse.

Mais nous luy demandons toute oblation n'est elle pas sacrifice? Or est il que ceste consecratiõ est vne oblation, laquelle se faiet & se fera iusques à la fin du monde en memoire de l'vnique & sanglante oblation de nostre Seigneur en la croix: & c'est ceste oblatiõ laquelle est appellee en Daniel Prophete, *iugè sacrificium*, le continual sacrifice, & de laquelle il est dit en Malachie Prophete, *A solis ortu vsque ad occasum magnum est nomen meum in gentibus, & in omni loco sacrificatur, & offertur nomini meo oblatio munda, quia magnum est nomen meum in gentibus, dicit dominus exercituum.* Depuis le Soleil leuant iusques au Soleil

Dan. 8.  
& 11.

Mal. 1.



*pretendu abus de la S. Messe.* 7

couchant, mon nom est grand entre les Gentils, & en tout lieu est sacrifiée & offerte à mon nom vne oblation nette, pource que mon nom est grand entre les Gentils, dict le Seigneur des armées. Nous demandons, quelle est ceste oblation si generale, qu'elle est offerte vniuersellement à Dieu entre les Gentils? ce n'est pas le mesme sacrifice de Melchisedech: ce ne sont pas les sacrifices de la loy mosaïque: ce n'est pas aussi la cene de nos nouueaux Euangelistes, d'autant que estant couuée & esclose à Geneue, elle ne s'est esté due qu'en fort peu de places en l'occident, & n'a encores faict son entree en l'orient, où neātmoins la Sainte Messe en laquelle est offert le sacrifice continuel duquel il est fait mentiō ez susdits passages de Daniel & de Malachie (c'est à sçauoir le sacrifice non sanglant du precieux corps & sang de nostre Seigneur) a eu, & a encores à present le cours, mesme au milieu des Turcs ennemis iurez de la Chrestienté, & aura encores le cours continuellement iusques à la fin du monde, & ne luy est apportee aucune cōtradiction sinon de la part des avant-coureurs ou ambassadeurs de l'Antechrist, lequel (comme dict saint Paul) *iam* <sup>2. Thessal.</sup> <sub>2.</sub>

## Responce au 1.

*ibid.*

*Math. 15.*

*operatur iniquitas misterium*, demonstre déjà par ses œuvres le secret de son iniquité. En quoy nous recognoissons deux marques de l'œuvre de Dieu en la Sainte Messe, à la confusion de la nouveauté que veulent introduire les Calvinistes par leur cene, sçavoir est la continuation de la messe, laquelle a eu tousiours le cours entre les Chrestiens depuis sa premiere institution, & la generalité d'icelle : d'autant que c'est ce sacrifice qui devoit avoir lieu en l'orient & en l'occident, & par tout entre les Gentils, selon que Dieu a reuelé au Prophete Malachie: Ces deux conditions manquent en la cene des Calvinistes, & partant nous font cognoistre qu'elle est de l'invention des hommes, & non instituee de Dieu. Or toute plâte laquelle n'est plantee de Dieu doit estre arrachee & mise au feu, comme dict nostre Seigneur, qui est vn passage duquel les nouveaux Euangelistes doiuent sçavoir quel fera leur iugement, puis que ils contredisent l'institution de nostre Seigneur, tant en la doctrine du sacrifice que de l'autel :

L'aduersaire dict, nostre Seigneur n'a pas celebré ce mystere sus vn autel, aussi n'ont pas fait ses Apostres, partant l'Eglise n'a

deu se seruir d'aucun autel en la celebra-  
tion de ce mystere. A quoy nous respon-  
dons que nostre Seigneur pour vne seule  
action a fait ce qui estoit plus necessaire,  
sans limiter ceste circonstance d'autel; se  
contentant de l'institution, & reseruant à  
la disposition de son Eglise, les moyens  
d'aduiser ce qui se pouroit trouuer de plus  
propre pour la bien seance & conuenan-  
ce & honneur de ce saint mystere. Et l'E-  
glise comme iugeant qu'il faut mesme par  
les Apostres faire distinction des choses  
sainctes & des prophanes, a aduisé qu'il  
falloit que le lieu de ceste consecratiō fut  
different d'avec la table des viandes com-  
munes & profanes, aussi bien en la loy E-  
uangelique qu'en la loy mosaïque, d'autāt  
que la verité ne merite pas moins de res-  
pect que l'ombre ou figure. Et mesme no<sup>r</sup>  
voyons qu'en la primitiue Eglise, Saint  
Mathieu Apostre & Euangeliste a celebré  
ce saint mystere en l'autel, où il fut occis  
pour le tesmoignage qu'il rendoit à no-  
stre Seigneur, ce qu'il n'a fait de son seul  
aduis, ains ayant communiqué avec les  
autres Apostres, lesquels tous d'un con-  
sentement ont déterminé des choses qu'il  
conuenoit offrir à l'autel, supposants par

*Can. 3. &  
4. Apost.*

*Mal. 1.*



## *Responce au I.*

*Dan. 8.* cela que l'oblation se deuoit faire à l'autel,  
*Ch. 11.* & par consequent ce sacrifice, qui est ceste oblation de laquelle il est faict mention au susdict passage de Malachie, & ce sacrifice continuël que nous auons allegué de la prophetie de Daniel; qui sont passages desquels le Lecteur recognoistra, que quiconque n'ye l'vsage des autels entre les Chrestiens, est ennemy de la doctrine des Prophetes & des Apostres.

Nous laissons les questions friuoles que faict le susdict Loque, comme indignes de responce; d'autant que ou elles procedent d'une pure ignorance de la distinction qui doit estre recogneuë entre les lieux sacrez & profanes aussi bien en la loy Euangelique qu'en la mosaïque, ou d'une malice deliberee & ordinaire entre les heretiques, qui est de penser auoir emporté la victoire quand ils se sont bien & au long moqué & raillé des saintes institutiōs de l'Eglise, troublans les esprits des simples, & les hazardans à leur erreur par vne multitude de folles questions & curieuses, sans s'arrester à aucune decision qui en ait esté faicte par l'Eglise, ce qu'ils font ordinairement tāt en leurs escrits qu'en leurs disputes.

Je viens au second & troisieme abus  
pretendu

tendu par Loque en la celebration de la  
saincte Messe.

*Nullité du 2. & 3. pretendu Abus.*

**L** trouue estrāge que le Prestre s'ap-  
chant de l'autel pour celebrer la sain-  
cte Messe, faict sa confession, disant *ego*  
*reus & indignus sacerdos, &c.* Et là il met  
ladite confession en latin & en françois  
selon sa forme & teneur.

Et pour se mocquer de ladite cōfession;  
& de ceste loüable coustume de l'Eglise,  
laquelle commence la celebration de ce  
haut mistere par la confession, il reco-  
gnoist que les Prestres ont en vsage deux  
sortes de confession: L'une secrete & au-  
riculaire laquelle ils font en l'oreille l'un  
de l'autre, & apres laquelle ils se donnent  
absolution l'un à l'autre; comme aussi par  
ce moyen mesme ils entendent les con-  
fessions du peuple, & apres icelles luy  
donnent l'absolution, sans toutesfois la  
receuoir reciproquemēt d'iceluy; & tient  
que ceste sorte de confession a esté intro-  
duite en l'Eglise par le Pape Innocēt tiers  
enuiron l'an 1200. L'autre confession (dit  
il) est publique & generale, laquelle le  
Prestre qui chante la Messe faict publique-  
ment, & prend l'absolution de son Diacre

*Response au 2<sup>e</sup> & 3.*

ou Clerc quiluy ayde. C'est de ceste cy dōt il est question en ce *Confiteor*.

Voy ons en ces propos du Ministre Loque les œuures du pere de mensonge & d'iniquité. Il recognoist que la confession auriculaire est en vsage en l'Eglise Catholique Apostolique Romaine, soit entre les Prestres mutuellement, soit entre les prestres & le peuple. Il ne l'approuue n'y reiette, Mais il dit simplement quel est en vsage en l'Eglise. S'il a pris garde au Leuitique où il est defendu au Prestre d'entrer au sanctuaire ou de se presenter à offrir le sacrifice, s'il n'est preallablement lauë & purgé, il recognoistra que ce lauement & purgation se rapporte au lauement & purgation de l'ame, par laquelle quiconque se presente à la communication des choses saintes & sacrees, soit le Prestre ou la

*Leuit. 16.*

*lib. 1. pra-  
par. enan.  
2. 3.*

personne laïque doit estre preparé, auant que s'en approcher. Et de faict nous lisons en Eusebe qu'il falloit pour expiation du peché, que quiconque auoit offensé se transporta ( tout affaire laissé & postposé) au lieu esleu & déterminé par l'ordonnance de Dieu, pour offrir son sacrifice, & après auoir declaré son peché il offroit pour iceluy vn mouton immaculé. Et ain-si le Prestre prioit Dieu pour luy pour la



remission de son peché. Car Moyse ne remettoit iamais le peché à celuy qui auoit offensé par contrainte ou par ignorance, que preallablement il n'eut declaré son peché. Et à ceux qui auoient offensé de propos delibéré & de certaine malice, il ordonnoit de grandes peines pour les retirer par ce moyē de leur peché. Et Sainct Iean Baptiste ne receuoit personne à son baptisme que preallablement il n'eut fait cōfession de ses pechez. Ce qui nous assure qu'en l'ancien testament la confession auriculaire estoit pratiquée. Et n'a esté moins pratiquée en la primitiue Eglise du temps des Apostres & mesme depuis, attendu que Sainct Iacques en son epistre canonique dict, *confitemini alterutrum peccata vestra*, confessez vos pechez les vns aux autres, c'est à sçauoir les Prestres les vns aux autres, & les Lâis aux Prestres auxquels seulement nostre Seigneur a dict, *quorum remisseritis peccata remittantur eis*, & *quorum retinueritis, retenta sunt*, ceux desquels vous aurez remis les pechez, ils leurs sont remis, & ceux desquels vous les aurez retenu, ils leurs sont retenus. La raison est (comme dict sainct Augustin) Dieu veut que nous nous confessions, non qu'il

*Matt. x*

*Iac. v.*

*Iean 10.*

*Aug. 10.  
de ser. in  
temp.*

*Responce au 2. & 3.*

» soit ignorant de nos pechez, mais à celle  
» fin que le diable entendant nostre confes-  
» sion sçache que nous sommes desplaisans  
» d'auoir offensé, & qu'il voye par nostre  
» contrition & par nos larmes, qu'il n'a plus  
» de puissance de nous accuser. Dieu veut  
» que nous nous confessions, le diable veut  
» que nous taisions & cachions nostre pe-  
» ché; auquel des deux obeyrons nous ?

Par cemoien, Loque ne peut nier que  
l'vsage de la confession auriculaire ne soit  
bien ancien. Partant, qu'ainsi soit qu'il ne  
le desnie pas absolument, pour le moins  
il adhère avec le pere de mensonge, en ce  
qu'il dict qu'elle a esté introduite par le  
Saint pere Innocent troisieme environ  
l'an 1200. Car il se trouue esloigné de son  
compte, de douze cens ans pour le regard  
de la loy Euangelique, puis qu'ainsi est  
qu'elle a esté pratiquée en la loy mosaï-  
que, & par Saint Jean Baptiste, & qu'elle a  
touours eu lieu en la loy Euangelique,  
en laquelle elle est au lieu du lauement &  
purgation qui estoit anciennement requi-  
se au Prestre quand il se deliberoit d'offrir  
son sacrifice. Or si telle preparation estoit  
requise au sacrifice de la loy figuratiue, &  
mesme ceste cōfession presuppōsee (com-

me auõs prouué cy dessus) il semble qu'à plus forte raison elle doit venir en vsage en la loy de verité, en laquelle est offert le sacrifice du corps & sang de nostre Seigneur qui estoit figuré par les sacrifices & oblations de l'ancienne loy.

Il diët en apres qu'il y a vne autre confession publique & generale laquelle se faiët publiquement: La raison se tire de l'escriture laquelle diët, *iustus in principio sermonis accusator est sui.* *Prou. 16.* Que le iuste commence son propos par l'accusatiõ de soy mesme. Dont le Prestre qui veut celebrer ce sainët mistere, se confesse avec son assistance, recitant preallablement ce psalme *Iudica me deus,* &c. Par lequel le Prestre *Psal. 42.* requiert Dieu le createur de le sequestrer d'avec les pecheurs, & le deliurer de la puissance des meschants, afin que dignement & librement il puisse entrer à l'autel & offrir son sacrifice.

Or en ceste sorte de confession Loque s'abuse estrangement, disant qu'apres icelle confession generale & publique, le Prestre prend l'absolution de son Diacre ou du Clerc qui luy ayde. La chose est telle; Le Prestre concludant ceste confession publique par vne priere qu'il adresse à son



*Responce au 2 & 3.*

assistance, la requerāt de prier Dieu pour la remission de ses offences; l'assistance faiēt priere à Dieu à ceste fin, & puis apres elle faiēt ceste mesme confession publique, en fin de laquelle elle prie reciproquement le Prestre de requerir Dieu, luy departir sa misericorde, & luy pardonner ses fautes pour participer plus dignement & communiquer au mesme sacrifice que pretend offrir le Prestre, ce que le Prestre ayant requis à Dieu, il donne absolution à son assistance; mais il ne la prend pas pour lors d'aucun, & n'en prend autre que celle qu'il a eu apres sa confession particuliere. Car, quelle apparēce y a il qu'il print l'absolution de son Diacre ou de son Clerc, veu que (comme nous auons dict cy dessus) la puissance de lier & delier est affectee particulièrement aux Prestres, & non aux Diares ou Clercs, & encores moins aux personnes laïques? En cela donc est tout euident l'abus pretendu par ledit Loque, contre le Prestre celebrant la sainte Messe, par lequel il luy impute trop inconsiderément qu'apres sa confession generale à l'entree de l'autel il prend l'absolution de son Diacre ou de son Clerc.

En apres il trouue estrange que le Saint

Pere Damase premier qui fut le 38. Pape apres Sainct Pierre, ait ordonné que ceste sorte de confession fut faicte au commencement de la Messe enuiron l'an de nostre salut 368. Attribuant outre plus ceste institution au Pape Pontian qui fut le 18. apres Sainct Pierre. Disant que ceste antiquité ne peut seruir de fondement à ceste pratique de l'Eglise: D'autant que ceste maniere de confession estoit faite par les anciens idolatres Romains, & nommement par les sacrificateurs de Numa Pompilius, lesquels (selon le recit d'Alexander ab Alexandro ) se purgeoient leur conscience par vne confession qu'ils faisoient à leurs dieux & deesses, auât que se presenter à leurs sacrifices, & que sans ceste confession leur sacrifice ne pouuoit estre celebré. L'argument que Loque tire de ceste coustume des payens pour improuuer ceste loüable institution & pratique de l'Eglise, nous le prendrons pour confirmation d'icelle, à la confusion des sectaires qui s'efforcent de la blasmer. Car si les Payens ont tant honoré leurs faux, abominables & superstitieux sacrifices qu'ils offroiēt à leurs faux Dieux, qu'ils ont estimé ne les pouuoir offrir dignement sans

*lib, 4.  
c. 37.*

*Responce au 2. & 3.*

prealablement faire vne cōfession à leurs  
pretendus Dieux & Deesses. Il semble  
biē estre raisonnable que le Prestre Chre-  
stien qui se delibere d'offrir à Dieu cest  
excellent sacrifice qui a esté preueu en Es-  
prit par les Prophetes de l'ancien testa-  
ment, & predict par les figures anciennes,  
sçauoir est du precieux corps & sang de  
nostre Seigneur, se purge sa conscience  
par la confession auriculaire auant que se  
presenter à l'autel, & qu'en se presentant  
à l'autel, tant pour sa seureté, que pour l'e-  
xemple de son assistance, qu'il face ceste  
confession publique pour suppleer les  
defaults qui pouroient rester en son ame,  
par la fragilité humaine, laquelle ne peut  
delaisser l'homme viuant. Et s'il ne le fai-  
soit, veu que ( comme nous auons dict)

*Prou. 18.* *Le iuste, dez le commencement de son propos se  
doit accuser soy mesme, il deuroit craindre  
que nostre Seigneur ne luy dict, Iustifica-  
buntur gentes exte : Les Payens seront iusti-  
fiés au regard de toy.*

Sus le subiect de ceste confession, Lo-  
que demande *pourquoy le Prestre faisant ce-  
ste confessiō generale. & publique s'encline bien  
humblement.* A quoy nous luy respondons,  
*Que le Prestre par ceste inclination represente*



*pretendu abus de la S. Messe.* 13

la profonde humilité de nostre Seigneur Iesus-Christ, en laquelle il a voulu recevoir la circonsion qui se donnoit en signe du peché originel, duquel neantmoins il estoit exempt. Et partant combien que lors le Prestre doive estre sans peché, il doit toutesfois confesser estre pecheur, d'autant que par ceste confession il confesse aux assistants que nostre Seigneur Iesus-Christ qui est le commencement, l'origine & la plenitude de toute sainteté, n'a point desdaigné pour l'amour de nous se monstrier comme pecheur.

Sus ceste responce est à considerer la belle protestation de Loque, lequel en son epistre liminaire a protesté ne vouloir vser d'aucune mesdisance ny attaque injurieuse, d'autant que il calomnie ceste raison en laquelle auons dict que *lors que le prestre se presente à l'autel pour celebrer la Messe, il doit estre sans peché, & dict que c'est par finesse que nous employons ceste raison, c'est à sçauoir, affin que le peuple ayât ceste persuasiō ne se recule point de l'ouye de la Messe, attendu mesme que les saints canons (qu'il appelle les canons des Papes) defendent aux Prestres de se presenter à l'autel estants en peché, suyuant l'écriture, laquelle dict, sacerdos in quo fuerit macula non accedet offerre oblationes domino.*

*Leuit. 21.  
1. 7. 1.  
sacerdos  
103.*

### Responce au 2 & 3.

que le Prestre qui a en soy quelque macule, c'est à dire quelque peché ne se doit presenter à offrir aucune oblation ou sacrifice à Dieu. Alleguant mesme le canon *Præter*, du Pape Alexandre second, lequel defend d'ouyr la Messe du Prestre concubinaire, & le canon du Pape Gregoire septiesme, *Si qui sunt*, lequel defend l'entree de l'Eglise aux Ecclesiastiques concubinaires. Ce qu'il allegue à dessein, sçavoir est pour en tirer vne mauuaise conclusion: Car il conclud de ces deux canons en mespris des Prestres & de la Messe, qu'il y a fort peu de Prestres qui puissent consacrer & celebrer la Messe, & que fort peu de personnes la peuuent ouyr sans encourir l'excommunication. Et voilà comment selon sa belle & feinte protestation il s'abstient de mesdire. En quoy toutesfois, pour ne laisser passer telles mesdisances sans responces, nous luy dirons que la puissance de consacrer ne despend pas du merite du Prestre, mais du pouuoir qui luy est donné par nostre Seigneur; & que le merite de ceux qui assistent à sa Messe ne despend pas de l'estat de la conscience du Prestre qui la celebre, mais de la bonne intention &

deuotion qu'ils y apportent.

En apres il trouue estrange qu'en ceste confession publique le Prestre se confesse non à Dieu seul, mais aussi à la Vierge Marie, aux Saints morts, & aux viuans assistans à la messe.

Il ne peut blasmer la confession laquelle se faiët à Dieu. Mais bien pretēd il blasmer celle qui se faiët aux saincts & aux assistans: Partant c'est à ces deux derniers qu'il nous faut arrester. Cōsiderons donc les qualitez differentes des vns & des autres, & en ce faisant nous trouuerons que ceste façon de se confesser à l'entree de l'autel n'est point estrange, ains louiable, voire necessaire pour bien commencer la celebration de ce sainct & excellent mystere. Premièrement ce sacrifice requiert vne si grande pureté en son sacrificateur qui est le Prestre (comme nous auons dict cy dessus) que si elle se pouuoit encores trouuer plus grande que nous ne la pouuons pas penser, nous ne la deurions pas estimer digne d'estre comparee à la pureté de celuy qui est offert en la messe, c'est à sçauoir de nostre Seigneur Iesus-Christ. Partant ceste confession que faiët le Prestre à Dieu, n'est que bien faiëte; d'autant



Responce au 2.<sup>e</sup> & 3.

que par icelle il confesse ne pouuoir dignement s'approcher de ce saint mystere à cause des diuerses manieres d'offencer qu'il a fuiuy, qui sont celles du cœur, de la bouche où parole, & de l'œuvre, qu'il exprime luy mesme en ceste confession publique,

Quand à la confession que le Prestre fait à la Vierge Marie & aux Saints morts, (comme il dict) viuants toutefois selon Dieu, & attendants la resurrection des corps. Elle est plus que raisonnable: Car se confessant à eux il entre en comparaison de l'insuffisance & defectuosité qu'il recognoist en soy, avec la grande pureté de laquelle les Saints ont seruy Dieu en ce mode, pour estre par icelle (avec la grace de Dieu) paruenus à la iouissance de la gloire où ils sont, ce qui fait que pour s'efforcer de suppleer par son humilité le defaut qui accompagne son infirmité, il dict au commencement *ego reus & indignus sacerdos*, Moy Prestre coupable & indigne. Dont tout ainsi comme se confessant à Dieu il a recours à sa misericorde, ainsi aussi par la confession qu'il fait aux Saints, il a recours à leurs prieres: bien que Loque & ses semblables se moquent

de la priere que les viuants esperent des Saints , & que ce soit vn de leurs lieux communs pour se moquer de la croyance de nostre Eglise.

Outre ce, chacun peut sçauoir comme nostre Seigneur a dict à ses Apostres, *vos qui secuti estis me sedebitis super sedes duodecim* *Math. 19.*  
*indicantes duodecim tribus Israel.* Vous qui m'avez fuiuy, vous serez assis au iugement sus douze sieges, iugeants les douze lignees d'Israël. Ce que l'escripture expose generalement de tous les Saints & nom des douze Apostres seulement: Comme aussi de toutes nations & peuples, & non seulement des douze lignees du peuple d'Israël. D'autant qu'elle dict, *indicabunt sanctinationes*, *Sap. 3.* les Saints iugeront les nations, c'est à sçauoir par comparaison de leur sainteté avec le peché du monde.

Or sur ces passages de l'escripture nous demandons, si le criminel qui est présenté deuant le Iuge, n'attire pas sus soy vn iugement de condamnation quant il desnie absolument auoir offensé: Car en desniant son offence il renuoye ses parties & le iuge à la preuue, & la preuue faicte, la condamnation ensuit. Et mieux vaudroit à l'accusé implorer la misericorde que

*Responce au 2 & 3.*

desnier son offence. Le Prestre donc lequel se iugeant pecheur, confesse que les Saincts luy peuuent estre fauorables en recognoissant en soy sa faute par la comparaison qu'il faict de l'estat de sa misere à leur beatitude, de sa condition de criminel à leur condition de Iuges, les reclame & inuoque à son ayde, non pas comme esperant son pardon d'iceux, comme auteurs de la remission des pechez, mais comme esperant la misericorde de Dieu par leur intercession, attendu que pouuant estre iugé & condamné par la sainteté d'iceux, comme ont esté les habitans de Sodome par l'innocence & sainteté de Loth; par la priere qu'il leur adresse en ceste confession il pretend les rendre intercesseurs & mediateurs enuers Dieu pour la remission de ses fautes & supplement de son infirmité.

Et quand aux assistans aussi ausquels le Prestre se confesse (selon qu'il se trouue par la forme de la mesme confession publique) il ne faut penser qu'il le face pour les recognoistre auteurs de la remission de leur peché, attendu que cela conuient à Dieu seul, ny aussi pour leur demander pardon, d'autant que cela se doit faire en



particulier en cas de peché particulier ou secret : ioint aussi qu'il se peut faire que le Prestre qui celebre n'ait offensé en particulier ny autrement aucun de son assistance: Mais il le fait suyuant l'escriture laquelle dict, *orate pro inuicem ut saluemini*, <sup>1ac. 5.</sup> priez les vns pour les autres afin que vous soyez sauuez. Ce qui est tout apparent par la fin d'icelle confession en laquelle il prie les assistans de prier Dieu, pour luy impetrer la misericorde de Dieu. Et outre, par ceste forme de cōfession il fait entendre aux assistâts, que si luy qui est sequestré du mōde par sa profession, & qui s'est préparé à offrir ce sacrifice à Dieu, se reconnoist pecheur, & donne preuue de ceste reconnoissance en les requerant d'employer leur prieres pour luy; à plus forte raison eux qui sont ordinairement avec le monde remply d'iniquité, voulans participer à l'oblation qu'il pretend faire & à ses prieres, s'en doiuent reputer indignes, & faire pour leur regard ceste mesme confession, en la fin de laquelle (en ensuyuant le susdict conseil de l'escriture) ils le requierent reciproquement de prier Dieu, la Vierge Marie, & les Saincts pour la remission de leurs fautes; c'est à sçauoir

### Responce au 2. & 3.

Dieu comme seul authœur d'icelle remission, & la Vierge Marie & les Saints comme intercesseurs & mediateurs des pecheurs enuers Dieu. Et à ceste intention l'Eglise mere spirituelle des Chrestiens a ordonné ceste forme de confession de la part du Prestre & de son assistance.

Pour neant donc s'est extranagué Loque en cest endroit, à rechercher diuerses sortes de confession en l'escriture, pour dire que celle cy de laquelle l'Eglise vse en commençant la Messe, c'est à sçauoir tant les Prestres que les assistās qui sont disposez à ouyr sa messe, ne s'y trouue aucune-ment. Car la conclusion negative qui se tire de l'escriture n'est receuable, bien l'affirmative. Car qui diroit, l'escriture dict telle ou telle chose, elle est donc vraye, il concludroit bien: Mais dire, telle chose n'est point en l'escriture, partant elle n'est pas vraye, il concludroit mal: Car ce seroit supposer qu'il n'y auroit rien de vray que ce qui se trouueroit expressement en l'escriture. Ce que estant, que deuiendroient les traditions escrites ou non escrites auxquelles toutesfois Sainct Paul obligeoit les Chrestiens? Et puis que Tertullian nous dict, *Patrocinium scripturæ disciplina christia-*

2. Tes-  
sal. 2.

lib. de co-  
rona mil.

*christiana est*, que le support de l'escriture est la discipline chrestienne, faut il improuver en la discipline chrestienne tout ce qui ne se trouue expressement en l'escriture, & dire que tout article de la discipline chrestienne qui n'est disertement exprimé en l'escriture n'est receuable entre les Chrestiens? Ce n'est donc pas bien conclure à Loque, Ceste forme de confession ne se trouue aucunement en l'escriture, Partant elle n'est receuable. Et voilà comment les conclusions des dialecticiens preiudiciēt du tout à la croyance & à la discipline des Chrestiens, d'autant que (comme dict Sainct Gregoire Pape) *fides non habet meritum, cui humana ratio præbet experimentum*. La foy n'a point de merite quand elle est appuice de la raison humaine.

*homil 26.  
in Euang.*

Au surplus ce n'est merueille si l'ennemy de la confession particuliere ou auriculaire, & de ceste confession publique, se debat de ce qu'il ne la trouue point disertement exprimee en l'escriture. Car puis qu'ainsi est que la confession est vne partie de penitence, & l'heretique est ennemy de la penitence, comment pouroit il approuver la confession en desniant ou



*Responce au 2. & 3.*

*Homil. de  
pastori-  
bus.* improuuant la penitence ? Or desnier la  
penitence c'est vne chose fort conuenable  
aux heretiques, lesquels (comme dict  
Saint Augustin) se ventent d'estre  
*M. st. 28.* Chrestiens & Catholiques, & toutesfois  
en ce qu'ils ne veulent point de penitence  
contreuiennent à l'ordonnance de nostre  
Seigneur, lequel a commandé de prescher  
penitence à toutes nations & peuples, &  
de baptizer. Et qui doubte que quicon-  
que empesche & desnie ce que nostre  
Seigneur a ordonné estre publié, soit indi-  
gne de porter le tiltre de Chrestien & Ca-  
tholique.

Or nous nous arrestons sus deux autho-  
ritez des Peres qu'allegue nostre Dialecti-  
cien Loque pour improuuer ceste cōfes-  
sion publique, voire mesme la confes-  
sion auriculaire, laquelle ne luy desplaist  
pas moins.)

*Lb. 80.  
confes.  
cap. 2.* La premiere est de Saint Augustin, dict  
il, lequel en ses confessions tient ce langa-  
ge, Quay-ie affaire des hōmes qu'ils oyēt  
mes confessions, comme s'ils deuoient  
guerir mes langueurs ! Ceste sentence se-  
roit fort fauorable à Loque pour le re-  
gard de l'authorité qu'a Saint Augustin  
entre les Peres & Docteurs de l'Eglise, si

elle estoit de luy. Mais iamaïs elle ne fut de luy. Au contraire en la fin du premier chapitre du liure allegué, il dict, Je veux accomplir la verité en me confessant à vous, Seigneur Dieu : mais par mon escritic me cōfesscray en presence de beaucoup de tesmoins. Et affin qu'on ne pense point que nous imposions à Sainct Augustin, nous alleguerons ses propres termes: Car apres ces mots, *ecce enim veritatem dilexisti, quoniam qui facit eam venit ad lucem* : Vous aymez la verité (Seigneur Dieu) pour ce que celuy qui l'accomplit parvient à la vraye lumiere: Il dict, *volo eam facere in corde meo, coram te in confessione: in stylo autem meo coram multis testibus*. Par ceste sentence, Sainct Augustin ne deteste point la confession publique, puis qu'il faict estat & proteste de mettre ses confessions en lumiere, pour estre leuës par toutes personnes, pour leur dōner exemple de ne point auoir en horreur la confession que le pecheur peut faire à son prochain : Et n'est vray semblable qu'il ayt eu à desplaisir la confession qui se fait en l'Eglise à vne petite assistance, comme est ceste confession publique du commencement de la celebration de la Messe,

### Response au 2. & 3.

puis qu'il a trouué bon faire sa confession à toute sortes de personnes par son escrit, qu'il a expressement laissé pour seruir aux Chrestiens, pour les attirer à l'humilité de confession par son exemple.

26 1e.  
confej.

Or voyons si Sainct Augustin a dict quelque chose qui approche de la sentence que luy attribue Loque par son escrit, & par consequent quelle charité il luy preste pensant tirer de luy quelque tesmoignage de sa mauuaise opinion. Il dict à la fin du second chapitre du mesme liure de ses confessions, *Confessio itaque mea Deus meus in conspectu tuo tibi tacite fit, & non tacite. Tacet enim strepitu, clamat affectu. Neque enim dico recte aliquid hominibus quod non à me tu prius audieris, aut etiam tu aliquid tale audies à me quod non mihi tu prius dixeris.* Je vous fais ma confession deuant vostre Maiesté (faite mon Dieu) tacitement & non tacitement. Tacitement pour le regard du bruit, mais avec clameur quand à mon cœur & affection. Car ie ne dis rien aux hommes de mon peché que vous n'ayez preallablement entendu de moy, & vous n'oyrez aucune chose telle de moy, que vous ne m'ayez preallablement dict. Par ceste sentence il dict trois cho-



ses. Premièrement que Dieu cognoist le peché qui est en l'homme, & qu'il ne peut l'ignorer, d'autant qu'il voit au cœur & en la cōscience du pecheur. Secondemēt qu'il ne cōfesse point son peché aux hommes que preallablement il ne l'ayt confessé à Dieu, comme sçachant bien que sans ceste confession le pecheur ne peut estre reconseillé avec Dieu auquel l'homme ne peut rien cacher. Tiercement il dict qu'il ne peut faire aucune confession à Dieu que preallablement Dieu ne l'ayt touché & combattu en sa conscience. Car Dieu (qui veut le salut & non la perdition du pecheur) luy dōne vn remords de son peché en son ame si tost qu'il a offensé pour le faire reuenir à son deuoir. Il approuue donc par ceste sentence la confession qui se fait au prochain, aussi bien que celle laquelle en secret se faiēt à Dieu. Partant nous pouuons dire avec raison que Loque a pris de trauers, bien qu'à son aduantage la sentence suyuant du mesme auteur au commencement du troisieme chapitre; *Quid mihi ergo est cum ho-* lib. 10.  
*minibus, vt audiant confessiones meas, quasi ipsi* confess. c.  
*sanaturi sint languores meos.* Qu'ay-ie affaire des hommes qu'ils oyent mes confessiōs

## Responce au 2 & 3.

comme s'ils deuoient guerir mes langueurs? Laquelle sentence bien espluchee & deuëment conferee avec les precedentes du mesme, nous apprendra que selon la pratique de l'Eglise nous faisons nostre confession à Dieu comme seul autheur de la remission du peché, d'autât que, *solus Deus peccata dimittit*, Dieu seul remet le peché. Nous faisons aussi nostre confession aux Prestres comme Ministres de ceste remission, par la puissance à eux donnee de nostre Seigneur, lequel leur a dict, *quorum remisieritis peccata remittuntur eis, &c.*

*Matth. 9.* *18.* *& I. oann. 20. cap.* Ceux desquels vous aurez remis les pechez, ils leur seront remis. Et d'autant qu'en la remission du peché il faut enioindre penitence correspondante au peché selon l'ordonnâce de Dieu, laquelle dict, *secundum mensurā dilecti, sit plagarum modus,*

*Deut. 25.* Qu'il faut enioindre au pecheur vne peine proportionnee à la grādeur du peché, & que nostre Seigneur disant aux pecheurs, *nisi poenitentiam habueritis, omnes simul peribitis,*

*Luc. 13.* Si vous ne faiçtes penitence vous perirez tous. Il n'a point entendu la penitence sans peine, & sans faire comparaison d'icelle au peché. Il faut nécessairement que le Chrestien face sa con-

session au Prestre, pour receuoir de luy penitence condigne de son peché pour obtenir le pardon & remission qu'il espere de Dieu, lequel a laissé à son Eglise la clef de remission. Outre plus nous faisons nostre confession publique tant au Prestre qu'au peuple au commencement de la celebration de la Messe, pour implorer les prieres les vns des autres, pour moyenner & faciliter nostre remission & grace que nous demandons à Dieu, nous asseurans sus le dire de Sainct Iacques, *orate pro inuicem ut saluemini*, Priez les vns pour les autres afin que vous soyez sauuez. Iac. 5.

L'autre passage duquel Loque tire son pretended abbus, de ceste forme de confession publique, est de Sainct Iean Chrysostome, en son exposition de l'epistre de Sainct Paul aux Hebreux. Là il dict; *non tibi dico ut te prodas in publicum, neque ut te apud alios accuses, sed obedire te volo Prophetæ dicenti: Reuela domino viam tuam: Ante deum ergo tua confitere peccata: Apud verum iudicem cum oratione delicta tua pronuncia non lingua, sed conscientia tua memoria, Et tunc Deum spera misericordiam te posse consequi.* homil. 31.  
psal. 31  
 Je ne dy pas que tu t'accuses publiquement ny deuant les autres, mais ie veux que tu obeis-



*Responce au 2<sup>e</sup> & 3.*

se au Prophete qui dit, Reuele au Seigneur ta voye. Confesse donc tes pechez deuant Dieu : prononce tes delicts avec oraison vers le vray Iuge, non point de la langue, mais par la memoire de ta cōscience; & adonc aye esperance de pouuoir obtenir misericorde. La question est donc maintenant, à sçauoir si Sainct Iean Chrysostome defend par ce passage de se confesser à son prochain secrettement ou publiquement: Car c'est ce que pretend inferer de ceste autorité l'ennemy de nostre cōfession tant priuee que publique. Nous disons que tant s'en faut que ce bon Pere & Docteur de l'Eglise pretēde cela, qu'au contraire il entend verifier ceste confession de laquelle nous sommes en dispute. Et qu'ainsi ne soit, il veut dire que c'est vne folie au pecheur de penser cacher son peché à Dieu qui voit au fond de la conscience de l'homme, & n'a que faire de la confession de l'homme pour y veoir clair, comme nous auons dict cy dessus de l'autorité de Sainct Augustin, & mesme est tout apparent du passage de l'escri-ture allegué en ceste mesme homilie de Sainct Iean Chrysostome, par lequel Dieu menace Dauid de reueler son peché aux

hommes au cas qu'il veuille le luy celer, luy disant, *Quæ tu secreto fecisti, ego cunctis manifestabo*, ce que tu auras faict en secret, ie le manifesteray à tous. Mais il veut que l'homme luy confesse son peché, en son Eglise, laquelle veut estre autant edifiée par la confession du pecheur, comme elle a esté offensée & interessée par son peché. De sorte que si le pecheur par son peché secret a empesché en l'Eglise l'effect de ses prieres & bienfaits, aussi par sa confession secrette il doit appaiser Dieu de tout son pouuoir, pour luy departir sa grace. Et s'il l'a scandalizé en public, il doit faire confession & satisfaction publique; & encores outre cela, pour l'edification de l'Eglise, laquelle a autorisé ceste sorte de confession publique, qui se faict au commencement de la celebration de la Messe, il doit se confesser publiquement selon l'ordonnance de l'Eglise, *quam qui non audierit, sit sicut ethnicus & publicanus*, à laquelle quiconque n'obeira doit estre reputé comme ethnique & publicain. Or l'union est telle entre nostre Seigneur Iesus-Christ & son Eglise, que quiconque ne se cōfessera à son Eglise, ne doit estre reputé se confesser à

### *Responce au 3.*

Dieu, puis que Dieu a donné à son Eglise la puissance de lier & deslier. Et voila l'intention de toute l'Eglise, comme aussi en particulier de Sainct Iean Chrysostome en ce passage allegué par l'aduersaire de nostre *Confiteor*, c'est à dire, de ceste confessiō publique & generale qui se faict au commencement de la celebration de la Messe. Comme aussi on peut recognoistre que l'heretique prend à son aduantage les authoritez des Peres de l'Eglise, aussi bien que les sentences de l'escriture.

### *Nullité du 3. Abbis pretendu.*

**L**E troisieme abbus que pretend Loque imposer à l'Eglise Catholique Apostolique-Romaine est sus le *Confiteor*, à la fin duquel (comme il dict) le Prestre inuoke la Vierge Marie, les Saincts & Sainctes d'estre Aduocats & intercesseurs enuers Dieu pour luy, afin q̄ par leurs prieres il puisse obtenir pardō & remission de ses fautes, & ne prie pas nostre Seigneur Iesus Christ à ceste mesme fin, lequel toutesfois est Aduocat pour nous enuers son Pere, & nous enseigne de demander à son nom à son Pere tout ce que nous voudrons obtenir, & est seul mediateur en-

3. Ioan. 2.

Ioan. 14.

1. Timo. 2.



tre Dieu & les hommes : adioustant outre plus que toute priere qui ne se faict point par nostre seigneur Iesus-Christ, non seulement ne peut effacer le peché, mais aussi elle est imputee à peché, comme dict Sainct Augustin sus le psal. 108. *Non est iusta oratio nisi per Christũ. Oratio que non fit per Christũ, non solum non potest delere peccatum, sed etiam ipsa fit in peccatum.* A quoy nous respondons ce que dict Sainct Ambroise *Christus act. 7. à beato Stephano dicitur stare à dextris dei pro bonitate intercessoris*, alleguant le susdit passage *aduocatum habemus, &c.* Par lequel Sainct Iean dict, *Nous auons enuers Dieu le pere vn Aduocat Iesus-Christ, &c.* Puis il dict, *sedere autem dicitur psal. 109. pro potestate regis.* qu'il est recogneu assis en la qualité de Roy. Si Loque eut réduit en vn sillogisme de Dialecticien ceste pretenduë raison, son sillogisme nous eust aussi peu preiudicié que ses allegations, cõtre lesquelles nous nous aydons des deux considerations de Sainct Ambroise, lequel par tesmoignage de l'escriture mesme recognoist nostre Seigneur Iesus-Christ, glorifié en la dextre de son pere en qualité de Roy, & en qualité d'Aduocat. De sorte que quand

### Responce au 3.

nous le recognoistrōs en vne de ses deux qualitez, nous ne derogons en rien à l'autre. Or nous demandons a Loque s'il ne le veut pas recognoistre pour vray Dieu aussi bien que pour vray homme: Et nous accordant l'vn & l'autre, nous luy demandons quel tort on faict à nostre Seigneur Iesus-Christ de le reclamer en qualité de Roy en luy demandant pardon, & taisant sa qualité d'Aduocat & mediateur ou intercesseur, ou bien d'implorer son Pere par luy, & le requerir d'estre nostre intercesseur pour remission de nos fautes, en taisant sa qualité de Roy? Tousiours l'vn des deux luy peut estre attribué sans desroger à l'autre, & qui le recognoist Aduocat ou intercesseur & mediateur pour nous enuers son pere, ne nye pas qu'il soit Dieu, ne qu'en ceste qualité il puisse luy mesme pardonner: & qu'ainsi ne soit l'Eglise luy dict, *Fili redemptor mundi deus miserere nobis*, fils de Dieu redempteur du monde ayez pitié de nous; comme la Cananee luy a dict fils de Dauid ayez pitié de moy. Samblablement qui le recognoist en qualité de Dieu & Roy, ne luy desnie point ceste qualité d'intercesseur. Voilà pourquoy l'Eglise a ordon-

né qu'au *Confiteor* qui se diét au commencement de la Messe : Nostre Seigneur Iesus-Christ estant reclamé sous ce nom de Dieu, sous lequel sont entendues les trois personnes de la Sainte Trinité, on ne l'inuoqueroit point particulièrement comme intercesseur, puisque il y est inuocé comme redempteur & autheur de la remission des pechez, sçauoir en tant qu'il est entendu sous le nom de Dieu. Comme aussi elle a ordonné qu'au mesme *Confiteor* que la Vierge Marie & les Saints feroient inuocuez comme intercesseurs.

Et d'autant que le mesme Loque impute à l'Eglise Romaine vn nouuel erreur sus ce point de l'inuocation des Saints deffuncts, disant que c'est vn abus d'inuocuer les Saints qui ne sont plus viuants, pour ce que l'inuocation d'iceux n'est point fondée en la parolle de Dieu escrite, nous nous arresterōs sus ce point pour paruenir à la nullité de son pretendu abus.

Et premierement nous dirons, que si la doctrine n'est receuable sinon en tant qu'elle est fondée en la parolle de Dieu escrite, la cene des Calvinistes s'en va



### *Responce au 3.*

*lib. 1.  
epist. 8.  
ad ple-  
bem.*

abolie si tost qu'elle est nee, par ce que elle n'est aucunement fondee en la parolle de Dieu escrite, attendu que (comme dict Sainct Cyprian) tout ce qui est institué par vne fureur & rage humaine au preiudice de l'ordonnance de Dieu, est vraye abomination, impieté, & sacrilege. Or est il ainsi que depuis peu de temps la cene a esté fuscitee & mise en auant par Caluin & ses complices pour desaduantager & reculler, voire pour abolir du tout la diuine & ancienne institution de la Messe, fōdee en l'expressē parolle du fils de Dieu; Partāt ladite cene est vne vraye abominatiō & sacrilege: Ce que nous pouuōs aussi bien dire cōtre toutes les nouveautez & inuentions des heretiques de nostre tēps.

Et pour ne point sortir de nostre propos de l'intercession des Saincts, nous la fonderons sus la raison alleguee par l'aduerfaire, & pour son fillogisme abusif correspondant à sa doctrine & intention abusifue, nous luy rendrons cestuy-cy.

Toute doctrine fondee en l'escriture est bonne & saine.

La doctrine de l'innuocatiō des Saincts est fondee en l'escriture.

Partant la doctrine de l'innuocaton des

Sainct est bonne & saine.

L'aduersaire ne peut nier nostre premiere proposition, puis qu'il faiët estat de se preualloir de l'autorité de l'escriture: Mais quand à la seconde il la pourra bien nier, pour ce que c'est le mesme point lequel est à present controuerse entre l'Eglise Catholique & la synagogue des Caluinistes de nostre temps. Nous entrõs donc en preuve d'icelle, & disons que l'escriture nous enseigne d'implorer l'ayde & secours de ceux qui nous peuuent secourir en nos tribulations & aduersitez. Or est il que les Saincts ont ceste puissance, partant l'escriture nous enseigne de les inuoyer à nostre ayde. Qu'ils ayent ceste puissance c'est chose toute apparente par la raison qu'en rend Sainct Iean Damascene, sçauoir est des miracles qui se font sus ceux qui les inuoquent en leur necessité: car (comme il dict) les Saincts ne secourreroient pas ceux qui leur adressent leurs prieres s'il n'auoiët quelque grande vertu & puissance enuers Dieu en l'estat de beatitude auquel ils sont. Qu'ainsi ne soit les diables sont chassez des corps des personnes pour lesquelles ils sont inuoquez, & les malades reçoient guari-

### Responce au 3.

son par leur prieres. Ce qui ne se feroit si apres leur mort corporelle ils n'auoient aucune puissance. Leurs corps sont morts nous en sommes d'accord: mais leurs ames ne meurēt point. Car l'escriture dict,

*Sap. 3. Iustorum animæ in manu Dei sunt*, les ames des iustes sont en la main de Dieu. Et

*lib. 4. orted. fid. c. 16.* comme demande Sainct Iean Damascene, Qui a il plus precieux que d'estre en la main de Dieu? Dauantage ils sont amis

*Ioan. 15.* de Dieu, ils sont ses enfans & heritiers, & sont coheritiers de Iesus-Christ, & sont

*ibid.* par cōsequent Dieux, Seigneurs & Roys, non de nature, mais par la semblance de l'image de Dieu, comme dict le mesme

*1. Tessal. 4.* auteur. Et quand à leur mort corporelle, c'est plustost vn dormir qu'une mort, attendu que Sainct Paul les appelle dormants. Ce qui tourne à la confusion des ennemis des Saincts: Et mesme leur doit tourner à vn rigoureux iugement la confession de l'honneur qui leur est deu, faicte autrefois par les briseurs d'images en leur faux concile de Constantinople, qu'ils ont surnommé fausement septiesme concile, sous l'Empereur Copronyme enuiron l'an 752. de nostre salut: Par laquelle confession ils ont faict plus

d'hon-



d'honneur aux Saints, & par iceux ils ont plus honoré Dieu que ne font nos nouveaux Euangelistes, iurez ennemis des Saints : Car combien qu'ils brisassent les images, ils ne nioient pas toutesfois l'honneur deu aux Saints, ny l'inuocatiõ d'iceux. Je veux bien qu'ils n'ayent tenu ceste doctrine que pour vn temps, & que par apres ils s'en soient departis, voire declarez ennemis, maistant y a qu'ils l'ont tenu. Or pour tesmoigner ce qu'ils en sentoient, ils ont inferé & inscrit en leur pretendu Concile de mot à mot ce qui en a esté dict & déterminé au second Concile de Nice, action sixiesme, definition dix-septiesme, en ces propres termes, *Si quis non confitetur Sanctos venerandos esse coram Deo, & anima & corpore, & horum intercessionem non petierit, utpote qui libertatem apud Deum habeant, pro mundo secundum ecclesiasticam traditionem interuenire, anathema.* Si quelqu'un desnie que les Saints venerables soient deuant Dieu, & quand à l'ame & quand au corps, & ne veut implorer leur intercession, d'autant qu'ils peuvent librement prier Dieu pour le mōde, qu'il soit tenu pour excommunié. Que les ames des Saints soient deuant Dieu cela

### Responce au 3.

est tout notoire par le passage cy dessus allegué de la Sapience 3. Que les corps aussi soient presens deuant Dieu, cela est tout clair par les miracles que Dieu fait par la presence de leurs reliques, & outre ce, par  
Pf. 33. le Psalmiste lequel dit, *Custodit dominus ossa sanctorum suorum, unum ex his non conteretur*, que Dieu garde les ossemens & reliques de ses Saints, & ne permettra qu'aucun d'eux soit brisé, c'est à dire pour estre empesché de paruenir à la resurrection de gloire, parce que Dieu mesme dit à Noé & à ses enfans, & par eux à tous hommes,  
Gen. 9. *sanguinem animarum uestrarum requirā de manu cunctarū bestiarum, & de manu hominis: de manu viri, & de manu fratris eius requirā animam hominis*. Je redemanderay le sang de vos ames de la main de tous animaux & de la main de l'homme: Je redemanderay l'ame de l'homme de la main d'un chacun & de son frere: qui est vn tesmoignage de l'Escripture duquel saint Iean Damascene tire l'assurance de la resurrection des corps: ce qui signifie que Dieu a en speciale & particuliere recommandation & les ames & les corps des Saints, par lesquels il fait des miracles sus ceux qui les reclament en leur tribulation, pour impe-

trier de Dieu par leurs prieres & intercessions allegement en leurs aduersitez.

Leur secõd argument pour improuuer l'intercession des Saints , est tel,

Quiconque a ce droict de debuoir estre inuoqué il a pareillement ce droict qu'on croye en luy.

Les Saints n'ont point ce droict qu'on doyue croire en eux.

Parquoy ils n'ont point ce droict de deuoir estre inuoquez.

La premiere proposition de cest argument est purement faulse, & le fondemēt duquel elle est tiree , est purement faux aussi , par consequent elle ne peut engendrer qu'une faulse conclusiõ. L'aduersaire *Rom. 10.* le tire de saint Paul, mais ce n'est pas sans desguiser le texte de saint Paul. Car il l'accorde à son intention , & ne le prend pas selon l'intentiõ de saint Paul: Ce qui se iuge facilement par le texte , lequel dit, *Omnis quicumque inuocauerit nomen Domini saluus erit. Quomodo ergo inuocabunt in quem non crediderunt?* Saint Paul ne demāde pas comment on inuquera les Saints sans croire en eux, mais comment il est possible d'inuquer Dieu sans croire en luy: & ce qu'il dit particulierement de Dieu,



### *Responce au 3.*

l'aduersaire l'accommode à sa mauuaise intention, en quoy il impute à saint Paul yne proposition generale à laquelle iamais il n'a pensé: Car il n'a pas dit que quiconque a ce droit de deuoir estre inuocé, il a pareillemēt ce droit qu'on croye en luy: mais il a dict que Dieu a ce droit d'estre inuocé par les hommes, & aussi il a ce droit qu'on croye en luy, & que l'homme ne peut inuocer Dieu à son salut s'il ne croit en luy. Voilà cōment nos nouueaux Euangelistes sont ouuriers de imposer à l'escriture pour fauoriser leurs erreurs & faire croire leur fausse doctrine aux simples pour les desuoyer de la vraye Eglise. Les autres argumens alleguez par ledit Loque, n'estans de meilleure estoffe que ce second meritent estre passez sous silence pour nous arrester à la doctrine solide entāt qu'elle est assaillie par les ennemis de la sainte Messe. Bien voulons nous aduertir que de la mesme liberte de laquelle il a vsé quand il a falsifié le texte de saint Paul en sa seconde raison, voulāt par iceluy improuuer l'intercession des Saints, il impose aussi à Theodoret & au Concile par luy allegué sus le secōd chapitre de l'epistre saint Paul aux Colos-

siens: Car pour ces mots que dit Theodoret, *Qui legem defendebant eos etiam ad Angelos colendos inducebant, dicentes fuisse legem per eos datam. Mansit autem hoc vitiū diu in Phrygia & Pisidia. Quocirca synodus quoque quæ conuenit Laodiceæ quæ est metropolis, lege prohibuit ne precarentur Angelos.* Loque dit en François, Il y en auoit qui induisoient les hommes au seruice des Anges, alleguans que la loy auoit esté baillee par iceux: lequel erreur est demeuré en Phrygie & Pisidie: & pourtant le synode tenu en Laodicee ville capitale de Phrigie a defendu par ordonnance expresse de prier les Anges: il dit cela simplement sans auoir esgard à l'intention de Theodoret.

Or pour monstrier sa mauuaise intention, il est à noter que Theodoret expose vn passage de saint Paul, par lequel il reprenoit certains hypocrites, lesquels sous le manteau ou apparence de religion enseignoient aux Colossiens ce qu'eux mesmes ne sçauoient pas, ou bien s'ils le sçauoient n'en esclarcissoient pas suffisamment le peuple qu'ils enseignoient: Car ils luy donnoient à entendre que il falloit maintenir encores la loy ancienne: d'autantque la loy auoit esté don-

### Responce au 3.

nee par les Anges, & que pour ceste occasion il estoit raisonnable de leur rendre  
*Matth. 4.* seruice: Ce qui est deu toutesfois à Dieu seul, *Dominum Deum tuum adorabis, & illi soli seruias*, Tu adoreras ton Dieu & tu luy rendras seruice à luy seul. Cest erreur courut longuement en Phrygie & Pisidie, cōme dit le mesme Theodoret, & cela fut cause qu'au Concile de Laodicee qui fut enuiron l'an 364. sur la fin du pontificat du Pape Liberius, fut defendu de prier & reclamer les Anges: mais comment fut il defendu, & de quelle intention? sçauoir est de les reclamer & recognoistre cōme auteurs de grace & de remission, d'autant que celà conuient à Dieu seul, & non aux Anges ny à autres creatures. Et d'autant qu'il y auoit grande apparence que ceux desquels parle Theodoret en ce lieu là selon le texte de saint Paul eussent ceste mauuaise intention, qui estoit pour induire le peuple de Dieu en erreur, le Concile de Laodicee defendit cela comme dict est. Ce qui se descouure mesme par le texte suyuāt de Theodoret qui excuse ces gens là, disant que par humilité recognoissans que Dieu est inuisible & incomprehensible, & qu'il n'y a aucun moyen



en ce monde de paruenir à la pleine & entiere cognoissance d'iceluy, ils enseignoient qu'il falloit par les Anges, c'est à dire par l'intercession des Anges acquerir la bien-veillance de Dieu. Et toutesfois, le susdit Concile a iustement déclaré ceste opinion erronee, au cas qu'elle fut entree en l'esprit d'aucuns, ou qu'elle eut esté publiee par des faux docteurs, comme il pourroit estre aduenü par la temerité d'aucuns qui auroient publié qu'il faudroit adorer les Anges, veu que l'adoration est deuë à Dieu seul.

De pareille liberté il se sert (bien qu'<sup>70.7.</sup>abusiuement) d'un passage de saint Augustin au second liure contre Parmenian chap. 8. duquel (à la verité) il allegue le texte, mais il destourne l'intention d'iceluy, attendu qu'il n'en prend que ce qui semble fauoriser son erreur. Il diët donc avec saint Augustin, Les oraisons mutuelles de tous les membres qui trauaillēt encores en terre doiuent monter au chef qui les a precedé au ciel, auquel nous auons remission de nos pechez. Car si saint Paul estoit mediateur, les autres Apostres le feroient aussi, & ainsi il y auroit plusieurs mediateurs, ce qui ne con-

<sup>1 Tim. 2.</sup>

Responce au 2. et 3.

uiendroit point à ce qu'il dit ailleurs, qu'il y a vn mediateur entre Dieu & les hommes. Comme voulant conclure que les Saincts ne sont point mediateurs, & que partāt nous sommes en erreur si nous leur adressons nos prieres, comme pretendans les auoir pour intercesseurs enuers Dieu pour nous obtenir nos necessitez.

Nous recognoissons avec sainct Paul & sainct Augustin qu'il n'y a qu'un mediateur entre Dieu & les hommes, c'est à dire, qui ait moyenné la reconciliation de Dieu avec les hommes, desquels la perdition & condamnation estoit toute certaine s'il n'y eut apporté le remede. Mais il ne faut pas conclure de là que les hōmes ne puissent & ne doiuent point prier les vns pour les autres, & mesme les Saincts defuncts pour les viuants, & les viuants les vns pour les autres. Car (comme dict

*Ibid. m.*

sainct Augustin) *homines omnes Christiani inuicem se commendant orationibus suis*, que tous hommes Chrestiens se recommandent mutuellemēt aux prieres les vns des autres, selon ce que dict l'Escripture, *orate pro inuicem ut saluemini*, priez les vns pour les autres afin que vous soyez sauuez. Et

*Iac. 5.*

que les Saints prient pour les viants , le passage préallegué de S. Paul ne l'empesche pas, & ne s'ensuit pas que si les Saints prient pour les viants qu'il y ait plusieurs mediateurs. Car il n'y a qu'un mediateur vniuersel de tous les hommes, c'est à sçauoir qui ayt moyenné leur redemption, pour ce qu'il est seul Redempteur : & c'est à cause de l'œuvre de redemption que saint Augustin en ce mesme passage dict qu'il est, *vnus verusque mediator*, vray & vni-que mediateur. Et les autres sont, *mediatores indulgentiæ*, non *salutis*, mediateurs de pardon & de grace, & non de salut: ce que mesmes peuuent estre les viants quand ils prient les vns pour les autres. Voilà cōment les nouveaux venus sçauent prendre de trauers les passages de l'escriture, des Conciles & Docteurs pour tascher à donner le dessus à leur meschante doctrine, & embrouiller les esprits des simples de leurs faussetez : & pour improuuer le *Confiteor*, qui se dit au commencement de la Messe, ils se precipitent d'erreur en erreur, & se souillent leur conscience de plus en plus selon ce texte de l'Apocalypse, *Qui sordibus est sordescat adhuc*, qui est



*Responce au 4.*

pour tomber de plus en plus au rigoureux iugement de Dieu.

*Nullité du 4. Abus pretendu.*

**E**N apres il fonde son quatriesme pretendu abus sur la forme de l'absolutiō que le Prestre dōne apres le *Confiteor*, qu'il maintient estre dit par la bouche du Clerc au nom des assistans sus lesquels le Prestre prononce ceste absolution: Comme si les assistans n'estoient pas tenus de dire leur *Confiteor*, aussi bien que le Prestre & son Clerc, pour participer à ceste absolution. Il est aisé à voir par cela que Loque n'a pas assisté beaucoup de fois à la celebration de la sainte Messe, puis qu'il n'a pas reconnu encores, que les assistans outre le Prestre & le Clerc ont accoustumé y faire leur confession, & par ce moyen y recevoir en toute humilité l'absolutiō: & par consequent on peut voir qu'il n'est iuge capable pour examiner chacun point de ladicte celebration, puis qu'il n'est vstité à la frequēter & recognoistre: mais l'impudence heretique ne prend pas ceste patience.

Puisque donc que l'escriture nous dit,  
*Prov. 26. responde stulto iuxta stultitiam suam, ne sibi sa-*

*piens esse videatur*, Respons au fol ou mal aduisé selon sa folie, afin qu'il ne s'estime estre sage; il nous conuient respondre par chacun point à ses mesdisances.

Premierement il dit que ceste absolution ne conuient aucunement aux Messes priuees. Il ne desnie donc pas en apparence les Messes priuees, ny par consequent la Messe, combien que toutesfois il se declare assez ennemy d'icelle puis qu'il la blasme & calomnie.

Or afin que l'on sçache que ce n'est chose nouuelle que la Messe priuee, nous noterons que la Messe, du commencement a esté solemnelle comme il peut apparoir par le mot, *synaxis*, duquel elle estoit qualifiée, d'autant que ce mot grec, *synaxis*, en latin est interpreté, *collecta*, qui signifie, *cōgregatio plebis ad audiendum sacrum*, ainsi la

*in breuiculo.*

*in epit. Paula.*

*Apologet. cap. 39.*

translaté saint Augustin: il signifie aussi, *collectio populi*, assemblée du peuple, comme dit saint Hierosme: selon Tertullian il signifie, *coitio Christianorum*, *communicatio orationis & omnis Christiani commercij*, assemblée des Chrestiens, communication de prieres & de toutes affaires qu'ils ont entr'eux: & ceste sorte de Messe est proprement Messe pastorale: ce qui se voit

## Responce au 4.

de cōsecr.  
dist. i. hoc  
quoque.

par l'exhortation du mesme Tertullian, qui dit, *si non potes colligere, sit tibi vel in tribus ecclesia*, comme s'il disoit si tu ne peux dire Messe de parroisse ou publique à cause des persecutiōs, dy la priuee, ou tu sois le troisieme. Ce que a esté ordonné par les Papes Sother & Anacletus. Ceste Messe donc ce dit priuement, & neantmoins en la presence de deux ou trois assistans, afin qu'il luy soit respondu selon la forme de sa priere ou salutation, comme à ces mots, *Dominus vobiscum*, & *Orate pro me fratres*.

Et pense ledit Loque auoir barre sur nous quand il dit, s'il n'y a plusieurs hommes & femmes en la Messe, à quel propos dit le Prestre, *Amen fratres & sorores*. A quoy nous respondons que la pluralité des hommes ou femmes n'y fait rien, & que quand même le mot (*sorores*) ne se diroit point en cest endroit, il n'y a aucun interest, attendu qu'en parlant comme les Grammairiens, nous entendons sous le masculin genre, le feminin, & qu'il n'est necessaire que tous ceux que nous entendons faire participants de la priere & absolution y soyent presents, comme s'ils sont malades, ou en pays lointain, ou oc-



cupez ailleurs pour causes qui ne leur permettent d'y assister, desquels toute la confession & absolution est representee par celle du Clerc & des assistants, d'autant que, *spiritu præsentes sunt, et si corpore absentes*, ils y sont presens de corps & d'esprit, encores qu'ils n'y soient de presence corporelle, comme dit saint Paul de sa personne mesme aux Corinthiens.

Et quand à ce qu'il impute au Prestre sus la forme & teneur de ceste absolution, qu'en icelle il erre, voire qu'il blaspheme quand il raut à nostre Seigneur Iesus-Christ l'honneur qui luy appartient pour l'attribuer à la Vierge Marie & aux Saints & aux Saintes, & qui pis est au signe de la Croix: Il s'abbuse, ou plustost il calomnie estrâgement l'Eglise en ceste louable coutume. Car premierement, quand à l'honneur deu à nostre Seigneur Iesus-Christ, il ne luy est point ravy, ains plustost attribué comme Dieu, & Fils de Dieu, estant reconnu pour tel en ces mots, *Confiteor Deo*, car cōme nous auons dit cy dessus, on ne peut dire, *Confiteor Deo*, sans entendre toute la sainte Trinité, en laquelle necessairemēt il faut entendre nostre Seigneur Iesus-Christ, lequel est fils de Dieu & de la Vier-

*Responce au 4.*

ge, & partant la confession luy est faicte cōme à Dieu; & à la Vierge & aux Saincts, comme intercesseurs, lesquels sont (comme bien-heureux) interposez entre Dieu & nous, pour nous obtenir par leur prieres remissiō de nos offences. Et quād au signe de la Croix, il y est employé comme marque de nostre salut & espouuētail du Diable, auteur du peché, & ennemy iuré de la remission d'iceluy, & vraye fortificatiō du Chrestien contre les assauts qu'il luy peut liurer, lors principalement qu'il tache à se mettre en bon estat, & obtenir la grace de Dieu par la remission de ses pechez.

Et d'autant que l'aduerfaire en ce lieu s'arreste principalement sus l'intercession qui se faict à la Vierge Marie en ceste forme & teneur d'absolution, il est bon de voir & remarquer comment en cest endroit il se contredit soy mesme en recitāt la priere que luy fait l'Eglise par ces mots, *Sancta Maria ora pro nobis*, & les louanges qu'elle luy rend en quelques hymnes ou chants celebres, composez en sa louange, & ce qu'il sent de quelques Peres & Docteurs de l'Eglise lesquels en ont parlé.

Premierement sus cestedicte priere de l'Eglise (*sancta Maria ora pro nobis*) il recite que Gabriel Biel Theologien , recognu profond entre autres, en sa leçon 80. sus le canon de la Messe , en l'exposition de ces mots ( *& intercedente beata Virgine Maria cum omnibus sanctis* ) dict (comme de vray il le dit) Le Pere celeste a donné la moitié de son Royaume à la bien-heureuse Vierge Marie, Royne du ciel. Ce qui a esté figuré en Ester, à laquelle Assuerus promet la moitié de son Royaume. Et comme ainsi soit que le Pere celeste ait pour principaux biens de son Royaume la iustice & la misericorde , se reseruant la iustice , il a concedé la misericorde a la Vierge Marie. *in Maria-  
li.* Il allegue outre-plus Bernardin Ochin, disant, Il faut appeler de la Cour de la iustice de Dieu à la Cour de la misericorde de sa Mere. Et conclud de ces deux passages, que puisque ces deux Docteurs de l'Eglise Romaine afferment que la Vierge Mere de nostre Seigneur a le droit de nous conferer & donner elle mesme la misericorde , il s'ensuit qu'elle est plus que simple Aduocate pour la nous obtenir de Dieu par ses prieres. Il conclud aussi que si de la iustice de Dieu on peut appeler à la mise-



*Responce au 4.*

ricorde d'icelle, il faut qu'elle soit souueraine par dessus Dieu, qui est vne absurdité & erreur, voire blasphème qu'il nous veut imputer par l'honneur que nous rendons à icelle.

Par ces deux pretēduēs cōclusions, il est tout appert qu'il fait l'ignorant; Cōme s'il estoit impossible à la Vierge de nous departir la misericorde, & d'estre en ce mesme regard nostre Aduocate enuers Dieu. L'Eglise la priant, l'appelle, *Regina misericordiae*, Roïne de misericorde, & neantmoins implorant ses prieres, elle luy dict, *Eia ergo Aduocata nostra*. C'est à sçauoir si l'Eglise en ces deux choses qu'elle recite en vne salutation & priere qu'elle luy fait, disant, *Salue Regina misericordiae*, peut estre conuaincuē de contrariété? C'est icy que se voit & recognoist l'ignorance maligne de Loque, comme s'il ignoroit que c'est vne commune maniere de parler entre les hommes quand ils veulēt signifier le credit & pouuoir qu'à vn inferieur enuers son superieur, de dire qu'il le possède entierement, qu'il le gouuerne, qu'il luy commande, qui n'est autre chose dire, sinon qu'il luy peut librement demander ce qu'il voudra, & qu'il l'obtiendra facilement

ment. Et s'il est question de declarer le grand credit qu'a vn Prince de la Cour enuers son Roy, pour obtenir promptemēt de luy des choses que les autres subiects & inferieurs du Roy mesme n'obtiennent qu'à grāde difficulté, ou par grande importunité, ou par longue succession de temps; on dit qu'il est Roy luy mesme; c'est à dire que tout ce qu'il veut, il est fait ou octroyé de la puissance & autorité du Roy. Pourquoy donc telle maniere de parler ne sera elle librement permise à l'Eglise, laquelle ne recognoist aucun entre les Saincts & amys de Dieu, qui ayt vn pouuoir esgal à celuy de la Vierge Marie, laquelle pour auoir esté esleuë de Dieu pour estre Mere de son Fils, surpasse en excellence de gloire au ciel, non seulement tous les Saincts, ains aussi les Anges? *Exaltata est super choros Angelorum ad cœlestia regna:* Elle est esleuë sus tous les ordres des Anges au Royaume des cieux. Mais ce n'est merueille si les heretiques ennemis de la Vierge Mere de nostre Seigneur tirent des faulses conclusions contre l'Eglise, del'honneur qu'elle rend à icelle, quād elle recognoist que, comme du droit de Mere elle obtient de son Fils fort ayse-

### Responſe au 4.

ment tout ce qu'elle luy demande pour nous , quand nous la reclamons en nos neceſſitez. Et ce qui les faiſt encores plus faſcher en ceſt endroit , ſont les beaux & ſpecieux tiltres d'honneur que luy rend l'Egliſe en ces cantiques & hymnes qu'elle chante en ſon honneur, quand elle l'appelle, *Royne de miſericorde , Dame des Anges, refuge des miſerables , noſtre eſperance , noſtre vie, noſtre ſalut , porte de Paradis.* Quand auſſi elle luy diſt, *Roga patrem, iube natum, iure matris impera.* Priez le Pere , commandez au Fils, commandez de droit de Mere. Eſquelles trois prieres adreſſantes à icelle Vierge , ſe recognoiſt la ſuperiorité de Dieu que l'Egliſe luy attribué iuſtement par deſſus icelle , par comparaifon de la premiere avec la ſeconde. D'autant que par la ſeconde il eſt dit, *iube natum*, commandez au Fils : ce qui regarde l'humanité que le Fils a pris au ventre de la Vierge, à raiſon de laquelle icelle Vierge eſt recogneuë auoir plus de pouuoir enuers ſon Fils , pour obtenir de luy nos neceſſitez qu'aucun des autres Saincts. Et d'autant que ce n'eſt pas l'humanité ſeule de noſtre Seigneur , ains toute la perſonne du Fils qui exauce les prieres de la Mere



pour nous, nous communiquant sa misericorde par les merites & prieres d'icelle, suiuant la susdicte maniere de parler vſitee en l'Eglise auſſi bien comme és affaires communs des hommes; nous luy attribuons la misericorde, non pour la deſnier à Dieu ( comme nous voudroit imposer Loque ) mais pour dire que la prerogative de l'obtenir eſt ſouuerainemēt en icelle, ſans toutesfois en deſnier l'effect aux autres Saints. A quoy les heretiques contrediront tāt que bon leur ſemblera, mais leur murmure n'empeschera l'honneur de la Vierge Marie, non plus que les portes d'enfer l'authorité & puissance de l'Eglise.

Ce n'eſtoit aſſez audit Loque de s'eſtre attaqué à la Vierge Mere de noſtre Seigneur, en l'obſeruation qu'il a voulu faire ſus la forme de ceſte abſolution qui ſe fait apres la confeſſion, s'il ne ſe fut adreſſé auſſi au ſigne de la Croix, duquel il y eſt fait mention, quand il eſt dit, *Et per ſignum ſanctæ crucis*: D'autāt que c'eſt vn des lieux cōmuns des heretiques de noſtre temps, leſquels ont en horreur le ſigne de la Croix, comme membres de Satan, & executeurs de ſa volōté, duquel dit S. Ignace,

## Responce au 4.

Epist. 5 ad  
Philippē-  
ses.

*Princeps mundi huius in hoc gaudet quando quis crucem negauerit, interitum enim sibi esse cognouit confessionem crucis. Hoc enim tropheum est contra eius virtutem, quod videns expanescit, & audiens timet.* Que le prince de ce monde, c'est à dire le diable, se resiouyt quand quelqu'un nie la Croix, d'autant qu'il voit que la recognoissance de la Croix est sa confusion, pour ce que la Croix est la marque de la victoire par laquelle il a esté supplanté, & quand il voit la Croix il est estonné, & entendant ce mot de la Croix, il est en crainte: Et de vray c'est le diable lequel suscite les heretiques à abbattre les Croix qui sont plantées par les chemins, & mesmes en autres lieux, pour le regret & desplaisir qu'il a d'auoir esté debouté par icelle de la puissance & principauté qu'il auoit usurpé en ce monde par le peché qu'il y a mis, pour ce que le signe de la Croix est la marque de la victoire qu'a fait le Fils de Dieu par sa mort qu'il a souffert en icelle: Et la souuenance d'icelle victoire luy fait detester la Croix.

Or pour improuuer ce signe de la croix qui se fait en la susdicte absolution il procede en ceste sorte. Il faut, dict-il, que le

Prestre prenne la Croix pour l'une de ces quatre choses : c'est à sçavoir , pour les souffrances & afflictions de Iesus-Christ, ou pour la mesme Croix en laquelle il a esté crucifié, ou pour l'image & figure d'icelle Croix , ou bien pour le signe de la Croix qui se faict de la main.

De propos deliberé Loque faict l'ignorant en ceste diuision, pour se donner carrière à reprendre au Prestre quelque absurde intelligence de ce mot de Croix, en ce qu'il diét , *per signum sanctæ Crucis*. Car que pourroit dire le Prestre plus clairement pour exprimer son intention, que ces mots, *per signum sanctæ Crucis* ? Ne montre-il pas bien qu'il parle du signe de la Croix ? C'est donc de gayeté de cœur que Loque se fait croire que l'intention du Prestre disant ces mots, est d'entendre vne de ces quatre choses , veu qu'expressément il parle du signe de la Croix qui est manifestement different des trois premieres significations qu'il allegue. Mais puis qu'il en veut par là, nous ne le delaisserons de luy en dire nostre aduis.

Il est tout certain que le signe ne s'entend point sans la chose signifiée , ny la figure sans la chose figurée , ny l'image sans la



*Responce au 4.*

chose representee par icelle. Partant, quiconque cōsiderera bien exactement toutes les choses qui se sont passees selon l'histoire en la personne de nostre Seigneur IesusChrist, en la Croix mesme en laquelle il a souffert pour nous, ne trouuera point estrange qu'en ce signe de la Croix que fait le Prestre de sa main, soient entendüs, & les afflictions & douleurs qu'a souffert nostre Seigneur en sa Croix, & la mesme croix en laquelle il a souffert, & l'image ou figure d'icelle croix. Car quelle incommodité cela pourroit il apporter à l'intelligēce du mistere de nostre redemptiō, auquel toutes ces trois choses se trouuent concurrentes selon l'histoire de sa mort? Quand au premier, il est tout notoire que nostre Seigneur a souffert des afflictions en la croix pour nostre salut, lesquelles tout bō chrestien entendra tousiours par le signe de la croix, laquelle prend sa sanctificatiō de nostre Seigneur qui a souffert en icelle: & que ceste croix ne se peut entendre sans les douleurs qu'il y a souffert, partant cela ne merite plus lōg discours: mais quand au second qui est de la vraye croix en laquelle il a enduré, c'est là qu'il nous conuient arrester, & luy respōdre, d'autāt

qu'il dit que ceste Croix la ( qui estoit de bois) n'a iamais eu ceste vertu d'estre nostre aide enuers Dieu pour l'induire & flechir à nous faire misericorde, & dit qu'il semble que le Prestre aye esgard à ce bois: cōme quand il dit ceste priere, *Perpetua nos quæsumus Domine pace custodi quos per lignum sanctæ crucis redimere dignatus es saluator mūdi*, qui vaut autant cōme à dire, Nous vous priōs (Seigneur Dieu) gardez nous en perpetuelle paix, nous qu'il vous a pleu racheter par le bois de la sainte Croix, cōme aussi quand il dit, *O crux aue spes unica, auge piis iustitiā, reisque dona veniam*: Ce que Loque a traduit en ceste sorte, à son aduantage, Bien te soit croix nostre vnique esperance, accroy iustice aux deuotieux, & fay mercy aux coupables. Il dit expressement ces mots, *Bien te soit*, pour imputer quelque note d'idololatrie à l'Eglise Romaine, cōme recognoissant la croix pour nostre rachat & esperance: Mais l'Eglise dit pour ce mot, *Aue*, ie te saluē: & ce sans aucun soupçon d'idololatrie: cōme nous le lisons ainsi traduit en la cōmune versio de la salutatio Angelique, de laquelle ne se peut tirer aucun soupçon de telle faute en l'Ange qui portoit le message de Dieu

## *Responce au 4.*

à la Vierge Marie. L'heretique pourroit dire que ceste salutation ou priere en la forme en laquelle elle est adressée à la croix ne se peut maintenir pour bõne, ny pour bien adressée à vne chose insensible & inanimée cõme est la croix: mais nous luy responderõs que c'est vne grande lourdisse d'esprit de pëser q̃ ceste salutatiõ ou priere ait esté adressée par l'Eglise au bois de la croix, & nõ à celuy qui y a esté attaché, & y a souffert pour nous: Et voilà cõment Loque se dõne carriere de ses interpretations ridicules. Et sous ceste mesme cõsideration, l'Eglise nous enseigne qu'il faut adorer le bois de la vraye croix, cõme sanctifié par l'attouchemẽt du vray corps & sang de nostre Seigneur: cõme aussi elle nous induit à adorer les cloux, la lãce, les vestemẽs & toutes choses qui ont esté sanctifiées de l'attouchement de son corps mesme: Sa creche, son sepulchre, sa croix, & mesme le signe ou figure de sa croix, à cause que nostre Seigneur parlant avec ses Disciples de l'effet d'iceluy, dit parlant de son secondu enement, Alors apparoi-

*LUC 21.*

stra le signe du Fils de l'hõme au ciel; entendãt la croix, en laquelle necessairemẽt aussi est entendu celuy qui y a souffert,



duquel l'escriture parle en ceste sorte, *Iesum Nazarenum quæritis crucifixum*, & saint Paul dit, *Predicamus Iesum crucifixum*. Sus quoy dict saint Iean Damascene, *Multi Christi & saluatores, sed unus crucifixus*, que en l'escriture nous trouuons plusieurs christes & sauueurs, mais il ne s'en trouue qu'un crucifié: Et dict d'auantage le mesme Autheur, *Adorandum est signum Christi, ubi enim fuerit signum eius illic & ipse erit*, Il faut adorer le signe de Iesus-Christ, pour ce qu'il est par tout où est son signe, qui est la Croix: qui est dire, que le signe de la Croix ne se peut entendre sans nostre Seigneur, lequel a souffert pour nous en la Croix. Et quand à la matiere de la Croix, nous ne l'adorons point: car (comme dit le mesme auteur) *Qui refert crux à materia si Christi representationem non habet?* *ib. c. 17.* quelle difference y a il entre la Croix & la matiere si elle ne represente nostre Seigneur crucifié? Pour neant donc Loque se traueille à rechercher des raisons & passages des Peres & Docteurs de l'Eglise, pour verifier qu'il ne faut adorer le bois ou la matiere de la Croix, d'autant que nous tenons qu'il n'y eschet & ne peut escheoir d'adoration, s'il n'est sanctifié de l'attou-

## Responce au 4.

chement du vray corps de nostre Seigneur, c'est à dire, si ce n'est du bois de la vraye Croix en laquelle il a esté crucifié, ou s'il n'a la forme de Croix, representant le crucifiement d'iceluy.

Il allegue outre-plus vn passage de S. Ambroise qu'il cote auoir tiré de sa troiesme Oraison funebre *de obitu Theodosij*, (encores qu'il ne s'en trouue qu'une) rapportant vn faict de l'Imperatrice Heleine mere de Constantin le grand, laquelle alla expressément en Hierusalem pour recouurer la vraye Croix qui auoit esté cachée sous terre par les Payens, pour oster aux Chrestiens l'occasiō de plus voyager en la terre Saincte: & quand elle l'eut recouuerte & le tiltre qui y auoit esté mis, elle voulut rendre à Dieu le deuoir d'adoratiō comme le dernier but & la vraye intention de son voyage. Dequoy parlant S.

*Ora. fune.  
de obitu*

*Theodosij.*

Ambroise, il dit, *Inde crucem Domini recognoscebat, inuenit titulum, regem adorauit, non lignum vtique, quia hic gentilis est error & vanitas impiorum: sed adorauit illum qui pependit in ligno, scriptus in titulo:* qu'elle adora Iesus-Christ & non le bois, d'autant que c'eust esté vn erreur & vanité des Payens. En cela Loque pense auoir cause gaignee. Mais

il ne dit rien que nous ne luy accordions. Car l'adoration n'est faicte ny à la matiere des cloux, de la lance, du bois, de la Croix, ny des vestemens de nostre Seigneur, mais à nostre Seigneur mesme qui les a sanctifié par son attouchement; & cependant qui desdaigneroit ou mespriseroit ces choses à cause de leur matiere, ou par crainte d'adorer la matiere, desdaigneroit celuy mesme qui les a sanctifié, & nous les a laissé pour marques & memoire de nostre redemption qu'il a operé en la Croix, en laquelle & hors laquelle il les a sanctifié. Partant il ne faut pas que la crainte d'adorer la matiere, nous face auoir en mespris la memoire de nostre redemption que nous apportent telles choses qui se recognoissent estre sanctifiees par son attouchement.

Il allegue en apres vn passage d'Arnobius, disant, *Cruces nec colimus, nec optamus.* Nous n'adorons point les croix & ne les voulons aucunement adorer. Il dispute en cest endroit là, contre les Gentils, lesquels en leur adoratiō, qui doit estre proprement appellee idolatrie, arrestoient leur intention tantost à la matiere, tantost à la forme ou figure des choses qu'ils a-

*Lib. 8. contra gentes.*



### Responce au 4.

uoient en honneur & reuerence. Or il remonstre que la matiere est chose naturelle, c'est à dire que nature administre à l'ouurier pour faire son ouurage : & la forme ou figure artificielle est vn œuvre des mains de l'ouurier. Or il dit qu'il ne fault que celuy qui adore, presume adorer ny la matiere de l'ouurage, soit bois, pierre, or, ou argent, ny la forme ou figure, quelque chose qu'elle puisse représenter; mais qu'il faut seulement adorer le souverain ouurier, c'est à dire le Createur de toutes choses. Dont il dit, *Nous n'adorons point les croix, ny les desirons adorer*, c'est à dire, en leur matiere ny en leur forme. Mais il ne defnie pas qu'en icelles nous n'adorions celuy qui a souffert en la croix pour moyenner enuers son Pere nostre redemption. Qu'ainsi ne soit il dit que l'homme qui estend ses bras, a la forme de la Croix en foy, & neantmoins il ne le faut pas adorer à raisõ de ceste forme là. De mesme il dit, que les enseignes ou guidõs que l'on porteés armées, & les mas des nauires ont la forme de Croix, & neantmoins on ne les adore pas, non plus qu'on les adoroit deuant que nostre Seigneur eut enduré; ce qui signifie que l'on n'adore pas la Croix

à cause de sa matiere ou de sa forme, mais à cause de celuy qui a accompli en icelle le mystere de nostre redemption. De sorte que nostre adoratiō ne se rapporte pas à la Croix, mais à celuy qui l'a sanctifié par l'atouchement de son precieux corps & sang, comme nous auons jà allegué de S. Iean Damascene. Partant il est tout euident que Loque abuse de ce passage d'Arnobius le prenāt puremēt & simplemēt, & en delaisāt l'interpretatiō qu'il en a dōné, en laquelle est declaree son intētion.

Il allegue par apres vn faict d'Epiphanius ancien Euesque fort renommé & celebre par sainct Hierosme, luy imputant qu'il a eu en execratiō le signe de la Croix, d'autant qu'il a rompu & deschiré l'image du Crucifix qui estoit à l'entree d'une Eglise, disant que cela estoit contre la doctrine & religion des Chrestiens. En ce narré, Loque dict vray quand au faict, car c'est chose vraye que celà a esté faict par Epiphanius: & quand il l'eut fait (selon le rapport de sainct Hierosme mesme) il rēdit raison de son faict tout à l'instant, disant qu'il valloit mieux employer vn tel voile auquel estoit ceste peinture, à reuestrir vn pauvre, que le pendre à la porte de

*D. Hiero.  
epist. ad  
Ioan. epis.  
Hieros.*

## Response au 4.

l'Eglise. Pourquoy dict-il cela? est-ce qu'il  
can. 36. ait improuvé les images? Non, mais c'est  
pource que (selon le recit du Concile d'E-  
libert qui fut tenu en Espagne durât l'em-  
pire de Constantin le grand) les payens  
faisoient la guerre à l'Eglise Catholique  
pour luy faire recevoir & recognoistre  
leurs idoles, & supprimer & oster totale-  
ment leurs images, voulans qu'en lieu d'i-  
celles ils recogneussent leurs faux dieux q̄  
ils adoroient en leurs idoles: & d'autant  
que (comme l'on dit) *obiectum mouet poten-  
tiam*, la presence de l'obiet induit la per-  
sonne à declarer ce qui luy en semble, les  
payens prenoient occasion de forcer &  
contraindre les Chrestiens de consentir à  
leur idolatrie par la veüe de leurs images,  
leur presentant en lieu d'icelles leurs  
idoles: & voilà comment Loque a pris  
fort mal à propos ce faict d'Epiphanius  
pour fauoriser sa mauuaise opiniõ, & im-  
prouuer l'hõneur & reuerence que rēdent  
les Chrestiens au signe de la Croix.

Oultre-plus il reproche aux Prestres  
de l'Eglise Catholique qu'ils ne consacrent  
point sans faire le signe de la Croix, com-  
me s'ils vouloient autant attribuer au si-  
gne de la Croix qu'aux parolles sacramē-



tales esquelles consiste leur consecration, & pour blasmer ceste intention, il allegue le canon *postea de consecrat. dist. 4.* Par lequel il est dict que le signe de la croix se doit faire nommément au cœur ou au front pour chasser le diable & le garder d'approcher, comme concluât que puis-que le canon ne dict point que le signe de la croix soit necessaire en la consecratiō, pourneant le Prestre faiët ce signe à la cōsecration.

Nous respondons que la consecration ne se fait point par le signe de la croix, ains seulement par les paroles sacramentales, & que neantmoins l'Eglise iustemēt a ordonné que le signe de la croix se fait en toute consecration, pour monstrier par iceluy signe que les Sacrements ont leur force de la passion de nostre Seigneur laquelle a esté accomplie en la croix, & sans laquelle passion les sacrements de la loy Euangelique n'auroient non plus de force & vertu q̄ ceux de la loy Mosaique.

De mesme temerité il tourne en rifee le nombre des signes de la croix que fait le Prestre en sa celebratiō: & en remarque en sommaire dix neuf. Premièrement trois au commencement du Canon, où il est

## Responce au 4.

dict, *Hæc dona, hæc munera, hæc sancta sacrificia illibata*, Dōt il estime que la raison ne soit autre que la representation des trois personnes diuines, c'est à sçauoir du Pere, du Fils, & du saint Esprit: chose de laquelle pour le vray il ne peut rendre raison, encores qu'elle se puisse soustenir. Il ne dit point quelle cōuenance ou proportion assuree se trouue de ces trois choses aux trois personnes diuines, soit qu'on les vueille prēdre en leur ordre, ou les accommoder à volonté aux trois personnes diuines: Mais telle est l'opinion de Loque pour estre trop peu versé & entendu aux mysteres de la sainte Messe. S'il eut cōmuniqué avec ceux qui font profession de la celebrer, il eut appris d'eux, & particulierement du Pape Innocent 3. que les parolles du canon de la Messe tendent à deux fins, sçauoir est à la consecration, & à l'effect d'icelle, & les signes ou cōsignations qui se font en forme de croix seruent à rememorere l'histoire de la passion de nostre Seigneur, en laquelle le signe de la croix a commencé à auoir sa vertu: & laquelle nous fait foy que le Fils a esté liuré à la mort par le Pere, par Iudas & par le peuple. Par le Pere, d'au-  
tant

tant que (comme dit saint Paul) *proprio filio non pepercit Deus, sed pro nobis omnibus tradidit illum.* Dieu n'a pas pardonné à son propre Fils : mais il l'a liuré pour nous tous. Ce que nostre Seigneur mesme a protesté quand il a dict à Pilate qu'il n'auoit aucune puissance sur luy sinon entant qu'elle luy estoit donnee d'enhaut, c'est à dire, de la diuinité; premieremēt du Pere (comme dit est) puis du Fils, lequel (cōme dit saint Pierre) *Tradidit iudicanti se iniuste* : s'est liuré foy mesme à celuy qui le iugeoit iniustement : puis aussi du saint Esprit, lequel a prophetizé par la bouche de Cayphe, disant, *Expediit vt vnus moriatur populo, & non tota gens pereat*, Il est expedient qu'un seul meure pour tout le peuple, & que toute nostre nation ne perisse point. Quand à Iudas, c'est vne chose toute notoire qu'il l'a liuré par le signal du baiser. Quand aux Iuifs aussi, c'est vne chose toute apparente qu'ils l'ont liuré à Pilate, lequel luy a dit, *gens tua & pontifices tui tradiderunt te mihi*, Ta nation & tes Pōtifes t'ont liuré à moy. Quand à ce qu'il a esté liuré de Dieu, cela s'est fait par vne grande charité pour le regard du Pere & du S. Esprit, d'autant que l'escriture dit, *Sic Deus dilexit mō-*

Rom. 8.

Ioan. 19.

1. Petr. 2.

Ioan. 18.

Lu. 22.

Math. 26.



## Responce au 4.

Iean. 3. *dū vt vnigenitum suum daret*, que Dieu a tellemēt ayiné le mōde qu'il a dōné son Fils pour luy: Luymesme du grād amour qu'il a porté au monde, il s'est liuré, *tradidit seipsum pro me*, dit sainct Paul, Gal. 2. il s'est liuré pour moy. La trahison de Iudas par laquelle il a esté liuré aux Iuifs est procedee d'auarice, car il a accordé aux Iuifs de leur liurer moyennant la somme de trente deniers. Les Iuifs l'ont liuré à Pilate par enuie. Dieu l'a donc liuré par vn don qu'il en a fait aux hommes. Iudas l'a liuré pour vn present d'argent qui luy en a esté fait. Les Iuifs l'ōt liuré en sacrifice qui en a esté fait en la croix: & voilà cōment il est dit, *hæc dona, hæc munera, hæc sancta sacrificia illibata*. Sus chacune desquelles proprieté se fait vn signe de la croix, pour signifier qu'il a esté liuré de Dieu le Pere, le Fils, & le sainct Esprit qui ont vne seule diuinité, de Iudas aussi & des Iuifs à vne mesme fin, qui estoit de souffrir la mort en la croix: & voilà pourquoy sont faicts ces trois signes de la croix, desquels Loque se tourmente si fort pour n'auoir regardé soigneusement aux raisons lesquelles ont meu les Apostres & toute l'Eglise de les obseruer.

En apres il s'arreste sus cinq autres signes

de la croix que fait le Prestre en vne priere proche de la consecration contenant ces mots, *Quam oblationem tu Deus omnipotens in omnib<sup>9</sup> quesumus benediētā, ascriptā, ratā, &c.* là où il fait sus chacū de ces trois derniers mots vn signe de la croix estendāt sa main esgalement sus le calice & sus le pain qui sont preparez pour faire la consecration: puis disant ces mots, *ut nobis corpus & sanguis fiat, &c.* à chacū de ces deux mots *corpus & sanguis*, il fait encores vn signe de la croix, & sont les cinq desquels entēd parler Loque en cest endroit, les rapportant ou aux cinq iours d'interualle qu'il conuiēt compter depuis le iour des rameaux iusques au iour de la passion, ou aux cinq playes de nostre Seigneur, ou biē rapportant les trois premieres à la deliurāce qui a esté faicte de la personne de nostre Seigneur aux Prestres, Scribes & Phariseens: celle qui se fait sus l'Hostie, à la persōne de nostre Seigneur Iesus Christ, & celle qui se fait sus le calice, à la personne de Iudas.

Ces expositions ne semblent estre hors de raison. Toutesfois si Loque eut bien communiqué avec ceux qui font profession de rēdre raison des misteres de la messe, il en eut peut estre allegué d'autres non

### *Responce au 4.*

moins pertinentes, d'autant qu'en ayāt esgard aux diuers effects de ce Sacremēt du precieux corps & sang de nostre Seigneur, le Prestre requiert & supplie Dieu vouloir donner cinq vertus à son oblation; sçauoir est premierement, La rendre beneste, afin que par icelle nous soyons benests de Dieu. L'annombrer avec les autres oblations qu'il a eu pour agreables, afin que par icelles nous-mesmes soions annombez avec les esleus de Dieu. L'approuuer, afin que par icelle nous soyons nous-mesmes approuuez de Dieu pour estre incorporez au corps mystique (c'est à dire) en l'Eglise militāte de nostre seigneur Iesus-Christ pour estre dignes membres d'icelle. L'approuuer pour raisonnable, afin que puissions par icelle renoncer aux passions & affections brutales ausquelles le plus souuent nous nous laissons aller. L'auoir pour agreable afin que par icelle nous puissions agreer à son fils vnique.

Selon l'expositiō du Pape Innocent 3. ces cinq mots emportent vne grande cōtrarietē de ceste oblatiō au maudit sacrilège du traistre Iudas, lequel ayāt esté supplanté par le diable commit vn grand sacrilège lors qu'il feit promesse aux Iuifs



de leur liurer nostre Seigneur, pour se recompenser de la perte qu'il pensoit auoir fait en l'effusion de l'onguēt precieux que la Magdelaine auoit respādu sus les pieds d'iceluy, par le prix de trente deniers qui luy furent accordez. Or ceste venditiō fut maudite & descree, elle ne proffita de riē à sō autheur ny aux luifs ausquels elle fut faite, ains leur tourna à confusion, elle fut meschante & detestable. Iudas ayma la malediction & elle luy aduint, il detesta la benediction & elle s'esloigna de luy. Au contraire de ceste venditiō, le Prestre supplie Dieu & luy requiert que son oblation soit beneiste, receuē deuant sa Majesté diuine, & approuuee, trouuee raisonnable, & agreable, & ce par le merite de la passion & mort que nostre Seigneur a souffert en la croix, de laquelle le signe est representé en la prononciation de ces mots, pour nous faire entēdre que la vertu de ceste oblation est en l'oblation sanglāte que nostre Seigneur a fait pour nous à son Pere, quand il a offert son propre corps à la mort pour nostre redemption, attendu qu'il a dit en donnāt ce Sacremēt, qu'il donnoit ce mesme corps, lequel deuoit estre liuré pour no°, & ce mesme sang

## *Responce au 4.*

qui deuoit estre respādu pour nous: ce qui ne se peut entēdre que par la croix, pour ce qu'il a souffert en la croix: & voilà pour quoy le signe de la croix est fait en la prononciation de tels mots. Brief, le signe de la croix ne se fait point sans signification & mystere tendant à representer quelque chose de l'histoire de la passion de nostre Seigneur, comme nous estant appliquee pour nostre redemption.

Or Loque n'oubliant point son mestier de raillerie, dit, que si chacun de ces signes de la croix a ceste vertu & efficace d'obtenir misericorde au Prestre qui celebre, & à ceux pour lesquels il celebre la Messe, il y aura de la misericorde à reuendre.

Voilà comment il a protesté en sa preface de n'vser point d'ataques iniurieuses, mais il n'a pas protesté de ne point blasphemer qui est la cause qu'il en fait fort peu de consciēce, comme en cest endroit auquel il se mocque de la misericorde, cōme s'il n'y auoit pas au monde assez de peché pour l'estendre & employer.

Il dit outre plus que nostre Seigneur n'a pas fait tant de signes de la croix en sa cōsecratiō, qu'il appelle sa sainte cene; nous dirons sa cene mystique, mais nō pas cene

telle que s'imaginent nos nouueaux Euāgelistes. Il adiousté qu'il n'y a aucun commandement en la parolle de Dieu de faire ces signes de croix en la celebration de la sainte Messe, qu'il n'y en a aucū exēple, ny aucune promesse, & q̄ partāt ils se font sans foy, & qu'ils ne peuuent auoir aucune efficace pour l'absolution de nos pechez.

Pour responce, nous voulons bien que nostre Seigneur en sa consecratiō n'ait fait aucun signe de la croix, d'autant que pour lors il n'auoit encores sanctifié la croix par l'attouchement de son corps. Nous voulons bien aussi qu'il n'ait donné aucun exemple ny commandemēt d'en vser en la cōsecratiō pour la mesme raison. Mais il n'a pas osté à son Eglise la puissance d'en ordonner & aduiser, ains luy a donné son saint Esprit pour la conduire & inspirer de ce qui seroit de besoin pour le bien de la foy & pour le salut des ames. Si donc le diable deteste le signe de la croix comme estant la vraye marque de sa confusion & condānation, pourquoy l'Eglise ne l'aura elle pas en hōneur, puisque c'est la marque de nostre redēption? Mais telle est la licēce des heretiques d'approuuer pour bō ce qui leur plaist, & reprouuer ce qui leur



## Response au 4.

Lib. 1. ad  
Marcion.

desplait. Car (cōme dit Tertullia) *eade penē  
semper fuit poetica, pictoria & hæretica licētia*,  
les heretiques se sont tousiours donné la  
mesme licence des Poëtes & des peintres.

Il vient en apres à blasmer ceste clause  
de la susdite absolutiō en laquelle le Pre-  
stre dit, *& per merita beatorū Apostolorū &  
omniū Sanctorum*. Sus quoy il allegue pour  
tout vne telle quelle aparente contrarieté  
de la remissiō gratuite que Dieu nous fait  
& de la satisfaction qui depend de nous:  
disant, si ie satisfay à mon creditur il ne  
me remet point ma debte gratuitemēt, &  
au contraire, si mō creditur me remet &  
quitte ma debte gratuitemēt, ie ne luy sa-  
tisfay point. Il allegue aussi S. Paul, pour  
confirmer son dire, lequel dit, *Omnes pec-  
cauerunt & egēt gloria Dei, iustificati gratis per  
gratiā ipsius, per redēptionem quæ est in Christo*  
Rom. 3. *Iesu*, que tous hommes ont offencé & ont  
besoin de la gloire de dieu, & sont iustifiez  
par sa grace, par la redemption que nous  
tenons de Iesus Christ. Il adioust ce que  
dit le mesme S. Paul, *Gratia saluati estis per  
fidē, sed non ex vobis*, vous estes sauuez par la  
Eph. 3. grace de Dieu, par la foy: mais cela ne viēt  
point de vous. Comme aussi il allegue ce  
que dit le mesme autheur, *Non ex operibus*

*iustitiæ quæ fecimus nos, sed secundum suam mi-* Tii. 3.  
*sericordiam saluos nos fecit per lauorum regene-*  
*rationis & renouationis Spiritussancti, &c.*  
 Que Dieu ne nous a pas sauué par les œu-  
 ures de iustice que nous auons faict, mais  
 par sa misericorde, & par le lauement du  
 baptesme.

De ces passages & autres semblables il  
 tire ceste conclusion que nous ne pouuõs  
 estre iustifiez par nos merites & bonnes  
 œuures, & que les merites & œuures des  
 autres, comme des Saincts ne nous peu-  
 uent iustifier deuant Dieu, ains que c'est la  
 seule grace de Dieu laquelle nous iustifie  
 & nous sauue. Et se persuade Loque par  
 quelques sylogismes tendans tous à ceste  
 conclusion, qu'il tire de ces passages, qu'il  
 a luy seul, cause gagnée contre la doctri-  
 ne que tient l'Eglise Catholique, du meri-  
 te des œuures. Comme si les sylogismes  
 des Dialecticiens estoient suffisants pour  
 regler la doctrine de l'Eglise, voire de l'es-  
 criture mesme à laquelle l'Eglise se con-  
 forme du tout.

Nous auons donc à prouuer au con-  
 traire que l'homme ne peut estre sauué s'il  
 n'apporte son consentement avec la gra-  
 ce qui luy est presentee de Dieu, attendu

Responce au 4.

que Dieu desire le consentement du pecheur avec la vocatiō par laquelle il l'appelle à la voye de salut. Premièrement, il  
*Exch. 18.* dict, *nolo mortem peccatoris, sed magis ut conuertatur & uiuat*, ie ne veux pas la mort du pecheur, mais ie veux qu'il se conuertisse, & qu'il viue. Il ne dit pas, ie veux conuertir le pecheur, mais il dit, ie veux que le pecheur se conuertisse. Il veut donc le consentement du pecheur, ainsi comme il veut son salut. Comme quand nostre Seigneur Iesus-Christ a dit, *Si vis ad vitam*  
*Matt. 19.* *ingredi, serua mandata*. Si tu veux venir à la vie eternelle, garde les commandemens, declarāt euidentement qu'il est en la puissance du pecheur de paruenir à la vie eternelle, comme aussi il entend qu'il est en la puissance du pecheur de garder & accomplir les commandemens par la voye desquels l'homme peut paruenir à la gloire eternelle. Sus quoy nous demandons, pourquoy est ce, que Dieu veut le cōsentement du pecheur pour le sauuer, si ce n'est que le pecheur apporte quelquefois de la contrarieté à la volonté de Dieu? Or Loque ne peut nier que le pecheur ne cōtreuienne à la volonté de Dieu: comme aussi il ne peut nier que Dieu veut qu'un



chacun soit sauué, *Vult omnes saluos fieri* & <sup>1. Tim. 2.</sup>  
*ad agnitionem veritatis venire*, Il veut qu'un  
chacun soit sauué, & que chacun paruiē-  
ne à la cognoissance de la verité, d'autant  
que c'est la voye de salut. Comment donc  
ce fait il, que la volonté de Dieu qui est  
de sauuer vn chacun, n'est pas accomplie,  
& que beaucoup deuiennent enfans de  
perdition, non pas comme estans deiet-  
tez entierement de Dieu, mais comme re-  
sistans à sa volonté, & mesprisans ses cō-  
mandemens? La verité est que gratuite-  
ment nous sommes sauuez par le sang de  
nostre Seigneur Iesus-Christ, & par le la-  
uement du baptesme: Mais, veu que le  
sang de nostre Seigneur est plus que suffi-  
sant pour sauuer tous les hommes, & que  
sa grace s'estend sus tous, d'où vient que  
l'effect n'est pas esgal en tous, sinon de la  
contrauention qu'aucuns y apportent?  
Pour oster donc cest empeschement, faut  
accomplir le dire de saint Paul, & coo-  
perer à la bonne volonté, & à la grace que  
Dieu nous presente, afin que nous puis-  
sions dire avec verité ce que dict S. Paul,  
*Coadiutores Dei sumus.* C'est pourquoy il <sup>1. Cor. 3.</sup>  
desire que nous compatissions avec no-  
stre Seigneur, pour regner avec luy, quād

## Responce au 4.

2 Cor. 1.

il dict, *si socij fueritis tribulationum, eritis & consolationis*, Si vous estes compagnons de tribulation vous participerez aussi à la consolation: Ce qui nous demonstre que nous ne pouuons communiquer à la tribulation de nostre Seigneur ou des Saints sans meriter, bien que la grace de ce merite ne soit de nous. Car puis qu'ainsi est qu'en communiquant aux passions de nostre Seigneur ou des Saints, l'homme acquiert la participation de leur gloire, celui qui n'y cōmunique point n'acquiert rien, pour ce qu'il ne merite rien. Et si les hommes ne peuuent rien meriter de leur part, comment est-ce que l'escriture nous dit, *Orate pro inuicem ut saluemini*? Priez mu-

1ac. 5.

tuellemēt les vns pour les autres, afin que vous soyiez sauuez? Celuy qui coopere ou interuient au salut de son prochain ne merite-il pas (sans comparaison) plus que celuy qui ne s'y employe point? Si donc l'homme n'apporte rien de sa part à l'auancement de son salut par ses œuvres, à quoy tient-il que tous hōmes ne soient sauuez, veu qu'il n'y a point d'acception de personnes en Dieu, & que de sa part il desire qu'un chacun soit sauué? Accuser Dieu d'iniustice, & dire qu'il voudroit de

sa volonté absoluë sauuer les vns, & perdre les autres, sans auoir esgard à aucune cause, merite, ou demerite des personnes, c'est errer trop lourdement, & accuser Dieu d'iniustice. N'a il pas reproché à son peuple d'Israel, que sa perdition venoit de luy? *perditio tua ex te Israel.* Il luy a dit ta *Osé. 13.* perdition vient de toy mesme Israel: cōme disant, elle ne vient pas de moy. Quād nostre Seigneur iugera les hommes, sus quoy fondera-il son iugement, sinon sus le defaut des œuvres meritoires? Car il *Mat. 25.* leur reprochera qu'ils n'ont pas accompli les œuvres de misericorde. Or est ce vne chose toute notoire, que si accomplir les œuvres de misericorde, est auoir merité, il faut au contraire que ceux qui ne les auront pas accompli, ains plustost eu en mespris, auront demerité. Et ceux qui les ont accompli, pour qui ont il merité, n'est ce pas pour eux mesmes? Et ceux qui ont prié pour autrui, n'ont il pas merité pour ceux pour lesquels ils ont prié? *Mat. 8.* Comme pour exemple, le Centurion *Mat. 15.* pour son seruiteur, la Cananee pour sa *Luc. 4.* fille, & saint Pierre pour sa belle mere, & pour sa fille propre, leur ayant impetré guarison de leur fiebure? C'est donc



*Responce au 4.*

errer trop lourdement dire que nous ne pouuons par nos œuures meriter pour nous, ny pour nostre prochain. Et ainsi comme ceste proposition est erronee en foy, ainsi sont les syllogismes de Loque, par lesquels il s'efforce de la prouuer, attendu que, & l'escriture, & l'experience y est du tout contraire.

Entre tous les syllogismes qu'il nous propose pour prouuer son dire, cestuy-cy semble presser plus que tous les autres.

Tout merite (dict Loque) presuppõe trois conditions. La premiere, que nous donnions du nostre: car celuy qui donne aux pauures des deniers de son maistre ne merite point enuers eux; plustost le merite (s'il y en a) appartiendra au maistre. La seconde, que nous ne foions point obligez de faire ce que nous faisons, car celuy qui paye vne debte ne merite rien en la payant. La troisieme, qu'il y ayt egalité en ce que nous donnons ou faisons, & entre ce que nous receuons, car si nous donnons vn verre d'eauë à nostre Roy, meritions nous qu'il nous donne en recompense vne belle ville ou vn grand chasteau?

Mais ces trois conditions ne se trouuēt nullement en nous , s'il est question de meriter enuers Dieu. Car premierement nos bōnes œuures ne font point de nous, mais de Dieu , selon saint Paul, lequel dit, *Deus est qui operatur in nobis velle & perficere*: C'est Dieu qui nous donne le vouloir & le parfaire selon sa bonne volonté. Et ( comme dit saint Augustin ) *donat* 10.7.li. de gra. & li. arb.c. 6. *sua coronat Deus, non merita tua*, Dieu corōne en toy ses dons & non tes merites. Secondement (dit-il) nous sommes obligez à l'obseruation de la loy , tellement que quand bien nous aurions fait toutes les choses que Dieu nous a commandees, neantmoins si aurions nous tousiours à nous recognoistre seruiteurs inutiles. Tiercement (comme il dit) il n'y a aucune egalité entre nos œuures & le don de la vie eternelle (comme dict saint Paul) *Non sunt condignæ passionēs huius seculi ad futuram gloriam quæ reuelabitur in nobis*. Rom. 8. Ce qu'il tourne mal à propos : car la vraye traduction est telle , Les souffrances du temps present ne font à l'equipolent de la gloire à venir , laquelle sera reuelee en nous. Voilà comment il conclud que nous ne pouuons rien meriter par nos

## Responce au 4.

œuvres deuant Dieu.

Pour respondre à ce beau syllogisme; Premièrement nous auons à dire que la raison de la premiere proposition a lieu seulement és affaires qui se traictent entre les hommes, & non en la communication que peut auoir l'homme avec Dieu: D'autant que les œuvres & actions de Dieu se comportent autrement que celles que traictent les hommes les vns avec les autres, car sans ceste distinction, la premiere proposition de ce syllogisme se trouuera vraye. Partant nous disons que ceste proposition est captieuse, d'autant qu'elle afferme vniuersellement ce qui se doit expliquer & dire sous condition, car il est certain que Dieu nous remet nos pechez gratuitement, & que ceste remission ne vient point de nostre satisfactiō, pource que le seul Fils de Dieu a satisfait dignement pour nous en la croix: Elle ne vient point aussi de nos merites, pource q nous ne pouons meriter dignement nostre salut, attendu que le mal que nous faisons iournellement excède le bien & la iustice que nous pouuōs auoir en nous: Car si nous disons que nous n'auons point de peché, nous nous seduison nous mesmes.



mes. Et si nous nous efforçons de faire tout le bien que nous pouuons, encores sommes nous seruiteurs inutiles. Et toutesfois si nous n'emploions quelque satisfaction de nostre part, & si nous ne faisons quelques œuvres meritoires pour reparation de nos offences, la satisfaction & le merite de nostre Seigneur ne nous seront point appliquez. Car s'il ne faut point de satisfaction & d'œuvres meritoires de nostre part, pourquoy est ce que nostre Seigneur nous oblige tous de faire penitence sus peine de damnation, disant, *si vous ne faiëtes penitence, vous perirez* Luc 13.  
*tous.* Pourquoy dit-il, *si tu veux venir à la* Matt. 19.  
*vie eternelle, garde les commandemens?* Si celuy demerite qui transgresse les commandemens, il s'ensuit donc que celuy qui les accomplit, merite. Pourquoy est il dit en Moyse, que, *selon la mesure de l'offence, la* Dent. 25.  
*peine doit estre ordonnee contre le pecheur?*

Entre les hommes donc ceste raison pourra estre vallable qu'a rendu Loque à sa premiere proposition, disant, que satisfaction & remission gratuite sont choses contraires. Car (comme il dit) si ie satisfay à mon creditteur, il ne me remet point ma debte gratuitement: (ce qui se

### *Responce au 4.*

dit manifestemēt de la fatisfaction qui se fait d'homme à hōme ) & ne se peut dire de mesme par comparaïson de l'homme pecheur à Dieu qui est iuge misericordieux ; que si le pecheur satisfaiēt à Dieu par sa repentāce & penitence, en tāt qu'en luy est, que Dieu pour cela ne luy remette point sa debte ou faute gratuitement, attendu qu'il n'y a pas de comparaïson de l'homme à Dieu , comme de l'homme à l'homme.

*D. Tho. 1.*

*2. q. 114.*

*art. 3.*

C'est ce que nos docteurs scolastiques entendent quand ils disent qu'il y a deux sortes d'œuvres meritoires , parce q̃ nous les pouuons considérer selon qu'ils procedent de la faculté du liberal arbitre de l'homme, ou en tant qu'ils procedēt de la grace du S. Esprit. Selon la premiere cōsideratiō, il est tout certain qu'il n'y a point d'egalité de l'œuvre de l'homme à la grace de Dieu, laquelle est infinie: mais il y a bien quelque egalité de proportion, parce qu'il semble conuenable que Dieu selon l'excellence de sa vertu , donne quelque recompense à l'homme qui se met en tout deuoir de luy complaire. Mais ( si selon la seconde cōsideration ) nous voulons rapporter l'œuvre meritoire de l'hō-

me à la grace du saint Esprit, à laquelle il s'est tousiours conformé quand elle luy a esté donnée de Dieu, l'œuvre meritoire merite par raison ou condignement la vie eternelle; par ce que la vateur du merite est rapportee du tout à la vertu du saint Esprit, lequel incite l'homme à desirer & prouuer de tout son pouuoir la vie eternelle. Le premier merite est appellé merite de conuenance, *meritum de congruo*. Le second, *meritum de condigno*, merite de cōdignité: D'autant que, si le saint Esprit a esmeu & incité l'homme à se pourchasser de tout son pouuoir la vie eternelle, & l'homme y a obey, il s'est rendu digne d'icelle vie eternelle.

Ces distinctions des docteurs scolastiques faschent estrāgement nos nouueaux Euāgelistes, & leur desplaisent ny plus ny moins que l'amertume de la medecine au malade. Mais ainsi que le malade qui prēd avec grand courage la medecine qui luy est ordōnee, paruiēt par icelle avec le bō deuoir qu'il apporte de sa part à la santé qu'il desire: ainsi si les nouueaux Euangelistes veulēt deposer leur mauuaise inclination, & goustier avec vn peu de peine les distinctions & raisons des scolastiques, ils



## Responce au 4.

y prendront plaisir, & condamnerōt eux mesmes leur opinia<sup>st</sup>reté precedēte. Mais ce qui les en empesche, est qu'ils n'y procedēt pas par prieres & par pureté de vie. Car (cōme dit S. Bernard, bon Docteur & bō

ad fratres  
de monte  
Dei.

François) *cœlestia arcana non verbo docentur, sed Spiritu reuelantur. Tamen, quod sermo non explicat, consideratio quærat, oratio expetat, vita mereatur, puritas assequatur.* Les secrets des choses diuines & celestes ne se montrent pas par le discours humain, mais ils se reuelent par le S. Esprit : Toutesfois ce que la parole n'explique point, la cōtemplation le doit rechercher, l'oraison le doit implorer, la vie le doit meriter, la pureté de vie le doit acquerir & obtenir.

Loque & ses consors, aduiferont en cōbien, & quels de ses points ils manquent, quand ils veulent paruenir à l'intelligēce de quelque article de foy, ou de doctrine Ecclesiastique, deuāt que d'en resoudre & escrire, comme en ce point des œuures meritoires & du salut qui en depend, auquel il s'est trop hasté de dire son aduis, & de cōtredire la doctrine de l'Eglise: Car il a accōmodé ses raisons ou syllogismes à la pratique des actions humaines, tirant d'icelles les conclusions de la iustice, mi-

sericorde & grace diuine, qui est trop notoirement abuser le monde.

Partant il a dit tres-mal à propos qu'en supposant trois cōditions en la nature du merite, sçauoir est, que nous donnions du nostre, q̄ nous ne soyons point obligez de faire ce que nous faisons, qu'il y ayt egalité entre ce que nous donnons ou faisons, & ce que nous receuons, nous ne pouuōs meriter de Dieu. Si la comparaison des moyens de meriter de Dieu & des hōmes estoit bonne, sa conclusion seroit bonne: Mais pource qu'en ceste suppositiō il veut egalier les merites enuers Dieu & enuers les hōmes, ce qui est notoiremēt abusif, sa cōclusion & sa maieure sont engagees en vne mesme fauseté. Et en cela est le general abus de tous les argumēs qu'il allegue contre les merites des œuures de l'hōme, quelque fondemēt de l'escriture qu'il leur puisse dōner; abusant aussi bien du fondement, c'est à dire de l'escriture qu'il prend pour prouuer son dire, cōme des conclusions mesme qu'il entire, sous pretexte de la loy des syllogismes qu'il dit garder. Car riē n'empesche que des beaux syllogismes, & des beaux passages de l'escriture, ne s'accōmodent à des faulses conclusions. Le

## *Responce au 4.*

*Math. 4.*

diable pere des heretiques , qui en a esté ouurier en la tétation de nostre Seigneur s'est seruy de l'escriture, cōtre luy, taschāt de le faire cōdescēdre à l'effet de sa tētatiō.

De mesme temerité il allegue pour improuuer les merites des œuures, des passages des docteurs de l'Eglise, qui semblent estre formellement contraires à ceste doctrine des œuures meritoires, ne regardāt pas que lesdits docteurs, comme tenans entierement l'intention de l'escriture & de l'Eglise, ont trop mieux entendu que luy, la concurrence de la grace de Dieu, & de la bōne volonté & effort de l'homme, condescendant à l'ordonnāce de Dieu, & se conformāt à icelle en tout & par tout. Ce qu'estāt suffisamment descouuert par les respōces q̄ luy auons dōné sur les passages qu'il a allegué de l'escriture, cōtre ceste doctrine, nous nous deporterōs de respondre particulièrement à iceux passages des docteurs par luy alleguez, cōme estāt chose superflue, & qui ne seruiroit qu'à remplir le papier.

Et d'autant qu'il s'arreste aussi à refuter quelques passages de l'escriture, sus lesquels est fōdee ceste doctrine des œuures meritoires, il semble bon de les rememo-



rer l'un apres l'autre, & examiner les contradictions qu'il y apporte pour reprouver icelle doctrine, pour ne rien laisser indecis des doubtes qu'il pretend laisser en l'esprit du Chrestien, par ses refutations telles quelles.

En premier lieu, il se moque de ceux qui tirent ceste doctrine, d'un passage de l'Ecclesiastique, auquel il est dit (selon qu'il rapporte) *la misericorde donnera lieu à un chacun,* *Ecc. 16.*  
*selon le merite de ses œuvres.* Or il blasme ce fondement des merites en deux sortes. Premierement, il dit, que le liure de l'Ecclesiastique est apocryphe, & que pour ceste cause il n'en faut tirer aucun article de foy. Secõdement il dit q ce passage n'est point cité fidelemẽt, & dit aussi qu'il y a ainsi selon le grec, de mot à mot, Il n'y aura biẽ-fait auquel Dieu ne donne place, car chacun trouuera selon ses œuvres: Esquels propos (dit il) n'est faite aucune mention du merite: Par ainsi il pense auoir cause gaignee.

Nous respondons dõc à sa premiere raison, par laquelle il maintiẽt pour apocryphe le liure de l'Ecclesiastique, duquel est tiré ce passage qui nous fait foy de ceste doctrine, que S. Hierosme doit estre creusé ce differẽt, plustost que Loque, & tout

## Responce au 4.

in Symbo-  
lo Ruffini.

autre qui peut estre de ceste nouuelle farine. Or S. Hierosme recherchant la difference des liures de l'escriture, qui doiuent estre tenus pour canoniques, & de ceux qui ne sont tenus pour tels, dit, *In scriptura libris hi nō tenentur canonici, sed tantū Ecclesiastici, Tobias, Iudith & Macabeorum libri*: Qu'entre les liures de l'escriture il y en a trois lesquels ne sont pas tenus pour canoniques, ains seulement pour Ecclesiastiques, sçauoir est, Tobie, Iudith, & les deux des Machabees. Il n'eut pas oublié d'y comprēdre l'Ecclesiastique, s'il eut pensé qu'il n'eut esté canonique. Ce que nous verifiōs plus amplement en sa preface sus le liure des Prouerbes, où il dit, qu'il trouue entre les liures Hebreux, le liure que les Latins ont appellé Ecclesiastique, autrement intitulé Paraboles; ce qui fait penser qu'il le tient de mesme autorité entre les Hebreux, q̄ le liure des Prouerbes: Et encores quād il ne seroit du canō des Hebreux, il ne s'enfuit pour cela qu'il ne fut approuué de l'Eglise aussi bien comme Tobie, Iudit, & les liures des Machabees, desquels a parlé S. Hierosme en ce passage allegué cy dessus: Desquels toutesfois il ne faut refuser la bonne doctrine ny aucun fondement d'icelle, s'il en peut estre tiré.

Et par le mesme sainct Hierosme comme tres-assuré & fidelle Interprete de l'escriture, nous respondons à la seconde raison dudit Loque, qu'il nous faut prendre les propres termes de la version Latine qui sont tels, *Omnia misericordia faciet locum unicuique secundum meritum operum suorum, & secundum intellectum peregrinationis ipsius.* Par laquelle version Latine nous cognoissons qu'en la traduction que pretend faire Loque selon le Grec, il impose à l'escriture. Car il dit que (selō le texte Grec) il faut lire que chacun trouuera selon ses œuures: Premièrement, cela ne se trouue point en ce texte Latin, fidelement traduit du Grec: Secondement, en ce qu'il est dit que chacun trouuera selon ses œuures, il est tout notoire que cela emporte quelque merite: car l'hōme ne peut trouuer selon ses œuures sans consideratiō de merite; comme en ce texte de l'Euangile *Reddet unicuique secundum opera sua*, auquel il est dict que Dieu rendra à vn chacun selon ses œuures, ce qui emporte manifestement quelque consideration de meriter. C'est donc par Loque que ce passage de l'Ecclesiastique n'est point cité fidelement, & non par les Catholiques, com-

*Ecclesi. 16.*

*Matth. 16*



### Responce au 4.

me il se voit par le texte latin cy dessus allegué.

Heb. 13.

En apres il tasche à corrompre la vraye & naïfue exposition d'un passage de saint Paul aux Hebreux, auquel il est dict, *Beneficentia & communionis nolite obliuisci, talibus enim hostiis promeretur Deus*, & l'allegue en François en ceste sorte pour se moquer des merites, *Ne mettez point en oubly beneficence & communication, car par tels sacrifices promeretur Deus*, comme si c'estoit mal interpreté, dire que par tels sacrifices on merite Dieu ou la grace de Dieu : & là il dit que ces paroles de l'Apostre sont fausement alleguees, pource qu'au lieu de *promeretur*, il faut dire, *delectatur*, comme si on disoit que Dieu prend plaisir à tels sacrifices. Mais il y a grande difference entre ces deux mots, *promeretur*, & *delectatur*; & est certain que l'intentiō de l'escriture n'est point d'entendre *delectatur* en *promeretur* : car ce mot *promeretur* se prend manifestement de la part de la creature qui s'efforce de meriter, & ce mot *delectatur* est attribué à Dieu & non à l'homme qui traueille pour meriter; & prendre l'un pour l'autre ce seroit entierement chāger le sens.

Nous voilà donc en controuerse pour l'exposition de ce texte de saint Paul: De qui en prendrons nous le iugement, de Loque & de ses adherents, ou des Peres de l'Eglise, & de l'Eglise mesme? Selon la glose ordinaire, en laquelle est le sens de l'Eglise *promeretur* est tourné *placatur*, comme en disant que par telles hosties Dieu est appaisé. Ainsi l'a exposé saint Iean Chrysostome. Cartusian dit *pro premio acquiritur*, que le salaire de telles hosties est Dieu mesme, c'est à dire la grace de Dieu, ou la jouissance de sa face: Et Theodoret anciē auteur ensuit ceste expositiō, disant que celui qui exerce la beneficence donne ses moyens temporels, mais Dieu rend benediction. Or si irriter Dieu est demeriter, appaiser Dieu est meriter: & par consequent selon l'exposition de saint Iean Chrysostome le merite se trouue fondé en ce passage de saint Paul: & si (selō l'exposition de Theodoret) pour la beneficēce Dieu rend benediction, il s'ensuit infalliblement qu'en la beneficēce il y a quelque consideration de merite.

*Hom. 33.  
ad Heb.*

Et pour d'auantage se donner carriere en ceste dispute il se mocque de ce que nous alleguons ordinairement pour la

## Responce au 4.

*Dan. 4.* preuue des merites, ce passage de l'escriture, auquel Daniel conseillant le Roy Nabuehodonosor luy dit, *peccata tua elemosinis redime*, Rachete tes pechez par aumosne. Duquel passage (comme il dict) nous tirons ceste raison.

Si nous rachetons nos pechez par nos bonnes œuvres, par icelles nous meritons.

Mais nous rachetons nos pechez par nos bonnes œuvres.

Donc par icelles nous meritons.

Or il en prouue la premiere proposition par le susdit passage de la prophetie de Daniel.

Pour refuter ceste raison il dit qu'au mot de racheter il y a erreur: Ce qu'il s'efforce de prouuer par le mot Caldaïque *perat* lequel (comme il dict) ne signifie pas racheter, ains diuiser, dissouldre, rompre, oster du milieu, & par ainsi, dit-il, rachette tes pechez par aumosne & misericorde, signifie, oste tes pechez arriere de toy par vn vray estude de iustice & charité; qui est autant cōme s'il disoit, ne continue point en tes pechez, ains repēs toy de bō cœur, & declare ta repentance par bonnes œuvres: en somme, pource que ce mot *rache-*



ter, luy est preiudiciable, il n'en veut point  
vser en cest endroit pour plus aisément  
nier la doctrine des œuvres meritoires.  
Mais il ne le peut faire quelque subtilité  
qu'il cherche. Car quelle difference y-a-il  
entre ces deux, oster arriere de soy son pe-  
ché par vn estude de charité & iustice; &  
racheter son peché par charité & iustice?  
C'est vn eschange qui se fait selon le con-  
seil de l'escriture, disant, *dote & dabitur vo-* LUC. 6.  
*bis*, par lequel celuy qui donne, merite que  
il luy soit donné, & celuy qui pardonne  
merite qu'il luy soit pardonné; & ne peut  
Loque (quelque exposition qu'il apporte  
sur ce passage) en rēuerfer la vertu du me-  
rite pour desnier qu'il y soit compris, &  
iustement fondé & authorisé: d'autant que  
tout ainsi comme celuy qui achette quel-  
que chose en donne vne autre pour l'ac-  
querir, ainsi celuy qui recherche la mise-  
ricorde de Dieu, pour y paruenir, il donne  
quelque aumosne & en reçoit le fruiet, nō  
que le peu de bien temporel qu'il donne  
puisse estre iustement comparé à la grace  
qu'il pretend obtenir de Dieu, laquelle est  
incomparablement de plus grande vertu,  
mais pour cognoistre que Dieu veut que  
l'homme employe quelque chose de sa

### Response au 5.

part pour participer à sa miséricorde, laquelle sans cest esgard deuroit estre esgalement departie à tous bons & mauuais sans distinction: tellement qu'autāt feroit deuant Dieu celuy qui feroit mal, que celuy qui feroit bien. Dont s'ensuiuroit qu'il n'y auroit aucune récompense des biens-faiçts, ny aucune punition de la transgression de la loy & des commandemens, qui est du tout abolir la iustice de Dieu: & toutesfois nostre Seigneur dict à ceux qui endurent pour sa iustice, *Matth. 5. Merces vestramulta est in cælo*, vostre loyer est grand au ciel: Ce qu'il ne dit pas à tous, recognoissant (comme iuste iuge) les merites d'aucuns & les demerites des autres.

### Response au cinquiesme pretendu abus.

**P**Our cinquiesme abus il allegue vne oraison que fait le Prestre apres la confession & absolution susdite.

Ceste oraison est, *Oramus te Domine per merita Sanctorum quorum reliquie hic sunt, & omnium Sanctorum, ut indulgere digneris omnia peccata mea*, Nous te prions Seigneur, par les merites des Saints desquels les reliques sont icy, & de tous les Saints, que tu daignes pardonner tous mes pechez.

Il pouuoit dire , *vous*, à Dieu, en lieu de *tu & de roy*, pour parler plus reueremmēt à la Majesté diuine. Mais il a tesmoigné en ceste irreuerence que le respect de l'autorité de l'Eglise luy estoit aussi peu en recōmandation que Dieu mesme auquel il parle si irreueremment.

Or il dit qu'il trouue à reprendre en ceste priere vn blaspheme horrible que luy mesme y suppose , qui est que le Prestre par icelle demande pardon à Dieu nō point par nostre Seigneur Iesus-Christ, mais par les merites de tous les Saincts en general, & spécialement de ceux desquels les reliques sont au lieu où il chante la Messe , & diēt que cela n'est autre chose que se mocquer de Iesus-Christ, sçauoir est en ce qu'au lieu de Iesus-Christ en ceste oraison sont substituees des creatures , lesquelles sans le merite d'iceluy ne feroient entrees au repos eternal.

Premierement , quand à la substance de ceste oraison , nous disons que selon l'Eglise Catholique il n'y a rien qui ne soit bon & sainct & propre à exciter la deuotion enuers Dieu & enuers les Saincts , & que (combien qu'elle ne se dise egalemēt par tous lieux & par toutes personnes , &



Responce au 5.

qu'il s'en peut dire en aucuns lieux quelque autre equipolente & approchante d'icelle) neantmoins elle n'est à reprendre, comme pretend Loque la reprendre: car ce qu'il trouue à reprendre en icelle, c'est (ce luy semble) qu'il faut inuoyer Dieu le Pere par son Fils Iesus-Christ, comme il dit luy mesme, *petite in nomine meo & accipietis*, Demandez en mon nom & vous obtiendrez. Celà est vray il nous a donné luy mesme ceste loy de prier. Mais par ceste loy, a-il defendu expres de prier par les Saincts, ce trouue-il en toute l'escriture qu'il ayt iamais refusé la priere d'aucun Saint, soit des viuants en ce mode, ou des morts; & qu'il l'ait repris, qu'il l'ait eu en horreur? A-il point dit luy mesme aux siens, *qui vos audit me audit, qui vos spernit me spernit? quod vni ex minimis meis fecistis mihi fecistis?* A-il pas dit à Samuel le quel se pleignoit de ce qu'il estoit mesprisé de son peuple, *Non te sed me abiecerunt?* Si Dieu n'a point donné de vertu à ses Saincts pour les faire recognoistre par les hommes, pourquoy a-il eu pour agreables en l'ancien testament les oraisons qui luy ont esté faites au nom des peres anciens, & nommément d'Abraham Isaac & Iacob? pourquoy a-il

a-il inspiré le Prophete Dauid de dire, *Laudate dominũ in Sanctis eius*? Et si par ces mots Psalm. 150 du Psalmiste il a pour agreable la louange qui est donnee à ses Saints comme celle qui luy seroit donnee à luy mesme, qui empesche qu'il n'ait pour agreable la priere qui luy est faite par l'intercession d'un Saint, comme celle qu'on luy pourroit adresser de prime face ? Car prier dieu par l'intercessiõ d'un Saint, c'est tousiours luy adresser sa priere, & l'honorer premier, & puis le Saint à cause de luy, cõme en recognoissance de la grace qu'il a fait reluire en luy, & demander à Dieu participation de la grace & du merite du Saint par l'intercessiõ d'iceluy. Si Loque demande d'auantage d'instruction sus ce poinct, nous le renuoyons à la refutation de son troisieme pretended abus, par lequel il s'est mocqué de la confession qui se fait aux Saints.

Et quand à ce qu'il dit icy que tous les merites des Saints, (quand mesmes quelqu'un d'iceux auroit plus enduré en son corps que ne peuvent estre estimees les peines & tribulations de tous les Saints ensemble) ne sont point suffisants pour effacer le moindre peché du monde, selõ le lib. 4. de bapt.

## Responce au s.

dire de S. Cyprian qu'il allegue; cela n'est rien contre l'intercession des Saints, car nous ne disons pas que ce soient les Saints qui effacent nostre peché, quand nous les prions, & de vray nous ne les prions pas d'effacer nostre peché, mais nous les priõs d'estre mediateurs & intercesseurs enuers Dieu pour nous obtenir remission de nostre peché, recognoissans qu'estans exēpts de peché ils sont en estat de beatitude, & qu'en ceste qualité, ils sont incomparablement plus capables que nous pour nous obtenir remission & grace.

Or il s'adresse principalement à la cōmemoratiō des reliques des Saints que fait le Prestre en ceste priere, d'autāt q̄ par l'intercessiō d'iceux le Prestre supplie estre absout de sō peché pour offrir pl<sup>9</sup> dignemēt le S<sup>r</sup>. Sacrifice qu'il pretēd offrir; & pour cēt effect il prie Dieu par les merites des Saints desquels les reliques sōt en ce lieu là, c'est à dire sous cest autel, & generalement de tous les Saints. Il ne calōnie pas ceste façon de prier recognoissant qu'elle est biē fondee en l'autorité du canon *placuit*, extrait du Concile d'Affrique canō 14. rapporté par Iuo Carnotensis en la 3. partie de son decret chapitre 57. Mais il se moque de la coustume de l'Eglise qui est de

*De consec  
dist. 1.*



ne point consacrer sinon sur des autels dediez & consacrez par la presence des reliques des Saints que l'on met sous iceux; & demande, quelle vertu ont les reliques des Saints, pour rendre l'autel recommandable, & s'ils le rendent plus recommandable que le corps mesme de Iesus-Christ que le Prestre (selon son intention) tient entre ses mains: ainsi parle-il de la verité du precieux corps de nostre Seigneur, nõ de son intention (car il ne le croit pas) mais de l'intention du Prestre. Et pour continuer ses rusees, (comme ne se souvenant plus de la belle protestation qu'il a fait au commencement de son discours, de n'vser d'aucunes mesdisances ne d'attaques iniurieuses) il demande de quelle partie du corps doiuent estre ses reliques, d'un bras, d'une iambe ou d'autre membre: Car qui voudra compter les pieces qu'on imagine estre esparses en diuers oratoires ou chapelles & Eglises, on trouuera (dit-il) plusieurs corps d'un mesme Saint, & allegue pour preuue de son dire qu'il y a debat entre plusieurs villes & parroisses pour la possession des reliques que chacune d'elles presume auoir.

Laissons en arriere les railleries de Lo-

## Responce au 5.

que & de toute sa sequelle, & respondōs au fonds de la question.

Il demande pourquoy en la consecration des autels on encloist dans iceux quelques reliques des Saints. Nous respondōs ce que luy-mesme au commencement  
*in cap. 13.* de son premier abus pretendu a dit & alleguē de S. Thomas d'Aquin, sus l'epistre de S. Paul aux Hebrieux, que l'autel des Chrestiens est Iesus-Christ, auquel & par lequel ils offrent leur priere, & de saintes prieres de l'Eglise se concluent tousiours par nostre Seigneur Iesus-Christ. Puis dōc qu'en l'autel auquel est offert nostre Seigneur Iesus-Christ, nous entendons & recognoissons nostre Seigneur, aduisons qui sont ceux entre tous les hommes qui ont plus approché de luy, c'est à dire, qui ont mieux ensuiuy ses exēples. Ne sōt-ce pas les Saints? & neātmoins les Saints ne sont pas en pareil degré que luy, ains sōt (cōme tousiours se sont recogneus) inferieurs à luy: Dont pour s'estre de plus pres cōformé ou approché de luy en sainteté de vie en ensuiuant ses exemples, il semble qu'au lieu saint (qui est l'Eglise en laquelle est offert iournellement le sacrifice non sanglant de son precieux corps & sang, pour

nous appliquer le fruit du sacrifice sanglāt qu'il a vne fois offert pour nous tous) iustement l'Eglise a ordōné que sous l'autel seroient mises les reliques des Saincts, pour nous mōstrer que le repos des Saints est avec nostre Seigneur, & en iceluy, & nō d'eux-mesme ny en eux-mesmes, pour nous raurir (sous ceste contemplation) à vn desir d'ensuiure les exemples de nostre Seigneur à leur imitation, selon ce que disoit S. Paul, *Imitatores mei estote sicut & ego Christi*, Soyez imitateurs de moy comme ie suis imitateur de nostre Seigneur : d'autant que par le moyen de ceste imitation nous deuōs esperer vn repos eternal avec nostre Seigneur, qui est ce repos auquel sont jà les Saincts desquels nous faisons mention. Cecy est aucunement fondé en l'Ecriture, en laquelle nous trouuons que S. Ieā l'Euāgeliste dit, *Vidi subter altare animas intersectorum propter verbū Dei, & propter testimonium quod habebant*. I'ay veu sous l'autel les ames de ceux qui ont esté occis pour le Fils de Dieu, & pour le tesmoignage qu'ils en rēdoiēt. C'est vne visiō de l'Apōstre par laquelle luy sont representez ceux qui ont souffert pour le nom de nostre Seigneur, comme proches de luy en sa

1. Cor. 4.

Apoc. 6.



## Responce au 5.

beatitude celeste, & ce par l'autel signifiant Iesus-Christ, & par le dessous de l'autel representant la condition des Saints cōme inferieure à celle de nostre Seigneur leur chef & capitaine, duquel ils ont esté imitateurs en ce monde quand ils ont esté vivants. Voilà pourquoy sont mises les reliques des Saints sous l'autel.

*Psal. 33.* Nous y adiousterons vne raison tiree du Psalmiste, disant, *Custodit Dominus ossa sanctorum suorum, unum ex his non conteretur,* que Dieu garde les ossemens de ses Saints, & qu'il ne permettra qu'aucū d'iceux soit brisé, c'est à dire, à l'effect de la resurrectiō: & conformément à ce passage nostre Seigneur dit, *Math. 10 unus capillus capitis vestri non peribit,* il ne perira aucun cheveu de vostre teste: signifiant l'integrité & perfection en laquelle il nous fera resusciter. Or si pour la resurrectiō en laquelle nostre Seigneur (selon le dire de S. Paul) nous conformera à son corps glorifié, il a si grād soin des reliques de ses Saints par les tesmoignages susdits, qui pourra reprēdre ceste louable pratique de l'Eglise, laquelle en ensuiuant son espoux, a en speciale recommandatiō les reliques de ses bien-aimez, c'est à dire, des Saints, lesquels au pris de leur sang &

en communiquant à ses passions & tribulations, luy ont rendu tesmoignage en leur sainte vie & en leur mort?

Ce n'estoit assez à Loque de s'estre ainsi raillé de l'Eglise, laquelle a ceste louable coustume, s'il ne se fust quand & quand attaqué à nostre saint Pere le Pape chef d'icelle, sus ce que l'Eglise (laquelle le recognoist pour son chef & vicaire de nostre Seigneur Iesus-Christ en terre, cōme aussi vray successeur de saint Pierre) n'approuue aucunes reliques sinon celles qui sont approuuees par nostre S. Pere le Pape, ou de son autorité, c'est à dire des Euesques des lieux lesquels dependent de son autorité. Que trouue-il de mauuais en cela? veut il que toutes sortes de personnes ayent la liberté de les approuuer pour les faire recevoir de leur propre autorité à l'Eglise? Les Payens, les Iuifs, les heretiques, les libertins & hypocrites auront beau en supposer à l'Eglise pour s'en mocquer. A qui est-ce à faire de vuider & decider les differēts qui naissent de iour à autre en l'Eglise si ce n'est aux Prelats lesquels dependent tous du iugement du souuerain qui est nostre S. Pere le Pape vicaire susdit? Si en la loy de Moyse qui n'estoit q̄ figure & om- *Exod. 18.*

## Responce au s.

bre de l'Euangile, il ya eu vn ordre estably en la iurisdiction de Moyse lequel par le conseil de son beau pere Iethro, esleut des iuges sus son peuple d'Israël pour decider les differēs de moindre importāce; les vns tribūs, les autres centuriōs, cinquāteniers ou doyens, & luy seul auoit la cognoissance des cas plus difficiles & plus graues: faut il q̄ l'Eglise Catholique pour ne point Iudaizer deteste ce bel ordre, & qu'en icelle toutes personnes indifferēment soiēt receuēs à approuuer les reliques, & les Saints qui doyuent estre canonizez, ou bien que certaines persōnes seulemēt ayēt ce pouoir? Nostre Seigneur mesme a-il negligé cest ordre? ne l'a-il pas recogneu quand il a dit, *dic Ecclesiæ*? quand (selō le dire & obseruation de sainct Paul) *quosdā dedit Apostolos, quosdam prophetas, alios euangelistas, alios pastores & doctores ad consummationem Sanctorum, in opus ministerij, in adificationem corporis Christi*, il a donné des Apostres, des Euangelistes, des pasteurs & docteurs, pour la consummation des Saincts, pour l'œuure du ministere, c'est à dire pour rendre parfaicts ceux qui sont jà Saincts, & reduire au corps mystique de Iesus Christ ou de l'Eglise, ceux qui sont desuoyez: & de vray

Math. 18

Ephes. 4.



nō seulemēt en l'Eglise, mais en tous estats & en toutes societez la cognoissance des choses plus graues & plus difficiles est attribuee tousiours à gēs de qualité, & plus cognoissās: mais ce n'est merueille si l'heresie laquelle a apporté tousiours confusion à l'escriture, & à la doctrine de l'Eglise, tasche tousiours à renuerfer l'ordre que Dieu a establie en son Eglise.

Il est donc bien raisonnable (pour eujter les impostures & faulsetez que la temerité des heretiques ou malueillants pourroit apporter à la doctrine & deuotion qui se pratique en l'Eglise de Dieu) que la cognoissance des choses plus difficiles soit attribuee aux Prelats, & particulierement au souuerain Prelat de l'Eglise, afin que la chose dont est question, estant determinee par luy, ou par eux, de son consentement & approbation, soit tenuē pour certaine, cōme particulierement en la canonizatiō des Saints, & approbatiō des reliques, desq̃lles Loque se dōne tāt de peine pour n'y vouloir adiouster foy.

Il dit, outre-plus, qu'en l'Eglise Catholique on honore les reliques, on les adore, on les prie. Ainsi faut-il qu'il nous face voir clair à ses impostures, car c'est vne

## Response au 5.

*D. Dama.  
in hypo-  
via.*

vraye imposture, dire que nous prions les reliques : nous ne prions pas les reliques, mais nous prions les Saints par la presence de leur reliques, laquelle nous les remet en memoire, & par ce mesme moyen nous les honorons pour trois raisons, lesquelles les Hermites ont allegué au Roy des Indiens Anéuir, leur demandant pourquoy ils portoient les reliques ou ossements des Saints sus eux : La premiere estoit pour se representer deuant les yeux l'heureuse mort des Saints, desquels estoient ces reliques : la seconde, pour rememorer l'heureuse & sainte conversation d'iceux : la troisieme, pour contempler le repos eternel d'iceux : & sur icelle contemplation, prendre courage d'ensuiure & imiter leurs bons & rares enseignemens, & exemples. Se trouue il quelque chose en ces trois points qui ne merite honneur ? ce n'est donc sans cause que nous honorōs les reliques des Saints.

Il nous reproche aussi que nous les adorons, & que pour nous defendre de ceste adoration nous auons recours à la distinction ordinaire de latric, dulia, hyperdulia, disants que l'adoration de latric est deuë à Dieu seul, l'adoration d'hyper-

dulie, à l'humanité de nostre Seigneur Iesus-Christ, à sa croix, & à sa mere : Et l'adoration de dulie aux Saints, aux images & aux reliques, de laquelle distinction aussi il se mocque, disant que les trois parties d'icelle s'ont frâchises des idolatres.

En cela il se monstre vray disciple de Calvin, lequel vse de ceste mesme mo-  
querie contre nous : mais nous luy res-  
pondons que ceste distinction est en S.  
Augustin en sa cité de Dieu, & aussi en  
son liure 20. contre Fauste Manicheen,  
chap. 21. & au liure 1. de la Trinité, chap. 6.  
& en son Epistre, *ad Deo gratias*, & en son  
Epistre, 66. *Ad Maximum*: & en son com-  
mentaire sus le Psalme 67. comme aussi  
elle se trouue au second Concile de Nice,  
auquel se trouue vne Epistre de Tharasius  
Patriarche de Constantinople, à Heleine  
Imperatrice, & Constantin Empereur, en  
laquelle il parle de ceste distinction, & il  
expose les trois parties d'icelle: outre les-  
quelles authoritez nous alleguerons l'es-  
criture expresse, en laquelle nostre Sei-  
gneur apres ses tentations, dit au dia-  
ble, *tu adoreras le Seigneur ton Dieu, & à*  
*luy seul tu seruiras*: En laquelle sentence  
deux choses deuës à Dieu nous sont de-

*li. 1. Instit.  
ca. 12. sec.  
2. li. 8. ca.  
27. & li.  
10. c. 1.  
& 3.*

*Epist. 49.  
Quast. 3.  
Actione  
17.*

*Matt. 4.*



## Responce au 5.

clarees, l'adoration, & le seruice: l'adoration ne luy est pas particulièrement deuë à luy seul, & pour ceste cause il n'a pas dit, tu adoreras le Seigneur ton Dieu seul: le seruice luy est deu particulièrement, & pour ceste cause il a dit, & à luy seul tu seruiras. Or ce qui nous faict sçauoir qu'il y a vne adoration laquelle est particulièrement deuë à Dieu & non à autre, c'est la diction grecque, par laquelle est representé ce mot de seruir: car le texte grec, dit, καὶ αὐτῷ μόνῳ λατρεύσεις τὸ λατρεῖν, signifie, *seruire*, il faut donc que, *latría*, signifie l'adoration, & seruice qui est deu à Dieu seul. Et quand à l'adoration laquelle s'estend sus aucunes creatures, elle s'entend au simple mot d'adorer, comme ceste adoration de laquelle Abraham a honoré le peuple du pays, auquel il vouloit acheter le lieu de sepulture pour sa femme: celle de laquelle Iacob a honoré & recognu son frere Esau: celle aussi que Ioseph a rendu au Roy Pharaon. Bref, l'adoration peut estre renduë à quelque personne, pour recognoissance de sa puissance & prerogatiue, de sa vertu, de sa science, ou dignité, selon le sens auquel saint Pierre dit, *Subditi estote Dominis in timore*

Gen. 23.

Gen. 33.

Gen. 47.

1. Pe. 2.

*non tantum bonis & modestis, sed etiam discolis,*  
Soyez subiets & obeissants à vos maistres  
en crainte, non seulement aux bons &  
modestes, mais aussi aux difficiles. Or  
pour respōdre à ce qu'il pretend repren-  
dre en nous sus ces trois sortes d'adora-  
tion, nous confessons que nous adorons  
l'humanité de nostre Seigneur de l'adora-  
tion de latrie, qui est la premiere adora-  
tion, entant qu'elle est vnies à la diuinité,  
en la personne de nostre Seigneur, mais  
non pas en tant que la pouuons conside-  
rer en son propre naturel, c'est à dire  
comme differente de la diuinité d'ice-  
luy.

Quand à la croix à laquelle il attribue  
l'adoration d'hyperdulie, il s'abuse, par  
faute d'auoir bien cōsideré que c'est q̄ de la  
croix: car ou il faut prendre la croix pour  
representation de celuy qui a esté cruci-  
fié, ou pour le bois mesme qui a esté ar-  
rousé de son precieux sang, quand il a esté  
attaché en iceluy: & en toutes ces deux  
considerations il faut adorer la croix de  
l'adoration de latrie, & non pas de hy-  
perdulie ou dulie, comme pense Loque:  
car soit que nous entendions en la croix,  
nostre Seigneur Iesus-Christ crucifié, soit

## Responce au 5.

3. p. 7. 25.  
4. 4.

*Ora. func.  
de obitu.  
Theodo-  
fij.*

que nous recognoissons le sang d'iceluy, par lequel elle est sanctifiée, tousiours l'adoration de latrie y est deuë, pour ce que le sang de nostre Seigneur n'est point sans la diuinité, laquelle a espousé l'infirmité humaine pour y demeurer inseparablement, & ne peut estre separee de la moindre particule d'icelle humanité: c'est ce que dit saint Thomas d'Aquin, que puis que toute l'esperance de nostre salut a esté en la croix, qu'elle doit estre adoree de l'adoration de latrie, c'est à dire de l'adoration deuë à Dieu seul, en tant que nostre Seigneur y a esté attaché: & partant Loque a allegué mal à propos le passage de saint Ambroise, par lequel il recite que Helene mere de l'Empereur Constantin ayant trouué la croix de nostre Seigneur, adora nostre Seigneur, & non point le bois: car tout ce qu'il peut tirer de ce passage, c'est qu'il ne faut pas adorer la croix de la supreme adoration, c'est à dire de l'adoratiō deuë à Dieu seul; & en cela il nous pense imputer que nostre intention (de nous autres Catholiques) soit d'adorer la croix en son bois, & non pas le Crucifix en icelle. Il s'abuse, veu qu'avec l'Eglise nous chantons ordi-



nairement pour tesmoignage de nostre foy & intention, ce que dict sainct Paul, *Nos autem gloriari oportet, in cruce Domini nostri Iesu Christi in quo est salus, vita & resurrectio nostra, &c.* Gal. 6. Il nous faut glorifier en la croix de nostre Seigneur Iesus-Christ, auquel (*il n'est pas dict en laquelle croix, mais auquel Iesus Christ,*) est nostre salut, & nostre resurrection: car quād nous chantons en l'Eglise ce texte de S. Paul, nous suiurons son intention, & ne changeons aucunement, & protestons (comme luy) rendre le deuoir de l'adoration de latrie à celuy qui nous a racheté par la croix, & non à la croix: car nous disons (comme sainct Paul) *in quo est salus, & non in qua cruce*, que nostre salut est en Iesus-Christ, & non en la croix en laquelle il a enduré: nous disons aussi *per quem*, par lequel Crucifix, *saluati & liberati sumus*, nous sommes sauuez & deliurez, & non pas, *per quam*, par laquelle croix.

Et quand à ce qui dit aussi que nous attribuons à la Mere (c'est à dire à la Vierge Mere de nostre Seigneur) l'adoratiō d'hyperdulie, c'est vne chose tres-vraye & certaine, d'autant que cest honneur est deu aux creatures excellentes, & lesquelles

*Responce au 5.*

surpassent en perfection toutes autres, pour la grande affinité qu'elles ont indubitablement avec Dieu. Or nous demandons quelle creature humaine a peu estre plus proche de Dieu , & plus coniointe avec luy, que la Vierge glorieuse, laquelle par grace speciale & particuliere a esté faiçte Mere de Dieu ? Partant c'est sans doute que cest honneur d'hyperdulie luy est deu. Mais nous desirerions que tout ce que nous a allegué Loque sus cest article, fut du tout aussi receuable comme ceste hyperdulie en cest endroit : Nous desirerions aussi qu'il se monstast tousiours aussi bien affectionné à la glorieuse Vierge , comme il semble faire en cest endroit , bien que ce ne soit pas son intention.

Il trouue estrange outre-plus, que nous rendons aux Saints trespassez, aux images & aux reliques, la troisieme adoration que nous appelons adoration de dulie: & pour improuver ceste deuotion & façon de faire, il allegue le dire de S. Augustin, qui est tel, *Nous honorons de vray les memoires des Martyrs comme des Saints hommes de Dieu, qui ont combattu pour la verité insques à la mort de leur corps, afin que la vraye religion*

*pretendu abus de la S. Messe. 65*  
religion fut recognue, & les faulſes religions  
conuaincues. Mais quel Chreſtien a iamais ouy  
aucun Preſtre, eſtant meſme à l'autel, qui auroit  
eſté baſty ſus les reliques d'un martyr à ſon hon-  
neur, ie t'offre mon ſacrifice Pierre, Paul, Cy-  
prian, veu que ſoubs leur memoire l'oblation eſt  
faicte à Dieu, lequel les a faict hommes &  
Martyrs, & les a eſleué à la gloire avec les An-  
ges, afin que par ceſte celebrite ou feſte qui eſt  
faicte de leur nom, nous rendions graces à Dieu  
de leur victoire: & que ſoubs ceſte memoire  
que nous en faisons, nous ayons courage d'enſui-  
ure leur conſtance, & puiſſions paruenir à la  
couronne de gloire qu'ils ont obtenu.

On pourroit deſirer que Loque eut  
allegué fidelement ce paſſage de ſainct  
Auguſtin, ſans y rien changer ou dimi-  
nuer: car ce n'eut eſté ſans declarer trop  
euidemment ſon aſtuce & malice: mais  
concluons de ce paſſage ce qui eſt à con-  
clure contre luy. Il penſe nous imputer  
que nous adorons les Saincts, les images  
des Saincts & leurs reliques, de l'adoratiō  
ſupreme, qui eſt latric, laquelle eſt deuë  
à Dieu ſeul, & il ſ'abuse: nous nous con-  
tentons (pour toute reſponce que nous  
auons à luy faire) de la doctrine Chre-  
ſtienne alleguee en ce paſſage de ſainct



*Responce au 5.*

Augustin , & n'auons autre responce à luy rendre que l'intention mesme de saint Augustin , par luy corrompuë & desguisee à son aduantage, en ce qu'il y a changé, adiousté, ou diminué.

*Homil. 2. in Macab.* Il allegue, outre-plus , (pour acheuer de nous declarer sa mauuaise intention) le passage de saint Iean Chrysostome, par lequel il dict , *Ne t'arreste pas à la cendre des corps des Saints , ny aux reliques de leur chair , ny a leur os qui sont consummez par le temps: mais ouure les yeux de la foy , & les regarde couuerts de la vertu diuine & de la grace du saint Esprit , & reluisants de la clairté diuine.* Que pense conclure Loque de ce passage ? qu'il ne faille tenir aucunement compte des cendres, des os, des reliques des Saints : il s'abuse estrangement, veu que ce passage de saint Iean Chrysostome, par son recit mesme, dict qu'il faut auoir esgard à la vertu diuine qui se manifeste en iceux : car si ce n'estoit ceste consideration, il faudroit egaleement honorer les cendres ou ossements de tous trespassez: mais d'autant qu'ils n'ont pas esté tous egaux en vertu, non plus qu'en l'imitation de nostre Seigneur, l'Eglise a esgard premierement & specialement à

ceux qui ont esté plus entiers au seruice de Dieu , & qui ont tesmoigné les graces qu'ils ont receu d'iceluy par leurs œuures saintes, qui ont rendu leur memoire recommandable, & sont ceux là desquels l'Eglise garde & honore les reliques, desquelles saint Iean Damascene parle en cest termes , *Fontes nobis salutare dominator* li. 4. ortod. fil. c. 16.  
*Christus præbuit sanctorum reliquias multimo-  
do beneficia scaturientes, vnguentum suauitatis  
emanentes, & nullus discredat: Si enim ex rupe  
& firmo saxo aqua in eremo profiluit volente  
Deo, & ex maxilla asini Sansoni sitiienti, quid  
dubitandum de Martyrum reliquiis ?* Dieu nous a donné pour sources salutaires de grands biens, les reliques des Saints, & que personne n'en doute : car si par la volonté de Dieu le rocher a rendu de l'eauë, & aussi la machoire d'asne en faueur de Sanson qui estoit alteré, quel doute faut-il faire des reliques des Saints ? & ( comme tom. 1. de Ritariis ed. vigin. lant. dit S. Hierosme ) nous honorons les reliques des Martyrs, pour adorer celuy pour lequel ils ont souffert en ce monde, *Honoramus reliquias Martyrum ut eum cuius sunt adoremus.* Il dit en apres, *Si non sunt honorande reliquie Martyrum, quomodo legimus præ-  
tiosam in conspectu Domini mors sanctorum eius ?* Psal. 113.

## Responce au 5.

1 Reg. 17. *Si ossa Martyrum polluunt cōtingentes, quomodo Eliseus mortuum suscitauit, & dedit vitam corpori quod iacebat immundum?* S'il ne faut pas honorer les reliques des Martyrs, cōmēt liſons nous en l'escriture que la mort des Saincts & esleus de Dieu est precieufe deuant sa face? si les ossements des Martyrs souillent ceux qui les touchent, comment Elisee mort a-il resuscité vn autre mort, & a-il donné vie à vn corps infect & puāt? En sommaire le tesmoignage de la sainteté & iustice qui a reluy au Martyr uiuant, ce trouue en son corps mort, c'est à dire en ses reliques apres sa mort, par les miracles que Dieu y faiēt ordinairement: car cōme dit S. Gregoire Nazianzene, les corps ou reliques des Saincts ont la mesme vertu que leurs ames, soit qu'on les touche ou qu'on les honore: & qui doute que la vertu & les graces que Dieu a mis en ses Saincts viuants, demeure en leurs ames apres leur mort? car Dieu n'est point le Dieu des morts, mais des viuants; & les Saincts sont tousiours viuants, d'autāt que tousiours ils suiuient l'Aigneau quelque part où qu'il aille: Les Saincts seroient ils de moindre cōdition que les diables, lesquels sont espars & se promenant parmy le monde,

*Ora. 1. in  
Iulianum.*

*D Hieron.  
adu. vigil.*



& par leur grāde agilité se trouuent d'vne vifteſſe non pareille en pluſieurs lieux? Ce n'eſt donc pas à l'oſſement ou aux cēdres du Martyr ou du Sainct que nous rendōs honneur, ains à la vertu de la grace diuine qui y reluit, en teſmoignage de leur ſainte vie.

Enfin il conclud ( bien qu'en mauuais dialecticien ) qu'il faut oſter & abolir du tout les images & reliques, qui ſont (dit-il) <sup>4 Reg. 18.</sup> en nombre infiny. Premièrement par vn paſſage de l'ancien Teſtament, ſçauoir eſt de l'hiſtoire d'Ezechias Roy de Iudee, lequel brifa le Serpēt d'airain qui auoit eſté dreſſé par l'expres commandement de Dieu, pour ce que le peuple d'Iſraël bruſloit de l'encens deuant iceluy, & par ainſi en abuſoit en idololatrie. Ceſte raiſō qu'il allegue eſt pertinente pour prouuer la iuſtice du zelle d'iceluy Roy Ezechias : car ſçachant bien iceluy Roy que Dieu ne l'auoit fait eriger pour ſeruir de dieu au peuple d'Iſrael, ains ſeulement de memoire de <sup>Num. 21.</sup> l'affliction qu'il luy auoit enuoyé par les Serpents, & qu'il commāda à ceux qui en feroiēt bleſſez de le reclamer par l'inſpection de ce Serpēt d'airain, il deuoit ſuffire à ce peuple de garder ceſte marque & me-

## Responce au 5.

moire des miracles du passé, sans deroger au vray Dieu par iceluy, ou à l'occasiō d'iceluy. Loque nous pourra dire qu'en l'Eglise Catholique nous sommes en pareil peché, & que nous encensons deuant les images: nous respōdrons que ce n'est pas à la mesme intention de laquelle les enfans d'Israel encensoient deuant le Serpent d'airain, d'autant que par cest encensement nous ne les recognoissons, ne reclamōs pour nos Dieux: mais par la similitude de la fumee de l'encens, laquelle monte tousiours en haut, nous requerons Dieu vouloir auoir pour agreables nos vœus & prieres que luy offrōs, par l'intercession des Saincts que nous honorons, & nous representons par leurs images, selon ceste priere du Psalmiste, *Dirigatur ad te*  
*Tsa. 140. Domine oratio mea sicut incensum in conspectu*  
*tuo*: par laquelle il desire que sa priere paruienne iusques deuant la Majesté diuine, ainsi comme la fumee de l'encens monte tousiours en hault.

Secondement il allegue que Constatin Empereur cinquiesme de ce nom, feit deterrer & ietter en la mer les ossements des Saincts, pour empescher (dit-il) la superstition des Chrestiens qui les baisoient &

adoroient: & dit outre-plus, qu'il seroit  
besoin aujourdhuy de tels Princes & Ma-  
gistrats, pour oster les reliques & images  
qui sont en nōbre infiny, desquels le peu-  
ple abuse vilainement, & au grand prei-  
dice de l'hōneur de Dieu, sous couleur &  
pretexte de la memoire des Martyrs.

Premierement, nous dirons que Loque  
n'a point allegué en quel autheur ou en-  
droit il a leu ceste histoire. Puis que ce n'est  
merueille que Constantin 5. Empereur de  
ce nom, ait fait vn tel acte cōtre l'hōneur  
des reliques & images: d'autant que cōme  
nous trouuons c'est ce Constantin qui fut  
surnōmé Copronyme, pource que quād  
on le baptisoit sur les fons il y fit son or-  
dure: ce qui dōna presage qu'il seroit mau-  
uais Chrestien, cōme de vray il fut cruel &  
ennemy iuré de l'Eglise Catholique, à cau-  
se dequoy il fut excommunié par le Pape  
Paul, premier de ce nom: Finalement il  
mourut desesperé, disant ces mots, *Je suis*  
*liuré au feu eternal*: Il fut fils de Leon 3. & luy  
succeda à l'Empire, l'an de grace 742. &  
gouerna l'empire 35. ans. Ceste histoire se Naucler.  
trouue en Nauclere & Sigebert, lequel aus- Sigib.  
si sus l'annee 725. de nostre Seigneur, dict  
que Leon pere d'iceluy Constantin auoit



### *Responce au 6.*

fait abattre les images; Est-ce dōc bien cō-  
clure à Loque. Cōstantin 5. fils de Leon 3. a  
fait abattre les images, & deterrer les reli-  
ques, & les ietter en la mer, partāt il le faut  
encores faire. Autant vaut ceste cōclusion  
cōme si on disoit l'ennemy iuré de l'Egli-  
se ne veut point receuoir les images ny  
l'hōneur des reliques: partant l'Eglise les  
doit defauoüer. S'il y a quelque loy qui di-  
se que l'Eglise se doie regler à la volonté  
de ses ennemis, Loque emportera ses pre-  
tensions de nous, & non autrement. Tout  
ainsi cōme ce seroit mal conclure, Calvin  
tient qu'il n'y a que deux Sacrements en  
l'Eglise, partant il n'en faut croire que  
deux; comme si Calvin estoit autheur suf-  
fisant pour regler la foy que doit tenir  
l'Eglise.

### *Responce au sixiesme pretendu Abus.*

**E**N apres pour sixiesme abus qu'il pre-  
tend imputer à la Messe, il allegue la  
priere que fait le Prestre en offrāt son ho-  
stie sus l'autel, disant,

*Sainct pere tout puissant Dieu eternal rece-  
uez ceste hostie sans macule, laquelle moy vostre  
indigne seruiteur ie vous offre pour mes innu-*

*merables pechez, offenses & negligences, & pour tous ceux qui sont icy à l'entour, voire pour tous fideles Chrestiens viuants & morts, afin qu'elle me prouffite & à eux à salut & vie eternelle, Ainsi soit-il.*

En ceste priere, sur le mot d'hostie Loque s'arreste & se donne carrière pour se faire rire, & trouue estrange que le Prestre dise que ceste hostie est sās macule. Il semble (dit-il) que le Prestre vueille faire allusion à l'Agneau Paschal & aux autres agneaux ou brebis des sacrifices qui selon la loy deuoient estre entiers & sans macule: ce que sainct Pierre attribue à bon droit à Iesus-Christ quand il dit que nous auons esté rachetez par le sang de Iesus Christ, cōme d'un agneau sans souilleure & sans tache. Or (dict-il) le Prestre l'applique faulxement à son hostie, laquelle n'est que pain, car lors qu'il prononce ceste oraison la transsubstantiation n'est point encores faicte, & partant mal à propos l'appelle-il hostie, voire hostie sans macule.

En ceste forme d'oraison, Loque a deu entēdre deux choses, selon l'vsage de l'Eglise, sçauoir est, la substance du pain qui est preparé & disposé pour la consecratiō qui doit estre faicte, & l'intention du Pre-

## Responce au 6.

stre qui est d'offrir à Dieu le Pere, ceste hostie, c'est à dire le corps de nostre Seigneur qui ne doit estre en soy autre hostie que sacre: donc selon l'intention de consacrer qu'a le Prestre, nous vsons de ce mot d'hostie en ceste priere, encores que la consecration & transsubstantiation ne soit faite: d'autant que l'intention est tousiours à cōsiderer & à preferer, or qu'elle ne soit effectuee: & c'est l'intention qui fait denommer l'action ou l'œuvre de l'homme; on dit ordinairement, *quicquid agant homines intentio iudicat omnes*, L'intention donne iugement de l'action des hommes: à cela voit on cōbien est defectueux le fondement qu'a pris Loque pour se mocquer de ce formulaire de priere: d'autant que le Prestre en icelle entend par ce mot d'hostie immaculee, nostre Seigneur mesme immolé en la croix, lequel il pretend offrir au Sacrement ou Sacrifice de la Messe, pour appliquer aux viuās & aux defuncts le fruiēt de ceste oblation sanglante qui a esté vne fois faite en la croix pour nous. Par là se cognoist que ceste hostie sans macule ce n'est pas le pain qui est preparé pour la consecratiō; mais c'est nostre Seigneur Iesus-Christ lequel ayant esté im-



molé en la croix vne fois pour le salut du monde, est iournellement offert en Sacrement à l'autel en la celebration de la sainte Messe pour nous appliquer en toutes nos necessitez le fruit de ceste vnique oblation sanglante, en ensuiuant le commandement de nostre Seigneur lequel a dict, *hoc facite in meam commemorationem*, Matth. 26  
Luc. 22. c'est à dire, consacrez & distribuez mon corps en memoire de moy, comme vous me l'avez veu consacrer & distribuer.

Il se mocque en apres de ce qu'en ce formulaire d'oraison le Prestre prie & requiert à Dieu que son hostie profite pour la remission des pechez des viuants & des morts.

Quand aux viuants, il dit que ceste oblation ne leur peut seruir à la remission de leurs pechez, d'autant qu'elle prouient de la seule oblation sanglante qui a esté vne fois faicte en la croix.

A la verité la cause generale de nostre reconciliation avec Dieu & de la remission a esté ceste oblation sanglante. Mais l'application n'en est pas esgale en tous, ains elle se fait seulement en ceux qui participent dignement à ce saint mystere. Pour ceste cause nostre Seigneur a dit en la con-

## Responſe au 6.

ſecration du calice, qu'iceluy ſang qu'il donnoit à boire à ſes Apoſtres ſeroit reſpandu pour eux & pour pluſieurs en remiſſion des pechez; il n'a pas dit qu'il ſeroit reſpandu pour tous, ſçachāt que pluſieurs y apporteroyēt toutes ſortes d'empeschement tant par la meſcroyance que par les deſbordemens de leurs actions, & par leur indeuotion & irreuerence: Car telles choſes empeschent l'applicatiō du fruit de ceſte hoſtie qui a eſtē offerte en la croix.

Et que la remiſſion des pechez ne puiſſe ſ'eſtendre iuſques aux morts par ceſte oblation, il le debat en ceſte ſorte. Il demande premierement ſi le Preſtre penſe que la Meſſe ſoit la cene du Seigneur. Nous ne luy diſons pas qu'ouy, ſi ce n'eſt qu'il vueille entendre que ce ſoit la cene myſtique, ſans dire la cene abſolument. Car noſtre Seigneur a fait trois cenes conſecutiuellement lors qu'il eſtoit proche de ſa paſſion. La premiere fut ſon dernier repas, qu'il auoit accouſtumé de faire iournellement avec ſes Apoſtres: La ſeconde fut la cene legale, c'eſt à dire laquelle ſe faiſoit ordinairement à la feſte de Paſque, & en icelle eſtoit mägél'Aigneau Paſchal,

selon la loy de Moyse:& ceste manducation de l'Aigneau Paschal figuroit la manducation sacramentale du corps de nostre Seigneur, laquelle est en vſage entre les Chrestiens selon l'institution de nostre Seigneur: La troisieme fut mystique, & estoit ceste institution du Sacrement de son precieux corps & sang:or, dire que la Messe soit la cene mystique ainsi entenduë,nous le voulons bien: ceste nostre foy est nostre doctrine Chrestienne: mais, que ce soit la cene comme la practiquent nos nouveaux Euangelistes nous le desnions tres-bien, attendu qu'icelle forme de cene est du tout contraire à l'institution de nostre Seigneur, & à la foy & doctrine de l'Eglise. Car elle n'y recognoist que l'ombre ou figure, ou signification du corps de nostre Seigneur, & l'Eglise selon l'institution de nostre Seigneur y recognoist son vray corps & sang.

Or il dit que nostre Seigneur n'a point institué ce Sacrement ( qu'il appelle la cene) pour les morts, ains pour les viuants seulement. Car ( dit-il ) elle ne peut estre pour les morts bien-heureux, pource que (comme dit l'escriture) *ils reposent de leurs* *Apo. 14.*  
*labeurs*, & partant ils n'ont que faire de



## Responce au 6.

Mesl'es, elle ne peut estre pour les damnez, car il n'y a point de redemption en enfer, ains il n'y a que perpetuel tourmēt: mais il ne cognoist point de Purgatoire auquel sont les ames de ceux qui esperent estre retirez des peines qu'il leur conuient endurer pour paracheuer la satisfaction de leurs fautes, laquelle ils n'ont pas entierement fait en ce monde auant leur decez:

*Mat. 12.* & c'est ce lieu duquel parle nostre Seigneur, disant, qu'il y a des pechez lesquels sont remis & pardonnez en l'autre monde; & d'autant qu'il promet d'en parler plus amplement en l'abus dixneufiesme, qu'il pretend trouuer en la Messe: nous nous remettons aussi iusques là pour luy respondre plus amplement, & pour le present nous nous contentons de luy auoir dict, que nostre Seigneur a dict clairement & sans aucune obscurité, que le peché qui se commet contre le Sainct Esprit n'est & ne sera iamais pardonné en ce monde ny en l'autre, nous donnant à entendre qu'il y a des pechez qui peuuent estre pardonnez en l'autre monde; ce que ne se pouuant faire sans purgation, sans laquelle l'ame souillée de peché ne peut entrer en gloire, comme dict l'escriture, il

s'ensuit qu'il y a quelque lieu destiné hors de ce monde auquel les ames souffrēt ceste purgation.

*Nullité du septiesme pretended abus.*

**I**L prend aussi pour abus en la Messe la mixtion du vin & de l'eauë que fait le Prestre en preparāt son oblation, & pour prouver que ceste mixtion ( qu'il appelle meslange ) s'y fait, il allegue la priere que le Prestre prononce disant qu'en icelle le Prestre requiert & supplie Dieu, que par le mystere de ce vin & de ceste eauë nous soyons faicts participans de la diuinité de celuy qui a daigné se faire participant de nostre humanité, qui est nostre seigneur Iesus-Christ.

S'il entendoit le mystere de ceste eauë & de ce vin il ne s'en mocqueroit pas. Or (cōme dict saint Cyprian) en l'eauë doit estre entendu le peuple, & par le vin s'entend le sang de nostre Seigneur : & quand on mesle l'eauë avec le vin dedans le calice, il est signifié que le peuple est conioint en vn avec nostre Seigneur, & qu'ainsi cōme l'eauë estant meslee avec le vin ne s'en peut separer, ainsi l'Eglise ne peut estre

*lib. 2. epi.  
3. ad Con-  
ciliū fra-  
trem.*

## Responce au 7.

separee de nostre Seigneur Iesus-Christ, ains elle demeure tousiours en la dilectiō diuine : partant ceste mixtion de vin & d'eau signifie que tout ainsi comme le but de nostre Seigneur , tant qu'il a esté en ce monde a esté d'vnir les hommes avec soy mesme, comme il est vny avec son pere (selon ce qu'il a dit luy-mesme à son Pere

*Ioan. 17.* par ces mots, *serua eos quos dedisti mihi vt sint vnum sicut & nos: & en apres, sicut tu pater in me, & ego in te, ipsi in nobis vnum sint, vt credat mundus, quia tu me misisti: Mon Pere* conferuez ceux que vous m'avez donné afin qu'ils soyent vn comme nous, & ainsi comme vous estes en moy, & moy en vous; ainsi qu'ils soyent vn en nous, afin que le monde croye que vous m'avez enuoyé) ainsi le Prestre par ceste priere qu'il fait en meslant l'eauë avec le vin, supplie que le peuple soit vn avec Dieu, comme l'eauë meslee est vnie avec le vin, & qu'ainsi comme l'eauë laquelle de son naturel est fade & insipide, est conuertie en la force du vin, & le vin ne prēd point la mauuaise & insipide qualité d'eauë, ainsi aussi par ceste oblation & sacrifice le Prestre prie Dieu de vouloir vnir son Eglise, c'est à dire son peuple avec soy : & telle est la  
raison



raison de ceste mixtion d'eauë avec le vin.

Loque faille lourdement en cest endroit en ce qu'il impute ceste institution au Pape Alexandre premier de ce nom, lequel gouuernoit l'Eglise enuiron l'an de nostre Seigneur cent vingt, & dit qu'il est des premiers corrupteurs de la sainte cene: il allegue aussi le canon, *in sacramen-*  
*torum*, auquel il est enioint d'offrir en la *Dist. 2. de consec.*  
Messe pain & vin meslé d'un peu d'eauë, à cause que le sang & l'eauë, sont sortis ensemble du costé de nostre Seigneur en sa passion: & nous reproche que ce commandement n'est escrit en aucun passage du saint Euangile.

Nous luy montrons que l'Euangile ne defend point aussi de faire ceste mixtion, & qu'elle se peut aisément tirer de l'Euangile en ce que nostre Seigneur a dit à ses *Ioan. 13.*  
Apostres, *Je vous ay donné exemple à ce que vous ayez à faire comme i'ay fait*, si donc les Apostres (par ce commandement) ont deu faire comme nostre Seigneur leur a montré, & dit; & mesme pour le regard de la consecration qui se fait en la sainte Messe, & non en la feinte cene des Caluinistes, ils ont deu mesler de l'eauë avec le vin en la celebration de ce saint my-

*Responce au 7.*

stere, pource que nostre Seigneur l'a faict en l'institution d'iceluy en leur presence: & d'abondant apres l'auoir faict il leur a dit ces mots, *Faites cecy en memoire de moy.*

Et que nostre Seigneur mesme instituant ce saint mistere aye meslé de l'eauë avec le vin quand il voulut consacrer le calice, nous ne doutons que Loque & ses adherents le nieront. Mais nous sommes fortifiez contre eux du tesmoignage de saint Pierre, de saint Marc son disciple, de saint Iacques, de saint Clement, lesquels tous en leur Liturgie ou Messe fus la consecration du calice asseurent que nostre Seigneur ayât pris le calice y mesla de l'eauë avec du vin.

Ces quatre tesmoings oculaires de ceste action de nostre Seigneur, sont ils pas, sans comparaison, plus receuables en ceste matiere, que Loque & autres sectaires de mesme farine? pourquoy donc Loque a-il imposé au Pape Alexandre susdict que c'est luy qui a inuenté ceste maniere de mesler l'eau avec le vin en la celebratiõ de ce saint Mystere? Voilà comment ils donnent tousiours des atteintes aux Papes

*Ican. 13.* à tors & à trauers, mais, *non est seruus maior Domino*, si nostre Seigneur n'a point esté

exempt de calomnies & impostures, aussi ne feront pas ses Vicaires ny autres qui ensuiuront sa doctrine & ses exemples.

Il dit oultre plus que ledict saint Pere Alexandre premier de ce nom est des premiers corrupteurs de la sainte cene: mais ce n'est sans supposer que ceste sainte cene de laquelle il entend parler, sçauoir est la cene Caluinienne, ayt esté dés lors, c'est à dire du temps d'iceluy Alexandre, ce qui ne se trouuerra: & quand il se trouueroit qu'elle eut eue le cours dés lors, ce ne seroit toutesfois la cene mystique que nostre Seigneur a institué; la difference que nous en auons recité en nostre respōce préalléguee en fera foy, & nous y renuoyons Loque pour le present s'il y veut auoir recours, sans rompre le fil de nostre dispute.

Et d'autant qu'il s'est deffié que ceux de l'Eglise Catholique, Apostolique & Romaine laquelle par mespris il appelle l'Eglise Papalle, n'auroyent faute de bōs & assurez tesmoignages pour prouuer pertinemment ceste meslange d'eau & de vin avec la consecration, pour se persuader (selon le naturel de l'heretique qui ne manque iamais de presumption) qu'il



## Responce au 7.

est plus habille homme que tous les Peres  
anciens qui en ont parlé, il allegue luy-  
mesme, puis apres il refute (ce luy semble)  
certains passages faisans foy de ceste cou-  
stume de l'Eglise. Et en premier lieu il al-  
legue le canon, *In sacramento corporis*, par  
lequel il est deffendu d'offrir rien au Sa-  
crement du corps & sang de nostre Sei-  
gneur que ce que luy mesme a enseigné,  
c'est à sçauoir, du pain & du vin meslé a-  
uec de l'eauë, & dit, qu'en la marge dudict  
decret, sur ce canō sont inferez ces mots,  
*Dominus miscuit aquam vino*, c'est à dire, no-  
stre Seigneur a meslé de l'eauë avec le  
vin: puis il demande, est-ce pas imposer à  
Iesus-Christ? est-ce pas dementir le saint  
Esprit qui a dicté les Escritures? est-ce  
pas arguer de faux l'Apostre saint Paul  
qui dict auoir receu du Seigneur ce que  
il a baillé ou enseigné aux Corinthiens  
touchant ce saint Sacrement? & cepen-  
dant pour les signes d'iceluy, il ne fait au-  
cune mention d'eauë, ains seulement du  
pain & du vin representans le corps & le  
sang de nostre Seigneur.

Loque alleguant ce canon, demon-  
stre luy mesme son mensonge. Car apres  
auoir exprimé par iceluy ceste mixtion du

dist. 2. de  
consec. ex  
9. Concil.  
Cartag.

1. Cor. 11.

Mensonge  
de Loque.

vin & de l'eauë, laquelle de vray est dis-  
temēt expriemee, il dit qu'il en est fait mē-  
tion en la marge : nous luy accordons ce-  
la: mais ceste marge qui le dict si expres-  
sément, dict elle qu'il n'est pas contenu  
au texte ? non : Mais la raison pour la-  
quelle cela a esté exprimé en la marge,  
c'est pour faire prendre garde au lecteur à  
la feureté de ceste doctrine & enseigne-  
ment de nostre Seigneur. Et puis apres,  
à quoy sont bonnes les exclamations de  
Loque, lequel dit que c'est imposer à no-  
stre Seigneur, au saint Esprit, à saint  
Paul, lequel comme fidelle obseruateur  
de la tradition de nostre Seigneur, ne fai-  
sant aucune mention de ceste mixtion  
d'eauë avec le vin semble suffisamment  
mōstrer que nostre Seigneur n'a point fait  
ceste mixtion? Nous luy respondons que  
oultre le tesmoignage asseuré des liturgies  
ou Messes des Apostres & disciples cy des-  
sus alleguees, ceste meslange se verifie par  
la conuenance de la Prophetie & de la ve-  
rité, nous asseurās que les Prophetes, Moy-  
se & les Psalmes ont prediēt ce qui est ad-  
uenü en nostre Seigneur.

Or est-il escrit, *Sapientia edificauit sibi*  
*domum, miscuit vinum, posuit mensam, que* *Psalm. 9.*

*Responce au 7.*

la Sapience s'est bastie vne maison, elle a meslé le vin, & dressé sa table. Ne voilà pas ceste mixtion d'eauë avec le vin bien exprimée, laquelle deuoit estre faite par la Sapience qui est le mesme Fils de Dieu? n'est-ce pas de son Eglise & de sa cene mystique de laquelle il est fait mention en ce passage sous les mots de maison & de table? Loque ne peut moins nous accorder en toute l'histoire de ceste sainte institution que ce qui est rapporté par les Euangelistes & par saint Paul, ceux-là n'ont rien imposé à nostre Seigneur, ny au saint Esprit; aussi n'ont-ils pas derogé à la fidelité de saint Pierre, saint Iacques, saint Marc & saint Clement, lesquels font mention de ceste meslange d'eauë & de vin practiquee & enseignee par nostre Seigneur; c'est vn mesme saint Esprit qui les a guidé & conduit en ce qu'ils nous en ont laissé par escrit; les Euangelistes ont usé de ce mot de calice, aussi a fait saint Paul: partant il faut que par ce mot de calice ils ayent entendu ceste mixtion d'eau & de vin de laquelle les quatre susdits Apostres ou disciples ont fait mentiõ, puisqu'ils ont esté conduits d'un mesme saint Esprit.



Il s'adresse par apres aux Conciles  
lesquels en ont traicté, pensant par iceux  
arguer d'inconstance l'Eglise Catholique  
sur ce poinct, comme tenant par aucuns  
Conciles qu'il soit de necessité, sus peine  
de peché mortel, d'offrir en ce sacrifice  
de la Messe du vin pur, & sans y mes-  
ler aucunement d'eau: & par autres sou-  
stenant que c'est mal faict d'y mesler de  
l'eau comme celà, derogeant à l'imita-  
tion de nostre Seigneur, d'autant qu'il  
ne se trouue point en l'Euangile qu'il ayt  
aucunement meslé de l'eau en ceste o-  
blation quand il voulut consacrer, & pour  
preuue il allegue le quatriesme Concile  
d'Orleans lequel fut tenu & celebré en-<sup>Can. 4.</sup>  
uiron le temps de Pelage premier de ce  
nom, Pape, auquel sont ces mots expres,  
*Nullus in oblationibus sacri calicis nisi quod  
ex fructu vineæ speratur, & hoc sine aqua  
mixtum offerre præsumat: quia sacrilegium iu-  
dicatur aliud offerri quam quod in mandatis sa-  
cratissimis saluator instituit*, que nul ne  
presume de rien offrir aux oblations du  
calice sacré, sinon ce qu'on espere estre  
du fruit de la vigne, & cecy sans estre  
meslé avec eauë. Car celà est iugé sacri-  
lege, d'offrir autre chose que ce que le

*Responce au 7.*

Sauueur a ordonné par ses tres-sacrez mandemens.

Il oppose à cest article du 4. Concile d'Orleans le Concile de Trente & le Catechisme faict de l'ordonnance d'iceluy Concile, portant qu'il n'est licite d'obmettre ceste mixtion d'eau avec le vin, sans peché mortel : disant toutesfois par apres, que si on n'y en mesle point, le Sacrement ne laisse point de subsister; ce que estant, il demande, à quel propos l'obmission de l'eauë est elle tenuë pour peché mortel?

Au canon allegué du 4. Concile d'Orleans, nous respondons que le vin naturel & pur, est necessaire pour ce sacrifice: mais la mixtion d'eauë est reseruee au Prestre qui doibt consacrer & non à autre, ainsi comme nostre Seigneur premier consecrateur voulant consacrer, a pris du vin naturel & pur, puis il y a mis de l'eauë pour no<sup>r</sup> mōstrer que ceste oblatiō doit représenter sa passion & sa mort que il a souffert en la Croix, & aussi le sang & eauë qui sont sortis de son costé, en quoy il est tout apparent que Loque faict l'ignorant quand il tire ceste con-

clusion du canon susdit : car c'est trop ignorer le faict de nostre Seigneur, attendu que les quatre auteurs préalleguez nous assurent en leur liturgie susdite, que nostre Seigneur voulant consacrer le Calice, il y a meslé l'eauë avec le vin.

Et quand à ce qu'il allegue du Concile de Trente, il n'est en rien repugnant au susdit canon, ny à la pratique de l'Eglise, laquelle observe fort songneusement ceste mixtion: car ceste mixtion n'est point de la necessité de ce Sacrement, lequel de vray pour l'obmission d'eauë qui s'ypourroit commettre ne laisseroit d'estre Sacrement: mais elle est de necessité pour le regard du commandement de l'Eglise, auquel il faut obeyr, d'autant qu'autrement ne seroit rapportee par ceste cōsecration la verité de l'histoire de la mort de nostre Seigneur, laquelle toutesfois y doit estre representee: & partant elle ne peut estre obmise sans peché mortel, attendu que c'est contreuenir au commandement de l'Eglise, lequel ne tend à autre chose qu'à observer ce que nostre Seigneur a enseigné par son exemple. Or n'est il necessaire que tout ce qui se faict à l'exemple de nostre Seigneur soit expressement com-



*Responce au 7.*

mandé en l'Euangile, d'autant qu'il nous doit suffir qu'il nous ait admonesté d'ensuiure son exemple.

Il veut encores subtiliser d'auantage: car ceste mixtion presuppsee, il demande, puis qu'en ce Sacrement se faict vne transsubstantiation, sçauoir est du pain au corps, & du vin au sang de nostre Seigneur, que deuient l'eauë qui est meslee avec le vin, en quelle nature est-elle trāsubstātiee? & sus ceste question il fait fort l'empesché, disant que ceste question ne s'est encores peu bien resoudre par les saincts Peres & Theologiens de Rome; il veut dire, ie croy, de l'Eglise Romaine: mais il se coupepe en ce qu'il diët qu'au Concile de Trente, & au susdiët Cathéchisme il est expressement porté que ceste eauë est conuertie en vin, & partant en la transsubstantiation du vin elle ne tient point lieu à part; & toutesfois il faut que ceste mixtion se face pour représenter le naturel du sang humain que nostre Seigneur avoulu tesmoigner en sa personne; lequel sang ne se trouue point entierelement pur, ains a tousiours quelque nature ou substāce d'eauë meslee: ainsi la voulu auoir nostre Seigneur vray Dieu &

vray homme , & l'a representé en ceste consecration du Calice par la susdicte mixtion, nous laissant l'exemple d'en faire de mesme.

Outre ce, il semoque d'vneraison de ceste meslange que nous tirons de la signification de l'eauë & du vin en ce Sacrement, laquelle est telle , qu'en entendant par l'eauë, le peuple, selon la signification que nous en trouuons en l'Apocalypse de saint Iean, & en entendant aussi par le vin nostre Seigneur Iesus Christ, par ceste mixtion de vin & d'eau est entendue l'vnion du peuple avec iceluy nostre Seigneur. Il trouue ceste raison inepte & friuole ( dit-il ) bien qu'vsitee & alleguee par saint Cyprian, en son epistre susdicte, *ad Cæcilium fratrem*, lequel merite plus de creance ( sans comparaison ) que Loque & ses complices: mais pour neant ce tourmente-il d'alleguer des raisons sans fondement, comme ce qu'il dit que nostre Seigneur n'a point vſé de ceste mixtion , & que saint Paul nous disant, *J'ay entendu du Seigneur ce que ie vous ay enseigné*, n'en faiſt aucune mention: car quand au premier , il se doit contenter de la preuue contraire que luy auons bail-

*Apoc. 17.*

*lib. 2.*

*1 Cor. 11.*

## Responce au 8.

lé: quand au secōd nous luy disons qu'en ce passage saint Paul n'affirme point que nostre Seigneur ait fait ceste meslange de l'eau avec le vin: & nous confessons aussi qu'il ne le nie pas, mais qui dira que saint Paul ne l'ait pas entendu comme les quatre auteurs susdicts, attendu que depuis sa vocation & conuersion il a esté conduit du mesme saint Esprit, lequel a guidé & conduit les dessusdicts Apostres & Disciples? ce seroit vne trop grande absurdité, de dire que les Apostres depuis mesme la Pentecoste, eussent eu entr'eux vn esprit de diuision & vne doctrine diferente.

### *Nullité du pretendu Abus huiëtiesme.*

EN apres il dit qu'il trouue vn abus en l'oblation du Calice qui se faict sur l'autel avec ceste forme de priere que prononce le Prestre, *Seigneur nous offrons le Calice du salutaire, supplians vostre clemence, qu'il monte avec odeur de suauité en la presence de vostre diuine Maïesté pour le salut de nous & de tout le monde. Amen.*

Passons ceste forme de priere en ceste oblation du calice, & considerons ce qu'il



y trouue à reprendre.

Il demande quel est ce calice : ce qu'il explique premierement selon la matiere de laquelle il est , puis aussi selon le nom qui luy est donné, en tant qu'on l'appelle Calice de salut: tiercement selon l'intention pour laquelle il est offert , qui est la remission des pechez ; & se moque plaisamment de ceste forme de priere sous chacune de ces trois considerations.

Quant à la premiere, il demande pourquoy a esté introduite en l'Eglise la coustume d'offrir seulement en Calice d'or, ou d'argent , ou pour le moins (en cas de pauvreté) en Calice d'estain ; dequoy il rend raison par le canon, *vt Calix , de consecr. dist. i.* auquel il est dict qu'il ne doit estre d'autre matiere pour euitier les incōuenients qui en ensuiuroient : car le cuire & le letton engendre la rouilleure , & prouoque le vomissement à cause de la force du vin ; & le bois , selon que dict la glose , est plein de poretz ; & le verre est fragile : & par ainsi qu'il est à craindre que ce qui seroit dedans ne s'espandist. Il n'a pas voulu dire qu'il y auroit danger que le sang de nostre Seigneur (qui est apres la consecration) ne s'espandist , & par con-

*Responce au 8.*

sequent, fut prophané & réputé comme  
vne autre liqueur vulgaire : ce qui luy a  
faict celer ceste raison , c'est qu'il est du  
nombre de ceux qui ne tiennent point la  
transsubstantion en ceste consecration,  
dont ce n'est merueille s'il demande par  
apres par derision , si ce ne sont pas la de  
belles raisons & de bonnes cautions pour  
maintenir les Calices d'or ou d'argent en  
l'Eglise. Qui luy dira qu'il est bien raison-  
nable que le Sacremēt du precieux corps  
& sang de nostre Seigneur soit honoré  
d'or ou d'argent , il le trouuera estrange  
aussi tost , comme s'il iugeoit le Fils de  
Dieu indigne de tel honneur. Il est tout  
notoire qu'en l'ancien Testament , l'or &  
l'argent ont esté en vsage en l'administra-  
tion & exercice des choses sainctes & sa-  
crees: Pourquoy ne feront ils aussi bien en  
vsage au sacrifice du precieux corps &  
sang de nostre Seigneur , qui se faict iour-  
nellement à l'autel ? Où est-ce que Loque  
a trouué qu'il faut moins faire d'honneur  
à la verité qu'à la figure ? les sacrifices de la  
vieille loy n'estoient que figuratifs de ce-  
stuy-cy, & estoient bien honorez de vais-  
seaux d'or & d'argent : pourquoy cestuy-  
cy ne le fera il pas aussi bien ? mais Loque

*Loquem-  
lin ou igno-  
rant.*

dira cōme aussi ceux de sa farine, *ut quid* <sup>Mat. 26.</sup>  
*perditio hæc?* que c'est autāt de perdu; pour- <sup>Marc. 14.</sup>  
quoy? pour ce qu'il leur semble que cest  
or & argent seroit mieux emploïé à leur  
plaisir, ou en leur bourse.

Toutesfois afin de ne faire penser qu'ils  
ayent ceste mauuaise intention (qu'ils ont  
jà par le passé trop descouvert par la pra-  
tique de leurs sacrileges) il fait mine d'en  
vouloir disputer au fond, & passe outre,  
disant ce qui est allegué au Decret, *de con-  
secr. dist. 1. can. vasa*, qu'au Concile Tribu-  
rien la question estant proposee, à sçauoir  
s'il deuoit estre permis aux Prestres de se  
seruir de vaisseaux, c'est à dire de Platei-  
nes & Calices de bois, il fut dit que saint  
Boniface Euesque & Martyr estant inter-  
rogé de ceste mesme question, respondit  
que non, d'autant que combien que telle  
eut esté la coustume de la primitiue Egli-  
se, toutesfois le Pape Zepherinus auoit  
ordonné que la consecration se feist en  
vaisseaux de verre: & depuis, le Pape Vr-  
bain auoit absolument defendu de plus  
consacrer en vaisseaux de bois, de peur de  
diminuer l'honneur de nostre Seigneur; &  
de vray il introduit la pratique de consa-  
crer en vaisseaux d'argent: & adiousta le-



*Responſe au 8.*

dict ſainct Eueſque & Martyr Boniface, que pour vn temps les Calices & Plati-  
nes auoient eſté de bois, ſçauoir eſt lors  
que les Eueſques & Preſtres eſtoient d'or  
& d'argent; & qu'au contraire pour lors  
les Preſtres eſtoient de bois & les Calices  
& Plateines eſtoiēt d'or ou d'argēt. Voilà  
en ſommaire comment il en diſpute au  
fond, tirant en deriſion de la Preſtriſe, ce  
qui a eſté dict pour aucuns vitieux qui ſe  
pouuoient trouuer au Clergé, & nō pour  
tous: & accusant par meſme moyen les  
Preſtres d'auarice ou de pompe mondai-  
ne en ce qu'ils s'eſforcent, ſelon l'inſtru-  
ction du Pape Urbain, d'offrir le ſainct ſa-  
crifice de la Meſſe en vaiſſeaux d'or & d'ar-  
gent, pour la dignité & excellence de ce-  
luy duquel nouſtenons ce ſacrifice, ſça-  
uoir eſt de noſtre Seigneur Ieſus-Chriſt.  
Par ainſi nous voyons que comme les  
ſerpents, crapaux, & autres animaux ve-  
nimeux cōuertiffent de leur naturel tou-  
te bonne nourriture en venin, ainſi les he-  
retiques, tournent en deriſion de l'Egli-  
ſe, les bonnes & ſainctes conſtitutions d'i-  
celle Eglise.

*Dan. II.* Il adiouſte pour combler ſon inten-  
tion maligne, que la prophetie de Daniel,  
par

*pretendu abus de la S. Messe.* 81

par laquelle il a predit que le Dieu Marzin seroit honoré par or & par argent, estoit accomplie par les Pontifes & Prelats de l'Eglise Romaine, à l'endroit du Dieu qu'ils honorent en leur Messe, en laquelle ils se seruent de vaisseaux d'or & d'argent; qui est vn mensonge deliberé, & procedant de certaine malice: car il ne peut ignorer que leur intention ne soit d'offrir le mesme corps & sang de nostre Seigneur, qu'il a offert luy mesme pour nous racheter, suiuant le commandemēt de nostre Seigneur mesme, par lequel il a dit, *Hoc facite in meam commemorationem*, Faiçtes cecy en perpetuelle memoire de moy. Or est il certain que nostre Seigneur n'a pas appris aux siens d'offrir aux idoles; & le lieu cōmun de la dispute qu'ont ordinairement les Calvinistes cōtre l'Eglise Romaine, de la verité du precieux corps & sang de nostre Seigneur, en ce Sacrement de l'autel, descouure suffisamment l'imposture & malignité de Loque, en ce qu'il dit que les Prestres de l'Eglise Romaine, par les vaisseaux d'or & d'argent, desquels ils ont l'vsage en leur Messe, accomplissent en eux, c'est à dire en leur Messe, la susdicte prophetie de Daniel.

## Responce au 8.

Outre-plus, il trouue estrange qu'en la susdite oraison le Prestre appelle ce Calice, Calice de salut, lequel il offre à Dieu, & prie qu'il monte avec odeur agreable deuant sa Maiesté: Et il demande qu'y a il en ce Calice, sinon du vin? car il n'est pas encores transsubstantié ny changé, & cōuert y au sang de Iesus-Christ, par consequent ce n'est que du vin qu'il offre en sacrifice, qui est vne trop manifeste moquerie.

Le pauvre miserable comme trop entier en ses railleries pense sus icelles auoir basty vne profonde dispute, ou plustost vne science certaine & infallible, & par faute d'auoir recognu ce qui est tres-vulgaire, que *finis est intentione primus, executione postremus*, La fin de toutes actions humaines est premiere en l'intention, & derriere en l'execution, comme nostre Seigneur la fort bien declaré sus ce Sacremēt de son precieux corps & sang, quand il a dit, *Panis quem ego dabo, caro mea est pro mundi vita*, Le pain que ie vous donneray est ma chair pour la vie du monde: Par ces mots il a parlé en tēps present de la chose laquelle n'estoit pas encores, ayant esgard à l'intention qu'il auoit de donner à son Eglise son vray corps & sang en ce Sacre-



ment: il disoit d'une part, *dabo*, ie vous donneray; d'autre il disoit, *caro mea est*, c'est ma chair. Pour le regard de sa diuinité, c'estoit jà le vray pain de vie, & sa chair vnüe avec ceste diuinité: mais ce n'estoit pas encores Sacrement, car il n'estoit pas encores institué, & toutesfois il le deuoit donner en Sacrement, comme de vray il l'a donné par Testament, quand il a esté proche de sa mort.

Ainsi le Prestre faisant ceste priere, n'appelle pas le Calice qu'il offre par icelle, Calice de salut, comme le tenant pour tel auant la consecration, ains seulement ayant esgard à la consecration qu'il entend & pretend faire. Les heretiques sont ordinairement ouuriers de nous remplir le papier de telles subtilitez.

*Nullité du neufiesme pretendu Abus.*

**I**L fonde en apres son pretendu neufiesme abus sus l'encens, sus la benediction d'iceluy, & sus l'encensement que faict le Prestre sur son offrande; disant premiere-ment sus l'encens ceste priere, Sois benit d'iceluy en l'hōneur duquel tu seras bruslé au nom du Pere, du Fils & du saint Es-

### *Responce au 9.*

prit: il en allegue deux autres formes de priere, tendant à mesme benediction de l'encens, lesquelles sont concurrentes avec celle cy, exprimant toutesfois vne particuliere vertu que l'Eglise prie Dieu donner à cest encens, c'est à sçauoir de chasser les assaults des diables, & les maladies, & d'obtenir la misericorde de Dieu.

Or premierement il blasme l'vsage de l'encens en l'Eglise, disant que l'encens n'a ny sens ny intelligence, & que c'est à faire aux forciers & enchanteurs de prier sur les choses desquelles ils se veulent seruir: il dit barbotter sur les choses desquelles ils seveulēt seruir pour faire leur charmes.

Que veut-il dire par ces mots, sinon appeller les Prestres enchanteurs & charmeurs, à cause des prieres qu'ils font sur les choses insensibles? Ainsi est il discret & aduisé (selon sa promesse) de se deporter de toutes paroles piquantes, & attaques iniurieuses.

Or à ce qu'il cognoisse que ce n'est sans cause que le Prestre fait sa priere sus telles choses, pour en obtenir (par la grace de Dieu) quelque bon effect, nous en auons prou de bons exemples en l'escriture.

Dieu a beny les poissons de la mer, qui Gen. 1.  
sont creatures sans intelligence, & pour  
cela Loque voudroit il dire que Dieu (en  
ceste benediction), fut enchâteur ou char-  
meur? à cela voit-on comment les mesdi-  
fances des heretiques tournent bien sou- Exo. 20.  
uent en atheisme. Dieu a beny le iour du  
Sabath, lequel il a créé comme les autres  
iours, & est sans aucun sens ny intelligen-  
ce: Or là il beny & sanctifié pour la gloire  
de son nom. Le diable n'a il pas reconnu  
& cōfessé que Dieu a beny les œuvres des  
mains de Iob? & tels œuvres estoient-ce Iob 1.  
choses capables d'intelligence? & si Dieu  
a beny les œuvres de Iob, pourquoy trou-  
uera-on estrange que l'homme benisse les  
œuvres de Dieu, cōme l'eauë, l'encens, &  
les fruits de la terre? Nostre Seigneur mes-  
mes a beny au desert les cinq pains & deux Matt. 14.  
poissons, desquels il repeut la multitude Luc 9.  
qui le suiuoit pour ouir sa parole. Il a beny Matt. 26.  
aussi le pain qu'il a consacré quād il a dit,  
*Cecy est mon corps prenez, & mängez*; Le pain  
n'a aucun sens ny intelligence, & pour ce-  
la nostre Seigneur-Iesus Christ le benif-  
sant, est-il enchanteur ou charmeur? Si l'a-  
ction de nostre Seigneur nous sert d'in-  
struction, comme luy mesme le veut en



## Responce au 2.

**Ioan. 13.** tant qu'il nous dit, *Je vous ay donné exemple afin que comme i'ay fait vous faciez aussi* : Il a beny le pain qu'il a voulu donner à māger à la multitude, pourquoy ne benirōs nous pas le pain & la viande qui nous est preparee à nostre repas? Il a beny le pain qu'il a disposé & préparé pour la consecration de son precieux corps & sang, pourquoy ne benirons nous pas (à son exemple) les creatures que nous voulons dedier à son honneur? or nous dedions l'encens à l'hōneur de Dieu, le reclamants à nostre ayde & secours sous la similitude de l'encens, **Psa. 140.** *felō ces mots de Daud, Dirigatur ad te Domine oratio mea sicut incensum in cōspectu tuo*: Qu'il vous plaise, Seigneur Dieu, que ma priere monte iusques deuāt vostre Majesté, ainsi comme l'encens monte en hault, c'est à dire la fumee de l'encens.

Secondement il se moque de ce que le Prestre prie que cest encens ait la vertu de chasser les diables par sa fumee, & de guarir des maladies, disant que l'escriture fait **Matt. 17.** **1 Petr. 5.** **Iac. 5.** bien foy que les diables ont esté chassez, & les maladies guaries par les ieunes & oraisons, mais nō par la fumee de l'encēs, non plus que par les exorcismes & abiurations que le Prestre fait au baptesme, ou

par eauë beniste , ou par le signe de la croix , par cierges allumez, huilles , onctions, ou autres semblables ceremonies.

Nous luy demãdons quand il est dit en l'Euangile, que *erat Iesus eijciens demonium*, Matt. 12. Luc 11. Iesus chassoit vn diable qui rēdoit son hōme müet , à sçauoir s'il iettoit le diable sans le coniuurer ? Et quand il est dit en l'Euangile , que *dedit eis potestatem spirituum immundorum*, Matt. 10. Il dōne à ses Apostres puissance sur tous esprits immōdes, pour les ietter hors, & de guerir toute sorte de maladie, & de langueur, à sçauoir s'ils iettoient les esprits immōdes sans y trauailler , c'est à dire sans exorciser ? L'histoire des actes des Apostres nous en fait foy : & où y a il plus d'occasion d'exorciser qu'au baptesme, deuāt lequel l'hōme notoirement est en la puissance du diable ? Et quãd à la guarison des maladies , les Apostres ny emploient ils point de l'huile ? L'Euangile dit expres, *Oleo ungebant multos egros & sanabantur* : Marc 6: Ils oignoient d'huile plusieurs malades, & les guerissoient.

De l'eauë beniste , des cierges allumez, ou signes de la croix, qu'ils y seruent, il n'y en a aucun doute, & n'est besoin nous arrester sus chacun point particulier , de ce

*Responce au 9.*

que pourroit obiecter l'heretique, lequel a accoustumé d'embrasser & enuelopper l'esprit du Chrestien d'une multitude de difficultez tout à coup, pour le rēdre douteux, & l'empescher de prouver son dire, ou de respōdre diffinitiuemēt à vn point de doctrine: & à la verité il n'y a aucun de ces points que Loque allegue tout à coup sur ce propos qui ne requiere biē vn traité particulier pour y respondre pertinēment: mais suiuiōs nostre propos. Loque dit q̄ l'escriture ne fait nō plus de mētion de la vertu de l'encens, que de la vertu des exorcismes q̄ fait le Prestre au baptesme, ou de l'eauē beniste, ou de l'huile, & autres ceremonies: nous luy disons tout au contraire, que l'escriture parle expressement de l'exorcisme, par la pratique qui s'en reco-  
*ibidem.* gnoist en nostre Seigneur, & en ses Apostres, & aussi de l'onction de l'huile qu'ils ont fait sus les malades; & q̄ par cōsequēt, tenir q̄ par la fumee de l'encens beny, les diables puissent estre chassēz & les maladies gueries, n'est point contreuenir à l'escriture, biē que ceste forme de paroles n'y soit expressement & formellemēt cōtenuē, q̄ par la fumee de l'encēs les diables soiēt chassēz & les maladies gueries: & disōs q̄



*pretendu abus de la S. Messe.* 85

ceste maniere de benir l'encens à tele effect nous est delaissee par la pratique des Apostres, & par leur tradition verbale, & qu'il la faut garder, d'autant qu'elle est de ceste sorte de traditions que le saint Esprit (enuoyé depuis l'Ascension de nostre Seigneur) a enseigné, encores qu'elle ne soit escrite, & que saint Paul dict, *tene-  
te traditiones quas didicistis à nobis, siue per ser-* 2. Thes. 2.  
*monem, siue per epistolam nostram :* & que de ceste maniere de faire ( comme dict Ter- li. de corona militis  
tullian) *traditio prætenditur nobis autrix, consuetudo confirmatrix, fides obseruatrix,* la tradition nous en dōne l'autorité, la coustume la confirme, & la foy nous la fait obseruer. Si donc la tradition (qui est procedee du saint Esprit) encores qu'elle ne soit escrite, ains seulement venuë à nous par l'obseruation qui en a esté en l'Eglise de temps en temps, n'est point repugnante à l'escriture : Ainsi comme l'exorcisme du Baptisme, l'vsage de l'huile, l'eau beniste, le signe de la croix, & autres choses semblables qui se practiquent en l'Eglise Catholique n'ont aucune contrarieté avec l'escriture, encores qu'elles n'y soyēt couchées & exprimees formellement ; ainsi aussi la pratique d'vsar d'encens n'y a au-

## Responce au 9.

cune repugnance, bien qu'il ne s'y trouue aucun commandement formel. Ioinct que nous pouuons dire avec les Peres anciens que l'argument qui conclud negatiuement de l'autorité de l'escriture, est nul. Car ceste proposition ne se peut tenir vniuersellement, que tout ce qui n'est point déclaré & exprimé en l'escriture n'est croyable: Autrement pourneant nostre Seigneur auroit-il promis aux Apo-  
*Iean. 14.* stres, c'est à dire, à son Eglise d'enuoyer apres son Ascension son saint Esprit, pour l'enseigner & instruire de ce qui n'auroit peu venir en leur cognoissance auparauât: Et n'est besoin que tout ce qu'enseigne le saint Esprit, & qu'il inspire aux Prelats, Pasteurs & Docteurs de l'Eglise soit entierement escrit, non plus que tous les miracles & propos de nostre Seigneur mesme,  
*Leuit. 23.* lesquels comme dict l'escriture, tout le monde ne pourroit pas comprendre: Et voilà d'où viennent les traditions non ecrites, entre lesquelles est celle de l'encens dont il est question maintenant.

De là il vient à demander la signification de l'encens & de l'encensoir. Pour luy  
*Exod. 25.*  
*Leuit. 16.*  
*3. Reiz. 7.* en rendre raison, nous le pourrions renuoyer à l'ancien Testament, comme à l'E-

xode chap. 25. & au 16. du Leuitique & des <sup>1. Par. 28</sup>  
Nombres, 3. liure des Rois cha. 7. aux deux <sup>2. Par. 4.</sup>  
liures des Chroniques de l'ancien Testa- <sup>Ezech. 8.</sup>  
ment, à la prophetie d'Ezechiel chap. 8. à  
l'epistre de saint Paul aux Hebrieux, chap.  
9. esquels passages il est abondamment par-  
lé de l'institution des encensoirs d'or, d'ar-  
gent, ou autre matiere quelconque, com-  
me aussi de l'usage, bruslement & fumee  
de l'encens : & afin que Loque n'allegue  
point qu'il ne faut pas que les Chrestiens  
(qui sont entierement fondez en l'Euan-  
gile de nostre Seigneur Iesus Christ) tirent  
en exemple ou en chef de doctrine ce qui  
est en l'ancien Testament, nous luy alle-  
guerons d'abondant l'Apocalypse de S.  
Iean, en laquelle il est dict que *l'Ange se*  
*tint à l'Autel ayant un encensoir d'or, & que* <sup>Apoc. 8.</sup>  
*plusieurs odeurs luy furent donnees pour offrir*  
*des oraisons de tous les Saints sur l'Autel d'or*  
*qui est deuant le throsne de Dieu :* En ce passa-  
ge selon la commune exposition, cest en-  
censoir signifie le corps de nostre Seigneur  
pour la conformité qui se trouue entre i-  
celuy & l'encensoir : Car l'encensoir s'ou-  
ure par dessus, & est clos par bas, signifiant q̃  
le corps de nostre Seigneur n'a point esté  
formé au ventre virginal d'un œuvre in-



## Responce au 9.

ferieur, ou humain, mais d'un œuvre supérieur, c'est à dire diuin, pour ce qu'il fut dit  
**Luc. 1.** à la Vierge sa mere qu'elle le conceuroit par operation du saint Esprit, & non par operation d'aucun homme: cest encensoir est d'or, signifiant qu'il est exempt de la macule de peché; l'encens qui y est brulé pour redre sa fumee odoriferante, signifie les prieres des Saints lesquelles sont faites au nom de nostre Seigneur, par lequel les Saints obtiennent facilement tout ce qu'ils demandent en son nom: qui est reuenir au propos cy dessus allegué  
**Joan. 16.** du Prophete Dauid, *Dirigatur oratio mea,*  
**Psal. 140.** &c. par lequel il requiert à Dieu qu'il face monter deuant sa face sa priere à la semblance de la fumee de l'encens laquelle de son naturel monte en hault. Nous ne pouuons rendre raison plus certaine de cest encens & de ceste coustume d'encenser que pour la correspondance & concorde de ces passages de l'escriture. Et afin que l'on cognoisse qu'elle n'est pas introduicte de nouveau en l'Eglise, cōme pense nous le persuader Loque, alleguant qu'elle a esté introduicte par le Pape Leon 3. environ l'an 800. de l'incarnation de nostre Seigneur, nous luy disons avec verité que

*Mensonge  
de Loque.*

sainct Pierre, saint Iacques & sainct Marc, en ont vsé en leur Liturgie ou Messe, ce qu'ils n'ont faiet sans bonne consideratiõ. Ce qui monstre clairement que les Prestres de l'Eglise Catholique, Apostolique-Romaine, tenants de personnages si notables ceste coustume d'encenser, ne la tiennent ny des Payens idolatres ny des Iuifs, comme Loque s'efforce par son beau discours de leur imputer.

*Nullité du pretended abus dixiesme.*

Pour dixiesme abus, il diét qu'il y a plusieurs erreurs en l'oraison generale qui est proferee pour toute l'oblation tant de l'Hostie que du Calice, auant la transsubstantiation, laquelle il exprime tout au long selon qu'elle est prononcee, premierement en Latin, puis en François en ceste sorte.

<i>Suscipe sancta Tri-</i>	Sainte Trinité,
<i>nitatis hanc oblationem</i>	receuez ceste obla-
<i>quam tibi offerimus ob</i>	tion laquelle nous
<i>memoriam Incarnatio-</i>	vous offrons en me-
<i>nis, Natiuitatis, Cir-</i>	moire de l'Incarna-
<i>cuncisionis, Passio-</i>	tion, Natiuité, Cir-

*Responce au 10.*

*Domini nostri Iesu* concision, Passion,  
*Christi, & in honorem* Resurrection, & Af-  
*beatae Mariae semper* censiō de nostre Sei-  
*virginis, & omnium* gneur Iesus-Christ,  
*Sanctorū qui tibi pla-* & en l'honneur de  
*cuerunt ab origine mū-* la biē-heureuse tou-  
*di, ut illis proficiat ad* siours vierge Marie,  
*honorem, nobis autem* & de tous les Saints  
*ad salutem animae &* qui vous ont pleu  
*corporis. In nomine Pa-* depuis le commen-  
*tris, &c.* cement du monde,  
afin qu'elle soit à  
leur honneur, & à  
nous au salut de no-  
stre ame & de nostre  
corps. Au nom du  
Pere, &c.

Or, il dict qu'il trouue en sommaire  
quatre erreurs en ceste oraison: le premier  
en ce que le Prestre offre son oblatiō, c'est  
à dire du pain & du vin, en lieu du corps  
& du sang de nostre Seigneur Iesus Christ,  
d'autant que pour lors la transsubstantia-  
tion n'est encores faiçte, & par ainsi (dit-il)  
voilà vn beau & digne sacrifice qu'il offre  
à Dieu.

Nous luy auonsjà respondu cy deuant



en semblable subtilité, qu'il faut auoir esgard en ce sacrifice de la sainte Messe, nō au commencement de l'action de celuy qui la celebre, d'autant que l'oblation n'est pas en ce commencement là, mais à la cōsecration en laquelle elle consiste: & ainsi nous disons qu'en ceste priere, ce mot d'oblation ne se rapporte pas au pain & au vin qui ne sont encores transsubstantiez, ains au corps & sang de nostre Seigneur, auquel par apres ils seront conuertis & transsubstantiez par vertu des parolles sacramentales, pource que selon le commū prouerbe allegué cy dessus, l'action de l'homme doit estre mesurée à l'intention finale qu'il a. De sorte que quand il dit, Je vous offre ceste oblation, il n'entēd pas que son action se termine & finisse en ces termes ou mots, mais en son dernier but qui est la transsubstantiation qu'il pretend faire par vertu des paroles sacramentales de nostre Seigneur mesme.

En second poinct, il dit qu'il offre en memoire de l'Incarnation, Natiuité, Circuncision, Passion, Resurrection & Ascension de nostre Seigneur, & que la sainte cene (ainsi appelle-il abusiuement le saint mystere de la Messe) n'a esté ordonnee de

Responce au 10.

nostre Seigneur Iesus-Christ pour memoire de toutes ces choses, ains seulement & particulierement pour memoire de sa passion & mort, selon le dire de saint Paul,

1. Cor. 11

*Toutes les fois que vous mangerez ce pain & boirez ceste coupe, vous annoncerez la mort du Seigneur iusques à ce qu'il vienne : & telle est (dit-il) la croyance de saint Ambroise & de saint Augustin inferree au decret au canon quia morte, & au canon, semel Christus.*

dist. 2. de  
consec.

Cela est bon: Mais la passion & mort de nostre Seigneur peut elle estre entendue sans presupposer qu'il ait esté conceu, nay & circoncis, & le fruit d'icelle est-il autre que nostre reſtabliſſement à la gloire de laquelle nous estions deboutez par le peché de nostre premier Pere? que si nous y debuions estre reſtablis, falloit-il pas que cela se fait par le ſecond Adam, c'est à dire, par nostre Seigneur Iesus-Christ; & que par conſequent il reſuscita & monta au ciel pour nous faire reſusciter & glorifier? & si toutes ces choses ſont tellement conioinctes en luy à cauſe de nous, quel mal eſt-ce à l'Egliſe de les rememorer en ceste oblation, encores que le vray & particulier but d'icelle, ſoit la memoire de ſa paſſion? Mais il falloit que Loque s'arrestast

s'arrestaſt à quelque choſe pour monſtrer ſa grande ſubtilité, & auſſi pour ne laiſſer aucun poinct de ceſte doctrine indecis. Et c'eſt touſiours deuotiō & teſmoignage de bonne & ſaincte affection au Chreſtien, de cōioindre la memoire des œuures de noſtre Seigneur tendans à l'effect de noſtre redemption.

Tiercement il reprend le Preſtre de cōtradiction en ceſte priere, diſant que ſi le ſacrifice que le Preſtre offre, eſt en memoire de noſtre Seigneur Ieſus Chriſt (comme il eſt porté expreſſément par ce formulair de priere) il ſ'enſuit que ce n'eſt dōc pas le meſme ſacrifice de Ieſus-Chriſt: d'autāt que ce qui ſe fait en memoire de quelque choſe n'eſt pas la choſe meſme.

Celà eſt bien vray en choſes communes & triuiales. Pour exemple, le tableau qui repreſente au viſ quelque defunct, n'eſt pas ſa perſonne meſme: & les images ne ſont les choſes meſmes qu'elles repreſentent: Mais par tout où il eſt queſtion des faiçts de Dieu, cela n'eſt pas neceſſaire, ains il peut aduenir que la choſe ſignifiante ſoit la choſe ſignifiée, toutesfois ſoubs diuerſe conſideration: comme il eſt tout notoire que les Sacraments de la loy Mo-



Response au 10.

say que estoient entierement differents de la chose qu'ils promettoyent ou signifioient; comme la Circoncision promettoit bien la vie eternelle, mais elle ne la donnoit pas. Mais les Sacrements de la loy Euangelique au contraire promettent & donnent la vie eternelle, & signifient neantmoins la vie eternelle: l'eauë du Baptisme signifie la purgation de l'ame, elle purgel'ame, & ouure le ciel à l'homme qui en estoit exclus. L'espece de pain & de vin au S. Sacremēt de l'Autel signifient le corps & sang de nostre Seigneur & neantmoins le contiennent reellement & de fait; & promettent, & finalement donnent la vie eternelle. Car si ainsi est que

1<sup>er</sup>an. 6.

nostre Seigneur a dit, *Si vous ne mangez la chair du Fils de l'homme, & ne beuvez son sang vous n'aurez point de vie en vous*, il s'ensuit que qui mangera sa chair, & boira son sang, il aura vie en soy, c'est à dire la vie eternelle. Loque (peut estre) ignoroit ceste distinction des Sacrements de l'ancien & du nouveau Testament, quand il a escrit ceste opinion, la fortifiant en apparence du dire de saint Bernard, par lequel il oppose la foy à l'espece, & la memoire à la presence: Car en cela il n'est

rien derogé à la foy de ce Sacrement, *Serm. 39.  
in canonic.*  
auquel nous voyons l'espece, & neant-  
moins par foy nous tenons la verité du  
precieux corps & sang de nostre Sei-  
gneur. Nous rememorons aussi la pas-  
sion & mort de nostre Seigneur, & neant-  
moins nous croyons la presence réelle  
& actuelle de celuy qui a esté estendu  
en la croix pour nous. Voilà commēt les  
saiçts de Dieu ne sont point liez aux regles  
ou contrarietez & contradictions qui se  
trouuent en nature.

Quartemēt, en ce formulaire de priere, il  
reprēd le Prestre de ce qu'il offre son sacri-  
fice en l'honneur de la vierge Marie & de  
tous les Sainçts, disant que l'honneur de la  
Vierge Marie & des Sainçts, n'est pas de la  
sainçte cene comme de la Messe, d'autāt q̃  
la sainçte cene a esté instituee en memo-  
re de nostre Seigneur Iesus-Christ & non  
des Sainçts. Nous ne respondrons point  
à ce mot de cene, pource que nous n'en  
sommes d'accord avec nos nouveaux  
Euangelistes, bien de la cene mystique  
ou consecration qui est la vraye substan-  
ce de la Messe. Nous dirons seulement  
que ce qu'ils trouuent estrange que ce  
sacrifice soit offert en l'honneur de la

## Responce au 10.

Vierge Marie & des Saints cela procede de l'ignorance des parties de la Messe: Dont la principale est ceste consecration que nous auons dict ; & l'autre consiste en ceremonies, chants, prieres, habits representans la mort & passion de nostre Seigneur attirans le Chrestien à deuotion & contemplation de ce hault mystere de nostre redemption : tellement que ceste inuocation ou interposition de l'honneur des Saints n'est pas de la substance de la Messe , comme le veult entendre Loque, ains est seulement vn accroissement de deuotion. Car puisque nostre Seigneur mesme a dict , *Velopater, vt ubi sum ego, illic sit & minister meus.* Ioan. 12 Je veux (mon Pere) que où ie suis, là soit aussi mon seruiteur : & en l'Apocalypse, il Apo. 14. est dict , *Que les Esleus suyuent l'Aigleau quelque part qu'il aille :* & qu'il est raisonnable (suyuant la promesse de nostre Seigneur ) qu'ayans compaty avec luy en ce monde , ils regnent avec luy en l'autre : il est aussi raisonnable que là où nostre Seigneur triomphe, les Saints y foyent recogneus.

Or est-il que le triomphe de l'Eglise militante, par lequel nostre Seigneur est



recogneu y regner, est la continuation de l'exercice de ce hault mystere par lequel on veoit qu'elle n'a iamais succombé à l'effort de toutes les heresies & puissances mondaines, iouyssant avec toute asseurance de la promesse de nostre Seigneur qui a dict, *Portæ inferi non præualebunt aduersus eam*, Math. 16 que les portes d'enfer n'auroyent aucune puissance contre elle. Partant il fault que la Vierge Marie & les Saints (qui ont approché des vertus & merites de nostre Seigneur, plus près que les autres) y soyent honorez. En quoy se recognoist aisément que Loque confond les mots de memoire & d'honneur, quand il dit que puisque ceste oblation est faicte en memoire de nostre Seigneur Iesus-Christ, il n'y faut faire aucune mention de l'honneur des Saints. D'autant que la memoire de nostre Seigneur n'abolit point l'honneur des Saints, & n'y a aucune contrarieté ou repugnance entre ces deux. Au contraire, si quelque honneur est rendu aux Saints, il reuiet à nostre Seigneur, comme estant leur chef; partāt, pourneāt Loque blasme il la coustume louable de l'Eglise, laquelle

## *Responce au 11.*

intitule les Messes des noms de la Vierge Marie & des Saints, non pour leur offrir ce sacrifice (comme il nous veut imputer) car c'est à Dieu seul qu'il est offert : mais pour employer leur intercessiõ pour nous à obtenir ce que nous demandons à Dieu en la grande insuffisance que nous reconnoissons estre en nous.

### *Nullité du pretendu abus onziesme.*

**P**Ar apres Loque s'adresse au canon de la sainte Messe auquel sont les articles plus signalez d'icelle, & en premier lieu considerant que le sacrifice de la Messe ( qui est non sanglant, & est en memoire du sacrifice sanglant que nostre Seigneur a offert vne fois en la croix pour tout le genre humain ) est vnique, comme aussi le mediateur de nostre salut . Il trouue estrange qu'au commencement dudiect canon de la Messe, ce sacrifice est exprimé en pluriel nombre, quand le Prestre en sa priere diect à Dieu ces mots,

*Te igitur clementis-  
sime pater , per Iesum  
Christum filium tuum  
Dominum nostrū sup-  
plices rogamus ac peti-  
mus, ut accepta habeas  
& benedicas hæc dona,  
hæc munera , hæc san-  
cta sacrificia illibata.*

Nous vous priõs,  
Pere tref-clement,  
& humblement re-  
querons par Iesus-  
Christ vostre Fils no-  
stre Seigneur , que  
vo<sup>9</sup> ayez agreables  
& benissez ces dons,  
ces presẽs, ces saints  
sacrifices immacu-  
lez. *Ainsi Loque a-il  
voulu traduire ceste  
priere en nostre langue  
Françoise.*

Il dit (sus la forme & maniere de ceste priere ) que le Prestre selon sa doctrine, n'entend point presenter & offrir à Dieu plusieurs sacrifices, ains vn seul, c'est à sçavoir Iesus-Christ.

Nous luy accordons cela , & luy confessons que ce sacrifice est vnique, d'autant que nostre Seigneur seul y est offert. Mais nous luy respondons aussi que faute de bien entendre l'intention del'Eglise & d'auoir remarquẽ qu'elle a



## Responce au II.

voulu imiter de point en point l'exemple de nostre Seigneur lequel a institué ce sacrifice non sanglant, sous deux especes, c'est à sçauoir, de pain & de vin, il a iugé (trop inconsiderément) que ces deux especes differentes, & disposees à l'effect de la consecration, ne deuoyent estre exprimees en pluriel nombre. Penseoit-il point que l'vnité du sacrifice fut incompatible avec ces deux especes differentes ? Il y en a grande apparence : mais s'il veut recognoistre que ceste institution est de Dieu, & quelle est correspondante à l'ancien sacrifice de Melchisedech, qui offrit pain & vin, & prendre pour tesmoignage de ce le Prophete Daud, & saint Paul, selon lequel nostre Seigneur est appelé, *Sacerdos in æternum secundum ordinem Melchisedech*, Prestre eternellement selon l'ordre de Melchisedech, il trouuera qu'il n'est aucunement estrange que deux especes, sçauoir est le pain & le vin, soyent concurrentes en vn mesme sacrifice. Mais (dira-il) nous ne debattons pas cela. Nous demandons seulement, si ces deux especes sont deux sacrifices, pour nous occasionner de dire en pluriel en ce-

*Psa. 109.  
Heb. 7.*

ste priere, *Hæc dona, hæc munera, hæc sancta sacrificia illibata* : pource qu'en ces mots il est manifestement parlé de plusieurs sacrifices , là est le neud de la question.

A quoy nous respondons, que Dieu (qui est auteur de ce sacrifice ou oblation ) & l'Eglise qui est conduite de son saint Esprit , nous font exprimer en pluriel ces deux especes, afin qu'en ceste oblation ou sacrifice no<sup>9</sup> recognoissio<sup>n</sup>s, & ce qui est de Dieu, sçauoir est l'vnité d'icelle oblation, & ce qui est de nature , sçauoir est le pain & le vin deuant la transsubstantiation, afin qu'en ceste contradiction apparente nous puissions recognoistre combien l'œuvre de Dieu & l'œuvre de nature sont differents; & ce, pour rememorer au vray l'histoire de la passion de nostre Seigneur, pour memoire de laquelle nostre Seigneur mesme a institué ce sacrement & oblation non sanglante , pour ce qu'en icelle passion, le corps d'iceluy estant en la croix , est sorty d'iceluy le sang , lequel par consequent a esté separé du corps, encores que (selon nature) le sang & le corps ne soient qu'un mesme subiet: Si donc selon nature nous recognoissons que le

## Responce au II.

corps solide & le sang d'iceluy sont differents, & toutesfois le sang & le corps sont vne mesme chose, sçauoir est vne mesme creature viuante: pourquoy trouuera-on estrange qu'au sacrifice qui se faict en l'autel en la loy Euāgelique, l'espece de pain & de vin signifie vn mesme & vnique Iesus Christ, lequel est iournellement offert en ce sacrifice non sanglant? Enquoy le vray Chrestien remarquera que tout ainsi comme par article de foy nous cōfessons & recognoissons trois personnes diuines en vne mesme diuinité, ainsi aussi en vn mesme Iesus-Christ nous recognoissons separement la diuinité & l'humanité, selon le Symbole de saint Athanase, lequel dit, *Deus & homo vnus est Christus*, que Dieu & l'homme est vn mesme Iesus-Christ, & en vn mesme sacrement de l'autel nous recognoissons vn Iesus-Christ seul, & les especes de pain & de vin sous lesquelles sont son corps & son sang.

Si ceste interpretation ne plaist à Loque & à ses adherents, qu'il voye saint Paul, parlant du deuoir du Pontife, quand il dict, *Omnis pontifex ex hominibus assumptus pro hominibus constituitur in iis que sunt ad Deum vt offerat dona & sacrificia pro*



*peccatis* : Que tout Pontife qui est pris & choisi d'entre les hommes, est constitué pour les hommes és choses qui se font envers Dieu, afin qu'il offre dons & sacrifices pour les pechez: là saint Paul dit manifestement en pluriel, les dons & sacrifices; cōme aussi il est dit au cōmencemēt du canon, par les mots cy dessus alleguez: Il ne parle pas en cest endroit des dons & sacrifices de l'ancien Testament, d'autant que son intention n'est pas de nous reduire à la seruitude d'iceluy: Et quand mesme Loque voudroit soustenir que saint Paul en cest endroit eust parlé des Pontifes & des sacrifices de l'ancien Testamēt, nous luy repliquerions que sous ceste diction vniuerselle (*omnis*) il auroit aussi entendu parler de ceux de la loy Euangelique, car qui dit tout, n'excepte rien: tellement qu'en fin ceste maniere de parler en pluriel de ce sacrifice, se trouue fondee en saint Paul, & au canon de la Messe, lequel est de mot à mot en la Liturgie ou Messe de saint Pierre, comme nous le prononçons.

Secondement sus ces mots mesmes il demande, à quel propos en ceste priere le Prestre appelle le pain & le vin saints Sa-

## Response au II.

crifices, veu que lors qu'il dit ces mots, les mots sacramentaux ne sont point encores prononcez, & que la transsubstantiation n'est encores faicte.

Nous respondons que le Prestre, voire plustost l'Eglise par le Prestre, ayant esgard à la fin ou intention de cest office diuin, qui est de consacrer & communier, par preuention vse de ces mots, comme nous auons respondu cy deuant à vne semblable question : & que (quant à ce qu'il dit en pluriel, *Hæc sancta sacrificia illibata*) comme aussi il a esté dit en la susdite responce derniere, il declare la grande difference qui est entre les deux choses disposees à ce saint Sacrifice, & le corps & sang de nostre Seigneur, qui est la seule oblation & vnique de ce saint mystere, en laquelle auant la transsubstantiation ou consecration le pain & le vin qui sont natures ou substances differentes, signifient le corps & sang d'un mesme Iesus-Christ, qui seront apres la consecration en lieu de pain & de vin: c'est donc pour leur regard & pour la derniere fin d'icelle consecration qu'ils sont appelez saints Sacrifices en pluriel nombre, & non pour le regard de nostre Seigneur, seul subiet de

ceste oblation, duquel (auant la consecration) ils representent le precieux corps & sang qui sera apres icelle consecration.

Tiercement il demande pourquoy ces deux oblations de pain & de vin sont appelez les Sacrifices sans macule.

Nous respondons que c'est pour le mesme regard pour lequel parauant ils sont appelez Saincts, sçauoir est pour le regard du corps & sang de nostre Seigneur, en la substance desquels ils doiuent estre consacrez par la vertu des mots sacramentaux, c'est à dire le pain en la substance du corps, & le vin en la substance du sang de nostre Seigneur: & que ce mot d'immaculé ne regarde point la substance du pain & du vin, comme elle est auant la consecration: Et s'il est question d'exposer en cest endroit ce mot d'immaculé, par le mot d'incorruptible, cela ne s'entend de la nature & substance du pain & du vin comme ils se comportent auant la consecration, attendu qu'en ceste consideration il est tout apparent que l'un & l'autre est corruptible, comme du pain & du vin est de son naturel; mais il s'entend de nostre Seigneur Iesus Christ, lequel en



## Responce au 12.

foy est incorruptible , soit en ce qu'il ne peut communiquer au peché , soit qu'il ne peut entrer corporellement en corruption, selon ce qu'a prophetizé de luy le prophete Daud, disant, *Non dabis sanctum tuum videre corruptionem*: Vous ne permettez point Seigneur que vostre Saint voye la corruption: car de qui cela peut il estre dit plus particulierement que de nostre Seigneur Iesus-Christ.

Partant , pourneant s'efforce Loque de prouuer par long discours & par ces raileries accoustumees , que la corruption peut aduenir en ces deux especes de pain & de vin, alleguant à cest effect tellement quellement les cautelles de la Messe: car supposé que quelque corruption aduienne aétuellement, & de fait à l'vne ou l'autre espece, ou à toutes les deux, pour cela il ne s'ensuit pas qu'elle soit au corps & sang de nostre Seigneur, lequel par ce passage préallegué est en foy exempt de toute corruption , & demeure tousiours entier, immaculé & incorruptible.

### *Nullité du pretendu Abus douziesme.*

**I**L fonde par apres son pretendu abus douziesme, sus ceste partie du susdict

*pretendu abus de la S. Messe.* 96  
canon de la Messe, en laquelle il est dict,

*Communicantes, &  
memoriam venerantes  
in primis gloriosa sem-  
per Virginis Mariae ge-  
nitricis Dei & Domi-  
ni nostri Iesu Christi,  
sed & beatorum Apo-  
stolorum ac Martyrum  
tuorum, Petri, Pauli,  
&c. & omnium san-  
ctorum tuorum, quo-  
rum meritis precibus  
que concedas, ut in om-  
nibus, protectionis tuae  
muniamur auxilio, per  
eundem, &c.*

Communiquans  
& honorans la me-  
moire, première-  
ment de la glorieu-  
se & tousiours Vier-  
ge Marie, Mere de  
Dieu nostre Sei-  
gneur Iesus-Christ,  
mais aussi de tes biē-  
heureux Apostres  
& Martyrs, Pierre,  
Paul, &c. & de to<sup>tes</sup>  
Saints, par les me-  
rites & prieres des-  
quels tu vueilles o-  
ctroyer que nous  
soyons munis en  
toutes choses de  
l'ayde de ta prote-  
ction, par iceluy  
mesme, &c.

Premierement, pour blasmer ceste  
partie du saint canon de la Messe, il dict  
quelle y a esté inferee par le Pape Syrice,  
enuiron l'an de nostre Seigneur 387. Ce

## Responce au II.

qu'il prend fort mal , faute d'auoir leu la Liturgie ou Messe de saint Pierre , en laquelle ceste partie se trouue de mot à mot , chose qui verifie l'antiquité , & par cōsequent l'autorité dudit canon , comme n'estant chose inuentee ny apostee par les Papes , comme veulent dire nos iaseurs heretiques, mais bien par le premier Pape & vicaire de nostre Seigneur , lequel notoirement ( selon la promesse d'iceluy ) a esté conduit & inspiré du saint Esprit.

Secondement, il dit qu'en ceste partie il y a trois erreurs , dont le premier est en ce que le Prestre dict, *communicantes* , c'est à dire communicans & communians, par lequel mot, dit-il, le Prestre se moque de Dieu & du peuple qui assiste à sa Messe, attendu qu'il mange & boit seul , qui est parler fort ineptement en vn saint mystere comme est cestuy-cy: car il n'est pas question icy d'un boire & manger commun & vulgaire , mais du saint & mystique, duquel la participation & communication ne consiste pas en l'œuure ou action commune & profane des dents ou de la bouche , mais en la preparation deuë & raisonnable, telle que la spécifié  
saint



sainct Paul, disant, *Quiconque mangera ce pain, ou boira le Calice du Seigneur indigne-* 1. Cor. 11.  
*ment, il sera coupable du corps & sang du Sei-*  
*gneur*: Ceste commination de sainct Paul  
n'est pas faicte en l'vsage de toute viande,  
mais de celle-cy seulement : & sus icelle  
nous demandons, puis que ceste oblation  
est instituee seulement pour le salut des  
hommes, lequel est le plus expedient au  
Prestre qui la fera de se cōmunier seul, ou  
cōmunier coniointement l'assistāce qu'il  
a? En icelle se peuuent trouuer des Iuifs,  
des Idolatres, des heretiques, des libertins  
ou pecheurs, qui ne sont aucunement dis-  
posez à cōmuniquer ou participer à ceste  
oblatiō, faut-il de peur de se cōmuniquer  
seul, qu'il les cōmunie tous? qu'il les met-  
te au feu eternel, en lieu de les approcher  
de Dieu & de leur salut? Ce n'est donc pas  
vice au Prestre (comme luy veut imputer  
Loque) de receuoir seul ce Sacremēt, sans  
en faire part aux assistans, puis qu'il ne luy  
apparoit point de leur preparatiō ou bō-  
ne volonté: Ioint que, *non est dandum san-* Matt. 15.  
*ctum canibus*, Il ne faut pas donner le pain  
des enfans aux chiens; comme nostre Sei-  
gneur mesme a dict: Or ce pain, c'est à di-  
re ce Sacrement, est le pain des enfans de

*Responce au 12.*

Dieu , lesquels entant que ses enfans ne voudroient s'y presenter sinon estans préallablement bien & deuëment preparez selon l'ordonnance de saint Paul, laquelle a dict , *Probet autem seipsum homo antequam de hoc pane edat & de Calice bibat:*  
1 Cor. II. Quel'homme s'esprouue auant que manger de ce pain, & boire de ce Calice, pour ce que par iceluy est annoncee la mort que nostre Seigneur a souffert pour nous racheter.

En apres, pour continuër à blasmer ceste forme de priere , il repete son lieu commun de l'intercession ou inuocation des Saints, disant que le Prestre en son sacrifice conioint la memoire de la Vierge Marie & des Saints , avec celle de Iesus-Christ, & que Iesus-Christ n'a point dict, faictes cecy en memoire de ma Mere & des Saints, ains seulement & simplement, *Faites cecy en memoire de moy:* Nous aduouõs que nostre Seigneur n'a point commadé de faire ceste oblation en memoire de la Vierge Marie & des Saints, mais s'ensuit-il de là qu'il ne soit licite d'y faire memoire d'iceux? s'il n'a pas dit cela, nous a il defendu d'employer les merites & suffrages de la Vierge Marie & des Saints , pour sup-

pleer en nostre priere le defaut que nos demerites y peuuent apporter? si l'aduersaire pēse estre bien fondé en raison pour dire que d'autant que nostre Seigneur ne l'a pas commandé, il ne le faut pas faire, nous serōs aussi bien fondez en raison, disans, nostre Seigneur ne l'a pas defendu, partant ce n'est chose hors de raison de le faire: mais nous passons bien outre, nostre Seigneur a dit, *Quod uni ex minimis meis* *Mat. 25.* *fecistis, mihi ipsi fecistis*: Ce que vous avez fait au moindre des miens vous me l'avez fait. Le Chrestien ne doute point de combien la Vierge Marie & les Saints sont plus proches à Dieu, c'est à dire à nostre Seigneur Iesus Christ, que nous autres pecheurs, qui sōmes encores icy en ce monde remply de peché. Si donc en procedāt à ceste oblation ou à la cōmunion ensuiuant apres icelle nous faisons memoire de la Vierge Marie ou des Saints, quel tort faisons nous à nostre Seigneur, auquel infalliblement retourne l'hōneur que nous leur faisons.

Quand à ce qu'il allegue que les Saints sont trespassez, & que partant c'est folie que de leur adresser nos prieres, nous y auons respondu sus le troisieme & qua-



Responce au 12.

triefme abus , comme aussi à l'objection precedente.

En apres pour cōtinuer le mesme point de la memoire & inuocation qui est faite aux Saincts par le canon de la Messe, il dit, qu'en iceluy le Prestre se confond soy-mesme, & se contredit manifestement en vne autre oraison qu'il dit par apres en ces propres termes.

*Nobis quoque peccatoribus famulis tuis de multitudine miserationum tuarum sperantibus , partem aliquam & societatem donare digneris cum tuis sanctis Apostolis & Martyribus Ioanne , Stephano, Mathia, &c. intra quorum nos consortium, non estimator meriti sed veniæ, quaesumus largitor admittite. Per Christum, &c.*

Qu'il te plaise dōner à nous pecheurs tes seruiteurs qui esperons en la multitude de tes misericordes , quelq̃ partie & societé avec tes saincts Apostres & Martyrs , Iean, Estienne, Mathias, & c. en la cōpagnie desquels no<sup>9</sup> te suppliōs de nous recevoir, nō point cōme estimateur d'aucun merite , ains cōme donateur de grace. Par Christ, &c.

Ainsi a il voulu traduire ceste priere latine de mot à mot en nostre langue françoise, disant à Dieu (par trop grande irreuerence) tu, & toy, comme il a faict cy dessus en plusieurs endroits.

Par ceste forme de priere il magnifie & louë merueilleusement ce qu'il a dict cy dessus, qu'il ne falloit point inuoker les trespassez, du nombre desquels sont les Saints bien-heureux en la gloire celeste : disant qu'en ceste priere le Prestre n'inuoke point les trespassez, & n'allegue point leur merites, ny les siens, cōme il a fait en la precedente priere, ains seulement supplie que luy & ses compagnons pecheurs soient admis vn iour en la compagnie des Saints decedez, & ce par grace, & non point par aucun de leur merite. Partant il conclud que ceste priere est du tout contraire à la precedente, & que par la prouidence de Dieu elle a esté inferée au canon de la Messe, afin que chacun veit combien il est mal faict.

Nous luy disons qu'elle n'a aucune contrarieté à la precedente, ains qu'elle y conuient du tout : car puis que nous in-

## *Responce au 12.*

uoquons les Saincts pour estre aydez de leurs prieres à obtenir la gloire celeste, il s'ensuit que nous desirons iouyr d'icelle gloire, avec eux : & pour auoir participation de ceste gloire celeste avec eux , il n'est point, ou ne doit point estre trouué estrāge que nous desirions estre assistés de leurs prieres pour y paruenir , puis que ( comme nous auons dit cy deuant sus le 3. & 4. pretendu abus ) nous confessons l'insuffisance des nostres, par le remors de nos consciences , & recognoissance de nos demerites.

Si donc il n'y a aucune contradiction ou contrarieté en ces deux manieres de parler qu'il a remarqué si subtilement ce luy semble , ains plustost vne grande conuenance , comme il est du tout apparent : Pour neant a il remarqué que c'est par prouidence de Dieu que ceste priere a esté inseree au canon , pour y faire recognoistre ceste pretendüe absurdité d'inuoker les Saincts trespassez, attendu que ceste mesme priere est de mot à mot au canon de la Liturgie ou Messe de saint Pierre , lequel d'autant qu'il a esté assisté de l'ayde du saint Esprit , ne peut estre tombé en contrarieté de do-



Strine , ains comme les autres Apostres & toute l'Eglise s'est tousiours maintenu ferme & stable , & n'a aucunement varié , qui est vne des marques de la vraye doctrine , & de la vraye Eglise.

*Nullité du pretendu Abus treziesme.*

EN apres, pour treziesme abus qu'il pretend remarquer en la saincte Messe, il s'efforce d'improuer la doctrine de la transubstantiation qui se faict par les mots sacramentaux , *Hoc est corpus meum, hic est sanguis meus , &c.* Et faict premierement vne question , pourquoy en la premiere consecration ( qui est du pain ) on adioust ce mot (*enim*) se moquant d'une raison commune que rend l'Eglise , qui est , que tout ainsi qu'en beaucoup de mysteres de l'escriture sainte nous trouuons cinq paroles , ainsi est il bon qu'en cestuy-cy par lequel le pain est transsubstantié au corps de nostre Seigneur , ceste parole , *enim* , y soit adioustee , d'autant que ce mystere de la consecration n'est moindre que les autres , comme celuy de la conception

## Responce au 13.

- de nostre Seigneur au ventre Virginal,  
*Luc 1.* par ces cinq mots , *Fiat mihi secundum  
verbum tuum* : La remission du peché  
*Luc 18.* du Publiquain , par ceste forme de sa  
priere , *Deus propitius esto mihi peccatori* :  
Le pardon octroyé au Paralytique par  
*Luc 5.* ces cinq mots , *Homo remittuntur tibi  
peccata tua* : La guarison d'un autre Para-  
*15.* lytique , par ces cinq mots , *Tolle graba-  
tum tuum & ambula* : La promesse du pa-  
radis faite au Larron , par ces mots,  
*Luc 23.* *Hodie mecum eris in paradiso* : Nous luy  
pourrions encores respondre que par  
ces mots qui sont en nombre de cinq  
en ceste consecration ou transsubstantia-  
tion l'Eglise latine a esgard à rememo-  
rer les cinq playes que nostre Seigneur  
crucifié pour nous a receu en ses bras , en  
ses pieds , & en son costé ; & qu'en tes-  
moignage de singuliere deuotion qu'elle  
a eu au nombre de ces cinq playes  
qu'il a receu en son corps pour nous , el-  
le a adiousté aux quatres mots de la  
consecration du corps ce cinquiesme  
mot , *enim* , pour y attirer d'auantage la  
deuotion du consecrateur , d'autant que  
par icelle nostre Seigneur a speciale-  
ment recommandé la memoire de sa

mort & passion esquelles il a receu ces cinq playes.

Or les ennemis iurez de la Messe (comme entre tous , Loque en cest endroit, se raillent de ce nombre des cinq mots de ceste premiere consecration, alleguants pour (s'en mocquer) qu'au texte Hebraïque & Grec, ce nombre des mots sacramentaux ne s'y recognoist point, c'est vne maniere de monstrier qu'il est versé en ces deux langues. Il n'allegue toutesfois aucū mot Hebrieu en cest endroit , bien allegue-il le Grec , mesme pour le regard des fufdits passages del'Euangile de saint Luc & de saint Iean , auquel ( dit-il) tantost il s'en trouue plus tantost moins de cinq. Nous luy dirions bien aussi qu'en la traduction Françoise qui se pourroit tirer du Latin, il en seroit de mesme. Aussi disons nous que ce n'est point superstition à l'Eglise d'vfer de ces cinq mots en la consecration: comme aussi que ce n'est aucunement deroger aux quatre mots seuls , *Hoc est corpus meum* , lesquels nostre Seigneur a prononcé pour consacrer : D'autant que ce mot *enim*, qui y est inferé , n'adiouste ny diminuë au sens, & ne change aucunemēt l'intention qu'a eu nostre Seigneur, quand



## Responce au 13.

Matt. 26  
Luc. 22.

il a consacré, ains seulement par le nombre de cinq qu'il fait, sert à raurir l'intentiō du consecrateur à la memoire de la passiō & mort que nostre Seigneur a tāt recom-mandé, quand apres la consecration du calice il a dit, *Hæc quotiescunque feceritis in mei memoriam facietis*, toutes & quantes fois que vous ferez cecy, vous le ferez en memoire de moy. Ce que l'Eglise ayant ordonné à ceste intention sans doubte, tout Prestre qui obmettroit à prononcer ce mot (*enim*) en consacrant offenceroit mortellement. Voyons de cecy les Liturgies des anciens.

Nous confessons librement que ce mot *enim* ne se trouue point en la Liturgie de saint Pierre, ny de saint Clement, ny en celle de saint Iacques, ny en celle de saint Gregoire Pape, ny en la Liturgie ou Messe des Ethiopiēs; en toutes ces Liturgies nous trouuons simplement ces mots, *Hoc est corpus meum*, sans cestuy cy *enim*, & de vray au texte Grec, ne se trouue point ceste dictiō *καὶ* qui signifie *enim*. Mais, tout ainsi cōme nous confessons qu'il ne se trouue point en toutes ces Liturgies, aussi faut-il que Loque & tous les ennemis de la Messe nous confessent qu'en la Liturgie ou Messe de

sainct Marc, ces mots Grecs se trouuent en ceste sentence de la consecration, *τοτο γὰρ ἐστὶ τὸ σῶμά μου* qui signifient en Latin, *Hoc est enim corpus meum.*

De ce texte Grec nous concluons que les Apostres & disciples en leur celebra-  
tion ont tenu cela pour indifferent de dire  
*enim*, ou le taire, & se contenter des quatre  
mots que nostre Seigneur a prononcé quā  
il a consacré. Car sainct Marc ne se seroit  
pas bandé seul contre les autres pour fai-  
re & suyure son opinion particuliere, &  
dire seul, *Hoc est enim corpus meum*, attendu  
que l'esprit de diuision n'a point eu le re-  
gne en ce sacré college de la primitiue E-  
glise. Et si depuis ce temps là, l'Eglise (la-  
quelle le sainct Esprit n'a iamais abandō-  
né) a trouué bon d'y adiouster ce mot *enim*  
l'ayāt trouué en la Liturgie de saint Marc,  
& ce pour la consideration cy dessus de-  
claree, n'a elle pas bien l'autorité d'y o-  
bliger sous peine de peché mortel tous  
ceux qui celebreront la Messe; puisque de  
si long temps, c'est à sçauoir, au commen-  
cement de la primitiue Eglise ce mot *enim*  
y a esté en vsage? Nous voulons bien ac-  
corder que ce n'a pas esté vniuersellemēt,  
ny en toutes celebrations, puisqu'il ne se

*Responce au 13.*

trouue pour lors autre que saint Marc qui en ait vſé. Nous accordons auſſi qu'il ne s'en eſt trouué pour lors aucun commandement exprez , mais auſſi il ne s'en trouue aucune deſenſe & prohibition par l'hiſtoire: ce qui ſignifie que l'antiquité n'y a trouué aucun dāger; & qu'elle n'a pēſé que ce mot *enim*, portast aucun preiudice à la conſecration qui ſe faiſt par ces mots. Reſte que ( comme enfans de l'Egliſe ) nous recognoiſſons qu'elle a ceſte authorité d'enioindre à tous ſus peine de peché mortel d'y prononcer ce mot *enim*.

Il combat par apres tant qu'il peut la doctrine que tient l'Egliſe touchant la tranſſubſtantiation qui ſe fait par la prononciation des mots ſacramentaux , *Hoc eſt corpus meum: hic eſt ſanguis meus* , c'eſt à dire, cecy eſt mon corps, cecy eſt mon ſang, & voulant verifier qu'elle ne ſe peut faire par ces mots, il dit qu'il y a grande difference ſur ce poinct entre l'action du Preſtre qui conſacre , & celle de noſtre Seigneur. Parce que noſtre Seigneur conſacrāt ne parloit pas au pain & au vin, ains à ſon aſſiſtāce, & le Preſtre (dit-il) tout au cōtraire pronōçāt ces mots ſacramētaux, par le au pain & au vin & non à ſon aſſiſtance.



Nous luy demandons sus quoy il se fonde quand il dit que le Prestre prononçant les mots sacramentaux parle au pain & au vin & non à son assistance. Car il ne peut tirer cela du texte auquel sont les propres mots de la consecration, ny de l'antecedent ny du consequent. Aussi ne parle-il pas à l'assistance, mais simplement il repete l'action & la consecration de nostre Seigneur, lequel a commandé à ceux qu'il a ordonné Prestres (c'est à dire à ses Apostres) de ce faire à son imitation & exemple, & en memoire de luy. Il est bien vray que nostre Seigneur apres avoir consacré parla à son assistance; mais tirer de là que le Prestre qui repete ceste action de nostre Seigneur suyuant son ordonnance, doyue parler à son assistance, c'est mal inferer. Car nostre Seigneur lors ordonnoit Prestres ceux ausquels il parloit: & le Prestre lequel celebre n'ordonne pas ses assistants Prestres, comme faisoit nostre Seigneur; & par ainsi le Prestre consacrant ne parle ny au pain, ny au vin, ny aux assistants.

Loque demande sus ce propos où le Prestre a trouué que toutes les fois qu'il prononcera sus le pain ces mots, *cecy est mon*

## Responce au 13.

corps)& sus le vin ces mots(*cecy est mon sang*) que le pain fera conuerti & changé en son corps,&le vin en son sang.Est-il ignorant de celà, veu que les mots de la consecration sont si clairs,& le commandemēt de consacrer à l'exemple & imitation,voire mesme en memoire de nostre Seigneur, y est si expres!C'est trop faire l'ignorant,& fermer les yeux au soleil de midy , pour se persuader qu'il est nuict contre le commun iugement de tous.

Et d'autant que la folle opinion des Caluinistes est , que cela ne se peut faire sans que nostre Seigneur descende du ciel en ce Sacrement par vn canal incogneu, il tasche à nous imputer que nous ayons ceste mesme croyance,disant que par ceste ceremonie par laquelle nous prononçons les mots sacramentaux sus le pain & sus le vin,nous ensuyuons Numa Pompilius,lequel donnoit à entendre que par sa Magie il faisoit descendre du ciel la deesse *Ageria*, & son Dieu *Iupiter Elicius*, par le moyen desquels luy estoient reuelez les secrets & mysteres celestes. N'est-ce pas appeller la consecration magie ? Ce n'est merueille de veoir sortir des blasphemés de la bouche des ennemis de la Messe: Car

*Tit. l.ii.  
li.1. dec.1  
Val. ma.  
lib.1.c.3.*

quel bon tesmoignage peut rendre vn ennemy à ce qu'il hayt le plus? Mais c'est outre-passer la promesse qu'il a fait du commencement de son liure de n'vser d'aucunes mesdisances ou attaques iniurieuses.

Or pour contredire ceste croyance de l'Eglise de la conuersion du pain & du vin en la substance & nature du corps & sang de nostre Seigneur, que nous appellons transsubstantiation, il nous propose l'autorité d'un des nostres, qui est Durand en son rational, disant que la consecration se faict par la benediction & non par la prononciation de ces mots sacramentaux, *Cecy est mon corps, & Cecy est mon sang.*

li. 4. c. 42  
nu. 768

En quoy ou il s'abbuse lourdement, ou il impute malicieusement à Durand. Car quiconque examinera bien les paroles de Durand en l'exposition qu'il donne là sus ce mot *benedixit*, il y trouuerra ceste sentence, *benedixit benedictione cœlesti & virtute verbi qua conuertitur panis in substantiam corporis Christi, scilicet, hoc est corpus meum.* disant que nostre Seigneur a beny le pain de benediction celeste, & de la vertu de sa parole, par laquelle le pain est conuerti en la substance du corps de nostre Seigneur, laquelle parole est, *cecy est mon corps.* En



### Responce au 13.

de conse.  
dist. 2.

cela, Durand s'est assez expliqué & n'a laissé aucune obscurité. Car il ne dit pas que c'est par la benediction que la conuersion se fait d'une substance en l'autre, comme luy veut imputer Loque, ains il dict que c'est par la vertu de ceste parolle ou de ces mots, *cecy est mon corps*. Et pour s'expliquer d'avantage, il dit au mesme endroit alleguant le canon, *panis est. Sacerdos conficit ad prolationem verborum istorum hoc est corpus meum, hic est sanguis meus*. Que le Prestre consacrer à la prolation de ces mots, *cecy est mon corps, cecy est mon sang*. Pouuoit-il parler plus clairement que cela pour monstrier que la cōsecration se fait par les paroles susdictes, c'est à dire, la conuersion de la substance de pain en la substance du vray corps, & la conuersion du vin en la substance du vray sang de nostre Seigneur? Voilà comment les modernes heretiques prestent des charitez aux Docteurs & Peres de l'Eglise, pour aduancer sous leur nom, leur faulse doctrine.

Poursuiuant outre-plus, il confere ces paroles sacramentales avec quelques sentences de l'escriture disant, que ces paroles ne sont point operatiues, ains seulement significatiues. Or alleguant ces qua-

tre

tre sentences, *Que la lumiere soit. Que la terre produise. Lazare sors dehors. Jeune fille, leue toy,* il dict, ce sont cy paroles operatiues: Mais les paroles de la sainte cene (ainsi appelle il ceste consecration) n'ont rien de semblable. Car Iesus Christ ne dict pas, *que cecy soit fait mon corps*, par maniere de commandement. Ces paroles donc ne sont point operatiues (dict-il) non plus que celles cy, *cestuy-cy est mon Fils bien aymé*, ains signifient seulement ce qui est.

Gen. 1.  
Ioan. 11.  
Math. 9.

Math. 3.

Mais nous luy demandons, quel besoin estoit-il que nostre Seigneur vst de commandement pour consacrer? Ne pouuoit-il consacrer sans ce faire? Quand il a conuertie l'eau en vin, & multiplié les pains & poissons au desert pour la refection du peuple qui le suyuoit, a-il vsé de commandement? N'a-il pas operé de puissance absoluë? Nous sommes d'accord qu'il a vsé de commandement en l'oeuvre de la creation, & en quelques autres endroicts. Mais pour cela faut-il dire ou tenir qu'il ne peut rien faire de puissance absoluë sinon avec vne forme & maniere de commandement? Pour preuue de cecy nous renuoyons Lo-

Ioan. 2.  
Ioan. 6.

### Responce au 13.

que & ceux de sa farine , aux miracles qu'a fait nostre Seigneur sans parler, ny significatiuement , ny operatiuement, desquels l'histoire Euangelique ne leur manquera.

Or, pour s'estendre en long discours & pour faire durer sa dispute , il s'efforce premierement d'enfreindre & combattre ceste croyance de l'Eglise par arguments , puis apres il tasche d'improuuer aussi les raisons & moyens par lesquels l'Eglise defend & maintient ceste transsubstantiation.

Et pour n'obmettre ses railleries accoustumees il dit en premier lieu que ceste transsubstantiation est imaginaire & fausse.

Puis il demande que veut dire ce pronom *hoc* , en ces mots sacramentaux: & d'autant qu'ordinairement il signifie ( *cecy* ) qui est vne diction demonstratiue , il dict qu'il signifie ou le corps de nostre Seigneur , ou le pain qui est disposé & préparé pour faire la consecration & transsubstantiation. Il trouue absurde & estrange qu'il signifie le corps de nostre Seigneur , d'autant que nous tenons qu'elle n'est point iusques à tant que tou-



tes les paroles soyent prononcees & paracheuees. Si nous disons qu'il signifie le pain, il replique qu'il s'ensuit que le pain soit le corps de nostre Seigneur, ce que toutesfois ne peut estre auant que tous les mots tendans à la consecration soyent prononcez: Tellement que ceste sentence, *Cecy est mon corps*, signifieroit, ce pain s'en va estre mon corps incontinent que les paroles de la consecration seront proferees. Cest argument presse fort (dict-il) & n'y a moyen de maintenir la transsubstantiation y ayant esgard. Car qui voudra (selon la Glose du decret de Gratian) prendre materiellement ce pronom demonstratif *hoc*, qui signifie *cecy*, c'est à dire, le prendre sans aucune signification, de sorte qu'il ne signifie rien, on repliquera, comment donc peut-il seruir à la transsubstantiation ou conuersion d'une nature & substance en l'autre? Nous disons qu'il n'est pas seul pour seruir à ceste conuersion, ains qu'il coopere avec les autres mots suy-uants. Et d'auantage nous ne rougirons point de dire avec la susdicte glose (bien-qu'au grand mescontentement des Philosophes de nostre temps lesquels veu-

*de consec  
dist. 2. ti-  
morem.*

### *Responce au 13.*

lent faire valoir la raison par tout, & mesme és articles de foy) qu'il fault que en cest endroit la foy emporte le prix par dessus toutes les raisons humaines, & que selon la foy que nous auons à ce Sacrement, il fault croire qu'il y a difference entre nostre Seigneur & le Prestre quand à la prononciation de ces paroles de la consecration, d'autant que nostre Seigneur les proferant consacroit & conuertissoit le pain en son corps & le vin en son sang : Mais le Prestre les proferant, consacre & conuertit le pain au corps de nostre Seigneur, & le vin en son sang. Ce qui nous fait dire que ces parolles en nostre Seigneur estoient significatiues & les prononçoit figuratiuement, sçauoir est, parlant de son propre corps & sang, & le Prestre les prononce du corps & sang de nostre Seigneur, & non du sien propre: ce qui fait dire qu'il les prononce materiellement, d'autant qu'il exprime par ces mots non son propre corps & sang, mais vn autre, sçauoir est celuy de nostre Seigneur, duquel il repete & rememore l'action, vsant pour ceste cause de ces propres mots pour operer par la vertu d'iceux la mesme consecration & con-

uersion. Ces paroles donc ne sont pas les paroles du Prestre, ains de Iesus-Christ pour faire que la nature & substance du pain & vin soit conuertie en la nature & substance du corps & sang de Iesus-Christ. Les raisons humaines ne peuuent conduire l'homme à vne parfaicte cognoissance d'un si hault mystere, tout ainsi cōme il ne s'accomplit aussi par moyen naturel, ains seulement par la toute-puissance de Dieu. C'est la foy qui doit faire iouyr l'homme du fruiēt que nostre Seigneur a promis par ce Sacremēt. Laissons donc là en arriere la subtilité des questions & raisons des heretiques, & suyuons la simplicité & la foy Chrestienne.

Il allegue par apres vne incommodité, laquelle humainement se peut inferer de ceste croyance, disant, si le pain & le vin de la sainte cene (ainsi appelle-il ce Sacrement ou ceste consēcration) estoient proprement le corps & sang de Iesus-Christ, il faudroit qu'ils fussent separez comme le pain & le vin sont separez l'un de l'autre. Or le corps & le sang ne sont point separez naturellement, & n'ont esté separez en nostre



### *Responce au 13.*

Seigneur qu'une seule fois, sçavoir est en sa passion: Partant le pain & le vin ne sont point le corps & sang de nostre Seigneur.

En ce beau syllogisme Loque se travaille de prouver que le pain & le vin ne sont point le corps & le sang de nostre Seigneur, comme si les Catholiques soustenoyent ceste proposition : ce seroit trop euidentement symbolizer avec les Lutheriens, lesquels tiennent notoirement ceste mesme proposition, & les Catholiques au contraire disent & soustienent la conuersion de la nature & substance du pain & du vin au corps & sang de nostre Seigneur : ce qui est conuerty d'une substance en autre, ne retient plus la nature & substance qu'il auoit du commencement deuant sa conuersion. Partant puisque nostre foy nous apprend que apres la prononciation des mots Sacramentaux par la toute-puissance de nostre Seigneur, le pain & le vin qui estoient auant icelle prononciation ne sont plus pain & vin, ains le corps & le sang auquel ils ont esté conuertis ; c'est chopper trop lourdement, dire qu'ils soyent le corps & sang de nostre Seigneur apres la conse-

cratiō. Mais Loque nous a voulu imputer ceste fausse croyance pour se donner carriere en ses disputes.

Ceste curiosité de traiter par raison humaine ce que la foy deburoit embrasser, a induit Loque à ce faire Lutherien, de Caluiniste qu'il s'est declaré cy deuant. Car nous ayant voulu imputer que nous tenions qu'en ce Sacrement le pain & le vin y demeuroyent apres la consecration faicte, il prend en fin ceste mesme proposition à prouuer, disant en ceste sorte: si le pain & le vin ne demeure en ce Sacrement en sa propre nature, il fault qu'il soit du tout aneanty, ou qu'il soit conuertiy en la nature & substance du corps & sang de nostre Seigneur. Or il n'est pas aneanty, Car ce ne seroit pas transsubstantiation, ains annihilation d'une substance, & introduction d'une autre: Aussi n'est-il pas conuertiy d'une substance en autre, car si cela estoit, il faudroit que ce qui auroit esté pain auant la transsubstantiation fut le corps de nostre Seigneur apres icelle, & que ce qui auroit esté vin fust son sang. Comme pour exemple l'eauë (és nopces de Cana) fut conuertie en vin par la

*Jean. 2.* puissance & volōté de Iesus-Christ, il faut donc dire que l'eauë fut vin, & ee que ce qui fut vin parauant auoit esté eauë. Ainsi la substance de pain est conuertie au corps de Iesus-Christ, il faut que le pain soit deuenu corps de Iesus-Christ, & que le corps de Iesus-Christ ayt esté pain parauant ceste conuersion, ce qui ne peut estre, dict-il: Car si cela est, il faut aussi que le corps de nostre Seigneur qui est monté au ciel ayt esté autres fois pain, ce qui ne se peut soustenir.

Il s'enueloppe tousiours en de plus grandes absurditez par ses belles conclusions. Car (encores que nous ne voulions accorder avec les Lutheriens, que la substance de pain demeure en ce Sacrement) si remarquerons nous toutesfois en passant que de ceste proposition Loque a mal inferé que le pain seroit aneanty, en confessant ceste proposition. Car vne conuersion d'une substance en autre ne suppose pas vne annihilation. Pour exemple, nous disons que la nourriture corporelle que nous prenons se conuertit en partie en nostre substance: & toutesfois d'autant que l'accroissement de nos corps ne se



faict pas de rien , ceste nourriture ne peut estre annichilee: car si la proposition des Physiciens est vraye (*ex nihilo nihil fit*) c'est à dire, *de rien ne se faict rien*: La nourriture que nous prenõs, seruāt à l'accroissement de nos corps ne sera pas reduite à neant, ains conuertie en nostre substance: En ce qu'il pense subtiliser de l'autre part de ce dilemme, laquelle dit que si le pain est conuertý en la substance du corps de nostre Seigneur, il se pourra dõc dire que le corps de nostre Seigneur aura esté pain auant la transsubstāiation , & que par cõsequent aussi le mesme corps de nostre Seigneur qui est monté au ciel aura esté autresfois pain, il se trompe lourdement: car encores que ce soit vn mesme corps de nostre Seigneur qui est au ciel & au sacrement, si faut-il toutesfois recognoistre que les cõsiderations en sont differentes. Les choses naturelles se recognoissent tousiours en leur estre specifique , c'est à dire en l'estre conuenable à leur espee, comme le corps de nostre Seigneur en la croix, au monument, & au ciel, auquel il est môté: mais les sacrements ont vne autre condition ; cõme pour exemple, quād nostre Seigneur eut consacré il tenoit en

## Responce au 13.

ses mains naturelles son corps sacramental, lequel il donnoit à ses Apostres, il le communia luy mesme : Partant c'est mal conclure à Loque, que si le corps sacramental de nostre Seigneur auant la transsubstantiation estoit substance de pain, qu'il faille aussi que son corps qui est au ciel ayt esté pain : & faut cognoistre ce que dict Paschasius Corbeiensis parlant de l'usage de ce sacrement, qu'en l'Eglise en la participation des sacrements, *Am-*  
*bulamus per fidem non per speciem. Si enim car-*  
*nis species visibilis apparet, iam non fides esset*  
*aut mysterium, sed fieret miraculum, quo aut fi-*  
*des nobis daretur, aut à perfidis execratio com-*  
*municantibus importunior grassaretur* : Nous  
cheminons par la foy, & non par l'espece des choses, d'autant que si en ce sacrement la chair s'apparoissoit visiblement, ce ne seroit plus foy, ains ce seroit vn mystere, & se seroit vn miracle par le moyen duquel ou la foy nous seroit donnée, ou plus grief iugement aduiendroit sus les perfides lesquels se presentent à la cōmunion: c'est ce que dit saint Ambroise, *Sub*  
*lib. 6. de aliena specie accipitur hoc sacramentum ne hor-*  
*sacr. ca. 1. ror cruoris insit, sed maneat gratia redemption-*  
*nis. Ideo in similitudinem quidem accipis hoc*

*sacramentum, sed vera natura gratiam virtutemque consequeris. Ego sum ( inquit ) panis* Ioan 6.  
*viuus qui de cœlo descendi :* On reçoit ce sacrement sous vne espece estrangere, afin d'en exclure l'horreur du sang humain, & pour obtenir la grace de redemption: Pour ceste cause reçois ce sacrement sous la semblance de pain, mais tu obtiens la grace & vertu de vraye substāce du corps de Iesus-Christ, lequel dict ie suis le pain vif, qui suis descendu du ciel: cōme aussi il dict, *Panis quem ego dabo vobis, caro mea est* Ioan 6.  
*pro mundi vita :* Le pain que ie vous donneray est ma chair pour la vie du monde: c'est donc ce mesme corps qui a esté en la croix, & qui est au ciel, lequel nous receuons en ce sacrement, & non autre.

Pour quatriefme argument, il dit contre ceste transsubstantiation ou cōuersion d'une nature en l'autre, que si elle a lieu, il faut aussi qu'en la consecration que fait nostre Seigneur elle ait esté faicte: ce qui ne se peut maintenir, dict-il, d'autant que de la s'ensuiuroient deux absurditez: La premiere, qu'il faudroit par necessité que nostre Seigneur apres auoir consacré eut eu deux corps, sçauoir est, l'un tenāt l'au-



Responce au 13.

tre en ses mains, ou bien l'un en forme de chair, l'autre en forme de pain; l'un parlant, & l'autre muet; l'un presentant & donnant à manger aux Disciples, & l'autre estant cela mesme qui estoit présenté & donné à manger: la seconde, qu'il s'ensuiuroit que Iesus-Christ se seroit mangé soy-mesme, puis qu'ainsi est qu'il mangea du mesme pain, & beut du mesme Calice qu'il distribua à ses Apostres apres auoir consacré.

Quand à la premiere absurdité qu'il infere de ceste foy, de la transsubstantiation, il est aisé de respōdre que nostre Seigneur Iesus-Christ est vn mesme Iesus-Christ en personne & en sacrement, d'autant que (comme dict saint Thomas d'Aquin) *Se conuescens dat in edulium*: Il se donne pour viande à ses Apostres, estant en table avec eux. Partant, la verité est qu'apres la consecratiō faicte par nostre Seigneur en presence de ses Apostres, il a eu son corps naturel comme parauant, & son corps sacramental, c'est à dire sous l'espece de pain: que son corps naturel tenoit son corps sacramental entre ses mains: que son corps naturel estoit en forme de chair, & son corps sacramental sous l'es-

pece de pain : son corps naturel parloit, & non son corps sacramental : son corps naturel presentoit son corps sacramental à manger à ses Apostres , & son corps sacramentalestoit présenté pour manger: quelles absurditez y a il en tout cela? quiconque entendra bien qu'apres la consecration le corps qui est sous l'espece de pain (selon ceste parole de nostre Seigneur , *Hoc est corpus meum, quod pro vobis tradetur*: Cecy est mon corps qui sera liuré pour vous) est le mesme corps qui est nay de la Vierge, qui a souffert pour nous en la croix, qui y est mort , qui a esté ensevely, qui est resuscité, qui est monté au ciel, ne trouuera point qu'apres la consecration faicte il y ait deux corps de nostre Seigneur , ains que l'un est l'autre , sous considerations differentes toutesfois : car c'est chose toute notoire que la chose qui est sous le sacrement est differente du Sacrement : car le corps de nostre Seigneur en son estre naturel estoit visible & sensible, & non au sacrement: & tout ainsi cōme le corps naturel & le sacrement sont differents, ainsi l'estre naturel & l'estre sacramental. Partant ce que Loque infere en cest endroict pour absurdité de ceste

*Responce au 13.*

doctrine de la transsubstantiation, nous le prenons & receuons avec l'Eglise, pour doctrine. Bien noterons nous en passant, qu'il a mal & improprement parlé, quād apres auoir inferé qu'il y auroit deux corps, il a dict qu'vn d'iceux parleroit, l'autre seroit muët; mal à propos il a dict que le corps sacramental seroit muet: car ce mot de muet ne se peut accōmoder à autre subiet qu'à celuy qui a (selon sa nature) quelque propriété de parler, ce qui ne se peut dire proprement du sacrement selon la nature ou propriété du sacrement.

Loque se trouuant rambarré de ce que nous disons que c'est vn mesme corps de Iesus-Christ, que celuy qui distribuoit le Sacrement aux Apostres, le maniant en ses mains, & celuy qu'il leur donnoit en sacrement, selon que tient la doctrine du Concile general de Trente, apres saint Augustin, disant que nostre Seigneur ayāt consacré se portoit en ses mains: ne pouuant contredire la doctrine, il s'adresse à ces autoritez taschant les improuuer ou debatre pour les rendre plus debiles.

Quand à l'autorité du Concile de Trente, elle est formelle, & n'y a au-

*De vera  
pres. corp.  
Christi c.  
1.  
Conc. 1. in  
Psal. 33.*



cun moyen de la combattre, sinon d'opiniastreté.

Quand à celle de saint Augustin, elle est tirée du premier liure des Rois, où il est dit que Dauid voyant que le Roy Saul auoit conceu vne mauuaise volonté contre luy à l'occasion de l'honneur que luy feirent les femmes d'Israël apres qu'il eut mis à mort Goliath, disants que Saul auoit deffait mil Philistins, & Dauid dix mil, craignant la fureur de Saul s'en alla vers le Roy de Geth, nommé Achis, ou estant arriué, & recognoissant que ceux du cōseil dudit Roy Achis commençoient à l'auoir pour suspect pour la grande reputation qu'il auoit entre ceux d'Israël, il entra en deffiance & commença à auoir paour: Et comme dict l'escriture, *Immutauit os suum coram Achis, & collabebatur inter manus eorum, & impingebat in ostia portæ, defluensque saliuæ eius in barbam*: Il changeoit sa contenance deuant Achis, & tomboit entre les mains des seruiteurs d'iceluy, & heurtoit aux huys de la porte, & la saliuë luy descēdoit sur la barbe. Voylà ce qu'en dict le texte du premier liure des Roys. Saint Augustin vsant plustost d'interpretation, que non pas rapportant l'histoire

## Responce au 13.

de mot à mot, en parle ainsi, *Timuit illum, & (sicut scriptum est) mutauit vultum suum coram ipsis, & affectabat, & tympanizabat ad ostia ciuitatis, & ferebatur in manibus suis, & procidebat ad ostia portæ, & salina decurrebant super barbam eius*: David craignit le Roy Achis, & (comme il est escrit) il changea de contenance deuant luy & deuant ses seruiteurs, & estoit comme transporté, & frappoit aux portes de la Cité, & se portoit de ses mains, & tomboit contre les huys des portes, & la salieue luy decouloit sus la barbe.

Il semble à Loque que de ces mots de saint Augustin, par lesquels il dict que David feignant estre fol se portoit de ses mains, nous voulions inferer que nostre Seigneur apres auoir cōsacré, distribuant son precieux corps à ses Apostres, se portoit entre ses mains, & qu'il ne doit estre trouué estrange puis que saint Augustin recite le semblable de David, au passage susdict: donc il s'efforce d'improuer le dire de saint Augustin, le confrontant avec le texte de l'escriture, mesme alleguant le texte Hebraïque pour auoir plus d'autorité: mais il n'en estoit point de besoin, d'autant que la version commune

ne

ne ne dit point au passage préallégué, que David se soit porté entre ses mains, & travaillé pour neant en cest endroit : car nous sommes d'accord avec luy pour ce point: mais pour dire au vray ce que nous semble du dire de saint Augustin, il semble que ce n'est qu'une maniere de parler, pour mieux exprimer comment David feignoit estre hors de foy, comme disant qu'il n'auoit aucune cōtenance ny maintien en son visage, en son regard, en son geste, & en son action, & qu'il sembloit qu'il se voulut porter avec ou entre ses deux mains, à voir comme il se manioit de ses deux mains.

Or, si Loque pense auoir improuué que nostre Seigneur ayant cōsacré se soit porté entre ses mains, pour auoir desnié que David si soit porté parauant, il s'abuse estrangement : car bien que nous confessions que ce soit chose impossible à tout hōme de se porter entre ses mains, si n'est il pas pourtant impossible à celuy duquel nous parlons, c'est à dire à nostre Seigneur Iesus-Christ, duquel la puissance n'est pas reglée sus la puissance ordinaire des autres: il a donc mal conceu, disant que puis que David homme pur & simple, ne



## Response au 13.

s'est peu porter entre ses mains non plus qu'aucun autre, il ne se peut faire nō plus, que nostre Seigneur s'y soit porté: Au cōtraire, nous disons que nostre Seigneur a eu cela de singulier par dessus tous autres hommes, de se pouuoir porter entre ses mains, sçauoir est en ce sacrement.

Conc. 2. in  
Psal. 33.

Il passe bien outre en examinant comment il est possible que nostre Seigneur se soit porté entre ses mains en ce sacremēt, se fondant sus ce que dict saint Augustin mesme, lequel demande de nostre Seigneur, *Quomodo ferebatur in manibus suis?* Comment se portoit il entre ses mains? à quoy il respond, *Quia cum commendaret ipsum corpus suum & sanguinem accepit in manus suas quod norunt fideles, & ipse se portabat quodammodo cum diceret, hoc est corpus meum:* Pour ce que recommandant son corps & son sang, il a pris entre ses mains ce que les fideles sçauent, & quoy? du pain: & rendant graces le rompit, & le consacra: c'est le pur texte de l'Euangile: & ayant consacré il se portoit aucunement, quād il disoit *Cecy est mon corps*, c'est à dire, non pas comme vn corps naturel porteroit vn autre corps naturel, mais il se portoit en sacrement: voylà donc la difficulté

de Loque resoluë, s'il la veut prendre selon le pur texte de l'Euangile : ce qu'il ne doit desdaigner.

Il demande outre-plus, si au sacrement est le vray corps de nostre Seigneur, & nostre Seigneur par ce sacrement s'est baillé pour vraye viande ? &, comme il dict luy-mesme, il a esté & est par ce sacrement veritablement viande pour la vie du monde, s'est-il mangé soy-mesme ? *Ioan 6.* car, dire qu'il se soit mangé soy-mesme, c'est vne trop grande absurdité.

Aquoy nous luy respondons que c'est la mesme absurdité que trouuoient les Capernaïtes en la parole de nostre Seigneur, quand il promettoit de donner son corps à manger, & son sang à boire : car estonnez qu'ils furent de ceste promesse, ils disoient entr'eux, *Ceste parole Ioan. 6.* est rude, & qui la peut ouyr ? Aquoy nostre Seigneur leur respondit, *Les paroles que ie vous dis sont esprit & vie : La chair ne sert de rien, c'est l'esprit qui viuifie : c'est à dire comme expose saint Cyprian, Le sens charnel ne peut paruenir à l'intelligence d'un secret ou mystere si profond, si la foy n'y interuient, qui est ce que nous*

### *Responce au 13.*

auons à respondre à la subtile question de Loque , par laquelle il demande , si c'est le vray corps de nostre Seigneur qui est en ce sacrement , comme il est possible que receuant luy mesme par ses mains ce sacrement , il se soit mangé foy-mesme : Aquoy nous luy disons pour toute responce qu'il ne comprendra iamais comment nostre Seigneur s'est mangé foy-mesme en ce Sacrement , s'il ne s'ayde du remede de la foy , & qu'à faute de ce faire il demeurera enueloppé en erreur , comme ont fait les Capernaïtes susdicts.

Il veut encores subtiliser d'auantage : car considerant qu'en ce sacrement apres la consecration faicte se recognoissent encores les accidents du pain & du vin comme la couleur , la quantité & faueur qui y estoient parauant : il demande pour cinquiesme argument , en quel subiect demeurent attachez ces accidents ? car , dict-il , s'ils demeurent en la substance du pain & du vin , il faut donc dire qu'apres la consecration du pain & du vin la substance du pain & du vin soyent encores : ce qui n'est pas , attendu qu'ils sont transubstantiez au



*pretendu abus de la S. Messe.* II  
corps & sang de nostre Seigneur : Si  
l'on diët aussi que ces accidents soient  
au corps & sang de nostre Seigneur,  
voilà vne autre absurdité , d'autant que  
nostre Seigneur qui est glorifié au ciel,  
ne peut plus recevoir aucunes nouvelles  
qualitez , car ce seroit recevoir vne  
mutation ou alteration , laquelle toutes-  
fois ne peut tomber en vn corps  
glorifié : Ioinct , diët-il , que par tels ac-  
cidents Iesus-Christ seroit rendu visible  
& palpable , ce qui ne peut conuenir à  
la nature de sacrement : Il faut donc ,  
diët-il , que ces accidents perissent par  
la consecration , & qu'ils ne soyent  
plus : car , ce diët saint Augustin , si tu to. 2. ad  
Dardanis.  
ostes aux accidents leurs subiects , ils ne  
se trouueront plus , & ne seront plus ac-  
cidents.

De là il forme son syllogisme en ce-  
ste sorte , pensant nous tenir bien pris &  
enveloppez en ses liens.

Si les accidents du pain & du vin  
estoyent sans aucun subiet ils periroient ,  
& ne seroient plus accidents.

Mais ces accidents ne perissent point ,  
car ils sont visibles & palpables.

Il s'ensuit donc qu'ils demeurent con-

### *Responce au 13.*

ioints à quelques subiects.

Or leurs propres suiets sont les substances du pain & du vin : Icelles donc demeurent & ne se changent point au sacrement.

L'abus que commet Loque, tant en cest argument qu'és questions precedentes de la conionction ou separation de la substance, & de l'accident, est en ce qu'il mesure de mesme pied la conionction de la substance & de l'accident és œuvres de Dieu & de nature : A la verité, selon nature il faut necessairement que tout accident subsiste en son propre subiect, ou bien qu'il perisse : mais Dieu ne lie pas les œuvres à ceste loy, ains il passe par dessus toute necessité & loy quand il veut manifester ses œuvres. Partant le fidele Chrestien ne doit trouver estrange qu'en ce sacrement ceste loy de la liaison indissoluble de l'accident & de la substance, ou de son subiect ne soit recogneuë, attendu que Dieu autheur de nature n'a point lié sa puissance à ceste necessité de nature.

Ceste responce ne plaist point à Loque, & de vray pour l'improuuer, il dit

que la parole de Dieu , parlant des signes en ce sacrement nomme le pain & le vin , & ne faißt point mention des accidents seuls sans leurs subiects.

Nous luy respondons que la parole de Dieu sus le fait de ce sacrement parle du pain & du vin , ou auant la consecration ou apres : Auant la consecration elle vse de ces mots , de pain & de vin , signifiants leur vraye substance, & ne les prend pas pour signes du vray corps & sang de nostre Seigneur , attendu que lors le corps & sang d'iceluy ne sont point sous les especes de pain & de vin , ains se recognoist seulement la vraye substance de pain & de vin : Apres la consecration , la substance de pain & de vin n'y sont plus , ains seulement le corps & sang de nostre Seigneur : & neantmoins l'escriture vse de ces mots de pain & de vin , parlant de ce sacrement , mesme apres la consecration faite : mais c'est pour faire entendre que la vertu du pain ( qui est de soubstenir le corps humain ) se recognoist en ceste nourriture spirituelle , c'est à dire en ce sacrement : car saint Augustin dit , veu

*Mat. 26.  
in Ioan.*



### Responce au 13.

que par le boire & manger les hommes pretendent seulement remedier à la faim & à la soif, il n'y a que ceste viande qui puisse produire tel effect, d'autant qu'elle rend immortels & incorruptibles ceux qui la reçoivent: & saint Cyprian remonstrant pourquoy apres la consecration faite nous vsons de ce mot de pain, pour signifier ce sacrement, *ser. de ex-  
na do.* dict, *Panis est esca, sanguis vita, caro substantia, corpus ecclesia. Corpus propter membrorum in unum conuenientiam, panis propter nutrimenti congruentiam, sanguis propter viuificationis efficientiam, caro propter assumptæ humanitatis proprietatem: Hoc sacramentum aliquando corpus suum, aliquando carnem & sanguinem, aliquando panem Christus appellat: Le pain est la viande, le sang la vie, la chair la substance, le corps l'Eglise, pour laquelle nostre Seigneur donne ceste viande ou ce pain: ce sang, & ceste chair, laquelle est appelée pain à cause de la vertu de nourrir, le sang à cause de la vertu de viuifier, la chair à cause de l'incarnation en laquelle le Fils de Dieu s'est rendu semblable à nous: Nostre Seigneur appelle quelquefois ce sacrement son corps, sa chair, & son sang, quelquefois*

aussi il l'appelle pain. Aussi S. Paul dit, *Panis* 1. Cor. 10  
*quæsumimus nunquid cõmunicatio corporis do-*  
*mini est?* le pain que nous prenons n'est-ce  
ce pas la communion du corps de nostre  
Seigneur? desquels propos il est aisé de iu-  
ger qu'après la consecration le pain & le  
vin ne sont pas signes du corps & du sang  
de nostre Seigneur: car pour estre signes, il  
faudroit qu'ils fussent en verité, ce qui ne  
se peut dire sans consentir à l'erreur de Lu-  
ther, lequel tient qu'en ce Sacrement les  
substances de pain & de vin sont concu-  
rrentes avec le corps & sang de nostre Sei-  
gneur. L'aduersaire demandera, quels  
sont donc les signes du corps & sang de  
Iesus-Christ en ce Sacrement? nous ne di-  
rons pas que ce soit le pain & le vin, mais  
bien l'espece du pain & du vin, & que si a-  
près la consecration, ce Sacrement est ap-  
pellé pain, c'est pour y demonstrier la ver-  
tu & force de nourrir, & non la substance  
de pain & de vin.

Nous voulons bien aussi ce que Loque  
allegue de sainct Augustin que les Sacre-  
ments ayent quelque conuenance avec To. 2. cpi.  
23. ad Ro-  
m facium.  
les choses desquelles ils sont sacrements,  
& qu'autrement ils ne seroient pas Sacre-

*Responce au 13.*

ments, d'autant qu'ils ne les signifieroient pas.

Nous sommes aussi d'accord avec luy en ce qu'il dit, qu'és Sacrements Dieu ne veut point tromper nos sens, & qu'il veut qu'en iceux par vne chose visible nous soit representee vne autre inuisible, & qu'il ne veut point renuerfer la nature des Sacrements laquelle porte que le signe visible soit significatif d'une autre inuisible; comme l'eauë visible du Baptisme, est significative du lauement interieur qu'il opere inuisiblement en l'ame; Mais dire pour cela qu'il faille necessairement que les accidents qui se recognoissent apres la consecration és especes de pain & de vin, subsistent en la vraye substance de pain & de vin, ou qu'ils perissent, c'est vne trop grande absurdité. Tant s'en faut que cela soit, qu'au contraire il est necessaire pour la grandeur & excellence de ce Sacrement qu'en iceluy les accidents soyent sans sujet: car en cela est le miracle de ce Sacrement qui est la transsubstantiation, laquelle estant faite, pour retenir les signes de ce Sacrement, il est de necessité que les accidents demeurent, la substance de pain & de vin n'estant plus, ains estant conuertie



en la substance du corps & sang de nostre Seigneur suiuant sa parole expresse, par laquelle il a dit, *cecy est mon corps*. Cela est cōtre la nature, dira Loque, nous le voulons bien; Aussi est-il contre nature que nostre Seigneur soit nay d'une Vierge : & de vray l'un de ces deux se prouue par l'autre selō sainct Ambroise, lequel sus ceste foy du Sacrement de l'autel demande, *Quid hic queris naturæ ordinem in Christi corpore, cum præter naturam sit ipse Dominus Iesus partus ex virgine? vera utique caro Christi quæ crucifixæ est, quæ sepulta est. Verè ergo carnis illius Sacramentū est. Ipse clamat dominus Iesus, hoc est corpus meum*. Pourquoi cherches tu icy l'ordre de nature au corps de Iesus-Christ, veu qu'oultre nature iceluy nostre Seigneur Iesus-Christ est nay de la Vierge? C'est la mesme chair qui a esté crucifiée, & enseuëlie. C'est donc vrayement le Sacrement de ceste chair. Nostre Seigneur mesme a dict, *cecy est mon corps*. Toute ceste dispute des heretiques procede de leur temerité ordinaire par laquelle ils veulent rendre Dieu (auteur de nature) subiect à la nature mesme, laquelle ne peut porter que l'accident demeure sās substāce. Mais Dieu leur vueille desfiller les yeux & ouurir l'entendement

*l. de iis  
qui fac.  
mist. ini-  
tiatur c. 9*

### Responce au 13.

pour leur faire comprendre qu'il n'est su-  
iet aux loix de nature.

Nous ne disons pas que la toute-puissan-  
ce de Dieu seule nous face croire ceste  
transsubstantiation & ceste subsistence des  
accidents du pain & du vin apres la confe-  
cration, cōme voulans inferer toutes cho-  
ses à nostre poste de ceste toute-puissance  
sans en rendre autre raison. Car dire, Dieu  
est tout-puissant, partant cela est, ce seroit  
donner lieu à beaucoup d'absurditez. Auf-  
si ne disons nous pas, Dieu est tout-puis-  
sant, partant la transsubstantiation se faict  
du pain & vin en la substance & nature du  
corps & sang de nostre Seigneur, mais  
nous disons en ceste sorte. La parole de  
Dieu est vraye, & elle oblige tout Chre-  
stien d'y adiouster foy: Or est-il ainsi que  
*Math. 26*  
*16m. 6.* nostre Seigneur a dit, *cecy est mon corps. Je*  
*suis le pain qui suis descendu du ciel, le pain que ie*  
*vous donneray est ma chair pour la vie du mon-*  
*de:* partant tout Chrestien est obligé de croi-  
re qu'en ce Sacrement est le vray corps de  
nostre Seigneur. Car dire que ce seroit en-  
cores pain c'est vne absurdité trop grande,  
d'autant qu'il ne se peut faire qu'une mes-  
me chose soit pain & chair, & specialemēt  
en ce Sacrement auquel nostre Seigneur a

declaré cōment il dōnoit son vray corps, quand il a dit, *cecy est mon corps lequel sera liuré pour vous.* Or est-il que ce n'est pas du pain qui a esté liuré à la croix pour nous, mais son vray corps. Partant c'est de la pure parole de nostre Seigneur que nous tirons ceste transsubstantiation, & non de sa toute-puissance; biē que nous ne nions pas qu'elle n'en soit le fondemēt, attendu que conuertir vne substance en autre c'est vne certitude & vraye marque de toute-puissance.

Et d'autant que nous disons que ceste transsubstantiation est miraculeuse, & que les accidents de pain & de vin demeurants apres la consecration ou conuersion sans aucun particulier suiect en font foy, Loque persiste à debatre ce poinct, nous alleguant sainct Augustin, lequel dict qu'il ne se fait point de miracle en ce Sacrement. Loque dict comme de sainct Augustin, qu'en la sainte cene il ne se fait point de miracle, nous luy accordons tres-volontiers qu'en la feinte cene, c'est à dire en la cene imaginaire de Calvin, il ne se faict point de miracle, mais bien au saint Sacrement de l'Autel, sçauoir est par les paroles de la consecration, comme jà nous

*To. 3. lib.  
3. de Tri-  
nit. c. 10.*



*Responce au 13.*

*Impossu-  
re de  
Loque.*

auons dict. Au surplus apres auoir bien  
leu & releu le chapitre allegué de S. Au-  
gustin, nous disons que Loque luy preste  
vne charité, d'autant que saint Augustin  
ne dit point qu'en ce Sacremēt ou en ceste  
consecratiō il ne se face point de miracle.

Et quand à ce qu'il dit que tout miracle  
se faiēt veritablement & represente la ve-  
*Id. od. 7.* rité sans tromper les sens, comme (pour e-  
xemple) quand miraculeusement la verge  
d'Aaron a esté cōuertie en serpent, le sens  
de la veuë a esté iuge: & quand nostre Sei-  
*Joan. 2.* gneur és nopces a conuertiy l'eauē en vin,  
le goust en a donné iugement: cōme aussi  
les sens exterieurs ont esté iuges du mira-  
cle qu'il a faiēt en la resurrection du Laza-  
re. Or en la sainte cene (dit Loque) les  
sens ne iugent point que les accidents de  
pain & de vin puissent estre sans aucū sub-  
iect (nous dirons en la feinte cene de Cal-  
uin comme dessus) mais nous dirons qu'en  
la consecration les sens qui ont esté & peu-  
uent estre encores iuges de quelques mi-  
racles, ne peuuent & ne doyuent estre iuges  
du miracle qui se faiēt en ce Sacremēt, soit  
de la transsubstantiation ou conuersion  
d'une substance en autre, soit de la separa-  
tion des accidents d'avec leur subiect natu-

rel qui se fait par le moyen de ceste trans-  
 substantiation. Car en ce Sacrement (com-  
 me dict Paschasius Corbeienfis) *ambulamus*  
*per fidem non per speciem*, nous sommes gui-  
 dez & conduits par la foy & non par l'e-  
 spece, d'autât que si l'espece de chair nous  
 aparoiſſoit viſiblemēt, ce ne feroit pas foy  
 ou mystere, mais ce feroit vn miracle par  
 leq̃l ou la foy nous feroit dōnee, ou feroit  
 reconuë l'exécrable peché des incredules.

Et de vray regardons pour quelle fin  
 nostre Seigneur a institué ce Sacremēt, veu  
 qu'il nous a dict, *Si vous ne mangez la chair*  
*du Fils de l'homme, & si vous ne beuvez son*  
*sang, vous n'aurez point de vie en vous.* C'est  
 vne chose toute notoire qu'il entend par-  
 ler de la vie eternelle. Or est-il que par ce  
 Sacrement nous sommes faicts vn mesme  
 corps avec nostre Seigneur selon ce texte *1. Cor. 10.*  
*de saint Paul, Vnus panis & unum corpus*  
*multi sumus omnes qui de vno pane & de vno*  
*calice participamus*, Nous qui cōmuniquons  
 en vn mesme pain & mesme calice, nous  
 sommes tous vn mesme pain & vn mesme  
 corps. Et comment ce fait cela? est-ce par  
 voye de nature ou par grace speciale de  
 Dieu? L'aduersaire ne peut dire que nous  
 ſoyons faicts vn mesme corps avec Iesus-

lib. de cor.  
 & sang.  
 do. ca. 13

1. Cor. 6.

*Responce au 13.*

Christ par ce Sacrement selon la voye de nature. C'est donc par grace speciale de Dieu.

Puis donc qu'un si noble effect procedant de ce Sacrement ne se communique point par la voye de nature ny par le iugement des sens extérieurs, pourquoy le Sacrement par lequel nous l'obtenons dependra-il de la voye de nature & du iugement des sens extérieurs?

*Exod. 7.*

Voilà en quoy s'est abusé Loque cy deuant quand il a allegué le miracle de la cōuersion de la verge en serpent, & de l'eauë en vin, & de la resurrection du Lazare, disant que les sens extérieurs en auoyent donné iugement, & qu'il falloit semblablement qu'en ce Sacremēt s'il y auoit quelque miracle que les sens extérieurs en iugeassent. Sa conclusion (à la verité) pourroit estre trouuee bonne, si toutes ces conuersions & autres semblables estoient de mesme vertu que celle de laquelle nous parlons: la conuersion de la verge en serpent, de l'eauë en vin, tendoyent à retenir les bons en leur simplicité, & à confondre les mes-croyans; mais elles ne faisoient pas l'homme vn mesme corps avec son Dieu, & ne le conduisoient pas à la iouissance de gloire



gloire eternelle, comme fait ce Sacremēt. Se peut-il trouuer aucun sens exterieur qui iuge comment l'homme est fait vn mesme corps avec le Fils de Dieu, & paruiuent à la iouyssance de gloire eternelle? Dieu a-il soubmis choses de telle importance au iugemēt des sens exterieurs? Tout ainsi comme ce Sacrement tend à vne fin qui surpasse les bornes de nature, & de laquelle le sens exterieur ne peut prēdre iugement, ainsi aussi le miracle qui se fait en iceluy ne depend point de nature ny de l'experience ou du iugement d'aucun sens exterieur.

L'aduersaire non contēt d'auoir iusques icy debattu s'il se fait quelque miracle en ce Sacrement, poursuit plus oultre, & continuē ceste mesme dispute par vne recherche qu'il fait de la nature & force du miracle, pour conclure qu'en ce Sacrement il ne se fait aucun miracle. Car vn miracle (diēt-il) non seulement nous doit faire apperceuoir vne chose nouuelle & non accoustumee, mais aussi vne chose estant par dessus la raison & le cours de nature; doit rauir nos sens & leur apporter quelque estonnēment & admiration; ce qui fait que saint Paul appelle les miracles

## Reſponſe au 13.

Heb. 2.

*ſigna portenta & virtutes*, ſignes, prodiges & vertus. *Signes*, (dict Loque) parce qu'ils representent vne autre choſe que ce qui ſe voit. *Prodiges*, parce qu'ils representent à nos ſens quelque choſe inuſitee, & nouvelle. *Vertus*, parce qu'ils nous montrent vn teſmoignage extraordinaire de la vertu excellente, & toute-puiſſance de Dieu. Pour ceſte cauſe (dict-il) ſainct Auguſtin parlant du pain & du vin de la ſaincte cene ( nous dirons de la cene feinte par Caluin ) n'y recognoiſſant aucun miracle dit, *Hæc honorem habere poſſunt vt religioſa, ſtuporem autem vt mira habere non poſſunt*. Ces choſes peuuent bien auoir de l'honneur comme religieuſes, mais elles ne peuuent pas apporter eſtonnement & admiration comme miraculeuſes.

To 3. lib.  
de Trinit.  
c. 10

Voilà le grand coup d'eſcrime duquel Loque ſe targue contre l'Egliſe Catholique, Apoſtolique - Romaine, pour maintenir ce qu'il a dit, qu'il n'y a aucū miracle en la conſecration.

Or il nous le faut combattre de ſes propres armes en recherchant en ce Sacrement ſi ce qu'il a dict de la nature & vertu du miracle ſ'y pourra trouuer. Pre-

mierement, y a-il en ce Sacrement quelque chose de nouveau & non accoustumé, & qui excède la raison & le commun cours de nature, & qui puisse raver nos sens & leur apporter quelque admiration? Ouy, car, qui fera l'impudent qui dira que ce soit vne chose vñitee & accoustumee, & selon la raison & commun cours de nature qu'une substance par la simple parolle se convertisse en vne autre substance comme il se faict en ce Sacrement, auquel par les paroles sacramentales ce qui estoit paravant vray pain & vin est faict le vray corps & sang de nostre Seigneur? Cela rait en estonnement & admiration non seulement le sens, mais aussi l'entendement de l'homme qui en entend parler. Le sens, d'autant qu'il ne peut comprendre qu'un mesme corps en mesme instant, soit en plusieurs lieux, comme il faut que (supposée la foy de ce Sacrement ou l'expresse parolle de nostre Seigneur par laquelle il a consacré) le corps de nostre Seigneur qui est au ciel, soit aussi en ce Sacrement. Car quel est ce corps de nostre Seigneur qui est au ciel? N'est-ce pas celuy qui a esté liuré pour nous: Et quel est le corps que nous reco-



## Responce au 13.

Mat. 26.  
Luc. 22.

gnoissons en ce Sacrement ? n'est-ce pas  
celuy mesme duquel il a dict , *Hoc est  
corpus meum quod pro vobis tradetur* ? Cecy  
est mon corps qui sera liuré pour vous.  
Par la parolle expresse de nostre Sei-  
gneur donc , le corps qui a esté liuré pour  
nous c'est celuy qui est au ciel , & celuy  
aussi qui est au Sacrement : le sens ne peut  
comprendre qu'un mesme corps soit en  
deux ou plusieurs lieux. Partant il faut  
confesser que selon le sens exterieur il y a  
quelque miracle en ce Sacrement, par le-  
quel il est estonné de recognoistre par l'es-  
criture qu'un corps est en plusieurs lieux:  
Bien est il vray que le sens ne se doit pas  
ahurter à sa capacité (laquelle est petite)  
ains plustost se soubsmettre à Dieu , d'au-  
tant que l'escriture dict , *Non est impossibile  
apud Deum omne verbum*, que rien n'est im-  
possible à Dieu. L'entendement aussi  
s'efgare & se perd , en recherchant les  
moyens de ceste transsubstantiation qui  
se faict par la vertu des paroles de no-  
stre Seigneur en vn instant, & non auec  
vne espace ou succession de temps.  
Nous recognoissons bien en nature v-  
ne conuersion du boire & du manger en  
nostre substance & nature de nostre

corps: Car si cela n'estoit, d'où procederoit l'accroissement de nos corps que nous prenons de nostre naissance? d'où procederoit aussi la conseruation des corps qui ont atteint leur parfaicte grandeur, desquels il dechet tousiours quelque chose, qui se repare par la nourriture que nous prenons? Or ceste conuer-  
sion de nourriture ne se fait pas en vn instant, ny par la prononciation d'aucune parole, mais elle se fait naturellement & par succession de temps. Mais la trans-  
substantiation qui se recognoist en ce Sacrement de l'Autel se fait en vn instant, & par la parole seule de nostre Seigneur, & faict que les accidents du pain & du vin demeurent seuls & sans suiet: Or l'vn & l'autre est contre le commun cours de nature, & estonne tant le sens que l'entendement, & le rait en admiration, & par consequent est miraculeux.

Que sert donc à Loque d'imputer à saint Augustin qu'il ait dict qu'en ce Sacrement il ne se faict aucun miracle? iamaïs saint Augustin n'y a pensé: & qu'ainsi soit recognoissons le par ses pa-

### Responce au 13.

roles alleguees par ledict Loque : elles sont telles. *Hæc hominibus nota sunt, quia per homines fiunt. Honorem tanquam religiosa possunt habere, stuporem tanquam mera non possunt.* Sainct Augustin dict tout clairement qu'en ce Sacrement l'espece du pain qui nous y est donnee est tost consummee, c'est à dire, ne demeure pas longuement en son entier apres la communion, que cela est tout notoire aux hommes: qu'il est honorable cō me chose religieuse, c'est à dire, de deuotion, & que ceste mesme consommation d'espece n'est point miraculeuse: & voilà comment Loque a pris à sa phantasie le dire de saint Augustin, contreuenant du tout à son intention. Il y a beaucoup à dire entre ces deux manieres de parler, en la transsubstantiation qui se faict au Sainct Sacrement de l'Autel, il n'y a aucun miracle, & en la consommation qui se faict de l'espece de pain, par la communion actuelle de ce Sacrement il n'y a aucun miracle. Sainct Augustin a dict ceste derniere proposition au lieu preallegué. Mais quand à la premiere que Loque luy impute, iamais il n'y a pensé, & se iuge aisément par la lecture de



l'antecedent & consequent de la susdite clause par luy alleguee. Tels sont les ouvrages des heretiques, lesquels se sont tousiours donné la liberté des poëtes & des peintres, c'est à dire, de feindre toutes choses à leur volonté, pour aduancer d'autant leurs meschantes opinions comme dict Tertul-  
lian. li. 1. adu.  
Marcion

De mesme licence Loque allegue la dist. nonante-troisiesme du decret au canon *legimus*, disant qu'en la glose d'icelle ces mots sont portez expres, *quicquid raro accidit miraculum est*, ce que la glose dict de vray, sus le texte qui porte ces mots, *quod rarum est plus appetitur*: Comme disant que communement on souhaitte ce qui est plus rare: pourquoy? pour ce qu'il est réputé comme miracle. De là donc il tire ceste raison pour improuuer le miracle que nous tenons estre en la transsubstantiation qui ce faict en ce Sacrement. *Miracle est ce qui aduient rarement*, Or la transsubstantiation n'aduient pas rarement, ains tous les iours puisque tous les iours la consecratiō se fait, Partāt elle n'est point miraculeuse.

### *Responce au 13.*

Or il nous faut respondre à la maieure de ce syllogisme , puis apres à ce qui s'en ensuit. Ceste maieure donc est , *miracle est ce qui aduient rarement*: Dict-elle que tout ce qui aduient rarement soit vn miracle certain & infallible? Si elle dict cela il s'y trouuera beaucoup d'exceptions: pour exemple, c'est vne chose rare en l'homme que la mort; car elle ne luy aduient iamais qu'une fois, & toutesfois la mort est vne chose naturelle en l'homme, & non miraculeuse: & pour parler sainement de ceste maieure qui est tiree de la glose du susdict canon, elle ne dict pas plus que le texte; or le texte est, ce qui est rare communément est plus desiré: & pour estre rare, est-il miraculeux? Non; mais d'autant qu'il rait en estonnement & admiration, il est reputé pour miraculeux: & n'est pas vray semblable que tout ce qui est reputé miraculeux, soit vray miracle pour cela: Dire donc qu'en la transsubstantiation de laquelle nous parlōs, il ne se fait aucun miracle, pource qu'elle se faict tous les iours, est mal conclure, non seulement pour le

defaut de la maieure susdicte, mais aussi pource que quand nous en ferions d'accord absolument, elle ne se peut prendre pour vraye & certaine, sinõ és choses lesquelles se conduisent selon la commune disposition & le commun cours de nature: és œuvres de Dieu elle n'aura aucun lieu. Pour exemple nous dirons avec verité certaine & infallible que Dieu par sa toute puissance crée tous les iours des ames nouvelles, lesquelles il met és corps humains. L'œuvre de creation est miraculeux, personne ne le peut nier: & pource que cest œuvre de creation se fait tous les iours, sera il dict qu'il n'est point miraculeux? prenons donc ceste proposition pour vray semblable és choses naturelles ou és actions humaines, & non és œuvres de Dieu, & par là nous cognoissons la defectuosité de l'argument de Loque.

Il fonde par apres son sixiesme argument contre ceste transsubstantiation sus le naturel du corps, qui est d'estre finy, circonscript & contenu en certain lieu, & non pas d'estre infiny, incirconscript, & en plusieurs lieux à la fois, & mesme pour accōmoder ce naturel du corps, au corps



## Responce au 13.

li. 4. cōtra  
Eutychen.

de nostre Seigneur, il allegue Vigile parlant d'iceluy en ceste sorte : Comment se faiēt cela que le Verbe diuin estant par tout, la chair ne se trouue point aussi par tout? car quand elle estoit en la terre, elle n'estoit pas au ciel, & maintenant qu'elle est au ciel, elle n'est pas en terre: de là dōc il tire ceste raison pour renuerſer la transſubſtantiation: ſi la transſubſtantiation eſt receüe en ce ſacremēt, dit-il, il ſ'enſuiura qu'un meſme corps, ſçauoir eſt le corps de nostre Seigneur, en meſme inſtant, ſera en deux lieux, voire en pluſieurs lieux tout à la fois: car premierement il eſt au ciel où il eſt monté quarāte iours apres ſa reſurrection: ſecondement il eſt au ſacrement: tiercement d'autant qu'il peut aduouër que ce ſacremēt ſe celebre en pluſieurs endroits tout en meſme temps, il ſe trouuera en tous lieux eſquels ce ſacrement ſe celebrera: Il nous tient bien enueloppez en ſes liens ce luy ſemble: mais nous luy demandons, le iour que nostre Seigneur conſacra ſon corps eſtoit en ſa place, & rempliſſoit ſa capacité, & neantmoins il tenoit ſon meſme corps entre ſes mains en ce ſacrement qu'il donnoit à ſes Apoſtres: comment donc ſe pouuoit

faire cela? estoit il en plusieurs lieux deslors? car il est tout certain que son corps naturel estoit circonscript en son lieu selon ses dimensions, & que le sacrement estoit entre ses mains: si donc en ce sacrement estoit ce mesme corps qui deuoit estre liuré pour nous: il faut aussi confesser que ce mesme corps qui deuoit estre liuré pour nous, estoit entre ses mains, ce qui ne se trouue possible selon nature, qu'un corps humain soit entre ses propres mains. Que ferons nous donc? pour ne point deroger à la commune disposition de nature, laquelle ne peut permettre qu'un corps humain se tiëne soy-mesme entre ses mains: renuerserons nous la parole du Fils de Dieu, lequel a dict, *Cecy est mon corps qui sera liuré pour vous?* Disons nous que le Fils de Dieu a esté menteur en pronōçant ceste parole pour sauuer ceste cōtrariété qui se trouueroit en nature? s'affectionner trop à nature pour renōcer à Dieu, est trop peu recognoistre Dieu: c'est ce qui induit les naturalistes à nier, & la transsubstantiation & la presence réelle & actuelle du corps de nostre Seigneur en ce sacrement. Comment donc faut-il (en fin) resoudre ceste questiō, de la presence

*Responce au 13.*

*s. p. q. 76.  
art. 5.*

reelle du corps de nostre Seigneur ? est-il en ce sacrement localement, c'est à dire selon ses dimensions corporelles ? y est-il seulement substantiellement, c'est à dire en substance sans auoir esgard aux dimensions corporelles ? nous dirōs avec S. Thomas d'Aquin (lequel Loque par mespris appelle simplement Thomas d'Aquin) qu'il y est substantiellemēt, c'est à dire de la sorte mesme de laquelle la substance se trouue comprise en ses dimensions : car il y est de la sorte mesme de laquelle se comporte la substance du pain auant la consecration : or est il ainsi, qu'auant la cōsecration la substance du pain n'estoit pas circonscripte en ses dimensions localement, attendu que la substance & la dimension sont entierement differentes, & l'un ne peut estre l'autre, & la substance en tant que substance n'a point de dimension : par consequent apres la cōsecration le corps de nostre Seigneur est en ce sacremēt substantiellement, & non pas localement en ses dimensions : bien qu'en ceste comparaison y a vne dissimilitude grande entre le pain & le corps de nostre Seigneur, d'autant que la substance du pain est le propre & naturel suiet de ses dimensions,



& le corps de nostre Seigneur n'est pas le propre suiet des siennes: ce qui faict dire qu'auant la consecration la substance du pain estoit en son lieu, par le moyẽ de ses dimensions, pource qu'elle n'estoit comparee avec son lieu, sinõ par le moyen de ses dimensions: mais la substāce du corps de nostre Seigneur apres la consecration est comparee avec son lieu, nõ pas par ses dimensions propres, mais par d'autres, c'est à dire par les dimensions qui estoient propres & particulieres à la substance du pain auant que la consecration fut faicte.

Outre ce, nous disons que nostre Seigneur apres sa resurrection estant demeuré en son propre corps, auquel il auoit esté crucifié, s'est manifesté en iceluy quand il a voulu, quelquefois aussi en face de Pel-  
lerin ou de lardinier, rendāt sa propre face incognuë, laquelle neantmoins il ne delaissoit point, il n'est pas plus estrange qu'en ce sainct Sacremēt il nous desnie & oste la cognoissance de sa face corporelle, encores qu'elle y soit de verité & de faict: Et de vray quelquesfois nostre Seigneur en ce sacrement s'est monstřé en face humaine, tantost pour la consolation

*Luc 24.  
Ioan 20.*

## Responce au 13.

des bons, tãtost pour la confusion des incredules : C'est pourquoy saint Bernard dict en son Homelie des deux Disciples quialloient en Emaus, *Nous voyons tous les iours Iesus-Christ en l'Autel sous les especes de pain & de vin, & lors il habite avec nous en habit de Pelerin.*

li 3. Orto.  
fid. c. 3.

Pour nous oster ceste croyance, Loque allegue saint Iean Damascene, disant que nulle des natures de Iesus-Christ ne peut recevoir des differences contraires : & de là il tire ceste conclusion que le corps de nostre Seigneur ne peut estre au sacremēt, attendu qu'il est au ciel : car il est au ciel en ses dimensions, en chair & en os, & par consequent visiblement : mais au sacrement il y seroit invisiblement, ce qui seroit recevoir differences contraires.

Voyons icy l'astuce de Loque, premierement il allegue tres mal l'autorité de saint Iean Damascene, secōdement d'une mauuaise allegation il en tire vne mauuaise conclusion : Saint Iean Damascene parle indifferemment de toute nature, & non pas particulierement d'une des natures de nostre Seigneur ; & outre ce, il dict qu'une mesme nature sous mesme consideration ne peut recevoir deux differē-

ces essentielles cōtraires: il dit deux choses, sçauoir est, differences essentielles, & non pas differences absolument & simplement: puis il dict sous mesme consideration: qu'ainsi ne soit voilà son propre texte selon qu'il est fidelement traduit de grec en latin: *Quomodo vna natura contrariarum substantialium differentiarum susceptiua fuerit? Quomodo enim possibile est eandem naturam secundū idem, creatā esse & increatam, mortalem & immortalem? circumscriptam & incircumscriptam?* Comment (dit-il) vne mesme nature peut elle recevoir deux differences substantielles contraires? cōme est il possible qu'une mesme chose soit sous vne mesme consideration, créée & non créée, mortelle & immortelle, circonscripte & incirconscripte? Nous nous arrêterons donc à ces mots (sous mesme consideration) en prenant les différences les plus cōtraires que l'on sçauroit les imaginer: Et premierement nous dirons que visible & invisible ne sont differences essentielles au corps de nostre Seigneur, soit naturel ou sacramental: car nature n'a point tellement commandé à nostre Seigneur qu'il ne se soit rendu invisible quād il a voulu, soit deuant sa passion, en ce qui



## Responce au 13.

- Luc 4.** est dict de luy & de ses ennemis, que *transiens per medium illorū ibat*, passant au milieu d'eux il s'en alloit : soit apres, comme des deux Pellerins allants en Emaus, que *oculi eorum tenebantur ne eum agnoscerent* : Leurs yeux estoient empeschez & retenus, afin qu'ils ne le cogneussēt point : ce qui nous signifie qu'en nostre Seigneur se sont recognuës deux differences cōtraires , en ce qu'il a esté visible & inuisible ; mais non sous vne mesme cōsideration : car il s'est monstré visible en nature d'homme , & inuisible par la vertu de sa diuinité : pourquoy donc au sacrement de l'Autel ne fera il pas inuisible , puis qu'en iceluy il s'est donné inuisiblement à ses Apostres en sa Cene mystique , & visible au ciel en son corps spécifique & naturel , tel qu'il l'auoit apres sa resurrection , quand il leur disoit, *Palpate & videte , spiritus carnem & ossa non habet sicut me videtis habere* : maniez moy & me voyez , l'esprit n'a ny chair ny os comme vous voyez que j'ay : voilà que c'est de vouloir reduire le corps de nostre Seigneur Iesus-Christ (Dieu & hōme) aux conditions & infirmitiez des autres corps humains , lesquels n'ont rien autre chose en eux que de la pure humanité & infirmité,

mité, & en la petitesse desquels il ne se peut rien imaginer de si haut que ce que l'Eglise Catholique, Apostolique-Romaine tient de ce saint Sacrement.

Partant c'est mal argumenter à Loque, que dire, Le corps de nostre Seigneur est au ciel avec ses dimensions, non autrement, Il ne se peut recognoistre au sacrement de l'Autel avec ses dimensions, Partant il n'y est point du tout, par consequent il ne se fait point de transsubstantiation, ny aucun miracle en la consecration: car le corps de nostre Seigneur est au ciel & au sacrement sous différentes considerations: Voilà comment Loque a tres-mal allegué saint Iean Damascene pour le prendre à son aduantage, & au desaduantage de nostre croyance: car il dict spécialement du corps de nostre Seigneur ce que saint Iean Damascene dict generalement de tout subiect, & passe sous silence ces mots dudit auteur (*sous mesme consideration*) selon lesquels il est aisé à iuger que le corps de nostre Seigneur est au ciel & au sacrement differemment, & non sous mesme considerations.

Et d'autant que nous soustenons avec

*Responce au 13.*

*Iohan 10.* l'Eglise que la vertu & puissance de nostre Seigneur peut aussi bien faire qu'en ce sacrement son corps y soit inuisiblement & incomprehensiblement, comme apres sa resurrection il est entré en la chambre de ses Apostres, les portes estant fermees, contre le pouuoir d'un corps naturel; comme il est aussi disparu de deuant les yeux de ses deux Disciples en Emaus: *Luc 24.* de ceste mesme vertu & puissance diuine qu'il monstroit comme il a cheminé sus les eaux, comme il s'est transfiguré deuant ses Apostres, comme il a nettoyé le Lepreux tout en vn instant, & par le commandement de sa seule parole, comme il a resuscité le Lazare de sa seule parole: Loque fait fort de l'empesché en cest endroit, & allegue plusieurs anciens Peres, disants que nostre Seigneur Iesus-Christ a fait ses miracles par la vertu de sa diuinité, & que par son humanité il a tesmoigné ses passions & souffrances: concludant de là que tousiours son humanité a esté circonscripcte en ses dimensions & en certain lieu, comme elle est encores au ciel; & que par consequent en ce sacrement de l'Autel ne luy peut estre ostee ceste circonscription: mais nous luy disons aussi suiuant



les autoritez des Peres qu'il allegue, que tout ainsi qu'en son corps circōscript il a cheminé sus les eauës, & s'est disparu, où il est entré les portes clausés contre le naturel d'un corps circōscript, & par l'operation de sa diuinité, ainsi aussi cōtre le naturel d'un corps circonscript il s'est tenu en ses mains le iour qu'il a consacré & distribué son corps à ses Apostres, & est tous les iours en ce sacremēt par ceste mesme vertu, sans s'affuiettir à aucune dimension ou infirmité naturelle de corps humain.

L'aduersaire dit que quand nostre Seigneur a faict les miracles cy dessus specifiez, ils ont esté tout euidents, & que tout doute en a esté leué par l'experience des sens naturels de l'homme, ce qui ne se fait pas en cest endroit, car le sens ne peut iuger que le corps de nostre Seigneur estant au ciel, cōme de vray il y est, soit au sacrement, & de fait l'œil humain n'en voit rien.

Aquoy nous dirons que ce sacrement est vn mystere de nostre salut, attendu que nostre Seigneur nous a obligé de le recevoir sus peine de damnation, quād il nous a dit, *Nisi manducaueritis carnem Filij hominis* Ioan 6.  
*& biberitis eius sanguinem non habebitis vitam*

## Responce au 13.

*in vobis*: Si vous ne mangez la chair du Fils de l'hōme, & si vous ne beuvez son sang, vous n'aurez point de vie en vous. Or les misteres de nostre salut ne despēdēt point du tesmoignage & de l'approbation de nos sens, attendu que le salut que Dieu nous promet regarde l'ame premiere-ment, puis en consequence d'icelle, le corps par la resurrection future, & nō autrement: Pour ceste cause Dieu ne les a pas voulu soufmettre au iugemēt des sens exterieurs: ioint que les sens exterieurs de l'homme, lesquels pour la plus part du temps sont mal disposez ou affectez, en eussent iugé diuerfement, ce qui eut faict que les hommes communement se fussent fouruoyez en la voye de leur salut: mais la regle de salut estant telle (selon S. Paul) qu'il faut que nous foyons spirituels & non charnels, & que d'autant plus que nous nous approchons de Dieu, d'autant plus nous deuenons spirituels: il nous faut acheminer par foy & par esprit à nostre salut, & non par le iugement des sens exterieurs: & aussi nostre Seigneur nous voulant vnir avec foy par la mādication de sa chair, n'a dict, *Nisi videritis carnem meam*, mais, *Nisi manducaueritis*: Il ne nous

a pas obligé à voir sa chair en ce sacremēt,  
mais bien à la manger.

Venons au 7. argument que met en a-  
uant ledict Loque contre ceste mesme  
transsubstantiation: il dit, si la transsubstā-  
tiation se fait en ce sacrement, il faut dōc  
que les infideles qui y participent reçoï-  
uent le corps & sang de nostre Seigneur:  
ce quin'est pas, tesmoin Iudas: car si à la  
cause ensuit necessairement son propre &  
naturel effet, & le propre & naturel effet  
est le salut, quel moyen y a il que les infi-  
deles & pecheurs, cōme Iudas, soient sau-  
uez par iceluy? puis donc (dit Loque) que  
le propre effet de ce sacrement est le salut  
de l'homme, & les infideles & pecheurs  
detestables n'y reçoïuent point de salut, il  
s'ensuit que le corps de nostre Seigneur  
n'y est point, & qu'il ne s'y fait point de  
trāssubstantiation, ou bien que les infide-  
les & autres pecheurs n'y receuants point  
de salut, pour neant nostre Seigneur aura  
dit à son Eglise, *Qui mange ma chair & boit* Ioan 6.  
*mon sang viura eternellement.*

Loque se precipite en de grandes ab-  
surditez de part ou d'autre, & tres-malai-  
sément s'en pourra il desueloper s'il ne se  
reduit à vn conseil de S. Paul, par lequel il 1 Cor. 11.



## Responce au 13.

**1 Cor. 11.** dit, *Probet autem seipsum homo antequam de hoc pane edat vel de calice bibat:* Que l'hōme s'esprouue foy-mesme auant qu'il mange de ce pain & qu'il boiue de ce calice : Or en ceste espreuue deux choses sōt necessaires, la foy, & la pureté de conscience, laquelle depēd d'vne penitēce préallable, & d'vne ferme resolution de s'amēder à l'aduenir : quand à la foy elle n'est point aux Payens & infideles: partāt si Loque estoit bien aduisé il n'en feroit aucune mention en cest endroit: quād à la penitence & resolution de l'amendement de vie, ny l'vn ny l'autre n'estoit en Iudas, partāt il a aussi mal à propos parlé de Iudas comme des infideles, attendu q̄ de Iudas particulièrement nostre Seigneur a dit, *Melius esset homini illi si nūquam natus fuisset:* Tellement q̄ le defaut de l'effet de ce sacrement n'est point au sacrement, ny en celuy qui l'a institué, ains en celuy qui le reçoit sans y estre préparé & dignement disposé: Tout estomach n'est pas capable de toute sorte de nourriture, encores que toute nourriture soit de foy, bonne, necessaire & utile: mais il faut accommoder la nourriture au naturel de l'estomach : ainsi toutes sortes de personnes ne sont pas egale-

**Marc 14.**

ment disposees à receuoir ce sacrement de salut , ains seulement les vrais fideles , qui sont preparez par digne penitence.

De là il est fort aisé de recognoistre cōment l'argument de Loque est friuole, en ce qu'il dict , l'effet cessant la cause cesse: Or, est il, que l'effect de ce sacrement ( qui est la vie eternelle) ne peut aduenir aux infideles, comme il se voit particulieremēt qu'il n'a eu lieu en Iudas, partant il s'ensuit qu'en ce sacrement n'est aucunement le corps de nostre Seigneur , & par consequent qu'il n'y a aucune transsubstantiation en iceluy.

Mais nous demandons aussi , si ce sacrement fait son effet , c'est à dire , donne la vie eternelle à celuy qui se trouuera bien preparé, tant par la foy que par vne digne & bonne penitence: pour ce regard donc le corps de nostre Seigneur y fera, & ce par le moyen de la transsubstantiation, attendu que nostre Seigneur a dict, *Celuy qui mange ma chair & boit mon sang a* Ioan 6:  
*la vie eternelle*, Et par consequent le corps de nostre Seigneur sera en ce sacrement par la transsubstantiation qui s'y fera, du moins pour le regard de ceux lesquels

*Responce au 13.*

par iceluy obtiendront la vie eternelle, selon la parole de nostre Seigneur : & d'autre part il n'y sera pas pour le regard de ceux qui n'y feront pas bien preparez : dont il s'ensuit chose tres-absurde, que ce ne sera point par la parole sacramentale de nostre Seigneur qu'il y sera, ains par la disposition de la personne qui le pourroit recevoir : Qu'est il plus ridicule que cela , principalement en vn des plus beaux points de nostre religion ? Ou la parole de nostre Seigneur a quelque vertu en tout sacrement , ou elle n'en a point : si elle en a , le sacrement ne despend point de la disposition ou indisposition de l'homme, pour le bien & salut duquel il est ordonné de Dieu : si elle n'en a point , il s'ensuit que les institutions & promesses de nostre Seigneur foyent frustratoires : ce qui ne se peut dire sans enorme blaspheme , & mesme en ce propos de nostre Seigneur , *Panis quem ego dabo* *caro mea est pro mundi vita* : Le pain que ie vous donneray est ma chair, pour la vie du monde : en quoy il a promis & le sacrement & l'effect d'iceluy , c'est à dire la vie eternel-



le. Promettre & ne point tenir c'est abuser ; dire que cela se puisse trouver en nostre Seigneur, c'est tomber en atheïsme, attendu que l'escripture dit, *Fidelis Deus in omnibus verbis suis, & sanctus in omnibus operibus suis*, que Dieu est fidele en ses paroles, & saint en tous ses œuvres : Voilà où se precipitent Loque & ses adherents & complices, pour nier contre l'euidēce de l'escripture la transsubstantiatiō qui se fait en ce Sacrement.

Il s'arreste par apres à la preuue de l'assumption de son syllogisme, par laquelle il a dict que les meschants comme les infideles & ludas, ne reçoquent pas en ce Sacrement le corps & sang de nostre Seigneur, bien qu'ils reçoquent le pain & le vin, pensant de là inferer pertinēmēt que le corps & le sang de nostre Seigneur ne soit point en ce Sacrement, & que par cōsequent la transsubstantiation ne s'y faict point.

Regardons premierement à la forme de ceste assumption ou mineure de ce beau syllogisme, elle est telle: Les infideles qui reçoquent le pain & le vin ne reçoquent point le corps & sang de Iesus-Christ.

## Responce au 13.

Par icelle il maintient qu'en ce Sacrement sont les substāces de pain & de vin. Comment y peuuent-elles estre ? ou sans les substances du corps & sang de nostre Seigneur, ou avec icelles : si elles y sont separément sans les substances du corps & sang de nostre Seigneur, où est donc la verité des propos sacramentaux prononcez par nostre Seigneur, lequel a dict, *Cecy est mon corps* ? si elles y sont conioinctemēt avec les substances (oultre que c'est là la pure opinion de Luther) ne s'ensuyura-il pas qu'en receuant le pain & le vin (puisque ainsi le maintient l'aduersaire) le comuniant receura conioinctemēt le corps & sang de nostre Seigneur ? Car les deux substances estans ensemble, pourquoy les bons receurent-ils conioinctement les deux substāces du pain & du vin, du corps & du sang de nostre Seigneur, & les meschans ne receurent que le pain & le vin ? Il s'ensuyuroit de là que la presence réelle & actuelle du corps & sang de nostre Seigneur en ce Sacrement dependroit de la preud'homme & bonté du comuniant & nō de la parole par laquelle nostre Seigneur a consacré, qu'est-il plus absurde & esloigné de la verité que cela ?

Math. 26

Luc. 22.

Laiſſons la forme trop ridicule de ceſte aſſomption, & voyons quelles preuues nous allegue Loque pour verification d'icelle.

En premier lieu il allegue ſainct Auguſtin, au 5. liure de *Baptiſmo contra Donatiſtas*, diſant, *Il ne faut point penſer que les meſchans mangent le corps de Ieſus Chriſt, veu qu'ils ne ſont point membres de Chriſt: Car ils ne peuuent pas eſtre membres de Chriſt, & membres de la paillardie.*

Ce qui fait penſer que Loque en ceſte allegation preſte vne charité à ſainct Auguſtin du nom duquel il veut ſ'authoriſer, c'eſt qu'il n'allegue point le chapitre: & quand il l'auroit allegué, & y auroit trouué ceſte ſentence formellement comme il l'a citee, nous luy dirions que ſainct Auguſtin n'auroit iamais eu intention de dire que les meſchans ne reçoient point ce Sacrement, bien qu'ils n'en reçoient point l'effect qui eſt la vie eternelle. Pour preuue dequoy, nous luy oppoſerōs à ſon dire meſme, S. Auguſtin au li. par luy allegué, duquel les mots ſōt tels. *Sicut Iudas cui bucellā tradidit Dominus, nō malū accipiendo ſed malē accipiēdo locum in ſe diabolo præbuit. Sic indignē quiſque ſumens dominicum Sacra-*

li. 5. cōtra  
Donatiſt.  
c. 8.



## Responce au 13.

*mentum, non efficit ut quia ipse malus est, malum sit, aut quia non ad salutem accepit, nihil acceperit. Corpus enim & sanguis Domini nihilominus erat etiam illis quibus dicebat Apostolus, Qui manducat indignè, iudicium sibi manducat & bibit.* 1. Cor. 11. Ainsi cōme Iudas auquel nostre Seigneur dōna le morceau de pain a dōné puissance au diable sus sa personne, nō pas en prenāt vne mauuaise chose, mais en receuāt indignemēt le don ; ainsi quicōque reçoit le Sacremēt de dieu indignemēt, encores qu'il soit mauuais de soy-mesme, il ne fait pas le Sacrement mauuais: ny aussi pour le regard de ce qu'il le reçoit à sa damnation, il ne doit pas estre reputé n'auoir rien pris quand il a pris ce Sacremēt. Car ceuxlà mesmes auoiēt receu le corps & le sang de nostre Seigneur ausquels l'Apostre disoit, *quiconque prend ce Sacremēt indignement, mange & boit son iugement, c'est à dire, reçoit sa condamnation.*

Duquel passage de saint Paul est toute euidente la malice de nos nouueaux Euangelistes, lesquels se moquent de nous quand nous disons que ceux qui participent indignement à ce Sacrement, ne laissent pour cela de le recevoir en verité & de faict, mais à leur condamnation. Car

s'ils ne le receuoyent, que receuoyēt-ils donc? du pain & du vin seulement? cela ne se peut dire, sinon ou en desniant que nostre Seigneur ait consacré, ou bien en desniant la vertu des parolles sacramentales, laquelle est de transubstâtier le pain & vin en substance du corps & sang de nostre Seigneur: ce qui seroit (non sans blasphème) l'appeller menteur en ce qu'il a dit, *cecy est mon corps, qui sera liuré pour vous.*

Loque respond à cela que saint Paul n'a pas dict, *Quiconque mangera ce corps & boira ce sang indignement, il mangera & boira son iugement, mais, Quiconque mangera ce pain & boira ceste coupe.* C'est trop faire l'ignorant & feindre à son escient n'auoir entendu ce que nous auons allegué cy deuant de saint Paul mesme, lequel dict, *le pain que nous prenons n'est ce pas la communion du corps de nostre Seigneur; & la coupe que nous prenons, n'est ce pas la communion de son sang?* là où il vse de ce mot de pain, pour nous remettre en memoire la vertu & force de nourrir à vie eternelle, selon la vertu de nourrir temporellement, laquelle se recognoist au pain cōmun, comme dict saint Cyprian.

1. Cor. 7.

*Serm. de  
cena D. q.*

En apres poursuiuant son mesme

## Responce au 13.

To. 9. tra. point il allegue saint Augustin mesme  
26. in loc. en son exposition sus saint Iean, sus ces  
mots du sixiesme chapitre, *Qui mange ma  
chair & boit mon sang demeure en moy & moy  
en luy* : & dit en ceste sorte rapportant le  
dire de saint Augustin, *Celuy qui ne demeure  
point en Christ, & en qui Christ aussi ne demeu-  
re point, ne mange pas la chair de Christ ny ne  
boit pas son sang, combien que charnellement  
& visiblement il brise de ses dents les signes du  
corps & sang de Christ.*

Voyons combien Loque en ce rap-  
port s'est esloigné du dire de saint Augu-  
stin pour le prendre à son aduantage &  
l'accommoder à sa mauuaise opinion.  
Voicy les propres termes de saint Augu-  
stin, *Qui non manet in Christo & in quo non  
ib. manet Christus, proculdubio nec manducat spi-  
ritualiter carnem eius, nec bibit eius sanguinem,  
licet carnaliter & visibiliter premat dentibus  
sacramentum corporis & sanguinis Christi.*

Loque a passé sous silence en son rap-  
port, ce mot de saint Augustin *spirituali-  
ter*, disant simplement, *ne mange pas la chair  
de Iesus Christ*; Il deuoit dire comme saint  
Augustin, *ne mange pas spirituellement la  
chair de Iesus Christ*. Car il y a bien de la dif-  
ference entre ces deux manieres de parler



ne manger point la chair de Iesus Christ, & ne la point manger spirituellement. Les meschants la peuuent manger sacramentalemēt sans la manger spirituellement, d'autant qu'ils la mangent à leur iugement & condamnation, comme nous auons cy dessus verifié par le dire de sainct Paul, *Qui manducat & bibit indignè iudicium sibi manducat & bibit, non diiudicans corpus Domini.* Dont conformément dict sainct Thomas d'Aquin en sa prose du sainct Sacrement, *sumunt boni, sumunt mali, sorte tamen inæquali vitæ vel interitus.* Les bons le mangent & sacramentalemēt, d'autant qu'ils reçoient le Sacrement, & spirituellement d'autant qu'ils le reçoient à leur salut, qui est le vray effect pour lequel nostre Seigneur l'a institué. 1. Cor. 11

Oultre ce, il a pris le mot de Sacremēt pour signe du corps & sang de nostre Seigneur. C'est bien le prendre à son aduantage, car si iamais il a appris la difference des Sacrements de l'ancien testament & du nouveau, il a trouué que les sacremēts de l'ancien Testament estoient signes seulement, & les sacrements du nouveau ne sont seulement signes, mais aussi les choses mesmes, partant és Sacrements du

Responce au 13.

nouveau Testament, il nous faut apprehender & les signes & les choses signifiees combien qu'ils soyent differents l'un de l'autre. Et pourautant que le signe n'est pas la chose signifiee, Loque pense que les melchants reçouyent ou mangent le signe de la chair de nostre Seigneur sans manger icelle chair, & voilà comment il a failly en sa version quand il a tourné ce mot de *Sacramentum*, par ce mot de signe, & non par le mot de Sacrement qui dit d'auantage que ce mot de signe. Ainsi Loque ensuyuant la pratique des heretiques prend l'escriture & les authoritez des Docteurs de l'Eglise à son aduantage pour deceuoir les simples.

Tract. 59.  
in Ioan.

En apres il allegue le mesme saint Augustin en la mesme exposition de saint Ieansus ces mots du treiziesme chapitre, *Non est seruus maior Domino, neque Apostolus eo qui misit illum.* Parlant des Apostres & de Iudas sus la difference de leur communion. Or il rapporte le dire de saint Augustin en ces propres termes, *Les Apostres en la cene ont mangé le pain qui estoit le Seigneur & ce en viande de nourriture eternelle. Mais Iudas n'a mangé que le pain du Seigneur, & ce en peine & condamnation eternelle.*

Voyons

Voyons de quelle fidelité il allegue ces mots cōme de saint Augustin. Voicy les propres termes de saint Augustin, parlāt par comparaison des Apostres & de Iudas *illi manducabant panem dominum, ille panem domini contra dominum: illi viā, ille pœnā: qui enim manducat indignè (ait Apostolus) iudicium sibi manducat. Les Apostres mangeoyent le pain qui estoit le Seigneur: Iudas mangeoit le pain du Seigneur cōtre le Seigneur, les Apostres prenoiēt la vie, Iudas la condamnation ou peine: car qui* 1. Cor. 11.  
*mange indignement (dit l'Apostre) il mange son iugement.*

Par comparaison du texte de saint Augustin & de la traduction de Loque, il est tout apparent que saint Augustin n'a jamais parlé de la cene en la sorte de laquelle l'entend Loque, c'est à sçauoir, pour y entendre seulement les signes du corps & sang de nostre Seigneur: ce qu'il declare tresbien, en ce qu'il dit, *manducabant panem dominum*, que les Apostres mangeoyent le pain qui estoit le Seigneur: car s'il estoit le Seigneur, il n'estoit donc pas seulement le signe du Seigneur; mais c'estoit le mesme & le vray corps du Seigneur, lequel n'a q̃ le nom de pain (cōme nous auōs dit cy deuant de l'autorité de S. Cypriā) pour nous



## Responce au 13.

signifier la propriété & vertu de mourir.

Par ce mesme texte de saint Augustin allegué par Loque, il est à noter qu'il a dict que, *Iudas manducabat panē Domini*, mangeoit le pain du Seigneur. Or par le mesme saint Augustin & selon l'allegation de Loque, le pain du Seigneur est le Seigneur mesme; par consequent Iudas a receu & mangé le pain qui estoit le Seigneur; dont s'ensuit que les meschans (cōme Iudas) mangent en ce Sacrement le vray corps de nostre Seigneur. Voyez cōme Loque pretendait renuerfer & la transsubstantiation & la verité du corps de nostre Seigneur en ce Sacrement, soit par mesgarde, soit par iuste permission de Dieu qui magnifie sa gloire par ses propres ennemis, la confirme & fortifie d'autant plus qu'il la pense combattre: Ainsi

*Num. 23.* comme Balaam voulant maudire le peuple de Dieu a esté contraint de Dieu de luy donner benediction, ainsi les heretiques desnigrans la doctrine de la sainte Eglise de Dieu, la fortifient. Or (comme

*Ad Pam- saint Hierosme) illud verum est testimoniū*  
*ma. adu. quod ab inimica voce profertur*, le tesmoigna-  
*erro. Ioan* ge qui procede de la bouche mesme de  
*Hierosol.* nostre ennemy, doit estre pris pour vray

*pretendu abus de la S. Messe.* 138  
en tant qu'il fortifie nostre dire; Voilà l'heretique qui pense renuerfer nostre croyance par les autoritez des Peres, & au contraire il la fortifie; Qui sera le Catholique qui la reuoquera en doubte quand nostre partie aduerse la remet sus?

Après auoir mal allegué ces passages, & non selō l'intention des auteurs, il en impute à bon escient d'autres à ceux qui iamaïs n'y ont pensé.

Comme premierement au Pape Innocent 3. duquel il allegue ces mots ou cette sentence, *Iudas a mangé le pain du Seigneur, mais il n'a pas mangé le pain qui estoit le Seigneur.* Qui voudra lire & relire ces passages dudict saint Pere, il trouuera qu'il n'en a touché aucun mot.

Puis aussi il allegue saint Hilaire comme disant, *le pain qui est descendu du ciel n'est receu sinon de celuy qui a le Seigneur Iesus Christ & qui est vray membre d'iceluy.* Saint Hilaire n'en fait aucune mentiō, comme pourra voir le lecteur qui lira ledict liure de bout à autre.

Il allegue aussi saint Hierosme comme disant, *Les meschants ne mangeront point le corps de Iesus, & ne boiront point son sang, pource qu'ils n'apportent point la foy, laquelle est*

## Responce au 13.

*necessairement requise aux sacrements*, Voicy les propres termes desquels vsc saint Hierosme, *Omnis hereticus nascitur in Ecclesia, sed de ecclesia projicitur & contendit & pugnat contra parentem*, Tout heretique prend son origine en l'Eglise, mais il est chassé de l'Eglise & combat contre l'Eglise sa mere. Puis parlant des heretiques il dict en pluriel: *Non comedent & non bibent corpus & sanguinem saluatoris*. Les heretiques ne mangeront point le corps & ne boiront point le sang du Sauueur.

Qu'y a-il de semblable entre l'allegation de Loque & ce texte de saint Hierosme? Loque parle des meschans en general, & saint Hierosme particulièrement des heretiques. Loque dict que les meschants ne reçoient & ne communient point le vray corps & sang de nostre Seigneur. Saint Hierosme entend seulement qu'ils ne le reçoient pas à leur salut, ains seulement à leur condamnation: autrement pourquoy veut-il que vn chacun examine sa conscience deuant que se presenter à la communion de ce Sacrement: il ne faut penser que ce bon Docteur ait iamais cōceu en son esprit vne opinion si contraire au dire de S. Paul, le-



quel tiët que celuy qui reçoit indignemēt ce Sacrement, ne le prend qu'à son iugement & à sa condamnation.

Il luy semble qu'il n'auroit rien fait s'il n'alleguoit aussi le decret, duquel le texte est tel: *qui discordat à Christo nec māducat carnem eius nec sanguinem bibit, etiamsi tantæ rei Sacramentũ ad iudiciũ suæ præsumptionis quotidie indifferenter accipiat.* Ce decret est tiré du liu. des sentēces de S. Augustin, sçauoir est de la sentēce 339. Loque le traduit fort bien à son aduātage, mais non pas fidelement comme doit faire le bon interprete. Il diët ainsi, *Celuy qui est discordant d'auec Christ ne māge point la chair de Christ, et ne boit point son sãg, et ainsi il prend tous les iours le sacrement de si grande chose au iugement de sa perdition.*

Premierement il a tout renuersé le vray sens de ce texte de saint Augustin en tournant ce mot ( *etiamsi* ) par ce mot , *ainsi*. Le lecteur iugera si le sens naturel de ce texte n'est pas tel, *Celuy qui est discordant d'auec Iesus Christ, ne mange point sa chair & ne boit point son sang, encores qu'il reçoie indifferemment tous les iours le Sacrement d'une si grande chose à sa condamnation.* Saint Augustin diët deux choses de ceste sentence:

*Responce au 13.*

la premiere est, qu'il se peut faire que ce-  
luy qui est discordant d'auec Iesus Christ,  
reçoine tous les iours le Sacrement d'une  
grande chose, qui est le saint Sacrement  
de l'Autel : la seconde, qu'en ce faisant,  
d'autant qu'il est discordant d'auec Iesus-  
Christ, il ne reçoit point la chair & le sang  
de Iesus-Christ, c'est à dire, selon l'intentiõ  
de nostre Seigneur, qui est que le Chrestien  
le reçoie à son salut.

Or, que l'intention de saint Augustin  
soit telle, il est tout notoire par luy-mes-  
me: Car puis qu'il dict en la dernière clau-  
se de ceste sienne sentence ces mots, en-  
cores qu'il reçoie indifferemment tous  
les iours le Sacrement d'une si grande  
chose, nous demandons à Loque & ses  
adherents, quelle est ceste grande cho-  
se, de laquelle est ce Sacrement? N'est-ce  
pas ou le corps & sang de nostre Seigneur,  
ou le salut de l'homme, pour lequel ce  
Sacrement est institué? si c'est le corps  
de nostre Seigneur, lequel nécessaire-  
ment & infalliblement est en ce Sacre-  
ment (comme l'a prononcé nostre Sei-  
gneur) il s'ensuit que les meschans rece-  
uants ce Sacrement reçoient le corps  
de nostre Seigneur, mais non à leur salut,

d'autant que puis qu'ils sont discordants d'auec nostre Seigneur, en la communion d'iceluy, ils ne peuuent auoir le but & intention de nostre Seigneur qui est le salut des comunians, en ce qu'il dict, *Qui manducat hunc panem uiuet in eternum,* Ioan. 6.  
*Qui mange ce pain viura eternellement.* Si par ceste grande chose de laquelle les meschans reçoquent le Sacrement se doit entendre le salut de l'homme, il est tout euident que saint Augustin dict que les meschants ne peuuent receuoir le corps & sang de nostre Seigneur à leur salut : & voilà comment Loque corrompt aussi hardiment le texte & les sentences des Docteurs de l'Eglise, cōme celles de l'escriture.

Après il fait estat de ramasser quelques sentences des Peres & Docteurs de l'Eglise, fauorables à ceste doctrine Catholique, par laquelle nous tenons, que, & les bons & les meschans indifferemment, reçoquent en ce Sacrement le vray corps & sang de nostre Seigneur, bien que auec diuers effect: pour par apres se faire trouuer braue homme en les contredisant. Entre autres il allegue saint Augustin, saint Cyprian & saint Iean Chrysostome;



### *Responce au 13.*

Desquels il n'est besoin d'alleguer le texte formel, d'autant qu'ils tiennent vna-niment ceste doctrine de l'Eglise. Seulement nous nous arresterons sus la forme que tient ledict Loque pour les contredire & refuter.

En premier lieu il dict que les Catholiques (lesquels il appelle par derision aduocats de la transsubstantiation) ne veulēt pas entendre les passages susdicts selō leur sens & selon l'analogie de la foy, ce que toutesfois ils deuroyent faire pour les biē entendre. C'est son opinion.

Il passe plus oultre, disant que quand il est question des Peres & Docteurs anciēns, nous nous deuons bien garder d'establis à la volée vne loy cōmune de tous leurs escrits, c'est à dire, pour les approuuer en tout & par tout, d'autant que cōme hōmes ils ont peu errer, & par consequent nous pourions errer & mesleriōs leurs vices & erreurs avec leurs vertus & bōnes opiniōs. Qu'il faut peser diligēment leurs escrits & les examiner à la regle de la sainte escriture. Que par ce moyē nous leur garderōs la dignité qu'ils meritent sans preiudicier à la prerogatiue & autorité de la parole de Dieu. Et pour dire qu'en cela il ne

faict point de tort à l'autorité des Peres de l'Eglise, il allegue le dire de saint Augustin, donnant iugement d'une certaine epistre de saint Cyprian, en ceste sorte, *Je ne m'arreste point à l'autorité de ceste epistre, car ie ne tiens point les escrits de Cyprian comme canoniques, ains ie les examine par les canoniques, & ce qui s'accorde avec l'autorité des saintes Escritures, ie le reçois à la louange d'iceluy, mais ce qui ne s'y accorde point, ne luy desplaist, ie le reiette*: Il allegue, outre-plus, le mesme saint Augustin, disant qu'il veut que les autres se comportent de mesme sorte au iugement de ses escrits, que luy au iugement des escrits des autres.

To. 7. li. 2.  
cōtra Cre.  
Gram.  
c. 32.

Voilà vn vray amusement & fort specieux pretexte pour ceux qui se veulent establir iuges en toutes disputes, comme sont ordinairement les plus signalez heretiques: il ne reste que de descouvrir le venin ou la peruerse intétion qui y est cachée.

En regardant le suiet duquel parle saint Augustin, cela se cognoistra, comme aussi en considerant son propre texte selon son intention, & le prenant de mot à mot.

Premierement, il donne son aduis sus

Responce au 13.

l'epistre de saint Cyprian, *ad Iubaianum*, en laquelle il dict que ceux qui se conuertissoient à l'Eglise apres auoir adheré aux heretiques, deuoient estre baptisez en l'Eglise, encores qu'ils eussent esté baptisez par l'Eglise: Cresconius (auquel parle S. Augustin en ce passage là) ne considerant que saint Cyprian auoit soubmis ses oeures & escrits au iugement de l'Eglise, cōme ont tousiours faict les anciens Docteurs, & que l'Eglise tenoit ceste opinion pour erronee, se vouloit ayder contre S. Augustin, de l'autorité de ce grand personnage fort renommé entre les Anciens, & soustenoit contre l'Eglise, & contre S. Augustin (par ceste autorité) qu'il estoit licite de rebaptiser: pour ceste cause saint Augustin luy dit en ceste sorte, *Ego huius epistolæ autoritate non teneor, quia literas Cypriani non ut canonicas habeo, sed eas ex canonicis considero, & quod in eis diuinarum scripturarum authoritati congruit cum laude eius accipio, quod autem non congruit cum pace eius reijcio*: Ie ne despens point de l'autorité de ceste epistre, pource que ie ne tiens point les escrits de Cyprian pour canoniques, ains ie les examine par les escritures canoniques, & en ce qu'ils y conuiennent



& accordent, ie les approuue à la louange d'iceluy; & en ce qu'ils n'y accordent point, ie les reiette sans en rien luy derogier.

Or, suiuant le dire de saint Augustin, s'il faut mesurer l'autorité des escrits de saint Cyprian, ou d'autres Docteurs sus les escritures canoniques, en ce qu'ils y accordent ou discordent, est-ce à vn particulier de ce faire, ou à l'Eglise? Il n'y a celuy qui n'accorde que c'est à faire à l'Eglise, car nostre Seigneur dict, *Qui Ecclesiam non audierit sit tibi sicut Ethnicus & Publicanus: Qui ne daignera esconter l'Eglise, qu'il te soit comme Payan & Peager.* Et c'est l'Eglise mesme, laquelle declare les liures de l'escriture canoniques pour nous faire entendre l'autorité des vns & des autres: ce que recognoissants les anciens Docteurs ont tousiours desiré que leurs escrits ayent esté visitez & approuuez par l'Eglise, auant que d'estre mis en lumiere pour seruir au public. Pour exemple les Apostres ont il pas déclaré quels liures de l'escriture deuoient estre reputez canoniques? Le Cōcile 3. de Cartage prouincial, cōfirmé par le 6. Concile general, tenu en la ville de Constantinople, a il pas fait le sembla-

*Mat. 18.*

*can. 48.*

*c. 47.*

## Responce au 13.

c. 59.

can 7.

*Prochorus*  
*ca. 47. vi-*  
*te B. 10a.*

ble? Le Pape Gelase I. de ce nom, n'a il pas  
declaré enuiron l'an 494. quels liures, ou-  
tre ceux de l'escriture, deuoient estre te-  
nus pour canoniques, & quels pour apo-  
criphes? Le Concile de Laodicee a fait le  
semblable sous le pontificat de Liberius  
Pape, & est approuué & confirmé ledict  
Concile par le sixiesme Concile general  
susdit. Et le Pape Innocentius I. de son au-  
thorité de souuerain & premier Pontife  
n'a il pas declaré en sa 2. epistre qu'il es-  
crit à Viétricius Archeuesque de Rouën,  
quels liures de l'escriture & autres il fal-  
loit tenir pour canoniques, & quels de-  
uoient estre tenus pour apocriphes? Et le  
Concile de Florence enuiron l'an 1439. a il  
pas exprimé mot à mot quels liures de  
l'escriture doiuent estre tenus pour cano-  
niques? & le dernier general Concile, qui  
est celuy de Trente, au premier decret de  
la 4. session, n'a il pas fait le semblable?  
Saint Iean l'Euangeliste a baillé à l'Eglise  
son Euangile pour la lire & approuuer &  
ratifier; ce qu'elle a fait promptement.  
Origene par vn epistre qu'il a escrit au Pa-  
pe Fabianus, ne s'est il pas excusé des er-  
reurs qu'il auoit escrit, luy faisant enten-  
dre par icelle epistre qu'il n'auoit pas mis

ces erreurs en lumiere, ains que cela estoit aduenü par vn sien amy auquel il se confioit & communiquoit fort priuément, qui se nommoit Ambroise, lequel par apres les auoit publié sans l'en aduertir? ainsi le recite saint Hierosme, disant auoir leu icelle epistre : c'est donc à faire au S. Pere, comme chef de l'Eglise, ou à l'Eglise assemblee par Concile sous l'autorité d'iceluy, de decider & vider les differents de la foy, & d'approuuer ou iuger la conuenance des liures des Docteurs de l'Eglise, avec l'escriture sainte, & non à aucun particulier, ou à vne secte nouvelle comme est celle des Calvinistes, de laquelle Loque & ses adherents sont membres, & non de la vraye Eglise.

*tom. 2. ad  
Pammachium &  
Oceanum  
de error.  
Origenis.*

Laissons donc les expositions des authoritez des Peres ( qui ont soustenu ceste transsubstantiation ) lesquelles Loque se donnant carriere a forgé à son plaisir, cōme ne meritants respōce, d'autant qu'elles sont procedees d'un cerueau particulier : & suiuous le grand chemin de l'Eglise.

Continuant ces coups, il se monstre si acharné contre ceste transsubstantiation que l'Eglise maintient estre en ce sacre-



ment, qu'il n'a point de honte de Caluiniste deuenir Lutherien : car il maintient que la vraye nature & substance de pain & de vin demeure en son entier en ce sacrement, & s'il dit qu'il ne tient pas comme Luther que le vray corps & sang de nostre Seigneur y soit avec le pain & le vin, comme faict Luther, pour le moins il est d'accord avec luy en ceste partie : ce qui est tout apparent par son huictiesme argument ou syllogisme, lequel est tel,

Si la vraye nature & substance du pain & du vin demeure en son entier en la sainte Cene ( ainsi parle il de ce sacrement ) il ne se faict en icelle aucune transsubstantiation: Or la vraye nature & substance de pain & de vin demeure en son entier en la sainte Cene : Partant il ne se faict en icelle aucune transsubstantiation.

Or, d'autant que l'assumption de ce syllogisme est formellement contraire à la doctrine de la transsubstantiation, il y apporte trois sortes de preuues, lesquelles nous proposerons & examinerons separément pour euitier confusion.

Il tire sa premiere preuue de l'autorité de l'escriture, sçauoir est de l'expresse

parole de nostre Seigneur, & de S. Paul, disant que nostre Seigneur apres auoir consacré & distribué ce sacrement à ses Apostres, leur a dict, *Amodo non bibam vobiscum de hoc genimine vitis donec illud bibam in regno patris mei* : De ceste heure ie ne boiray de ce fruit de vigne iusques au iour que ie le boiray nouveau avec vous, au royaume de mon Pere : auquel passage le fruit de vigne signifie le vin, & non pas le sang de nostre Seigneur.

Et saint Paul ayant recité la consecration faite par nostre Seigneur, dict aux Corinthiens, *Quotiescúmque manducabitis panem hunc vel Calicem bibetis, mortem Domini annuntiabitis donec veniat* : Toutes les fois que vous mangerez ce pain & boirez ce Calice, vous annoncerez la mort de Iesus-Christ iusques à ce qu'il vienne : lesquels propos il vse manifestement des mots de pain & de Calice apres la consecration faite; partant il s'ensuit qu'apres la consecration faite, le pain & le vin demeurent en la sainte cene : voylà le dire & la conclusion de Loque, tres-bien fondé ce luy semble, encores avec le mot de la sainte cene.

## Responce au 13.

Voyons combien il est loin de son compte: il semble qu'il n'a pas bien appris la pratique de l'escriture sainte, laquelle est telle que pour exprimer le changement d'une nature ou substance en une autre, elle repete le nom de la premiere nature ou substance, comme si apres le changement faict la premiere substance estoit encores en son estre.

Exo. 7.

Pour exemple au liure d'Exode, par le commandement de Dieu, Moÿse & Aaron son frere, en la presence de Pharaon Roy d'Egypte, ont ietté contre terre leur Verge, laquelle aussi tost a esté conuertie en Serpēt. Les enchâteurs de Pharaon voulants blasmer ce miracle, & dire qu'il n'estoit de Dieu, ont faict le semblable: Qu'est-il aduenü pour verifier que Moÿse & Aaron operoient de la part de Dieu, & non les enchâteurs? Le Serpent qui estoit procedé de la Verge de Moÿse & d'Aaron deuora les Serpents qui estoient procedez des Verges des enchanteurs: Et cōment l'escriture a elle exprimé cela? elle dit, *Sed deuorauit virga Aaron virgas eorum*: La Verge d'Aaron deuora leurs Verges: quelle vertu & action peut auoir une Verge insensible pour en deuorer d'autres?



tres? c'estoit vn combat des Serpents & non pas des Verges.

Semblablement en la cōuersion d'eauë en vin que feit nostre Seigneur és nopces, l'Euangeliste mōstrant la preuue & verité de ce miracle ne dit-il pas, *Vt autem gustauit Architriclinus aquam vinū factam: Quād* <sup>Ioan 2.</sup> le maistre d'hostel eut gousté l'eauë qui auoit esté conuertie en vin; c'estoit du vin, & neantmoins l'Euangeliste l'appelle encores eauë: Que veut dire cela, si ce n'est que l'escriture se donne ceste liberté d'attribuer les nōs primitifs ou premiers, aux substāces lesquelles auront esté cōuerties de nouveau? de ceste mesme liberté donc elle attribuë le mot de pain, ou de vin, ou de fruit de vigne à ce sacrement apres la cōsecratiō faite, encores qu'il n'y ait plus de nature & substance de pain ou de vin.

Qu'ainsi ne soit, y a il Chrestien au mōde qui ne trouua fort estrange & hors de toute raison que nostre Seigneur lequel a dit en consacrant, *Hoc est corpus meum quod pro vobis tradetur*: Cecy est mon corps qui fera liuré pour vous, eut liuré aussi vne nature & substance de pain pour estre crucifiée; & que de son costé & de ses playes fut forté du vin; puis qu'en la seconde conse-

*Responce au 13.*

cratiō, il a dit, *Hic est sanguis meus*, Cecy est mon sang lequel sera respandu pour vous & pour plusieurs pour remission des pechez? Car en ces paroles de la cōsecration il n'a laissé aucun doute, il a parlé manifestement de son corps & de son sang, & nō de la nature ou substance de corps & de vin.

Si donc apres la consecration il a parlé du vin l'appellant le fruit de vigne : & S. Paul aussi apres auoir declaré le fait de la consecration n'a fait difficulté d'vser de ces mots de pain & de vin, c'est vne liberté qu'a l'escriture de nommer les choses transmues de leur premier nom, ce qui sert à rememorer les merueilles de Dieu, & pour ceste cause ne peut estre iustement blasmé.

L'autre raison de laquelle se sert Loque pour prouuer que les vrayes natures & substances de pain & de vin demeurent en leur entier en ce sacrement qu'il appelle la sainte cene, est, qu'il faut qu'en icelle il y ait analogie & conuenance entre les signes & les choses signifiees : ce qu'il prouue par saint Augustin, disant,

*Si les sacrements n'auoient quelque similitude avec les choses desquelles ils sont sacrements, il*

ne seroient point du tout sacrements : Loque dict , ils ne seroient plus sacrements : Le texte de saint Augustin est , *Si sacramenta quandam similitudinem earum rerum quarum sacramenta sint non haberent , omnino sacramenta non essent.*

Or (ce dit Loque) ceste analogie consiste en cela, que les signes representent le corps & le sang de Iesus-Christ, la nourriture de nos ames, & l'vnion des fideles: ce que les accidents seuls du pain & du vin ne peuuent représenter : parquoy il est necessaire que la nature & substance du pain & du vin demeure en son entier en ce sacrement ; Loque dict , en la sainte cene.

Il faict force sur ce passage préallégué de saint Augustin, pour l'exposition duquel il est à noter (comme nous auons dit cy dessus) que les sacrements de la loy Euangelique sont differents de ceux de la loy ancienne; en ce que ceux de la loy Euangelique contiennent en eux la chose qui est signifiée, & le signe, & non ceux de la loy ancienne, lesquels seulement contiennent le signe : La raison gist en la difference de la loy ancienne & de l'Euangelique, qui est telle, que la loy ancienne pro-



*Responce au 13.*

mettoit le Redempteur du monde qui deuoit venir; & en l'Euāgile se recognoist iceluy Redempteur qui auoit esté promis & non enuoyé aux Peres anciens : La loy ancienne estoit pleine de promesses, mais l'Euangile contient les effets d'icelles promesses : partant les sacrements de la loy ancienne ne cōtenoient que les signes de ce qui deuoit estre effectué au nouueau, & les sacrements du nouueau cōtiennent & les signes & les choses signifiees : partant Loque qui a ignoré ceste difference pour neant s'est arresté en sa pretēduēraison à l'analogie ou conuenance du signe & de la chose signifiee en ce sacrement, d'autant que ces deux choses sont cōcurrentes & conuiennent ensemble en ce sacrement, auquel la substance du pain & vin est conuertie en la substance du corps & sang de nostre Seigneur; & les accidens du pain & du vin apres la transsubstantiation faicte demeurent pour signes du corps & sang de nostre Seigneur, estans en ce mesme sacrement, qui sont les choses signifiees par iceux accidens sensibles. Il ny a doute que cela soit impossible selon nature: mais celuy qui a transgressé l'ordre de nature au mystere de l'incarna-

tion du Fils de Dieu, le transgresse aussi en ce mystere du precieux corps & sang de nostre Seigneur.

La troisieme raison est prise de l'authorité des anciens Docteurs de l'Eglise: Pleut à Dieu que Loque & ses semblables s'y voulussent bien arrester & y prendre pied: Ils ne reuoqueroient plus en doute les saincts mysteres de la Messe, lesquels temerairement ils ont qualifié du tiltre d'abus.

Il dict donc pour troisieme raison, les anciens Docteurs sont de cest aduis, & tiennent que la substance de pain & de vin demeure vraiment en ce sacrement, partant il le faut tenir ainsi.

Nous luy disons du contraire, que les anciens Docteurs tiennent qu'en ce sacrement la transsubstantiation se faict, & qu'icelle faicte il n'y est plus question de la substance de pain & de vin, ains seulement du vray corps & sang de nostre Seigneur, partant nous le devons ainsi croire & tenir. Vuidons donc ce différent par les mesmes authoritez des anciens qu'il allegue à son aduantage.

En premier lieu il met en auant le dire de Theodoret en ceste sorte, *Nostre*

*v. dicit. qui  
incommuta-  
bilis dicitur.*

## Response au 13.

Seigneur & Sauueur a changé les noms aux sacrements, & a donné à son corps le nom du signe, & au signe aussi il a donné le nom du corps: & en la mesme façon qu'il s'estoit appelé sep, il a ainsi appelé le vin son sang: N'en desplaise à Loque, il n'a pas traduit fidellement le texte de Theodoret, qui est tel, *Seruator quidem certe noster nomina commutauit, & corpori quidem id quod erat symboli ac signi nomen, imposuit: symbolo autem, quod erat corporis. Ita cum se vitem nominauisset, sanguinem, id quod erat symbolum appellauit: Cela veut dire de mot à mot sans rien desguiser, selon ce qui se peut tirer du texte precedent où il estoit dict, *In mysteriorum traditione corpus panem appellauit, & sanguinem id quod in calice infusum & commixtum est; que, Nostre Sauueur enseignant les saincts mysteres (c'est à dire de ce sacrement) a appelé son corps, pain: & son sang ce qui estoit versé & meslé dans la coupe: Dont s'ensuit par apres selon le texte recité, Nostre Sauueur a changé les noms en enseignant ce sainct mystere: il ne dict pas comme Loque, aux sacrements en general, ains il dict particulierement en ce sainct mystere: & a donné à son corps le nom du signe, & au signe le nom de**



son corps : Ainsi comme apres qu'il s'est nommé vigne , il a appelé son sang , ce qui n'estoit que le signe de son sang.

Nous demandons à Loque , d'où procede ceste mutation de noms si familiere à nostre Seigneur quand il parle de ce sacrement ? pourquoy appelle il le pain son corps & le vin son sang , ou bien son corps, pain, & son sang vin ? Est-ce pour faire entendre qu'il nous faut croire que le pain soit son corps & que le vin soit son sang ? cela se peut-il tirer des paroles sacramentales ? Par icelles a il dit que c'estoit le pain qui deuoit estre liuré pour nous ? le pain ne vit ne meurt : A il dict aussi que c'estoit du vin qui deuoit estre respendu pour nous en remission des pechez ? non, mais bien son sang. C'est donc mal conclure à Loque , nostre Seigneur baille le nom de pain & de vin à son corps & sang, & le nom de son corps & sang au pain & vin , qui sont les signes en ce sacrement, partant il donne à entendre que le pain est son corps, & que le vin est son sang : donc s'ensuit que la vraye substance du pain & du vin demeure en son entier (comme il dit) en la sainte cene.

Le Lecteur se souuiendra en ce lieu de

## Responce au 13.

la cause pour laquelle apres la consecration les noms de pain & de vin sont attribuez au vray corps & sang de nostre Seigneur; & que ce n'est point pour signifier qu'ils soient pain & vin vray & naturel: mais à cause de la propriété & vertu de nourrir, non pas pour vn temps, comme la nourriture corporelle, mais à vie eternelle, comme nous auons obserué cy dessus de l'autorité de S. Cyprian: ce que nostre Seigneur mesme a donné à entendre, quand il a dit, *Je suis le pain vif qui suis descendu du ciel*, l'appellant pain vif, à cause de la vie eternelle qu'il opere en nous.

Serm. de  
cana do.

Ioan 6.

Et sans prolōger ceste dispute, voyons la condamnation de Loque, par le texte de Theodoret au mesme passage, là où il declare au vray pourquoy nostre Seigneur parlant de ce mystere a vsé de ceste mutation de noms. Il dict en ceste sorte, parlant de l'intention de nostre Seigneur, *Volebat eos qui sunt diuinorum mysteriorum participes non attendere naturam eorum quæ videntur, sed propter nominum permutationem mutationi quæ fit ex gratia credere: Que nostre Seigneur vouloit que ceux qui participent à ses diuins mysteres n'eussent aucun esgard à ce qui s'y voit,*

Ibid.

mais que par le changement des noms ils eussent à croire le changement qui s'y fait par grace: & quel est ce changement que nostre Seigneur veult que nous croyons en ce diuin mistere? n'est-ce pas le changemēt de la substāce du pain & vin en la substance du precieux corps & sang de nostre Seigneur? Loque a bien sceu recognoistre que ce passage ne luy seruiroit de rien à aduancer l'assomption de son syllogisme, pour ceste cause il l'a passé soubs silence, suyuant la coustume de ses conforsts ou adherents, lesquels ne se seruent des passages des Docteurs & Peres de l'Eglise qu'en tāt qu'ils les peuuēt tronquer ou changer pour en vser à leur aduantage.

Continuant ceste mesme industrie il allegue vne autre sentence de Theodoret au mesme passage en ceste sorte, *Celuy qui appelle son corps naturel froment & pain, & qui s'est appelé soy-mesme sep: iceluy aussi a honoré les signes visibles du nom de son corps & de son sang, non pas changeant la nature: mais adioustant grace à la nature.*

Il pense auoir cause gaignee, mais il se trouuera bien loing de son intention. Il estime que Theodoret ayt dict que nostre Seigneur en ce Sacrement ne change



### Responce au 13.

point vne nature & substance en autre; c'est à dire, la nature & substance de pain & de vin en la nature & substance de son corps & sang. Pour monstrier que non, suyons les proposjà alleguez du mesme Theodoret; par lesquels il a dict, *qu'en ce saint mystere nostre Seigneur ne veut point que nous prenions garde à la nature des choses qui se voyent.* Et qu'est-ce qui se voit & se recognoist en ce sacrement sinon l'espece du pain & du vin, desquels la nature & substance n'est point en ce Sacrement, ains seulement les accidens? Car Theodoret mesme dit que nostre Seigneur veut que nous nous arrestions seulement à la mutation qui est faicte; & quelle est ceste mutation, sinon du pain au corps, & du vin au sang de nostre Seigneur? Quand vne nature ou substance est conuertie en vne autre, elle n'est plus ce qu'elle estoit; comme (pour exemple) quand nostre Seigneur eut conuerty l'eauë en vin, ce n'estoit plus eauë, ains c'estoit vin: quand le bois est conuerty en cendres par l'actiõ du feu, ce n'est plus bois: Quand aussi par les paroles sacramentales le pain & vin sont cõuertis au precieux corps & sang de nostre Seigneur, ce n'est plus pain & vin. Donc

*pretendu abus de la S. Messe.* 150  
quand Theodoret diët ce qu'allegue Lo-  
que, que nostre Seigneur, *symbola & signa*  
*quæ videntur, appellatione corporis & sangui-*  
*nis honorauit, non naturam quidem mutans, sed*  
*naturæ gratiam adiiciens*, a honoré les signes  
visibles de ce Sacrement, les appellât son  
corps & sang, non pas changeant la natu-  
re, mais adioustant grace à la nature. Il ne  
nie pas que nostre Seigneur ait changé la  
nature & substance de pain & de vin en la  
substance & nature de son corps & sang:  
mais il diët que quand nostre Seigneur  
appelle ces signes, du nom de son corps  
& sang, qu'il ne change & ne cōuertit pas  
les signes, ains qu'avec iceux demeurent  
son vray corps & sang, de sorte que son  
corps & sang demeurent pour vraye na-  
ture & substance, & non pour signes seu-  
lement, comme la conuersion du pain &  
vin estant faicte par les paroles sacramen-  
tales, le pain n'est plus pain, ains est le  
corps de nostre Seigneur, & le vin n'est  
plus vin, ains le sang de nostre Seigneur: &  
quant au signe ou symbole, diët Theodo-  
ret, vne grace luy est adioustee, par laquel-  
le, sous la presence & recognoissance d'i-  
celuy nostre Seigneur doibt estre adoré  
comme present, d'autant qu'il y est inuisi-

### *Responce au 13.*

blemēt. Par ainsi Theodoret sert à reprouuer & non à fortifier la mauuaise opinion de Loque, comme aussi font les autres Peres & Docteurs de l'Eglise, de l'autorité desquels il n'abuse pas moins qu'il a faict de celle de Theodoret, soit en immuant ou retranchant à son aduantage.

Le neufiesme argument de Loque n'est moins friuole que les precedents, il le forme en ceste sorte.

Si la sainte cene se doit celebrer pour annoncer la mort de Iesus-Christ iusques à ce qu'il vienne, il s'ensuit que quand on la celebre il n'y est point : Mais la sainte cene se doit celebrer pour annoncer la mort de Iesus-Christ iusques à ce qu'il vienne.

Il s'ensuit donc que quand on la celebre il n'y est point.

Nous demandons à Loque sus quoy il fonde sa maieure. Ne la fonde-il point sus les differences destemps, comme disant ce Sacrement celebre pour annoncer la mort de nostre Seigneur iusqu'à ce qu'il vienne, comme dict saint Paul. Il s'ensuit donc que tant que ce Sacrement ce celebre nostre Seigneur n'est pas encores venu. S'il n'est pas encore venu, comment



peut il estre en ce Sacrement? y sera il deuant qu'il soit venu? Car s'il y est deuant qu'il soit venu, il s'ensuit donc qu'il sera en mesme instant en deux lieux, sçauoir est, au ciel, & au Sacrement: & comment se peut-il faire qu'un mesme corps en mesme temps soit en deux ou plusieurs lieux? Voilà d'oc Loque reuenu à son lieu commun, pour ne pouuoir ou ne vouloir recognoistre que la vertu & puissance diuine contre nature puisse faire qu'un mesme corps soit en deux ou plusieurs lieux.

Nous tenons donc jà de la confession de Loque que nostre Seigneur est en son propre corps au ciel: l'escriture en fait foy & Loque le dit & confesse selon l'escriture. Si donc il veut tenir ce que tesmoigne l'escriture, il faut necessairement qu'il cōfesse que le corps de nostre Seigneur est en ce Sacrement comme il tient qu'il est au ciel. Or, qu'il soit au Sacrement l'escriture en fait foy. Nostre Seigneur dit: *Cecy* Math. 26  
*est mon corps qui sera liuré pour vous.* Ioan. 6. *Le pain*  
*que ie donneray est ma chair pour la vie du*  
*monde. Je suis le pain vif qui suis descendu du*  
*ciel.*

Nous demandons à Loque s'il croit

## Responce au 13.

que nostre Seigneur Iesus-Christ soit le  
vray Fils de Dieu: Il dira qu'ouy, s'il a tant  
soit peu leu l'Euangile, auquel de vray  
Dieu le Pere rend tesmoignage au Fils di-  
*Math. 3.* *Math. 17.* *1.4. contra* *Marsion.* *Ioan. 1.* *tant: Hic est Filius meus dilectus in quo mihi*  
*complacui.* Cestuy-cy est mon Fils bien ay-  
mé auquel i'ay pris mon bon plaisir. Ter-  
tullian se sert de ceste raison pour prou-  
uer que nostre Seigneur est le vray Fils de  
Dieu. Nous demandons aussi à Loque  
pourquoy il croit que le Fils de Dieu a  
pris chair & nature humaine, il nous re-  
spond que l'escriture dict, *Verbum caro fa-*  
*ctum est,* que le Verbe a esté faict chair. De  
mesme raison s'il nous demãde pourquoy  
nous croyons que le corps de nostre Sei-  
gneur lequel est au ciel, est aussi saint au Sa-  
crement: Nous luy respondons que nostre  
Seigneur dict, *Hoc est corpus meum quod pro*  
*vobis tradetur,* cecy est mon corps lequel  
fera liuré pour vous. Partant comme nous  
auons dict cy deuant, il reste que nous te-  
nions que le corps de nostre Seigneur est  
au ciel en sa propre espece, & au Sacre-  
ment inuisiblement sous les signes visi-  
bles du pain & du vin.

De là il est tout apparent & notoire  
que la maieure ou premiere proposition

du syllogisme de Loque est puremēt faul-  
se par la quelle il dit, *Si la sainte cene (nous di-  
rons le Sacrement d'Eucharistie) se doit celebrer  
pour annoncer la mort de Iesus-Christ iusqu'à  
ce qu'il vienne, il s'ensuit que quand on la cele-  
bre, il n'y est point*, car pour n'y estre pas en  
propre espee de son corps naturel il ne  
laisse pas d'y estre reellement & de faict,  
comme nous l'auons prouué par l'escrit-  
ture. Nous confessons bien que Loque dit  
librement qu'il ne recognoist point d'in-  
uisible pour le regard de l'humanité de  
nostre Seigneur: mais pour la negation de  
Loque & de ses consorts la vertu de no-  
stre Seigneur en fera-elle moindre? La ve-  
rité de la parolle de nostre Seigneur de-  
pend-elle de la confession ou negation de  
l'homme? Les Apostres ausquels nostre  
Seigneur a dict, *prenez, mangez, cecy est mon  
corps qui sera liuré pour vous*, ont ils veu sous  
l'espee du pain & du vin qu'il leur don-  
noit vn corps naturel de chair & d'os?  
non: ils ne voyoient que le corps speci-  
fique & naturel qui estoit assis avec eux en  
table: & toutesfois n'ont ils pas commu-  
nié ceste espee de pain & de vin sous ce-  
ste foy que c'estoit le corps & le sang de  
nostre Seigneur qu'ils receuoient? Ils ne



*Response au 13.*

I'ont point debatue, ains ils l'ont creu constamment, & mesmes ils l'ont protesté deuant les magistrats quād ils ont esté enquis de leur foy, profession & doctrine; comme nous lisons de saint André, lequel entendant le commandement qui luy estoit fait par le Proconsul Aegeas, respondit, *I'offre & immole par chacun iour à Dieu tout-puissant qui est unique & vray Dieu, non pas la chair des taureaux, ny le sang des boucs, mais l'Agneau immaculé à l'Autel, duquel la chair estant mangée par le peuple fidele, l'Agneau qui a esté sacrifié perseuere et demeure entier et vif.* Telle dōc a esté & est tousiours la foy de l'Eglise, & ne peut aucun Chretien degenerer de ceste foy sans faire banqueroute à l'Eglise.

Et n'est merueille si Loque s'arreste à prouuer sa conclusion, laquelle ne pouuoit estre bonne, d'une maieure faulse, & est de verité aussi faulse comme icelle maieure: & mieux eut vallu taire ce syllogisme que d'en remplir le papier & en embrouiller le cerueau du lecteur: la preuue qu'il met en auāt pour fortifier ceste mesme conclusiō n'est moins friuole que tout son syllogisme.

Il dict pour raison que saint Paul en  
ces

ces mots (*Toutesfois & quantes que vous mangerez ce pain & boirez ce calice vous annoncerez la mort du Seigneur iusqu'à ce qu'il vienne*) il signifie que si Iesus Christ estoit venu, ce mystere deuroit cesser: Nous en sommes d'accord: car quand nostre Seigneur sera venu en son iugement il ne sera plus question de l'exercice de la foy & des œuvres meritoires, d'autāt qu'il n'y aura plus de moyen de meriter, & faudra alors que chacū soit iugé selon ses œuvres du passé. Mais il ne faut pas conclure de là que nostre Seigneur ne puisse aucunement estre en ce saint Sacrement, sinon en vain & contre l'ordonnance d'iceluy; au contraire il faut croire qu'il y est de necessité, autrement que l'escriture soit fausse. Cela se peut veoir & iuger par les passages cy dessus alleguez.

Son dixiesme argument procede par autorité des Docteurs anciens: or pour y <sup>10. ARGUM</sup> entrer, il le forme en ceste sorte. *Les anciens Docteurs de l'Eglise ont escrit que le pain & le vin de la sainte cene ne sont sinon signes du corps & sang de Iesus Christ: Parquoy ou ils ont erré, ou bien la transsubstantiation n'est point veritable.*

A cest argument nous respondons

### Responce au 13.

premierement que les Docteurs anciens n'ont iamais recogneu ceste cene que tiennent & de laquelle parlent les Calvinistes. Secondement nous faisons vn argument tout contraire & disons; Les anciens Docteurs de l'Eglise ont escrit que l'espece du pain & du vin sont signes du corps & sang de Iesus-Christ apres la consecration faicte , Partant infalliblement ils tiennent la transsubstantiation.

li. 4. cōtra  
Marcion.

Que l'antecedent soit vray il appert par les mesmes tesmoignages des Peres qu'il allegue : & premierement par le tesmoignage de Tertullian , auquel il attribue seulement ces mots, *Christ ayant pris le pain & distribue à ses disciples l'a faict son corps en disant cecy est mon corps, c'est à dire la figure de mon corps.* Il a cause gaignee celuy semble. Car il ne luy reste plus rien sinon dire que la figure n'est point la chose mesme qui est figuree : Or, ( selon Tertullian ) nostre Seigneur a dict , *Cecy est mon corps* , c'est à dire , la figure de mon corps , partant il n'y a point de transsubstantiation : d'autant que la figure ne prend point la substance de la chose figuree.



Mais aussi nous demandons à Loque, Tertullian pouuoit-il parler plus clairement & plus sainctement de ce Sacrement qu'en disant que *nostre Seigneur ayant pris le pain l'a fait son corps en disant, cecy est mon corps* ? S'il l'a fait son corps, il n'estoit donc plus pain, mais son corps. Nous desirons ceste confession de Loque aussi biẽ cõme il nous l'a fait voir au texte de Tertullian, lequel il n'a sceu alleguer sus ce propos sinon à son desaduantage, attendu que la confession de Tertullian tient contre Loque & contre ses consorts la presence réelle & actuelle du corps de nostre Seigneur par la voye de transsubstantiation en ce Sacrement.

Et quand à ce qu'il diët que Tertullian a expliqué le dire de nostre Seigneur (*cecy est mon corps*) par ces mots (*cecy est la figure de mon corps*) recognoissons l'intention de Tertullian par son propre texte que Loque n'a voulu alleguer sinon à demy de peur de descouurir son astuce; il diët en ceste sorte, *Acceptum panem, & distributum discipulis, corpus suum illũ fecit, hoc est corpus meum, dicendo, hoc est figura corporis mei. Figura autẽ non fuisset nisi veritatis esset corpus.* Il print le pain, il le distribua à ses disciples

Responce au 13.

il le feit son corps, en disant (*cecy est mon corps*) c'est à dire la figure de mon corps. Or il n'y eut point eu de figure si le corps de verité n'y eust esté, c'est à dire, le vray corps. Voilà le dire de Tertullian, par lequel il appert qu'il ne prend pas ce mot de *figure* comme on le prend communement & ordinairement: car selon le commun vsage il signifie la representation de la chose figuree: Comme pour exemple la figure d'un Roy se voit en un tableau, & toutes fois ce n'est pas le Roy mesme, & le Roy n'est pas & ne peut pas estre par tout où se peut trouuer sa figure. Pierre Martyr disciple de Zuingle l'a pris en ceste sorte, quand il a traduit les mots sacramentaux, disant qu'ils signifioient, *cecy est la figure de mon corps*: & Loque pense imputer ceste exposition à Tertullian, lequel iamais ne pensa à expliquer ainsi ces mots sacramentaux, ains par le mot de figure a entendu le symbole ou signe du corps & sang de nostre Seigneur, lequel ne se peut entendre sans la chose signifiée, comme il est certain qu'un relatif ne se peut entendre sans son correlatif: ce que Tertullian monstre bien particulièrement quand il dit

ce que Loque a voulu taire , qu'il n'y eut point eu de symbole ou signe qu'il appelle figure , si le vray corps n'y eut aussi esté. En quoy il respond couuertement à la question de ceux lesquels se conduisans tousiours de leur sens grossier , diroyent volontiers qu'apres la consecration il ne se voit point de corps humain en lieu de pain, ains que le pain se voit en sa propre quantité & qualité retenant tousiours sa figure. Or Tertullian fait entendre à tels grossiers, que puisque le pain qui se voyoit est faict le corps de nostre Seigneur par les paroles sacramentales, il n'est plus pain , & que ce qui se voit apres la consecration est figure, c'est à dire , le signe du vray corps de Iesus-Christ caché, c'est à dire, estant inuisiblement sous ceste figure ou signe visible. De sorte qu'il dit que nostre Seigneur a donné son vray corps à ses Apostres inuisiblement sous ce signe visible qui est resté apres la consecration.

Il allegue encore le mesme Theodoret, comme disant en ceste sorte, *Le pain & le vin sont les signes & figures du corps & sang de Iesus-Christ , & non pas de la diuinité.* *Dial. i.*



## Responce au 13.

Imposture  
de Leque.

Ne luy en desplaïse , Theodoret ne dict pas cela : & quand il le diroit , il ne l'entendroït pas de la substance du pain & du vin, sinon deuant la consecration & nō apres, d'autāt que alors ils ne sont plus pain & vin en verité de nature & substāce: voyons en ce qui en est dict par le texte d'iceluy Theodoret. Il demande si la saincte ou sacree viande que nous receuons en ce Sacrement est symbole ou figure du corps & sang de nostre Seigneur, ou bien de sa diuinité, puis sus la responce qui luy est faicte que ceste viande est le symbole ou figure du corps & sang de nostre Seigneur, il dit que c'est parler en verité, & rend la raison en ces propres termes , *Etenim cum Dominus accepisset symbolum seu signum , non dixit , hoc est deitas mea,*

Ibid.  
Math. 26  
Ioan. 6.

*sed , hoc est corpus meum : & rursus , hic est sanguis meus : & alibi , panis quem ego dabo vobis caro mea est pro mundi vita :* que quand nostre Seigneur eut pris le symbole ou le signe, il ne dit pas cecy est ma diuinité,

Ioan. 6.

*mais, cecy est mon corps, puis , cy est mon sang.* Et en vn autre endroict il dit, *Le pain que ie vous donneray est ma chair pour la vie du monde :* icy nous demandons qu'appelle-il la nourriture saincte & sacree, c'est ce Sacre-

ment de son corps & sang, laquelle nourriture se prend visiblement & sensiblement en l'espece de pain & vin qui sont appelez symboles ou signes du corps & sang de nostre Seigneur, & non pas de sa diuinité separee, selon ce que nous auons dict cy dessus, de l'autorité & opinion de Tertullian. Par ainsi il est bon à veoir que Loque abuse du mot de figure, comme il a fait cy deuant, quand il a allegué Tertullian, le voulant prendre cōme fait Pierre Martyr disciple de Zuingle, & non pour symbole ou signe.

Il allegue aussi vn autre passage du mesme Theodoret, comme demandant, *Dy moy ie te prie, ces signes mystiques lesquels sont presentez au Seigneur Dieu par les ministres des choses sacrees, dequoy sont ils signes? ne sont ils pas signes du corps & sang du Seigneur?* *Dial. II*

Par cela Loque pretend dire que le pain & le vin ne sont pas conuertis ou transsubstantiez au corps de nostre Seigneur, non plus que le signe n'est transsubstantié en la nature & substance de la chose signifiée. A quoy nous luy respondons qu'auant la consecration le pain & le vin sont les signes & symboles du corps & sang de nostre Seigneur, qui sera apres

*Responce au 13.*

la consecration : & que depuis la consecration, l'espece de pain & vin est signe visible & sensible du corps & du sang de nostre Seigneur qui sont inuisiblement sous cesdeux especes. Voilà cōmēt Loque destourne à sa guise l'intentiō de Theodorēt pour y appuyer & fonder son erreur.

To. 4. in  
10. c. l. Co.

Après il allegue le commentaire de sainct Iean Chrysostome sus ces mots de sainct Paul, *Le pain que nous rompons n'est-ce pas la communication du corps de Iesus Christ.* lesquels mots sainct Paul mesme ayant voulu expliquer a dict par apres, *Nous sommes tous vn mesme pain & vn mesme corps nous qui participons d'un mesme pain & d'une mesme couppe.* Ce que sainct Chrysostome voulant donner à entendre, demande en premier lieu, Que veut dire en la premiere de ces deux closes de sainct Paul ce mot de *communicatiō*? il veut dire que nous sommes vn mesme corps. Et par apres il demande, que signifie en la derniere close ce mot de pain? il respond qu'il signifie le corps de Iesus-Christ. Il demande encores, & que deuiennent ceux qui reçoient ce pain? il respōd qu'ils sont faits le corps de Iesus-Christ, c'est à dire, le corps mystique, ce qu'il enseigne par



vne similitude familiere, disant, qu'ainsi comme plusieurs grains de bleds sont cōcurrents en vn mesme pain, ainsi plusieurs Chrestiens ou fideles en vn mesme corps mystique de l'Eglise de Dieu.

Or, en ceste exposition saint Iean Chrysostome ne dict pas absolument comme le veut prendre Loque, que le pain en ce sacrement signifie le corps, car ce seroit tenir que le pain demeureroit en sa substance apres la consecration, & que par consequent il ne s'y feroit point de transubstantiation: mais il dict qu'en ce texte de saint Paul auquel il est dit, le pain que nous rompons n'est-ce pas la communication du corps de nostre Seigneur; les mots de pain & du corps de nostre Seigneur sont pris pour vne mesme chose; c'est à dire que par le mot de pain est entendu le corps de nostre Seigneur: d'autant que (comme nous auons dict cy deuant) il est loisible selon l'escriture, d'attribuer à la chose transubstantiee le nom mesme qu'elle auoit auant qu'elle fut cōuertie en vne autre, & particulierement en ce sacrement, auquel apres la conuersion ou changement de substance se trouuent les qualitez de pain & de vin: Voilà

*Responce au 13.*

la subtilité, ou plustost la subtile brouillerie de Loque, voulant renuerfer la foy que nous auons de la transsubstantiation en ce sacrement.

De pareille subtilité, & aussi mal à propos, il allegue saint Ambroise au liure *De iis qui sacris mysteriis initiantur*, chap. 9. disant, que deuant la benediction des paroles celestes vne autre espeece est nōmee, apres la consecration le corps de Iesus-Christ est signifié. Saint Ambroise ne dit pas qu'apres la consecration le corps est signifié par le pain : car apres la consecration il ne recognoist plus de pain en substance, pource que la transsubstantiation est faicte, mais il dict simplement qu'apres la consecration le corps de nostre Seigneur est signifié, pourquoy ? pour ce qu'il ne se voit pas en ce sacrement, & il y est inuisiblement, mais il est signifié present par le signe & symbole du pain, duquel se recognoissent encores sensiblement les accidents; & la substance n'est plus d'autant qu'elle est conuertie en la substance du corps de nostre Seigneur: Voilà l'opinion de saint Ambroise en ce mesme passage, du tout contraire à celle que luy pense imputer Loque pour luy

*pretendu abus de la S. Messe.* 158  
attribuer sa peruerse opinion.

Ceste mesme resolution doit seruir pour les autres passages des Docteurs de l'Eglise qu'il allegue sus ce propos, comme nommément de saint Denis Areopagite, de saint Augustin, *contra Adimantum Manich. c. 12. & in Ps. 3.*

Il n'auroit assez montré la gaillardise de son esprit (ce luy semble) si apres auoir recité les authoritez des Docteurs de l'Eglise il ne s'adressoit au corps du droit canon pour donner quelque masque de verité à sa fause opinion: Partant sans delay il s'adresse au canon, *Hoc est*, de la 2. dist. *de consecratione*, extraict de saint Augustin, & des sentences de Prosper d'Aquitaine son disciple, alleguant ces mots dudit canon, *Cœlestis panis qui Christi caro est, suo modo vocatur corpus Christi, cum reuera sit sacramentum corporis Christi*: Le pain celeste qui est la chair de Christ, est appelé le corps de Christ à sa mode, comme ainsi soit qu'à la verité ce soit le sacrement du corps de Christ. Apres cela il met la glose dudit texte, qui est telle, *Cœlestis panis, id est cœleste sacramentum quod vere representat Christi carnem, dicitur corpus Christi sed impropriè: Vnde dicitur suo modo, sed non rei ve-*

*de eccl.  
Hier. ca. 9.*



### Responce au 13.

*ritate, sed significanti mysterio, ut sit sensus, vocatur Christi corpus, id est, significat: Il la traduit en ceste sorte, Le pain cœleste, c'est à dire, le sacremēt cœleste lequel represente vrayement la chair de Christ, est dict corps de Christ, mais improprement: Partant il est dict à sa mode, & non point selon la verité, ains par un mystere significatif, le sens estant tel, il est appelé le corps de Christ, c'est à dire, il est signifié.*

En ceste allegation Loque n'a point degeneré de la coustume des heretiques, qui est d'alleguer seulement ce qu'ils iugent pouuoir fauoriser leur opinion erronee, & retrancher ou obmettre le surplus, soit de l'escriture ou des escrits des Peres de l'Eglise: Et qu'ainsi soit, voicy le propre texte du canon, selon qu'il est escrit au lieu susdit, *Sicut cœlestis panis qui uerè Christi, caro est, suo modo vocatur corpus Christi cum reuera sit sacramentum corporis Christi, illius uidelicet quod visibile, palpabile, mortale, in cruce est suspensum, uocaturque ipsa immolatio carnis quæ sacerdotis manibus fit Christi passio, mors, crucifixio, non rei veritate, sed significante mysterio*: En traduisant ces mots du canon, & rendāt mot pour mot, nous dirons, *Le pain celeste, qui est vraye-*

ment la chair de Iesus-Christ, est appelé le corps de Christ à sa mode, d'autant que vraiment il est le sacrement du corps de Iesus-Christ, c'est à sçauoir, de celuy qui est visible, palpable, mortel, qui a esté mis en la croix : & est appelee ceste immolation de chair qui se faiët par les mains du Prestre, passion de Iesus-Christ, mort & crucifiement, non pas selon la verité, mais selon le mystere qui la signifie.

De ce canon nous retiendrons deux points concernant la foy que nous deuons auoir de ce sacrement : Premièrement que ce pain celeste qui est en ce sacrement est appelé le corps de Iesus-Christ à sa mode, c'est à dire sacramentellement : Secondement que le corps de nostre Seigneur qui est visible & palpable, qui a esté crucifié & enseuely, est son corps naturel & spécifique, & non sacramental : & toutesfois c'est vn mesme corps que le corps de nostre Seigneur spécifique ou naturel & sacramental, mais sous diuerses cōsiderations, comme il appert, veu que nostre Seigneur le donnant à ses Apostres sous l'espece de pain a dict, *Prenez, mangez, cecy est mon corps qui sera liuré pour vous* : Car lors, dès mains de son

Responce au 13.

corps naturel il tenoit son corps sacramental.

Le canon donc fait vne comparaiſon du corps ſacramental de noſtre Seigneur, & de ſon corps naturel ou ſpecifique, & diſt que le corps ſacramental, par myſtere ſignifie le corps naturel qui a enduré, qui a eſté crucifié, & qui eſt mort: ce qu'il exprime encores plus clairement, car il diſt que l'immolation qui ſe faiſt par les mains du Preſtre eſt appelee paſſion, crucifiement & mort de Jeſus-Chriſt, nō pas proprement ny en verité, mais par myſtere ſignifiant: Voilà les propres termes du canon, leſquels de vray ſont fondez en la declaration qu'en a faiſt noſtre Seigneur, quand il a diſt, *Hæc quoties, unque feceritis, in mei memoriam facietis*: Toutesfois & quantes que vous ferez cecy, c'eſt à dire, que vous conſacrerez à mon imitation, vous le ferez en memoire de moy.

Loque en l'expoſition qu'il a donné de ce canon a monſtré vn vray trait de ſophiſte: car il a deſguiſé le vray & naturel ſens de ces deux mots, *ſignificante myſterio*, qu'il a traduit par myſtere ſignificatif, & les a accōmodé au pain, pour dire qu'en ce ſacrement le pain eſt ſignificatif du



corps de nostre Seigneur, ou bien qu'il signifie par mystere le corps de nostre Seigneur, & par ce moyen oster la transsubstantiation: Et pour mieux iouir son personnage de sophiste, il a couppe le texte du canon; en taisant ce qui luy nuisoit, & s'est adressé à la glose, sans aucunement conferer l'antecedent avec le subsequent: ce qui se iuge fort facilement par le vray & naturel sens du texte du canon, selon que nous l'auons allegué, c'est à dire en le prenant tout entier sans en rien couper: Voilà comment Loque qui sçait fort biē obseruer les traicts des sophistes, nous appelle sophistes, voyant que nous suiuous le sens naturel des textes, tant de l'escriture que des Peres, & des saincts canons.

Il se veut encores faire trouuer plus braue homme: car, non content d'auoir tenu ces moyens de reprouuer la trāssubstantiation, il s'adresse aux raisons par lesquelles les Catholiques (qu'il appelle sophistes) la maintiennent.

Et en premier lieu il propose cesteraison de laquelle il s'ayde.

Si Iesus Christ a tousiours dit la verité, il l'a dite en l'institution de la sainte cene, en ces paroles, *Cecy est mon corps.*

### *Responce au 13.*

Mais Iesus-Christ a tousiours dit la verité, car il est la verité mesme, & ne peut mentir, & iamais fraude n'a esté en sa bouche.

Parquoy quand il a dict, *Cecy est mon corps*, il a dit la verité: & partant le pain n'est plus pain, mais il est transsubstantié au corps de Iesus-Christ.

Loque a fort bonne grace, il nous attribué des syllogismes qu'il forme luy-mesme à sa poste, pour par apres se donner carriere & se mocquer de nous, en nous appellant sophistes. Il met en ce syllogisme vne assumption & vne conclusion double, pour desnier par apres que la derniere conclusion se puisse tirer de la premiere: Nous voulons donc nous mesmes former nostre syllogisme sans estre aydez ny secourus aucunement de l'artifice de Loque, & le formerons en ceste sorte.

*Tout fidele Chrestien doit tenir la parole de nostre Seigneur pour vraye.*

*Or est il que nostre Seigneur enseigne la transsubstantiation.*

*Partant tout Chrestien doit tenir & croire la transsubstantiation pour vraye.*

L'assumptiō se prouuera en ceste sorte.

*Trans-*

Transsubstantiation est vne conuersion d'vne nature & substance en vne autre nature & substance.

Or est-il que nostre Seigneur consacrant à conuerty la substance de pain & de vin en la substance de son corps & sang.

Partant il a fait vne transsubstantiation qu'il nous enseigne.

L'assumptiō de ce second syllogisme est toute notoire en ce q̄ nostre Seigneur a dit, *Cecy est mō corps qui sera liuré pour vous*, Rapportant ceste parole à l'effect de nostre redemption. Or est-il certain que du pain pur ne peut auoir ceste propriété d'estre liuré à la croix pour la remission des pechez, partant ce n'estoit du pain qu'il parloit, mais de son propre corps quād il disoit qu'il seroit liuré pour nous: car le pain pur & simple ne peut auoir ceste vertu, bien le corps de nostre Seigneur deifié, c'est à dire, estant vny à sa diuinité, cōme luy mesme le pronōce en la cōsecration: car si la diuinité n'y estoit, le corps seul n'auroit ceste vertu, attendu que cōme dit le texte de l'Euangile, *Solus Deus peccata di-* *Ioan 2.*  
*mittit*, Dieu seul remet les pechez: Et voylà cōment le corps de nostre Seigneur est



## Responce au 13.

au S. Sacrement par transubstantiation.

Maintenant arrestons nous à la difficulté que fait Loque sus ce propos: Il cōfesse que nostre Seigneur, cōme Pere de verité, a dit vray quand il a dit, *Cecy est mon corps*: Mais il nie que de ces propos s'ensuiue la trāssubstātiatiō du pain au corps de nostre Seigneur, & maintient que ces paroles sacramentales, *Cecy est mon corps*, ne se doiuent pas entendre proprement & selon la lettre, mais par vne metonimie sacramentale, par laquelle ce qui cōuient à la chose signifiée est attribué au signe.

Il nous allegue pour preuue de son dire, que c'est la maniere de parler du S. Esprit, lequel n'a iamais autrement parlé en traitant des sacremens: comme pour exemple, quand l'escriture dit, que la *Circōcision est l'alliance de Dieu: Que l'Agneau est le passage: Que la pierre estoit Christ, Que le baptesme est la uement de regeneration.*

Gen. 17.  
Exo. 11.  
1 Cor. 10.  
Tit. 3.

Nous luy disons que le mesme saint Esprit qui a dict ces paroles là, a dict celles-cy, *Verbum caro factum est*: Le Verbe est fait chair: Que le Pere qui est vn avec le Fils & le saint Esprit, a dict, *Hic est filius meus dilectus in quo mihi complacui*: Cestuy-cy est mon Fils auquel i'ay pris mon bon

Ioan. 1.  
Matt. 3.

plaisir: Que le Fils qui est vn avec le Pere  
 & le saint Esprit, a dict, *Cecy est mon corps* <sup>Mat. 26.</sup>  
*lequel sera liuré pour vous*: Si donc toutes  
 ces paroles lesquelles sont de mesme  
 poix que celle qu'a allegué Loque, c'est  
 à dire, qui signifient quelque sacrement  
 ou mystere, doiuent estre prises figurati-  
 uement ou significatiuement, il s'ensui-  
 ura que tout ainsi comme figuratiuement  
 ou significatiuement, *La Circoncision estoit*  
*l'alliance de Dieu*: *le baptisme est la regenera-*  
*tion*: *l'Agneau estoit l'alliance*, & *la pierre*  
*estoit Iesus-Christ*: Ainsi aussi figuratiue-  
 ment ou significatiuement le Verbe a esté  
 fait chair, & le Pere donnant tesmoigna-  
 ge au Fils, a dict figuratiuement ou signi-  
 ficatiuement, *Cestuy est mon Fils auquel i'ay* <sup>Mat. 3.</sup>  
*pris mon bon plaisir*: Tellement que tout  
 ainsi comme Loque veut dire que ces pa-  
 roles sacramentales, *Cecy est mon corps le-* <sup>Ioan 8.</sup>  
*quel sera liuré pour vous*, se doiuent enten-  
 dre significatiuement ou figuratiuement,  
 disant que le pain figure ou signifie le  
 corps de nostre Seigneur, de sorte que le  
 corps ne seroit en ce sacrement, sinon par  
 signification ou figure, Ainsi faudroit di-  
 re que le Verbe ne seroit fait chair que par  
 signification ou figure, qui seroit entiere-

*Responce au 13.*

ment desnier le mystere de l'incarnation du Fils de Dieu: Et aussi faudroit dire que le tesmoignage qu'a donné le Pere au Fils en son baptisme & en sa transfiguration, ne luy auroit esté donné que par figure ou par signification, & nō en effet & en verité, attendu qu'en ces deux propositions l'escriture ne parle point plus clairement du Fils de Dieu qu'en ces mots sacramentaux, par lesquels il est dict, *Cecy est mon corps qui sera livré pour vous.*

Que ferons nous dōc pour sortir de ceste cōfusion de disputes que Loque nous met en auāt pour abolir nostre foy de ceste trāssubstantiation? Nous remarquerōs par les sentēces significatiues ou figuratiues qu'il allegue de l'escriture, qu'il n'est pas necessaire q̄ toutes telles sentences de l'escriture soient figuratiues ou significatiues, cōme ces quatres qu'il a allegué, & dirons que toutes sentēces qui signifient ou emportent ensemble quelque mystere de nostre redemptiō ou de nostre vniō avec Dieu, doiuent estre entēduës en leur propre sens, sans y apporter aucune estrange explication, d'autant qu'il nous a racheté en verité: Telles sont ces trois sentēces de l'Euāgile par nous allegues: la premiere



qui porte ces mots, *Le Verbe est fait chair*: la seconde du tesmoignage que le Pere dōne à son Fils Iesus Christ: la troisieme qui cōsiste és mots sacramentaux, par lesquels nostre Seigneur dit, *Cecy est mō corps qui sera liuré pour vous*, attendu qu'il n'y auroit point d'apparēce de dire que du pain pur & simple eut esté offert en croix pour nostre redemptiō. Les quatres sentēces allegues par Loque n'emportent point tels mysteres, biē qu'elles en ayent quelque signification ou figure, partant il ne faut point cōclure par icelles que les mots sacramētaux que nostre Seigneur a proferé sur le pain & sur le vin se doiuent entēdre significatiuement ou figuratiuement: Par ceste differēce de telles sentences on voit combien est friuole l'argument de Loque par lequel il cōbat la transsubstantiation.

Il examine en secōd lieu vne autre raison par laquelle nous maintenons la trāsubstantiation, nous appelant par gosse-rie, aduocats d'icelle.

Ceste raison est telle, ainsi cōme Loque l'a deu former: Ce dequoy nostre Seigneur a dit, *Cecy est mon corps*, est la chose mesme de laquelle il a dit, *qui sera liuré pour vous*: Et ce dequoy il a dit, *Cecy est mō sang*,

### *Response au 13.*

est la chose mesme de laquelle il a dit , *qui sera espendu pour vous & pour plusieurs en remission des pechez.*

Or, il n'a point dit du pain , *qui sera liuré pour vous*, ains de son vray corps, comme aussi il n'a point dict du vin , ains de son sang, *qui sera espendu pour vous.*

Parquoy il n'a pas dit du pain , *Cecy est mon corps*, ains de son propre corps, ny du vin, *Cecy est mō sang*, ains de sō propre sang.

Nous auons cy deuāt soustenu la trāsubstantiation par ceste mesme raison , & n'estoit besoin de l'alleguer pour nostre regard, d'autāt q̄ nous la tenons pour tres-certaine: mais d'autāt que Loque fait estat de s'attaquer aux plus viues raisons d'icelle , il nous faut emploier à descouurir de quelle subtilité , & de quel artifice il les combat.

Premierement donc il nous nie nostre proposition par laquelle nous auons dict que nostre Seigneur , disant , *Cecy est mon corps qui sera liuré pour vous*, & , *Cecy est r-on sang qui sera espādu pour vous*, a demōstré manifestemēt qu'il parloit de son vray corps & sang : & dit pour raison de sa negation q̄ nostre Seigneur a dit du pain & du vin, *Cecy est mō corps*, & *cecy est mō sang* , par vne

signification sacramētale: Bien recognoist il que ce n'est pas du pain qu'il a dit, *qui sera liuré pour vous*, mais de son propre corps: Sēblablemēt aussi qu'il n'a pas dit du vin, *qui sera espendu pour vous*, mais de son propre sang.

Il veut dōc diuifer le dire de nostre Seigneur, & toutesfois il est tout apparēt que le corps qu'il a dit deuoir estre liuré pour les hōmes estoit son mesme & vray corps qu'il dōnoit à ses Apostres, & que le mesme sang qu'il a dit deuoir estre respandu pour les hommes, estoit son vray sang qu'il leur bailloit à boire.

Lequel croirons nous des deux, nostre Seigneur avec sa verité, contenant l'accōplissement de son Testamēt, nō en signification sacramētale, mais en effet, ou Loque avec sa significatiō sacramētale par laquelle il oste entierement le vray sens des propos de nostre Seigneur? lequel des deux doit auoir plus de poix & d'autorité enuers le Chrestien? Failloit il autre plus grāde expositiō à ces paroles sacramētales de nostre Seigneur q̄ celle mesme qu'il a dōné, quād il a dit q̄ c'estoit le mesme corps qui seroit liuré pour nous, & le mesme sang qui seroit espendu pour nous? Si c'est



### *Responce au 13.*

le pain qui est ce corps, & le vin qui est ce sang, il sera donc aussi vray que le pain aura esté liuré pour nous, & le vin espādu pour nous, comme il se dit du vray corps & sang de nostre Seigneur: Il sera vray par consequent que le pain & le vin sont en ce sacrement: Par consequent voylà Loque qui fait banqueroute à Calvin, pour se rendre cousin de Luther.

Il dira peut estre pour se garantir de ce blasme d'inconstance, qu'il n'entend pas comme Luther, que le pain & le vin, le corps & sang de nostre Seigneur soient concurrents en ce sacrement, ains que le pain & le vin y sont, puis qu'il veut que nostre Seigneur ait dict d'iceux qu'ils sont par signification sacramentale, le corps & le sang de nostre Seigneur.

C'est dōc dire q̄ le pain & le vin sont de verité en ce sacrement, & que le corps & sang de nostre Seigneur y sont seulement par signification sacramentale, & nō réellement & de faict: Sus quoy nous demandons, quel corps donc est-ce qui a esté liuré pour nous, & quel sang est ce qui a esté espandu pour nous? est-ce vn corps & sang significatif ou vray? si c'est vn corps & sang significatif, il s'ensuit dōc q̄ nostre

Seigneur ait enduré pour nous significati-  
uement & non realement & de faiët, puis  
qu'il veut que ce corps & sang soit en ce  
Sacrement seulement par signification.  
Si c'est son vray corps & sang, pourquoy  
Loquevse-il (au preiudice de l'intentiõ de  
nostre Seigneur) de ce mot de significa-  
tion?

En sommaire si la signification sacra-  
mentale des Caluinistes Loqueteux est  
employee en l'exposition des mots sa-  
cramentaux, prononcez par nostre Sei-  
gneur, voilà vn article de la foy hors du  
symbole des Apostres par leur belle sub-  
tilité, sçauoir est, celui qui faiët foy de la  
passion & mort corporelle de nostre Sei-  
gneur.

Oultre ce, nous remarquerons que la  
plus grande subtilité de Loque desniant  
la transsubstantiation en ce Sacrement est  
vne raison orbiculaire mal feante aux bra-  
ues Logiciens, du nombre desquels il pē-  
se estre, d'autant qu'il diët, que la cause  
pour laquelle la transsubstantiation n'a  
point de lieu en ce Sacrement, c'est que le  
pain & vin y demeurent apres la conse-  
cration, pour signifier sacramentalemēt  
le corps de nostre Seigneur, & que la reel-

### *Responce au 13.*

le existence ou presence du pain & du vin qui s'y recognoist à l'exterieur , signifie qu'il n'y a point de conuersion de natures & substances. Il parle bien à son aise quād il n'a point de contredisant , & faict porter à son papier tout ce qu'il veult, mais il ne peut pour cela changer la verité des paroles sacramentales prononcees par nostre Seigneur.

#### *3. Raison.*

Entroisiesme lieu il examine vne raison tiree de la cōmunion de ce Sacremēt, qui est telle.

Si en ce Sacrement il n'y auoit point de transsubstantiation, les meschants qui y participent indignement n'y receuroyent point le corps & sang de nostre Seigneur Iesus-Christ.

Or est-il que les meschants qui participent indignement à ce Sacrement y reçouyēt le corps & sang de nostre Seigneur Iesus-Christ.

Partant en ce Sacrement est la transsubstantiation.

L'Assomption se prouue par saint  
*1. Cor. 11.* Paul, lequel dit, que ceux qui participent à ce Sacrement indignement sont coupables du corps & sang de nostre Seigneur



& comment en seroyent-ils coupables s'il n'y estoit actuellement & en verité? Or est-il qu'il n'y peut estre sinon par transsubstantiation ainsi comme maintiennēt les Docteurs de l'Eglise, attendu que nostre Seigneur ayant disertement declaré sa passion par les mots sacramentaux, ne nous a point laissé d'ambiguité de laquelle il fust possible de tirer que le pain & le vin ait operé quelque chose au mystere de nostre redemption, comme a fait son corps qui a esté liuré pour nous, & son sang qui a esté espendu pour nous.

En sa refutation qu'il employe contre ce troisieme argument, premierement il declare qu'il ne se veut arrester aux anciēns Docteurs qui tiennent ceste doctrine de la transsubstantiation, & qu'il se contente de les auoir exposé en son septiesme argument. Aussi de nostre part nous nous contentons d'auoir respondu à ses pretenduës expositions, & d'auoir declaré comment mal à propos il a tronqué leurs textes pour les prendre à son aduantage. Partant, recours audit septiesme argument & examen d'iceluy.

Quant à l'autorité de saint Paul, il allegue pour tout payement ce qu'il a ac-

### Responce au 13.

coustumé de dire, que saint Paul ne dict pas, *Qui mange le corps & boit le sang de Iesus Christ indignement*, mais, *qui mange de ce pain & boit de ceste coupe indignement*. Aussi luy respondons nous ce que nous auons dict cy dessus, que saint Paul suit la coustume ou liberté de l'escriture, laquelle nomme les choses changees de substance en autre, du nom de leur premiere substance, & que il n'est pas incommode apres la consecration de nommer le corps de nostre Seigneur du nom de la substance premiere qui a esté conuertie en iceluy, & l'appeller pain pour rememorer la vertu & propriété de nourrir, & ainsi est-il du vin & du sang, comme nous auons dict parauant.

Et que la substance du pain materiel ne conuienne point au corps de nostre Seigneur c'est chose toute euidente, en ce que nostre Seigneur dict de soy mesme, *Ioh. 6. Ego sum panis viuus qui de cœlo descendi*, Je suis le pain vif qui suis descendu du ciel. Car il est tout notoire que ce n'est pas du pain materiel qui est descendu du ciel, ains que c'est le Fils de Dieu : ainsi se peut-il aussi entendre ce passage de saint Paul, conformément à ce texte de l'Euangile.

Et pource que sus cela nous pourrions dire à Loque que pour manger du pain & boire du vin. L'hōme ne feroit tenu pour coupable du corps de nostre Seigneur, & de son sang, Loque dict du contraire, d'autant que c'est ne distinguer point le pain & le vin commun qui sont ordōnez pour signes sacrez du corps & sang de nostre Seigneur, ains les mespriser & reietter vilainement.

Si nous luy demandons, *Comment est-il possible que celuy qui ne mange que le signe de la chose soit redenable de la chose mesme*, attendu qu'il y a grande difference entre le signe & la chose signifiée; il respond que c'est pour l'abus du signe & pour le mespris & refus de la chose signifiée, Nous luy repliquons (comme il le sçait fort bien remarquer) *Si Adam n'eut mangé que la figure du fruiēt defendu, eut il esté condamné*: Ouy (dit-il) si Dieu luy en eust fait defence comme il a faict du fruiēt mesme.

Nous luy demandons, *Si les Iuifs n'eussent crucifié sinon l'image ou peinture de nostre Seigneur, eussent ils esté coupables de sa propre mort*? Il respond qu'ils eussent esté coupables d'un crime capital & digne de mort eternelle, comme celuy feroit coupable



### *Responce au 13.*

du crime de leze majesté, & meritant la mort, qui pendroit en vn gibet l'effigie d'un Roy: Nous luy repliquons encores, que *l'on n'est tenu de satisfaire qu'à ce qu'on reçoit en verité.* Il retourne (sans rendre autre raison) à ce qu'il a dict cy deuant, & dict qu'il n'est point icy question simplement d'une satisfaction ou d'un payement à raison de quelque chose receüe, mais d'une peine laquelle on encourt pour deux fautes, l'une, qu'on reçoit les signes indignement, foulât aux pieds les choses sacrees: l'autre qu'en mesprisant les signes sacrez, on reiette aussi la chose signifiée de laquelle procede la vie & le salut. Comme si vn malade se mocque du medecin (dict-il) & si il reiette la medecine à son escient & de propos deliberé, il merite estre abandonné & mourir.

Si nous luy disons que *sainct Paul ne parle point icy de ce refus, ains qu'il dict seulement que le meschant pour auoir receu indignement le corps de nostre Seigneur Iesus-Christ, & sans preallablement auoir fait preuve de sa conscience, est coupable du corps de nostre Seigneur,* il dit que l'un & l'autre est faulx, & pour raison du premier, il dit que *sainct Paul parle du refus du corps & sang de Iesus Christ, quād*

il dit, ne discernant point le corps du Seigneur: Mais il y a bien de la difference entre discerner & recevoir. Celuy qui reçoit le corps de nostre Seigneur ne le refuse pas. Il y a beaucoup à dire entre refuser & recevoir: & celuy qui reçoit trop hardiment & indiscrettement le corps de nostre Seigneur, il ne le discerne pas, & neantmoins il le reçoit bien qu'indignement.

Pour raison du second, il diët à sa maniere accoustumee que saint Paul ne parle point là de la manducation indigne du corps de nostre Seigneur, mais de la manducation du pain & du vin, vsant expressément de ces termes de pain & de vin; qui est tout ce que Loque a à dire quand il se voit pressé des raisons qui induisent à croire la transsubstantiation en ce Sacrement Pour tout telle est son opiniõ du S. Sacrement de l'Autel, biẽ que cõtraire à l'Evangile au texte de saint Paul, aux expositiõs des Docteurs, & aux saintes canons & decrets de l'Eglise.

4. *Raison.*

Il vient en apres à nostre quatriesme raison, laquelle premierement il allegue purement & simplement, puis apres il la

*Response au 13.*

refute ce luy semble. Il la propose donc en ceste sorte.

Si celuy qui reçoit ce Sacrement indignement mange son iugement : d'autant qu'il ne discerne point le corps de nostre Seigneur, il s'ensuit donc que saint Paul par le pain entend le corps de nostre Seigneur, attendu que pourneant on discerneroit le corps de nostre Seigneur s'il n'estoit tel à la verité.

Or celuy qui reçoit ce Sacrement indignement, mange son iugement, d'autant qu'il ne discerne point le corps de nostre Seigneur.

Partant saint Paul par le pain duquel il parle entend le corps de nostre Seigneur.

Pour refuter ceste quatriesme raison de la transsubstantiation, il nie la proposition de ce syllogisme, disant pour toute raison qu'il ne se peut recueillir des paroles de saint Paul, qu'il ait dict qu'il faille discerner que le pain de la sainte cene (nous disons le pain qui est en vſage pour la confection de ce saint Sacrement) soit le corps de nostre Seigneur, car il dict simplement, *ne discernant point le corps du Seigneur.*

*Il ne*



Il ne pouuoit mieux dire pour nous , & à sa confusion. Car, à la verité saint Paul a vsé de ces propres termes sans y apporter aucun fard ou obscurité, & en cela Loque condamne sa propre interpretation qu'il a apporté sus ces mots de saint Paul, quand il a exposé le mot de pain materiellement & en sa propre signification : ce que saint Paul n'a iamais entendu en ce passage là , appellant le corps de nostre Seigneur pain selon la liberté de l'escriture, laquelle dōne le nom de la chose primitive, à celle qui est apres la transubstantiation.

En fin, il donne sa resolution sus la maniere de laquelle il pense que le corps de nostre Seigneur soit en ce Sacrement, & interpretant ce texte de saint Paul il dit, Ne discerner point le corps du Seigneur, ne signifie point ( selon le sens de saint Paul ) ne iuger pas ce pain estre le corps de nostre Seigneur reellemēt & substantiellement; ains n'auoir point d'esgard à la dignité du corps de Iesus-Christ, lequel nous est offert & donné sacramentellement en ce Sacrement, & ne le distinguer point de toutes autres choses selon son excellence.

### *Responce au 13.*

Par ce moyen il tend tousiours à nier la manducation réelle & actuelle du corps de nostre Seigneur, ne receuant que la sacramentale. Mais nous luy baillerons cest os à ronger, & à bien considerer en son iugement comment nostre Seigneur a entendu ces mots, *Caro mea verè est cibus*, Ma chair est vrayement la viande : nous luy laisserons à penser sur ces mots, s'il n'y a point de difference entre ces mots, *vrayement & sacramentalement* : comme aussi nous luy laisserons à penser si les sacrements de la loy Euangelique ne contiennent pas en verité & en effect ce qui a esté seulement promis par les sacrements de la loy escrite ; comme pour exemple, si le Baptisme de la loy Euangelique ne donne pas en verité & en effect ce qui estoit anciennement promis par la Circuncision. Le mesme se doibt iuger de la conference de l'Agneau Paschal & du Sacrement de l'Autel.

#### *Raison 5.*

Il forme par apres nostre cinquiesme raison en ceste sorte.

Si en la sainte cene le pain & le vin estoient seulement la figure du corps & du sang de Iesus-Christ, & non point ce pro-

pre corps & ce propre sang, il s'ensuiuroit que la Pasque auroit esté aux Iuifs vn Sacrement plus aduantageux & plus expres & signifiant que ne seroit aujourd'huy la sainte cene aux Chrestiens, car la chair & le sang de l'Aigneau estoient vrayement chair & sang, pour mieux représenter la chair & le sang de Iesus-Christ que le pain & le vin.

Mais la Pasque n'a pas esté aux Iuifs vn Sacrement plus aduantageux, ny plus expres & signifiant qu'est aujourd'huy la sainte cene aux Chrestiens: Car saint Augustin dit, & la verité est telle, que nos sacrements encores qu'ils soyent en nombre plus petit, toutesfois ils sont plus grands en vertu, & de plus excellente signification & vtilité, & plus faciles à observer.

*To. 1. epi.  
118. ad  
Iannar.  
c. 1.*

Il s'ensuit donc qu'en la sainte cene le pain & le vin ne sont point seulement la figure du corps & du sang de Iesus-Christ, ains sont ce propre corps mesme & ce propre sang.

*Responce.*

En ceste pretenduë raison que Loque nous attribue, nous ne sommes aucune-



Responce au 13.

ment d'accord avec luy sinon du passage de saint Augustin. Et quand au syllogisme il est trop confus: & oultre ce, il nous attribue la sainte cene, de laquelle nous ne pouuons tomber d'accord avec les Caluinistes Loqueteux, bien que nous cognoissons que leur feinte cene n'est point vne institution de Dieu, ains vne pure inuention des hommes. Car (comme dict saint Cyprian) *Adulterum est, impium est, sacrilegium est, quicquid humano furore instituitur, vt diuina dispositio violetur*: C'est vne chose adultere, impie, sacrilege, tout ce qui est institué par vne fureur humaine, au preiudice de l'ordonnance de Dieu. Et quant à la premiere conclusion de ce syllogisme il nous impute que nous tenons que le pain & vin ne peuuent estre seulement figure du corps & sang de nostre Seigneur, ains qu'il est le mesme corps & sang de nostre Seigneur, qui est nous imputer faux: car nous tenons au contraire qu'apres la consecration, il n'y a plus de pain & de vin, d'autant qu'ils ont esté conuertis en la substance du corps & sang de nostre Seigneur. Par ainsi, d'autant que ce seroit nous mettre au rang des Lutheriens, nous ne voulons point de ce

li. 1. ep. 3.  
ad Cornel.  
Pa.

syllogisme, & sommes d'aduis que Loque le reserue à son vsage si bon luy semble.

Bien mettrons nous en eschange le syllogisme qui ensuit pour verifier la transsubstantiation.

Si au sainct Sacrement de l'Autel, le pain & le vin ne sont conuertis en la substance du corps & sang de nostre Seigneur, il s'ensuit que la Pasque des Iuifs leur ayt esté vn Sacrement plus aduantageux que n'est aux Chrestiens le sainct Sacrement de l'autel, attēdu que la chair & le sang de l'Aigneau qui estoient vrayement chair & sang representoyent mieux la chair & sang de nostre Seigneur que ne feroient pas le pain & le vin s'ils demouroient en ce Sacremēt sans estre transsubstantiez.

Or est-il que la Pasque n'a pas esté aux Iuifs vn Sacrement plus aduantageux qu'est aux Chrestiens le sainct Sacrement de l'Autel.

Partant le S. Sacrement de l'Autel ordonné de Dieu pour les Chrestiens, doit contenir en soy par vertu de transsubstantiation du pain & du vin le vray corps & sang de nostre Seigneur.

*Responce au 13.*

Voilà vn autre syllogisme que celuy que Loque nous impute & qui conclud plus formellemēt qu'il ne voudroit, pour la transsubstantiation.

De cesteraison les ennemis iurez de la transsubstantiation tirent vne question de laquelle ils nous pensent bien estonner, & demandent, lequel des deux a plus de conformité avec le corps & le sang de nostre Seigneur, la chair & le sang de l'Aigneau Paschal, ou les accidents du pain & du vin qui demeurent apres la cōsecration faicte: Car il semble que le pain & le vin qui sont substances toutes notoires, auroyent plus de cōformité avec les substances du corps & du sang de nostre Seigneur, que les simples accidēts de pain & de vin, & à la verité vne substance est mieux representee par vne autre substance, que non pas par vn simple accident ou par plusieurs accidents: Mais cela s'entēd selon nature: Or est-il que nature ne peut donner la loy à Dieu, & que Dieu de sa toute-puissance peut faire que des accidēs separez de leur substance soyent signes de substance, comme de vray il le fait en ce Sacrement: Par ainsi voila la question de Loque, friuole.



Venons au sixiesme argument de la transsubstantiation qu'il nous attribue, & le representons en ses propres termes pour y respondre par apres.

*6. Argument.*

Il le propose en ceste sorte.

Nous ne pouuons reellement participer à vne substance si elle est absente de nous.

Or est il qu'en ce Sacrement nous participons reellement à la substance du corps & sang de nostre Seigneur Iesus-Christ.

Partant la substance du corps & sang d'iceluy n'est point absente de nous en ce Sacrement.

Nous receuons cest argument pour bon & vallable pour maintenir la transsubstantiation : Partant il ne nous reste que de respondre à la refutation que pretend Loque en auoir fait en son libelle de contredits. Et d'autant qu'il commence à en discourir par vne distinction de ce mot , *reellement* , nous la mettrons premierement en auant. Il dict que ce mot peut estre rapporté à l'instrument corporel duquel nous communiquons à quelque substance , &

*Responce au 13.*

qu'il se prend lors pour ce mot *corporellement*, & en ce sens il admet la proposition purement & simplement : mais il nie l'assomption par laquelle il est dict, qu'en ce Sacrement nous participons reellement à la substance du corps & sang de nostre Seigneur, & ne rend aucune raison de sa negation. Sus quoy nous luy remontrerons seulement, que puisque nostre Seigneur a dict à ses Apostres, *Prenez, mangez de cecy tous, car cecy est mon corps qui sera livré pour vous*, & que les Apostres y ont obey, il s'ensuit qu'en ce Sacrement nous participons reellement au corps de nostre Seigneur, cōme lors les Apostres y ont participé. Tous abayeurs qui crieront du contraire nous les tiendrons pour ennemis formels de la parole expresse de nostre Seigneur.

L'autre partie de la distinction de ce mot, *reellement*, est qu'il peut estre rapporté à l'instrument de la foy & signifie *vrayement*, ou *sans tromperie*, comme quand il est question de la conionction qui est entre nostre Seigneur Iesus Christ & nous; & en ceste sorte, Loque accorde tout l'argument, cōme ne contenant rien contre sa doctrine. C'est reuenir au commun

erreur des Caluinistes , lesquels disent qu'en leur cene ils reçoivent le corps de nostre Seigneur par foy seulement : Et nous, nous disons qu'au saint Sacrement nous le receuons , de vray & de faict , & par foy , sans laquelle il ne nous proffiteroit , ains il nous apporteroit damnation: Et les Apostres l'ont receu de ceste sorte quand nostre Seigneur leur a donné.

Or, pour deduire son abus de ce mot de *foy* , il dict d'auantage , sçauoir est que combien que la chair de nostre Seigneur soit au ciel & non ailleurs , elle est neantmoins vrayement & efficacement presente à nostre esprit & à nostre foy , non seulement aux saints Sacraments , mais aussi en la predication de la parole, pour ce qu'une telle conionction n'est point corporelle, mais spirituelle , non pour le regard de nostre Seigneur Iesus-Christ, lequel ne peut estre avec nous , sinon tout entier , d'autant qu'il ne reçoit point de diuision en son humanité , mais ( dict-il ) pour le regard de l'instrument de ceste conionction & vnion qui est ( pour le regard de Dieu ) la puissance & operation du saint Esprit , & pour nostre regard , la



Responce au 13.

li. d'Isaac  
& anima  
c. 5.

foy : Non pas ( dict-il ) que ceste foy face descendre Iesus-Christ du ciel , pour s'v-nir avec nous , mais pour ce qu'elle mes-me s'esleue iusques au ciel , se fondant sur les promesses de Dieu : & là elle nous rēd presents à Iesus-Christ , & Iesus-Christ à nous , suiuant ce que dict sainct Ambroise faisant parler Iesus-Christ, *Ceux-là*, dict-il , *me sont presents desquels la foy est avec moy, & desquels ie suis la portion*: Ses termes sont tels, *Adest mihi, qui exit de seculo: Adest mihi, qui me cogitat, me intuetur, de me sperat, cui ego portio sum*: Celuy m'est present qui sort du monde: celuy m'est present qui pense en moy , qui me contemple , qui espere en moy , duquel ie suis la portion.

Voilà vn beau discours ce semble au Lecteur , mais à quoy sert-il ? à tirer & inferer vne obscurité d'vne autre obscurité, & à rendre le Lecteur ou Auditeur tousiours plus ignorant, en lieu de luy esclaircir ceste difficulté, & finalement à nier la presence reelle & actuelle du corps de nostre Seigneur en ce sacrement.

En sommaire , il nous represente trois choses en ce sacrement , à sçauoir l'humanité de nostre Seigneur , la vertu du sainct Esprit , laquelle opere en ce sacrement,

puis aussi nostre foy : Cōsiderons les belles sentences desquelles il se fert en ce long narré.

Il dict premierement , *Que la chair de nostre Seigneur est au ciel & non ailleurs*: c'est tousiours pour tendre à son but qui est ne point recognoistre qu'elle soit au sacrement de l'Autel. En apres il dict , *qu'elle est vraiment & efficacement en nostre esprit & en nostre foy* , de là il s'ensuiura qu'elle n'est donc pas presente à nostre chair: Quand à l'exemple & imitation de nostre Seigneur & des Apostres qui l'ont communié, nous la receuons en nostre bouche en la comuniant , qui est nier manifestement les paroles sacramētales cy dessus alleguees, desquelles nostre Seigneur consacrant a parlé aux Apostres: Car de la sorte de laquelle nos Loqueteux parlent, ils ne recognoissent pas la presence de la chair de nostre Seigneur en nous , par la communion, ains seulement l'efficace d'icelle en nostre esprit & en nostre foy:& pour s'expliquer ils alleguent vne similitude , disants que la chair de nostre Seigneur est vrayemēt & efficacement presente à nostre esprit & à nostre foy , au sainct Sacrement, comme elle est aussi en la predica-

### Responce au 13.

tion : Sur quoy nous leur demandons, pourquoy donc la predication n'est elle pas sacrement du corps & sang de nostre Seigneur, & pourquoy ce sacrement est-il plustost sacrement du corps & sang de nostre Seigneur que la predication, puis que la chair de nostre Seigneur, par l'un & par l'autre est esgalement presentee à nostre esprit & à nostre foy vraiment & efficacement, comme dit Loque?

Ils nous respondent que ceste conioction de la chair de nostre Seigneur n'est point corporelle, ains spirituelle : c'est là que nous les attendions : Nous leur demandons, si nostre Seigneur n'a pas dict,

Ioan 6.

*Nisi manducaueritis carnem filij hominis & biberitis eius sanguinem non habebitis vitam vobis: Si vous ne mangez la chair du Fils de l'homme, & si vous ne beuvez son sang vous n'aurez point de vie en vous :* Nous leur demandons, outre-plus, si la chair n'est pas corps: & de là, si la mādication de la chair de nostre Seigneur n'est pas corporelle, & si elle est corporelle, pourquoy est-ce que la conioction que nous acquerons avec nostre Seigneur, par la manducation de sa chair n'est elle pas corporelle aussi bien comme spirituelle ? Car puis que Loque



mesme dict qu'il faut que nostre Seigneur soit fait nostre en son humanité toute entiere, & non point en l'esprit seul de son humanité, nous le communions donc corporellement aussi bien comme spirituellement.

Il dict que la raison pour laquelle ceste conionction est spirituelle, & nō corporelle, procede de l'instrument par lequel elle se faict: & cest instrument, dit-il, pour le regard de Dieu est la puissance & operation du saint Esprit, & pour nostre regard, la foy, qui sont deux choses spirituelles: Mais fera il dict que là où la vertu & operation du saint Esprit; & nostre foy se rencontrent, le corps & sang de nostre Seigneur ne s'y puisse trouver? Tant s'en faut, il est de necessité que le corps & sang de nostre Seigneur soit en ce sacrement, par vertu & operation celeste, c'est à dire du saint Esprit, & que nostre foy le tiene ainsi; & à faute de le croire, cōme aussi d'y estre bien préparé, ce sacrement nous sera à damnation & iugement.

Il dict d'avantage pour maintenir cest instrument de foy, & par icelle, l'union ou conionction spirituelle de nostre Seigneur avec nous par ce sacrement, *Non*

### Responce au 13.

*pas que ceste foy face descendre Iesus-Christ du ciel pour s'unir avec nous , mais pour ce qu'elle mesme s'esleue iusques au ciel , se fondant sus les promesses de Dieu, & là elle nous rend presents à Iesus-Christ, & Iesus-Christ à nous : Quelle absurdité est-celà ? dire que la foy seule nous rende presents à nostre Seigneur , & luy à nous : N'est-ce pas oster l'effect des paroles sacramentales ? lequel des deux a le plus de pouuoir , la parole de nostre Seigneur , ou nostre foy ? la defectuosité de nostre foy peut elle empescher l'efficace de la parole de nostre Seigneur ? cōme pour exemple , si le sacramentaire ne veut croire la presence recelle du corps de nostre Seigneur en ce sacrement , s'ensuit il qu'il n'y soit point ? & si l'idiot se vouloit faire croire que le corps de nostre Seigneur fut sacramentellement en tout lieu où il se voudroit le faire croire , y seroit-il pourtant ? nous disons bien avec l'escriture que Dieu est par tout, qu'il remplit le ciel & la terre , & qu'il est par tout où il est inuoqué, mais nō le corps & sang de nostre Seigneur, d'autant que la diuinité estāt par tout, le corps n'y est pas pourtant, sinon au ciel en sa propre espeece & nature; & au sacrement de l'Autel, inuisi-*

blement & incomprehensiblement, & recellement & actuellement toutesfois, puis que par ses paroles sacramentales luy-mesme nous le dit.

Et voilà comment s'entend les propos de saint Ambroise alleguez par Loque, *li. de Isaac & anima c. 5.* comme procedants de la bouche de nostre Seigneur Iesus-Christ, *Ceux-là me sont presents desquels la foy est avec moy, & desquels ie suis la portion*: ce qui s'entend de la presence de sa vertu operatiue, & non de la presence sacramentale, laquelle est non seulement spirituelle, comme dit Loque, ains aussi corporelle: Ainsi s'entend le passage de saint Augustin qu'il allegue sus ce propos, bien qu'il s'abuse en la cote, le prenant du traicté 5. sus saint Iean, & toutesfois n'en est faicte aucune mention audit traicté: mais peut estre la haste qu'il auoit de parfaire son liure, & le mettre en lumiere, luy a faict prēdre l'un pour l'autre: mais ce n'est la premiere fois, ny peut estre la derniere. De mesme moyen aussi se doit resoudre & exposer le passage qu'il allegue du decret, tiré d'un sermō d'Eusebe Emisene, du corps & sâg de nostre Seigneur, où il est dit, *Regarde le sacré corps & sang de ton Dieu par foy, touche le de* *de consec. di. 2. quia corpus.*



## Responce au 13.

ton ame, prens le avec la main de ton cœur : Cella est bon, & nous dōne à entendre comment nous deuons sentir & estimer de la presence réelle & actuelle du corps & sang de nostre Seigneur en ce sacrement; & nous faict entendre aussi qu'il n'en faut pas iuger comme des autres choses corporelles lesquelles dependent du iugement des sens extérieurs, & nous diēt que nos sens extérieurs ne nous peuuent conduire à la cognoissance de ce mystere, mais bien la foy laquelle nous y deuons apporter, attendu que telle est la difference des choses naturelles ou terrestres, & des choses diuines & celestes : En somme ce passage & les autres préalliguez de S. Ambroise, & de sainct Augustin, ne desnient point, ains plustost fortifient & cōfirmement la doctrine que tient l'Eglise Romaine de la vraye presence du precieux corps & sang de nostre Seigneur, par la transsubstantiation qui se fait en ce sacrement : C'est à quoy nous accommodons aussi ces mots que lediēt Loque pense accommoder à sa mauuaise & sinistre intention, *Sursum corda*, lesquels tendent à raurir les cœurs des assistants à ce haut mystere, & leur faire apporter la vertu de la foy, ou

man-

manque le iugement de leurs sens extérieurs pour discerner la verité du precieux corps & sang de nostre Seigneur en iceluy, laquelle si Dieu vouloit communiquer à l'homme en propre espee de chair & de sang, luy feroit horreur : & d'autre part, s'il vouloit y monstrier la gloire de sa diuinité, le confondroit, attendu qu'elle surpasse la capacité & puissance de l'homme mortel : & pour ceste cause, il faut que nostre Seigneur Dieu & homme soit communiqué à l'homme sous vne espee estrangere, & que l'homme ne le mesurant pas à son sens imbecille, y apporte la foy, laquelle toutesfois n'oste point la vraye presence de Iesus-Christ Dieu & homme, en ses deux natures, lesquelles l'homme doit apprehēder par foy.

*Raison 7. pour la transsubstantiation.*

Il met en apres ceste raison pour septiesme.

Il nous est enioint de manger la chair de nostre Seigneur Iesus-Christ si nous voulons estre sauuez.

O est-il que la manducation est vne action corporelle.

Partant il nous faut manger corporel-

## Responce au 13.

lement la chair de nostre Seigneur si nous voulons estre sauuez.

*Ioan 6.* Ceste raison est fondee en la pure & expresse parole de nostre Seigneur, laquelle dict, *Si vous ne mangez ma chair, & si vous ne beuvez mon sang vous n'aurez point de vie en vous* : Loque n'y trouue que redire quand à la matiere, recognoissant que ce n'est que l'escriture expresse, bien qu'il la blasme, disant que c'est plustost vn sorite captieux en sa forme, que non pas vn vray syllogisme: Qui luy faict dire celà, c'est qu'il y voit entierelement de l'autorité de l'escriture, laquelle il ne peut nier.

Il s'attaque donc seulement à la matiere, confessant que la manducation est vne action corporelle, d'autant que c'est le corps qui mange & non l'ame : & toutesfois que quand la manducation est rapportee à l'ame à cause des signes & sacrements qui se peuuent manger, elle est prise non proprement, ains par vne similitude & par maniere de parler, comme quand on dict que l'esprit oit & voit, lequel toutesfois n'a point de bouche pour manger, d'oreilles pour ouyr, ny d'yeux pour voir: Et suyuant ceste exposition, il



dict que pour vray la chair commune ne peut estre mangée, sinon corporellement par la bouche : mais que de la chair de nostre Seigneur Iesus-Christ il n'en est pas de mesme, d'autant que ce n'est point vne viande qui soit pour le ventre, comme vne viande commune & ordinaire, mais qu'elle est pour l'esprit seulemēt. Et pour confirmer d'auantage son dire, il allegue saint Ambroise, disant, *Non iste panis est qui vadit in corpus, sed ille panis vite eternæ qui animæ nostræ substantiam fulcit* : Qu'il n'est pas icy question du pain commun qui entre dedans le corps, ains du pain de vie eternelle qui repaist nostre ame : il allegue aussi le canon, *ut quid paras*, extrait de saint Augustin, auquel il est dict, *A que faire appreste-tu les dents & le ventre? Croy, & tu as mangé, car qui croit en luy le mange* : Il s'est bien gardé d'y adiouster ce qui ensuit au mesme canon, *Que l'homme est repeu inuisiblement par ce sacrement, ainsi comme il est regeneré inuisiblement* : Il allegue aussi vn passage de saint Ambroise, en ceste sorte, *Comme le pain est la propre viande du corps & est mangé corporellement, ainsi le corps de Iesus-Christ est la viande de l'esprit, & est mangé spirituellement*.

*li. 5. de sacra. c. 4.*

*de consec. dist. 2.*

*lib. 6. de sacram.*

*Responce au 13.*

Ne luy en desplaïse, ce passage n'est point en saint Ambroise, & aussi s'est il bien gardé de coter le chapitre auquel on voudroit voir ce passage: Saint Ambroise en tout son sixiesme liure des sacrements, ne parle du saint Sacrement de l'Autel, sinon au premier chapitre: Et si Loque veut dire qu'il l'y ait trouué, il a deu alleguer les mots expres de S. Ambroise, & coter le chapitre: mais ce ne luy est nouueauté de prester telle charité aux Docteurs & Peres de l'Eglise.

En somme pour dōner quelque apparence de verité à son opinion, il faiēt vne comparaïson de la mādication spirituelle avec la corporelle; disant que la mādication spirituelle qui se faiēt par le moyen de la foy n'est pas moins réelle & veritable que si elle se faisoit charnellemēt par la bouche du corps charnel, parce que les actiōs spirituelles de l'esprit ne sont pas moins réelles & veritables que les actions corporelles du corps qui s'aperçoïuent des yeux.

Sur quoy nous auons à dire que si ceste opinion a lieu, autāt recevra ce sacremēt celuy auquel il sera present, que celuy duquel il sera entierement esloigné, d'autant

que les actions de l'esprit & de la foy ne consistēt point en la proximité ou distāce des choses: car aussi bien l'esprit apprehēde-il ce qui est loin de la personne, cōme ce qui en est pres: de sorte qu'il ne sera point besoin de sacrement pour recevoir veritablement & reellement le corps de nostre Seigneur: dequoy donc seruira la cene aux Caluinistes, veu que l'esprit & la foy ne requierent point la presence des choses: autāt recevra leur cene celuy qui n'y assiste pas comme celuy qui y assiste: nous ne disons pas cela du S. Sacrement de l'Autel, auquel nous croyons la vraye & reelle presence du corps & sang de nostre Seigneur.

Nous disons que d'autant que toute action de nostre Seigneur nous doit servir d'instruction, attendu qu'il a dit, *Je vous ay* *Ioan 13.*  
*donné exemple à ce que vous ayez à faire comme*  
*j'ay fait*: Puis qu'il a dict que nous devons māger sa chair & boire son sang pour obtenir la vie eternelle: puis qu'il a dit aussi,  
*Le pain que ie vous donneray est ma chair pour* *Luc 22.*  
*la vie du monde*: puis qu'il a dit, *Cecy est mon*  
*corps qui sera livré pour vous, prenez, mangez,*  
& qu'il a baillé à ses Apostres sa chair & son corps à manger corporellement de



## Responſe au 13.

leur bouche , qu'il faut que nous croyons que la manducation corporelle eſt neceſſaire auſſi bien comme la ſpirituelle , que les aduerſaires diſent ſe faire par eſprit & par foy: ce qui ſe peut cognoiſtre en ceſte ſorte. L'hōme eſt compoſé de deux natures, ſçauoir eſt, du corps & de l'ame: Dieu ne veut point ſauuer l'hōme à demy, ains entierement, & quand au corps & quād à l'ame, d'autāt que les œuures de Dieu ſont parfaicts, & ne manquent en rien: Noſtre Seigneur Ieſus-Chriſt Fils de Dieu , veut ſauuer l'hōme en luy donnant la vie eternelle: il glorifie l'ame en attēdant ſon iugement, le corps demeurāt en terre: mais il reſuſcitera le corps pour le glorifier cō-iointement avec l'ame par ſon iugement. Quand donc il diēt, *Si vous ne mangez ma chair & ſi vous ne beuuez mon ſang vous n'aurez point de vie en vous*: Il l'entend de la vie eternelle, tāt du corps que de l'ame. Or le corps eſt viſible, l'ame inuiſible: Il faut donc qu'en ce ſacrement que noſtre Seigneur nous a commandé ſi eſtroictemēt, il y ait quelque choſe pour le contentement du corps, & quelque choſe pour la reſeſtion de l'ame: pour le corps eſt le ſacrement par ſes ſignes viſibles & ſenſibles,

qui sont les especes de pain & de vin, & ce, pour nous conduire & acheminer à la cognoissance de ce qui est de plus haut, sçauoir est, de l'humanité & du corps de nostre Seigneur, inuisible sous ce sacrement, & par le moyen duquel nous sommes vnis avec nostre Seigneur, selon ces mots de S. Paul, *Nous sommes tous vn mesme* 1 Cor. 10.  
*pain & vn mesme corps nous qui communiquõs d'un mesme pain & d'un mesme calice:* Et ainsi cõme ce corps inuisible qui est sous ces signes est deifié, ainsi il deifie & nos corps & nos ames par la participatiõ que nous en prenons; en laquelle l'action corporelle n'est point la principale action, d'autant que, cõme dit S. Cyprian sus ces mots de l'Euangile, *La chair ne sert de rien: Carnalis* ser. de coe-  
na dom.  
Ioan. 6.  
*sensus ad intellectum tantæ profunditatis non penetrat, nisi fides accedat:* Le sens charnel ne peut paruenir à l'intelligence d'un si profond mystere si la foy n'y interuient: Par laquelle exposition de saint Cyprian, il est tout apparent qu'en ce sacrement deux choses doiuent estre considerees, sçauoir est le iugement du sens lequel conuient au corps fragile, & le iugement de l'esprit: Le iugement du sens corporel apprehende en ce sacrement ce qui y est

*Responce au 13.*

sensible, sçauoir est, les especes de pain & de vin qui sont sensibles, & le faut necessairement puis que nostre Seigneur mesme a receu & communié, & baillé à ses Apostres ce sacrement ( qu'il a appellé son corps & son sang) sous ces signes & especes sensibles, autrement nous derogions à son institution & commandement: Le iugement de l'esprit ( se soubmettant à la parole & toute puissance de nostre Seigneur) apprehende par foy que puis qu'il a dict, *Cecy est mon corps, cecy est mon sang*, & qu'il est Pere de toute verité, que sous ces signes sensibles, est son vray corps & son vray sang inuisiblement & incomprehensiblement sans discuter le moyen de la possibilité, d'autant qu'il recognoist (selon l'escriture) qu'il n'est rien impossible à Dieu: Tellement que ces propos de S. Augustin, *Crede & manducasti*, cy dessus alleguez par Loque, nous remettent deuât les yeux deux sortes de mādication qui doiuent estre cōsiderees en ce sacrement, l'vne sacramentale, l'autre spirituelle: Selon la premiere, ce sacrement est receu indifferēmēt par les bōs & par les mauuais, bien q̄ ce n'est pas avec mesme effect, suiuant ce que dict la prose de S.

LUC 1.



Thomas d'Aquin, *sumunt boni, sumunt mali, forte tamen inequali, vitæ vel interitus*, Que les bons & les mauuais reçoient ce Sacrement avec differents effects, c'est à sçauoir de vie & de mort eternelle. Partant les bons & les mauuais reçoient le corps & sang de nostre Seigneur sacramentale-ment; mais les bons seulement le reçoient spirituellement; c'est à sçauoir par le moyen de la foy qu'ils ont de la presence recelle & actuelle du corps & sang de nostre Seigneur, & de la disposition prealable qu'ils y apportent: Car comment le pouroit recevoir avec effect salutaire, c'est à dire de vie eternelle, celui qui ne croit pas la vertu & la presence d'iceluy? s'il n'est question que d'y apporter la croyance & l'esprit, le diable a l'un & l'autre. Mais quand il est question de la confiance qu'il y faut auoir, & de l'esperance qu'il y faut apporter, & d'une digne preparatiõ ou disposition; à cela se recognoist le bon d'avec le meschant, & mesme d'avec le diable, lequel à son grand regret a esprouvé en ce saint Sacrement par infinis miracles par lesquels il a esté chassé des corps des personnes, la preséce du corps & sang

de nostre Seigneur.

Et d'autant que Loque voulant feindre estre bon Chrestien & auoir vne sainte creance de ce Sacrement fait vne comparaison de la manducation spirituelle avec la manducation corporelle, dict que la manducation qui se faict spirituellement par le moyen de la foy, n'est pas moins réelle & veritable que si elle se faisoit charnellement par la bouche du corps, par ce que les actions spirituelles de l'esprit ne sont pas moins réelles & veritables que les actions corporelles du corps qui s'apperçoient des yeux : Nous luy demandons, à sçauoir s'il pense que ce soit chose impossible que les actions corporelles, & les actions spirituelles conuiennent & se rencontrent ensemble en mesme suiet. Pour exemple, l'experience nous apprend que l'esprit de l'homme iuge bon ou mauuais tout ce que l'œil voit, ce que l'oreille oy, & ce que la main touche. Ce qui se faict par l'instinct de nature plustost que par vne doctrine qui se puisse apprendre en l'escole par la conduite d'un superieur ou maistre. Pourquoi donc en ce Sacrement ne sera-il pas loisible de receuoir corporellement & de la bouche corpo-

relle le precieux corps de nostre Seigneur  
sous les signes sensibles ; & de l'appre-  
hension de l'esprit & de la foy recevoir  
inuisiblement & insensiblement , le  
vray corps & sang de nostre Seigneur.  
L'un n'empesche point l'autre, puisqu'il y  
va d'un don celeste qui se doit communi-  
quer tant au corps qu'à l'ame par ce Sacre-  
ment, c'est à sçavoir de la vie eternelle , la-  
quelle est promise au corps & à l'ame par  
iceluy. Voilà comment Loque abuse es-  
trangement du mot d'esprit, & du mot de  
foy pour oster de ce Sacrement la presen-  
cereelle & actuelle du vray corps de no-  
stre Seigneur.

8. *Raison de la transsubstantiation.*

Loque cognoissant bien qu'en main-  
tenant la doctrine de la transsubstantiatiõ  
en ce Sacrement nous desnions que le  
pain & le vin y demeurent en substance  
de pain & de vin, lesquels toutesfois il  
maintient estre de verité en sa cene , com-  
me figures du corps & sang de nostre Sei-  
gneur , tasche de propos deliberé de nous  
embrouiller d'une raison qu'il nous attri-  
bue , portant vne comparaisõ de la figu-  
re & de la verité, la formant en ceste sorte.

Si les figures n'ont eu lieu que sous le



### *Responce au 13.*

vieil Testament ayants pris fin sous le nouveau par nostre Seigneur Iesus-Christ qui en est la verité & le corps, il s'ensuit qu'en ce Sacrement il n'y a point de figure, ains que la verité & substance de son precieux corps y est.

Or les figures n'ont eu lieu que sous le vieil Testament, ayant pris fin sous le nouveau par Iesus-Christ qui en est la verité & le corps.

Partant en ce Sacrement ( qu'il appelle sa cene ) il n'y a point de figure, ains y est la verité & substance du corps.

Voilà la 8. raison qu'il nous impute pour la defence de la transsubstantiation: en laquelle nous remarquons, que pour nous rendre ridicules par icelle, il allegue pour preuve de l'assumption, saint Paul en la 2. aux Corinthiens chap 17. en laquelle toutesfois il ne se trouue que 13. chapitres. Mais telles sont les voyes obliques que suivent les enfans de diuision pour blasmer l'uniõ que nous tenons avec l'Eglise de Dieu, qu'ils appellent Romaine, par derision, voulans ignorer que ce nom luy soit attribué pour vray tiltre d'honneur.

Or il se donne du plaisir sus ce mot de

figure : & combien qu'il ayt à desplaisir sus toutes choses les distinctions des Theologiens, d'autant que par icelles sont decouvertes & desuelopees les obscuritez que les heretiques apportent à la pure verité, toutesfois luy-mesme se donne carriere sus la distinction de ce mot de figure, & par icelle tasche à rendre ridicule nostre croyāce que nous auōs de la presence reelle & actuelle du corps de nostre Seigneur Iesus-Christ en ce Sacrement, & la desguise estrangement pour paruenir au dessus de son intention : Car de là il tire la refutation de ceste raison.

Il dit donc que ce mot de *figure*, se peut entendre en trois sortes : & que premiere-ment il signifie les sacrifices & ceremonies qui figuroyent soubs la loy Mosaique l'aduenement de nostre Seigneur Iesus-Christ, lesquelles ne deuoyent durer que iusques au temps de la correction ou accomplissement qui en deuoit estre faict par nostre Seigneur. Secondement, dit-il, les figures signifient des Sacrements qui sont signes ou figures visibles, comme les anciens ont parlé. Tiercement, il appelle les figures trophées ou similitudes.

*Heb. 9.  
Coloss. 2.*

### *Response au 13.*

Quand à la premiere signification il fait le douteux, disant qu'en prenant les figures pour les sacrifices ou ceremonies de l'ancienne loy qui figuroyent nostre Seigneur qui deuoit estre incarné, il ne sçait qui se doit sentir le plus pressé par ceste signification du mot de figure: le Catholique, qu'il appelle sophiste, ou l'heretique tenant l'opinion de Calvin. Car le Calviniste dit, qu'en sa cene le pain & le vin sont figures ou signes du corps & sang de nostre Seigneur. Le Catholique maintiét que les especes de pain & de vin sont signes du vray corps & sang de nostre Seigneur estant inuisiblement en ce Sacrement. En cela il ne doute point sus l'opinion des enfans de diuision: car il maintient formellement avec eux que le pain & le vin en sa cene sont signes du corps & sang de nostre Seigneur. Et sus la doctrine des Catholiques, il fait mine d'ignorer qu'és Sacraments de l'Eglise Catholique, il faut recognoistre deux choses, sçauoir est, le signe ou figure visible qui signifie la chose inuisible cachee sous ce signe; & aussi icelle chose laquelle est inuisiblement sous ce signe visible. Ce que s'il vouloit recognoistre pour discerner les



sacrements de la nouvelle loy d'auec l'ancienne, en ce que ceux de l'ancienne contenoient seulement le signe ou la figure de la chose signifiee, & non la chose signifiee, il n'entreroit point en ce doute: mais il luy plaist y entrer par ceste feintise ou ignorance simulee.

Quant à la seconde signification selon laquelle il a dict que par les figures on entend les sacrements qui sont signes ou figures visibles, il dict que ceux de l'ancien Testament de verité sont cessez, voire en telle sorte qu'ils ne doyent plus estre en vsage, mais quant aux nouveaux, il dict qu'ils sont tellement establis par nostre Seigneur Iesus-Christ en la place des anciens que l'Eglise les doit pratiquer iusques à la fin du monde.

Pour preuue de ce il allegue saint Augustin disant, *Les premiers sacrements qui estoient observez & celebrez en la loy estoient figuratifs de Iesus Christ à venir, lesquels apres auoir esté par luy accomplis ont esté abolis pour ce qu'ils estoient accomplis: Car il n'est pas venu transgresser la loy, ains l'accomplir: & ont esté instituez autres sacrements plus grands en vertu, & de plus grande utilité, plus aisez à observer, & en nombre plus petit, comme reuelez par la*

*To 6. lib.  
19. contra  
Faustum  
Mani.  
cap. 13.*

### Responce au 13.

*injustice de la foy aux enfans de Dieu, quand il les a appellez à leur liberté, leur ostant le ioug de servitude, lequel estoit plus cōuenable au peuple dur & charnel.*

Voilà le propre texte de saint Augustin fidelement traduit de mot à mot, & bien autrement que Loque ne l'a rapporté.

Nous receuons tout cela pour bõ, mais non pour conclure aux fins de Loque. Lequel voudroit peut estre en tirer ce syllogisme.

*Les sacrements ou signes & figures qui sont instituez par nostre Seigneur apres l'accomplissement de la loy ancienne, doiuent estre retenus perpetuellement en l'Eglise.*

Or est-il que nostre Seigneur a donné en ce Sacrement pour signes & figures le pain & le vin.

Partant en ce Sacrement le pain & le vin sont signes & figures du corps & sang de nostre Seigneur, & doiuent estre perpetuellement retenus pour tels en l'Eglise.

Si Loque se veut ayder de ce syllogisme, nous dirons qu'il est vn mauuais ouurier de syllogismes. Car vne des premieres fautes qui se peuuent commettre en la composition des syllogismes, est celle laquelle

quelle par les Logiciens est appelée *Petitio principij*: Car en toute ceste dispute il a à prouver qu'en ce Sacrement le pain & le vin sont les signes & figures du corps de nostre Seigneur, pour conclure de celà qu'il ne se fait point de transsubstantiatiō de la nature & substance du pain & du vin en la nature & substāce du precieux corps & sang de nostre Seigneur, & ce qu'il deuroit conclure, il le mettoit en l'assomption de son syllogisme, qui seroit repeter son principe, & toutesfois quād il ne voudroit clairement & ouuertement se servir de ce syllogisme pour euitter cest inconuenient de repetition du principe, il tend tousiours à la mesme conclusion.

Or nous sommes d'accord avec luy que nostre Seigneur ayant premierement accompli puis aboly les figures de l'ancien Testament, & en lieu d'icelles introduit d'autres figures & signes, lesquels l'Eglise doit practiquer iusqu'à la fin du monde, nous les deuons obseruer: mais en vne chose nous sommes differents de Loque sus ce poinct; c'est qu'il dict que les figures & signes que nostre Seigneur a ordonné en ce Sacrement, sont les substances de pain & de vin, figuratiues



### Responce au 13.

& significatiues du corps & sang de nostre Seigneur: qui est maintenir en ce Sacrement les substances de pain & de vin, & en oster la reelle presence du corps & sang de nostre Seigneur. Et nous au contraire nous maintenons que les figures & signes du corps & sang de nostre Seigneur ne sont point en ce Sacrement les substances de pain & de vin, d'autant que elles n'y demeurent pas apres la consecration, ains seulement les accidents visibles & sensibles qui demeurent és especes de pain & de vin transsubstantiez en la nature & substance du corps & sang de nostre Seigneur, lesquels par ce moyen sont en ce Sacrement reellement & de faict, & non la substance de pain & de vin.

Ioan. 6.

Cecy se verifie par vne conference des textes de l'Euangile sus ce propos, *Non hoc corpus quod videtis manducaturi estis, & bibituri sanguinem illum, quem fusuri sunt illi qui me crucifigent.* Vous ne mangerez pas ce corps que les Iuifs crucifieront, & ne beurez pas ce sang que respandront ceux qui me crucifieront. Comment dōc s'entendent les paroles qu'il a dit luy-mesme à ses Apostres leur enioignant la commu-

nion de son precieux corps & sang, & leur disant, *Prenez, mangez, cecy est mon corps qui sera liuré pour vous, cecy est mon sang qui sera respandu pour vous?* Au premier passage il entend son corps & sang en propre espee de corps & de sang humain, & au dernier il l'entend en sacremēt, inuisiblemēt, & son vray corps toutesfois, puis qu'il specifie que c'est ce mesme corps qui doit estre liuré à mort, & ce mesme sang qui doit estre respandu.

C'est pourquoy saint Augustin exposant ce premier passage, *Non hoc corpus quod videtis manducaturi estis, & bibituri illum sanguinem quem fusuri sunt qui me crucifigent*, dit, *ipsum quidem et non ipsum: ipsum inuisibiliter, et non ipsum visibiliter*. Vous mangerez ce mesme corps que vous voyez, mais inuisiblement; vous ne mangerez pas ce mesme corps visiblement: & est ainsi alleguee au decret de ceste exposition de saint Augustin sur ce passage de saint Iean. Cependant est à noter que puis qu'inuisiblement est receu & mangé par ce Sacrement le corps mesme qui a esté liuré, il s'ensuit qu'il y soit, ce qui est formellemēt cōtre la doctrine de Loque.

Quant à la troisieme signification de

## Responce au 13.

ce mot de figure, selon laquelle il se prend pour trophée ou similitude, il dict que si elle n'est employée es paroles sacramentales pour l'explication & vraye intelligence d'icelles, il faudra biffer toute l'écriture en laquelle les mystères ne nous sont pas proposez nuëment & simplement, ains couverts de quelque figure, & mesme par nostre Seigneur, lequel appelle les fideles ses brebis, & cōmande à saint Pierre de les paistre: lequel s'appelle vigne, disant, *Je suis la vraye vigne*: & appelle ses Apostres les serments d'icelle vigne. Brief, il parle souuent par paraboles: Mais nous luy auons jà respondu que les passages de l'écriture qui concernent le mystère de l'Incarnation de nostre Seigneur, comme

Ioan. 16.

Ioan. 15.

Ioan. 1.  
Matth. 3.

ceux-cy, *Verbum caro factum est: Hic est Filius meus dilectus, &c.* Le Verbe a esté faict chair: Cestuy est mon Fils bien-aimé; se doyuent entendre nuëment & simplement, Comme aussi ceux qui emportent ou signifient les moyens de nostre salut, pour exemple, la forme du Baptême, & les paroles sacramentales par lesquelles se faict la consecration du corps & sang de nostre Seigneur: d'autant qu'en telles choses il n'est point question de figure ou simi-



litude, ains de pure verité & de vray effect: Car nostre Seigneur n'est point incarné par figure ou similitude. Son Baptisme ne laue point en figure ou similitude, ains vraiment & de fait son precieux corps & sang ne nous donne point la vie eternelle en figure ou similitude, ains en verité & en effect, bien que sous signes visibles & sensibles de l'espece de pain & de vin, pour figure ou signification de la verité qui y est contenue, comme nous auons ja dict cy dessus.

Partant que Loque allegue tant d'autoritez & passages qu'il voudra sus ce propos pour verifier qu'il faut qu'il y ayt en ce Sacremēt quelques figures ou signes pour signifier le corps & sang de nostre Seigneur, nous l'entendons tousiours en ceste sorte, & non autrement.

*Raison 9.*

Pour neufiesme raison de la transsubstantiation il allegue ce syllogisme sous le nom des Catholiques.

Si Iesus-Christ peut & veut que son corps soit au ciel & en la terre en autant de lieux que le saint Sacrement ce celebre, sans difficulté il y est.

Mais il le peut, car il est tout-puissant.

*Responce au 13.*

Il le veut aussi: car il a déclaré sa volonté en l'institution de ce S. Sacrement, quand il a dict, *Cecy est mon corps.*

Parquoy sans difficulté son corps est au ciel , & est en la terre en autant de lieux que le saint Sacrement se celebre.

L'impudēce ne rougit point, mais l'impudent deuroit rougir d'alleguer vne raison si pressante, & encores plus de s'efforcer de la contredire: attendu que pour la contredire il faut infalliblement qu'il s'adresse ou à la toute-puissance de Dieu, ou à sa volonté. Quand à la volonté il dict en auoir parlé au premier argument qu'il a ja combatu: aussi pour la maintenir nous le renuoyons à la responce que nous luy auons faicte sus la refutation dudit premier argument.

Et quant à la toute-puissance, ainsi cōme il dit en auoir aucunement parlé sus le 5. argument, ainsi aussi nous le renuoyōs & le lecteur aux responces que luy auōs fait sus iceluy argument.

Et pource qu'il dict que ce poinct merite estre enfoncé d'auantage, voyons ce qu'il en veut dire, puis nous luy respon-  
drons. Il dict que combien que Dieu

puisse beaucoup plus faire qu'il ne veut faire, toutesfois pour nostre regard sa toute-puissance doit estre consideree selon les tesmoignages de sa volonté, de laquelle l'exécution ne peut estre empeschée par aucune creature : Ce qu'il allegue de saint Augustin, & pour exemple de cela il allegue Tertullian, disant, que Dieu pouuoit bien donner à l'homme des plumes aussi biē comme il en a donné aux oyseaux, qu'il pouuoit (s'il eust voulu) abyssmer Praxeas & tous les heretiques, & qu'il ne l'a pas voulu faire.

*Encic. 96*

*Aduers.  
Praxeas.*

Nous sommes d'accord de tout cela avec Loque. Partāt si ainsi est, que pour nostre regard sa toute-puissance doye estre consideree selon les tesmoignages de sa volonté, regardons si en l'escriture il se trouuera quelque tesmoignage par lequel il apparoiſſe que pouuant dōner son precieux corps & sang aux hommes, il ait eu volonté de le faire: Puis aussi si ayant eu la volonté de le faire, ioincte à la puissance, il la fait de verité: car si cela est, Loque n'a plus que dire pour excuse de sa mes croyāce sus le faict de la transsubstantiation en ce Sacrement, & faut qu'il croye par vertu d'icelle que le vray corps & sang de nostre



## Responce au 13.

Seigneur y foyent.

*Ioan. 6.* De la toute-puissance de sa diuinité, il en est d'accord avec nous : De la volonté correspondante en voicy les tesmoignages: *Le pain que ie vous donneray est ma chair, pour la vie du monde. Si vous ne mangez la chair du Fils de l'homme, et si vous ne beuuez son sang, vous n'aurez point de vie en vous.* Desquels propos nous tirerons ce syllogisme.

Nostre Seigneur ne nous a pas obligé à vne chose sous peine de damnation, contre sa volonté, ains voulant que nous y obeissions.

Or est-il qu'il nous a obligé à manger sa chair & boire son sang sous peine de damnation.

Partant il veut que nous mangeons sa chair & que nous beuions son sang, il le peut, & le veut : Partant c'est chose vraye que son corps & son sang sont en ce Sacrement, sans diuiser sa volonté d'avec sa puissance.

Or, qu'il ait effectué cela, c'est chose toute claire par les mots Sacramentaux, d'autant qu'il a dict à ses Apostres, *prenez, mangez, cecy est mon corps qui sera liuré pour vous. Prenez, beuuez de*

*cecy tous , cecy est mon sang qui sera respandu pour vous & pour plusieurs en remission des pechez.*

Loque pourfuiuant son point & pretendant monstrier que c'est vne chose repugnante ou à la toute-puissance , ou à la volonté de nostre Seigneur Iesus-Christ, de faire que son precieux corps & sang soit en ce sacrement, remarque qu'il y a deux sortes de choses impossibles à Dieu: L'une, des choses qui repugnent à sa nature, comme quand l'escriture dict, que *Dieu ne peut mentir, qu'il ne peut estre tenté de maux, qu'il ne se peut nier soy-mesme*: lesquelles choses (selon S. Augustin) il ne peut, pour ce qu'il est tout-puissant: car s'il les pouuoit faire, cela diminueroit de sa toute-puissance: Et partant quand nous disons qu'il ne les peut faire, nous ne les mettons pas en auant comme exceptions de sa toute-puissance, ains plustost comme vrayes confirmations d'icelle, d'autāt que les pouuoir faire n'est pas vn tesmoignage de puissance, ains d'impuissance, d'infirmité, & de defaillāce de perfection & de vertu: Partant S. Augustin, a dit, *Dieu ne peut certaines choses, pour ce qu'il est tout-puissant.*

*lib. 1. de  
symb.  
ca. 20*

*lib. 5. de  
citi. Dei  
c. 10.*

## Responce au 13.

*Pet. Iom.  
li. 1. sent.  
dist. 40.*

L'autre sorte des choses impossibles à Dieu est de celles qui impliquent contradiction: comme quand les anciens ont dict, *Que Dieu ne peut faire que les tenebres soient lumiere: Qu'une chose estant faicte ou dictée, ne soit faicte ou dictée: Qu'une vierge violée ne soit violée: Qu'un triangle n'ait point trois angles & trois lignes: Que deux choses opposées l'une à l'autre soient ensemble en un mesme sujet*: Et la raison pourquoy Dieu ne peut ces choses, est pour ce qu'en luy il n'y a pas ouy & non, verité & mensonge, & qu'il ne peut mentir ny estre contraire à la verité: car il faut necessairement que de deux choses contradictoires l'une soit vraie, & l'autre fause.

Ceste distinction des choses impossibles à Dieu presuppосee, il vient au propos du corps de nostre Seigneur en ce sacrement, & dict, *qu'il est impossible à Dieu de faire qu'un corps demeurant corps ne soit pas corps, qu'il soit circonscrit & incirconscrit en un certain lieu, & ensemble en plusieurs lieux à la fois, d'autant que ces choses sont contradictoires*. Or la parole de Dieu dict que le corps de Iesus-Christ est vray & naturel corps, visible & palpable, ayant chair & os contre le naturel de l'esprit: Qu'il est mōté au



ciel, & qu'il faut qu'il y soit contenu iufques à ce qu'il viēne au dernier iour pour iuger les viuants & les morts: Iefus-Christ donc ne peut faire le contraire, car s'il le faisoit ou disoit, ce feroient choses contradictoires, & par consequent il ne feroit point veritable. Par cela Loque reuient au lieu commun des Caluinistes, portāt que le corps de nostre Seigneur ne peut estre au ciel & au sacremēt, d'autāt q̄ si on veut tenir qu'il soit en l'vn & en l'autre, il faut que ce soit par vertu diuine, & que la diuinité aye faict deux choses cōtraires, voire contradictoires sus vn mesme suiet, ce qu'il ne peut, d'autant que cela derogeroit à sa toute-puissance, comme il a esté dict cy dessus de l'autorité de sainct Augustin.

Pour respondre à ceste belle subtilité de Loque, nous ne disons pas simplement (comme luy) *que deux choses contraires ou contradictoires ne se peuuent rencontrer en vn mesme suiet*, mais nous y mettons ceste circonstance, *soubs vn mesme temps, et soubs vne mesme consideration*: Pour exemple, qui empesche que l'homme ne puisse estre appelé ignorant & sçauant, fort & foible, sain & malade en diuers temps? Qui em-

## Responce au 13.

peschera aussi que le vray corps de nostre Seigneur ne soit au ciel en sa propre espeece de corps humain, c'est à dire, en espeece de chair, d'os, & de sang sensiblement, & en terre en plusieurs lieux ensemble, c'est à dire, esquels sera faicte la consecration, non en sa propre espeece, visiblement & sensiblement, mais sacramentalement? Car puis qu'ainsi est qu'il n'y a homme si aliené de son esprit qui ne cōfesse que nostre Seigneur est veritable, & entierement ennemy de mensonge, il faut donc confesser qu'il a dict vray quand il a dict à ses

LUC 22.

*Apostres, Prenez, mangez, cecy est mon corps qui sera liuré pour vous: Or est il qu'il ne leur bailla pas son corps à mager selon sa propre, espeece & en ses dimēsiōs corporelles, d'autant qu'il leur auoit dit parauant, Vous*

IOAN 6.

*ne mangerez pas ce corps que vous voyez: c'est à dire, en forme humaine, mais bien sous l'espeece de pain: ce qui a jà esté exposé cy deuant selon ce mesme texte de S. Iean: Et quel corps est-ce le quel a esté liuré à la croix, le quel est mort, le quel a esté enseuely, le quel est resuscité, monté au ciel, & est à la dextre du Pere, si ce n'est celuy mesme que les Apostres voyoient en sa propre espeece & forme de corps humain,*

lors que nostre Seigneur leur tenoit ces propos? Voylà donc comment sous cōsiderations diuerses, deux choses contraires se trouuēt au corps de nostre Seigneur: car au ciel il retient son naturel de corps sensible, palpable, visible, tel qu'il estoit quand apres sa resurrection corporelle il le representoit à ses Apostres, leur disant, *Palpate & videte, maniez et voyez*: En terre, c'est à dire, au sacrement de l'Autel, il n'est pas maniable & sensible: car nostre Seigneur le donnant à manger à ses Apostres, ne leur a pas dict, *maniez, voyez*: ains il leur a dict, *Prenez, mangez*: L'aduersaire voulant auoir le sens exterieur pour iuge des choses saintes & sacrees, tout ainsī comme des choses communes & vulgaires, demande: S'il leur disoit, *Prenez & mangez*: Pour luy obeyr que pouuoient ils prendre & manger, sinon vne chose corporelle? &, qu'y auoit il de corporel en ce que nostre Seigneur leur commandoit de prendre & māger, sinon du pain? Nous respondons, il y auoit ce que nostre Seigneur Pere de verité disoit: Or il disoit, *Cecy est mon corps qui sera liurè pour vous*: Il ne disoit pas cecy est du pain qui signifie ou figure mon corps, ou ce pain est mon

*LUC 24.*

*MATT. 26.*



*Responce au 13.*

corps : car il n'a liuré pour nous ny pain ny figure ou signification, ains son vray & propre corps : Et voylà comment sous diuerfes considerations le vray corps de nostre Seigneur est au ciel & en terre : au ciel en son vray estre , & en sa vraye espece & forme de corps humain , tel qu'il y est vrayement monté au ciel : & en terre, en sacrement , & vrayement toutes-fois : Car comment n'y feroit il vrayemēt, puis que nostre Seigneur mesme a pronōcé & dict sans aucun desguisement, que c'estoit ce mesme corps qui deuoit estre liuré pour nous , qu'il donnoit à ses Apostres sous espece de pain , retenant ses accidens, sans que l'œil ny aucun sentiment corporel sceut donner iugement de ceste presence corporelle de nostre Seigneur en ce sacremēt? Voylà la cōfusion qu'emporte Loque de sa belle distinction des impossibilitez qui sont en Dieu, pour l'auoir mal pris.

*Raison 10. Pour la transsubstantiation.*

Il forme par apres la 10. raison en ceste sorte, la prenant de l'autorité des anciens Docteurs de l'Eglise.

Les anciens (dit-il) ont escrit qu'en ce sacrement, le pain & le vin sont changez

*pretendu abus de la S. Messe.* 192  
& transsubstantiez au corps & sang de nostre Seigneur.

Partant il le faut ainsi tenir & croire.

Pour verification de l'antecedent, il allegue sainct Iean Chrysostome (lequel <sup>10. s. Hom.</sup> simplement il appelle Chrysostome) disant, *Ce n'est pas l'homme qui fait le corps et le sang de Iesus-Christ, ains c'est le mesme Iesus-Christ qui a este crucifié pour nous: Les paroles sont bien proferées par la bouche du Prestre: mais la consecration est faite par la grace & vertu de Dieu: Il allegue en apres ce que le mesme auteur dict, sus le 10. chap. de la premiere epistre de sainct Paul aux Corinthiens, en ceste sorte, Ce qui est en la coupe est cela mesme qui est coulé du costé de nostre Seigneur, & nous en sommes faits participants.* <sup>60. ad pop. Antioch.</sup>

En apres il allegue sainct Cyprian, disant, *Ce pain que nostre Seigneur donna à ses Disciples, n'estant point changé en son espece, (c'est à dire en ses accidents,) mais en sa nature: (c'est à dire en sa substance,) par la toute-puissance de la parole, est fait chair: Et en vn autre endroit du mesme sermon, Iesus-Christ cree encores aujourdhuy, beneit, sanctifie, et distribue son tres-vray et tres-sainct corps à ceux qui le prennent deuotement.* <sup>sermo. de canado.</sup>

## Responce au 13.

li. 4. de sa-  
cra. ca. 4.

ca. 18.

Il allegue aussi saint Ambroise , disant, *Deuant la consecration ce n'estoit point le corps de Iesus-Christ: Apres la consecration ie te dis que c'est le corps de Iesus-Christ* : Il allegue par apres le mesme auteur au premier liures de ses Offices , disant ces mots aux incredules lesquels doutent de la vraye & reelle presence de nostre Seigneur en ce sacrement , *Tu dis parauanture, mon pain est commun: mais ce pain est bien pain auant les paroles du sacrement, mais la consecration interuenue, du pain il est fait la chair de nostre Seigneur* : Il a allegué ce dernier passage là veuë de pays , comme d'autres que nous auons remarqué cy deuant ; & de vray , en ce dix-huictiesme chapitre du premier liure des Offices, saint Ambroise ne touche aucun mot de ce sacrement, bien confessons nous que ceste doctrine est de saint Ambroise, comme des autres Peres de l'Eglise.

lib. de iis  
qui sac.  
mist. ini-  
tiantur.  
c. 9.

Il se trouue prou de passages , tant es-  
crits des auteurs alleguez , que des au-  
tres Docteurs de l'Eglise , pour soustenir  
ceste doctrine de la transsubstantiation,  
mais d'autant que Loque se contente d'a-  
uoir allegué ceux-cy, nous nous en cōten-  
terons aussi bien que luy : Seulement il  
nous



nous faut voir, & contredire sa refutation.

Premierement ( comme se moquant de nous à cause que nous soustenons ceste doctrine de la transsubstantiation, & nous surnommant aduocats d'icelle) il dit que ces passages alleguez nous semblent fort clairs & nullement ambigus, & que par iceux il est tout apparent que les paroles de la consecration prononcees par nostre Seigneur ne se doiuent entēdre ny exposer par figure, ains proprement & selon la lettre, cōme à la verité nous le recognoissons ainsi, bien que formellement contre son intention.

Puis (pour contredire ces passages) il repete ce qu'il a parauant allegué de saint Augustin de la maniere de lire avec discretion & iugement les escrits des Peres anciens, pour les rapporter au vray sens des paroles de nostre Seigneur suiuant l'analogie de la foy: ce que repetāt il n'oublie pas de s'attribuer & à ses semblables le droit de publier son interpretatiō, sans regarder s'il est plus raisonnable de la prendre de l'Eglise ou des Docteurs anciens, que de son particulier iugement.

De là il vient à examiner le passage de

### Responce au 13.

S. Chrysostome par lequel il dict, *Que ce n'est pas l'homme qui fait en ce sacrement le corps & sang de nostre Seigneur, ains que c'est le mesme Iesus-Christ qui a esté crucifié pour nous: & que ce qui est en la coupe est cela mesme qui est coulé du costé de nostre Seigneur: Ce qu'il expose en ceste sorte à son aduantage, comme de coustume, & en soustenant tousiours son erreur: Ce n'est pas l'homme qui faiet du pain & du vin commun, le corps & sang de Iesus-Christ, à sçauoir sacramentale-ment: Enquoy selon la forme des propos il parle treffainctement, & se semble conformer au dire de saint Iean Chrysostome: mais l'interpretation qu'il donne de ce mot, sacramentale-ment, gaste tout: car il dict sus ce mot, Ce n'est pas l'homme qui par sa parole & vertu ordonne & face que le pain & le vin de la sainte cene (ainsi appelle il ce sacrement) soient signes & sacrements du corps & sang de Iesus-Christ, c'est le mesme Iesus-Christ qui les consacre & dedie à cest usage: Ainsi expose il le dernier passage du mesme auteur, disant qu'il se doit entendre, sacramentale-ment, c'est à dire, par representation ou par vne metonymie sacramentale: Cōme si S. Iean Chrysostome auoit dit, le vin qui est en la coupe, est signe ou sacrement*

du sang qui est coulé du corps de nostre Seigneur.

Mais (comme nous auons declaré suffisamment cy dessus en combattant ceste mesme opinion) il ne se peut tirer des paroles sacramentales, que nostre Seigneur ait dit qu'en ce sacremēt son corps & sang y fut *par signe, par representatiō ou metonimie sacramentale* (comme dit Loque) bien que son vray corps qui deuoit estre liuré pour nous, & son vray sang qui deuoit estre respandu pour nous, y fut : car ce n'est vn signe ou sacremēt ou representation qui a esté liuré & respandu pour nous, ains son vray corps & sang, puis qu'ainsi il la proferé de sa bouche.

*Refutatiō  
de l'erreur  
de Loque.*

Semblablement, és paroles formelles de S. Iean Chrysostome, il ne se peut rien recognoistre en quoy il entende parler de signe ou representation ou metonimie sacramentale, ains il est tout euidenr qu'il parle du vray corps & sang de nostre Seigneur, auquel seul il attribue la vertu de transsubstātier le pain & le vin en son precieux corps & sãg, par le ministère du Prestre qui pronōce les paroles sacramentales: & n'auroit voulu iamais desguiser vn texte si expres pour imposer à nostre Sei-



### Responce au 13.

gneur lequel ne nous a point sauué en figure ou par signe, & aussi ne nous a point donné par signe ou en figure au sacremēt son precieux corps & sang.

*ser. de cœ-  
uz dom.*

Il vient par apres aux deux passages de S. Cyprian, & quand au premier il dit qu'il est mal tourné par les Catholiques qui s'en seruent, par ce que les mots latins de S. Cyprian estants tels, *Panis iste quem Dominus discipulis porrigebat, non effigie sed natura mutatus, omnipotentia verbi factus est caro:* Pour lesquels mots latins, Loque pour se donner aduantage sur nous, nous attribué ceste traduction, *Ce pain que nostre Seigneur donna à ses Disciples n'estant point changé en son espece, mais en sa nature, par la toute puissance de la parole est fait chair:* Et s'arreste sus ce mot, *d'espece*, cōme pēsant nous imputer, q̄ tout ainsi cōme quād nous voulōs distinguer le corps de nostre Seigñr en ces deux manieres d'estre, sçauoir d'estre au ciel, & au S. Sacremēt, nous disōs qu'il est au sacremēt sacramentalemēt, c'est à dire en sa vraye nature & substāce, mais inuisiblement, & qu'il est au ciel en sa propre espece, c'est à dire en son propre naturel, visible & sensible: Ainsi aussi qu'en ce passage de S. Cyprian, quād il est dit, *Ce pain changé en sa na-*

*euve, & non pas en son espece*: Il faut par necessité que nous entendions par ce mot (*d'espece*) le vray estre naturel du pain, & nō le changement de sa substance, ce que si nous voulions cōfesser en ce mot de pain à cause que nous le cōfessons au corps de nostre Seigneur, en tant que nous disons qu'il est au ciel en sa propre espece, pour ne point varier en l'intelligēce de ce mot, *d'espece*, en l'vn, non plus qu'en l'autre: Il nous surprendroit incontinent en cōtrariété, & nous feroit tomber en son erreur: car de ceste confession il s'ensuiuroit que l'espece du pain ne chāgeāt point, le pain demeureroit en son estre naturel, & en sa vraye substance, & par cōsequent que les accidents seuls d'iceluy ne demeureroiēt pas pour nous faire apparoir sa semblāce apres la cōsecration, par laquelle nous tenons que le pain & le vin sont transsubstātiez au corps & sang de nostre Seigneur: Voilà où tend la subtilité de Loque, nous voulant surprendre en contradiction par l'interpretation de ce mot, *d'espece*.

Pour respondre à ceste belle subtilité, nous disons à Loque, que tout ainsi cōme cy deuant en la refutation de nostre 9. raison il a voulu que nous ayons trouué bō-

*Responce au 13.*

ne la distinction de l'impossibilité par luy  
alleguee, pour mōstrer qu'il y a des choses  
impossibles à Dieu, desquelles toutesfois  
ne se peut inferer aucune impuissance en  
luy, ainsi nous desirons de pareille liberté,  
qu'il notte vne distinction de ce mot, *d'es-  
pece*, de peur de s'y abuser, & d'en abuser  
d'autres : car ce mot, *d'espece*, signifie pre-  
mierement la nature specifique de toutes  
choses avec les accidents concurrents à la  
singularité d'icelles: comme nous tenons  
que la nature specifique de l'hōme est en  
cestuy-cy, & en cestuy-là, c'est à dire en  
Pierre ou Iean: & outre icelle nature spe-  
cifique, y cōcurrent & se rencōtrent cer-  
tains accidents, tāt en son corps qu'en son  
esprit, par lesquels est distinguee vne per-  
sonne d'avec l'autre: En ceste sorte nous  
tenōs que nostre Seigneur est au ciel en sa  
propre espece, d'autāt qu'il a en son corps  
en son esprit, & en sa diuinité tout ce qu'il  
y a eu dès le premier instant de sa conce-  
ption, & pour le regard particulier de sa  
diuinité, qu'il n'a en rien chāgé de ce qu'il  
est de la coēternité qu'il a avec Dieu son  
Pere, cōme pour exemple, en ce qu'il dit,  
*mon Pere opere iusques à maintenant, & moy  
i'opere*: En autre sorte, le mot, *d'espece*, si-



*gnific, semblance, image pourtrait fait au vif, ou forme:* Ces quatre expositions vulgairement vsitees, n'emportent ny la substāce, ny le propre naturel de la chose, ains sont du tout differentes de la mesme substance & nature.

Or en ceste sorte, S. Cyprian dit qu'en ce sacrement le pain est changé, non pas en son effigie, c'est à dire, en sa forme, image, ou semblance, d'autant qu'en ce sacrement la forme & semblance de pain demeure apres la cōsecration & transsubstantiation faicte, & non la substance de pain, par ce qu'elle est conuertie en la nature & substance du corps de nostre Seigneur; ce qui ne se peut dire du corps glorieux de nostre Seigneur estant au ciel, auquel il est en son estre specifique, retenant le naturel specifique de l'hōme, avec toutes les singularitez de sa diuinité & humanité.

Et quād au secōd passage de S. Cyprian mesme, par luy allegué pour la trāsubstantiation, il le trouue si formel, qu'il ne s'en peut depestrer, sinō en passant par dessus, par maniere de ruses & repetāt les propres termes de S. Cypriā par luy alleguez, il cōtrefait le moqueur, s'il ne l'est tout à fait, ne redoutant aucunement, ny la droite in-

## Responce au 13.

serm. de  
can. do.

tention, ny l'autorité de S. Cyprian: car  
sus ce qu'il dit au susdit sermon, que *Iesus-  
Christ cree encores aujour d'huy, sanctifie, benit,  
& distribue son tres-vray & tressainct corps à  
ceux qui le prennent deuotement*, il dit en se rail-  
lant, que le corps de nostre Seigneur ne peut estre  
créé, benit, & sanctifié plus qu'il est: N'est-ce  
pas mal prédre l'intentiō & le dire de ce  
grād Docteur de l'Eglise? Mais, ce n'est de  
nouveau q̄ l'heretique se moque des Saints  
aussi bien comme de l'escriure mesme.

En fin cōme iuge, ou (ce luy semble) cō-  
me fidele interprete, & truchement de  
l'escriure & des Saints Docteurs, il dict  
qu'en ceste sentence de saint Cyprian,  
ces mots, de *creer, sanctifier, & benir*, ne  
se raportent point proprement au corps  
de nostre Seigneur, ains au pain de la sain-  
cte cene: nous autres Catholiques nous  
dirons, *du saint Sacrement*.

Par ceste interpretation de Loque,  
*C'est donc le pain qui est créé de nouveau au  
saint Sacrement, & pour user du mot de  
distribuer qui est expres en ce texte de saint  
Cyprian, Ce sera aussi le pain, & non le  
corps de nostre Seigneur qui sera distribué en ce  
S. Sacrement: Voyez l'astuce de Loque  
en ceste interpretation subtile: ne tend-il*

Aburdi-  
ces de l'ex-  
position de  
Loque.

pastoufiours à nous troubler en nostre croyance, & à planter son erreur?

Aussi abusant comme parauant de ce mot, *sacramental*, & le prenant pour *significatif*, ou *signe*, ou *figure*, comme il a faict cy dessus, il dit qu'en ce sacrement ( qu'il appelle cene) *Le pain n'est pas mis pour pain commun, comme il est pour la nourriture du corps, ains il est comme pain sacramental pour nous représenter le corps de nostre Seigneur pour la nourriture de nos ames.* De là donc s'ensuyura que nos ames par ce Sacrement ne seront pas vrayement nourries, ains qu'elles seront nourries seulement par représentation. Mais quelle nourriture est ce que nourriture représentatiue? quelle nourriture fera-ce que la chair de nostre Seigneur de laquelle il n'a pas dict, *Ma chair est représentatiuement viande*, mais, il a dict, *Ma chair est vrayement la viande?* & nos ames qui doyuent estre repuës & nourries de la viande que leur a donné nostre Seigneur, sont-ce ames représentatiues ou vrayes ames? sont-elles sauuees représentatiuemēt par le moyē de ceste nourriture représentatiue? nostre Seigneur les a-il rachetez représentatiuemēt? Voilà ce q̄ nous apportēt les représentatiōs, signes, metoni-

*Ioan. 6.*

*Autres  
absurdi-  
tez.*



*Responce au 13.*

belles expositions qu'ils ont voulu dōner sus les paroles sacramentales de nostre Seigneur: ainsi explique il les deux passages alleguez de S. Ambroise, les rapportāt aussi à ce pain sacramētal, qu'il dit estre representatif du corps de nostre Seigneur.

Pour conclure par apres ceste dispute de la transsubstantiation & y faire fin, il s'excuse de la longueur qu'il a tenu sus ce propos, comme la chose le meritant; & dict que c'est le poinct qui est plus soustenu & defendu par les Catholiques, lesquels (par derision) il appelle aduocats & protecteurs d'icelle. S'il luy a semblé bon d'estre vn peu long sus ce propos, pour ceste occasion, il estoit aussi raisonnable que pour maintenir cest article fondé sus l'expresse & pure parole de nostre Seigneur, nous donnassions le loysir de luy respondre de poinct en poinct. Par ainsi la mesme raison de laquelle il s'ayde pour s'excuser du long discours qu'il a tenu sus ce propos de la transsubstantiatiō, nous seruira pour nous excuser de la longueur que nous auonstenu pour respondre à ses pretenduës raisons, sus lesquelles il a voulu fonder la nullité de la transsubstantiation qui se fait en ce Sacrement.

*Nullité du prétendu Abus quatorziesme.*

Pour quatorziesme abus de la Messe, il dict que c'est abus d'y auoir vne hostie ronde, puis aussi que l'elevation & adoration d'icelle est abusive: & premierement il calomnie la rondeur de l'hostie, disant, qu'elle sent son Paganisme, & qu'elle est tiree de la superstition des idolatres & magiciens, nommément de Numa Pompilius, qui estoit plus de 700. ans deuant l'Incarnation de nostre Seigneur, lequel ordonna de communier & manger sus la fin du sacrifice des petits pains ronds consacrez à l'honneur des dieux au nom desquels estoit célébré le sacrifice; & ces hosties rondes (dict Loque) estoient faites de farine qui estoit appelée *mola*, dont est venu ce terme, *immoler*.

*Alex. ab*  
*Alex. li.*  
*4.c.17.*

De là, nous appelliant par mespris (chantres de la Messe) il nous demande qui nous a inspiré sinon l'esprit de ce *Numa*, de composer nostre hostie de ceste matiere, & en ceste figure ou forme.

Il nous demande plus oultre, quand nostre Seigneur celebra ce Sacrement que il appelle cene, & commanda à ses Apostres de faire ce qu'il faisoit, à sçauoir, s'il

## Responce au 14.

leur enioignit de suyure la religion des anciens idolatres; il print du pain, dit-il, & le rompit, & le donna à ses disciples; nulle mention de ces oublies rondes : voilà le tiltre honorable qu'il donne à la matiere de ce Sacrement.

Nous l'atendions là: ce n'est nouveauté de voir le chien vomir sa superfluité, il falloit que Loque se rendit agreable à ses Loqueteux ennemis de la Messe, en desgorgeant ce que le grand chien d'enfer luy auoit mis en son estomach, pour monstrier sus quel fondement estoit appuyee ceste nouvelle doctrine qu'il veut planter au preiudice de celle de nostre Seigneur: mais telle plante comme dit nostre Seigneur, doit estre *arrachee, desracinee, & ietee au feu.* d'autant qu'elle n'est point plantee par le pere celeste.

*Matth. 15.*

Il y a plaisir à considerer les belles questions que faict Loque sus ceste figure de l'hostie; Il demande qui nous a inspiré sinon l'esprit de Numa, de composer l'hostie de ceste matiere de farine & en ceste forme ou figure: & à sçauoir si nostre Seigneur instituant & enseignant le Sacremēt de son precieux corps à ses disciples leur enseigna de suyure la religion (nous dirons



*pretendu abus de la S. Messe.* 199  
la superstition ) des anciens idolatres Romains.

A quoy nous luy respondons que la figure ronde est dès la creation du monde, sçauoir est, au ciel & en tous les corps celestes, en l'air, en la mer, & en la terre: & par consequent, que l'ordonnance de Numa Pompilius qu'il a fait & publié pour prescrire la forme des pains de ses sacrifices, ne nous fait point la Loy en ce que nous obseruons ceste figure ronde en l'hostie que nous employons au sacrifice de la Messe.

Nous demanderions volontiers à Loque & ses Loqueteux iurez ennemis de la sainte Messe par leur beau libelle, où ils ont iamais practiqué qu'autre figure que celle-cy ait esté obseruee & practiquee, en formant & façonnant le pain coustumier. Nous luy demandons aussi s'il a trouué en l'ancien Testament que les pains de proposition (qui estoient en figure de ce Sacrement du corps de nostre Seigneur) ayent esté cornus ou longs, ou autres que ronds.

Nous luy demandons aussi quelle est la signification de ceste figure ronde. En la figure ronde il ne se recognoist ny com-

Responce au 14.

commencement ny fin: Partant ceste figure signifie proprement la diuinité, laquelle n'a ny commencement ny fin, & pour ceste cause elle conuient fort proprement à toutes choses qui ont quelque significatiō de diuinité; comme à l'hostie qui est employee à ce sacrifice ou Sacrement, sans que nous en puissions rien attribuer à l'institution de Numa Pompilius, comme s'efforce de nous l'imputer ce calomnieux de la sainte Messe, & de toutes les parties d'icelle. Mais il n'est rien si vray & si certain que l'ennemy de verité & de sainteté ne mette en doute.

Reste que nous respondions à l'autre risée qu'il met en auant sus l'adoration & eleuation du corps de nostre Seigneur ou de la sainte hostie qu'il appelle *Profanatiō euidente de la sainte cene de nostre Seigneur*, disant que le Prestre fait en cest endroict vne chose que nostre Seigneur n'a point fait, ny commandé de faire, quand il a institué ce Sacrement: D'autant qu'apres auoir cōsacré il n'a point leué le pain sus sa teste, qu'il ne l'a point luy-mesme adoré ny cōmandé à ses Apostres de l'adorer se mettāt à genoux. Qu'il n'a point eu de diacre ou de clerc pour luy leuer la robe par der-

riere de la main gauche, & pour luy tenir de la droicte vne torche ou flambeau allumé, le luy haussant pour esclairer : Il dict oultre que les Apostres continuans le memoire de ceste institution & comunians ensemble n'ont iamais faict & practiqué toutes ces choses. Il dict que saint Paul <sup>1. Cor. 11.</sup> protestant auoir baillé & enseigné aux Corinthiens tout ce qu'il auoit entendu de nostre Seigneur sus le faict de ce saint Sacrement, ne fait aucune mention de toutes ces choses, & specialement de l'elevation & adoration.

Par ces belles gaufferies il se dōne cause gaignee, & pense auoir renuersé la decence que nous maintenons de ceste adoration & eleuation du corps de nostre Seigneur. Voyons donc combien il est loing de son compte.

Il semble à Loque par ses belles raille-  
ries, qu'il ne faut point auoir d'esgard à ce  
que nostre Seigneur apres auoir consacré  
& distribué à ses Apostres son precieux  
corps & sang sous les especes de pain &  
de vin, leur a dict incontinent ces mots,  
Faictes cecy en memoire de moy, *Hoc fa-*  
*cite in meam commemorationem.* <sup>Math. 26</sup> Quel besoin  
estoit-il de leur specifier qu'il falloit faire



## Responce au 14.

Joan. 13.

faire ceste esleuation en memoire de ceste esleuation de son corps qui a esté vne fois esleué en la croix pour accomplir la promesse qu'il auoit fait parauant en ces mots qu'il auoit prononcé de sa bouche, *Ego si exaltatus fuero à terra omnia traham ad me? Si ie suis esleué de la terre i'attireray tout à moy? &* suyuant ceste promesse de nostre Seigneur declarant le souuerain bien qui nous deuoit aduenir par sa croix, faut-il qu'un bon Chrestien trouue estrange que l'esleuation se face apres la consecration, pour rememorer par icelle le souuerain bien qui depend du crucifiement de nostre Seigneur, duquel il est faict memoire particuliere en ceste consecration & communion par ceux qui obeissent au cōmandement de nostre Seigneur lequel a dict, *FaiCtes cecy en memoire de moy.*

Et quant à l'adoration qui est renduë à nostre Seigneur en ceste eleuatiō, sus quoy se fonde Loque pour la calomnier? est-ce bien argumenter pour vn bon Logicien qu'il se vante d'estre, dire, Nostre Seigneur ne s'est point adoré en ce Sacremēt, apres qu'il l'a faict & accomply, il n'a point commandé aux Apostres expres, de l'adorer; Partant, il ne le faut point adorer? Vn Chrestien

Chrestien doit sçauoir qu'un argument tiré de l'autorité de l'escriture, lequel conclud negatiuement, est de nul effect. Car commēt seroit-il possible que tout ce qui se peut tirer raisonnablement de l'escriture eut esté expressement déclaré en l'Euan-gile, ou par les escrits des Apostres, veu que saint Iean escrit qu'à peine tout le monde eust peu comprēdre les liures des miracles faicts par nostre Seigneur, s'il eust esté question de les reduire tous par es-crit?

Nous disons donc que Satan ennemy de la verité, a suscitē Loque à mettre en auant tels blasphemes, contre l'eleuation & adoration du precieux corps de nostre Seigneur, auquel est infalliblement la diuinité, & par consequent est deuē l'adōration, & ne luy peut ny doit estre desniee, ny par consequent aucune chose qui puisse seruir à ce deuoir d'adoration: & que l'Eglise ( depuis ceste institution ) a peu de son autorité, comme conduite du saint Esprit, instituer & apporter tout ce qu'elle a iugé estre bon & conuenable à ceste adoration; comme le feu, l'encens, la genu-flexiō & autres choses semblables: & qu'il n'estoit besoin que nostre Seigneur les spe-

*Response au 14.*

cifia si particulieremēt aux Apostres, pour le faire entendre par eux à la posterité. Or que ces choses nous aient esté enseignees par les Apostres & premiers Peres del'Eglise, qui voudra veoir les Liturgies ou Messes de saint Pierre, de saint Marc son disciple, de saint Iacques, de saint Clement, de saint Basile, de saint Gregoire Pape, trouuera que sont choses decentes à la diuinité de nostre Seigneur, laquelle est infalliblemēt vnite avec son precieux corps & sang. Mais d'autant que Loque desnie la reelle & vraye presence de nostre Seignr Iesus-Christ en ce Sacremēt, ce n'est merueille si par ces ceremonies il nous estime idolatres, & s'il s'en mocque à pleine gorge. On ne scauroit tirer d'un instrument de Satā qu'un temeraire mespris des choses saintes & diuines.

S'il veut considerer que nostre Seigneur promettāt à ses Apostres de leur enuoyer son saint Esprit apres son Ascension, les assure qu'il leur enseignera les choses qu'ils n'auoyent onc sceu comprendre, il confessera en fin qu'il a remis à leur liberté, la puissance d'apporter à la dignité de ce Sacrement toute reuerence & deuoir qu'ils iugeroyent estre à propos: Et par là



il confessera que si ce que dit saint Augu-  
stin a lieu, *qui non habet ecclesiam matrem in*  
*terra, non habebit Deum patrem in cœlo*, que  
qui n'a point l'Eglise en terre pour mere,  
n'aura point au ciel Dieu pour pere, à fau-  
te d'embrasser la foy de l'Eglise nostre me-  
re spirituelle, non seulement sus le fait de  
ce qu'elle tient de la reelle presence du  
corps & sang de nostre Seigneur en ce Sa-  
crement, mais aussi sus l'honneur, adora-  
tion & reuerence qui y est deuë, ne sera  
point recogneu par nostre Seigneur pour  
estre de ses enfans & bien-aymez.

*To. 9. li. 4.  
Symb. ad  
Catecum.  
c. 10.*

*Nullité du pretendu abus quinziesme.*

**I**L fonde en apres son pretendu 15. abus  
sus la communion: & premierement il  
remarque qu'il y en a de deux sortes en  
l'Eglise: sçauoir est, celle de Pasques, qui  
est celle du peuple; & celle de la Messe: &  
là il trouue mauuais q̄ quād le Prestre don-  
ne la communion aux personnes laïques,  
il ne leur met pas la sainte hostie entre  
leurs mains, ce qu'il dict estre contreuenāt  
à l'institution de nostre Seigneur; d'autant-  
que nostre Seigneur baillant ce Sacrement  
à ses Apostres il leur dict, *prenez, mangez.*  
Or ce mot (*prenez*) se rapporte à la main,

## Responce au 15.

& ce mot (*mangez,*) se rapporte à la bouche.

Mais nous luy demandons si ceste consequence se peut trouuer bonne, nostre Seigneur a baillé son precieux corps à ses Apostres à le prendre premierement en leurs mains, puis pour le communier par apres de leur main propre. Partant le Prestre doit bailler le corps de nostre Seigneur aux seculiers & laïques entre leurs mains pour le communier par apres de leur main propre. Ceste consequēce ne se peut trouuer bōne. Car les Apostres pour lors furēt instituez Prestres par nostre Seigneur, partāt ils deuoiēt manier son precieux corps: mais où est-il dit q̄ le Prestre instituë pour Prestres tous ceux ausquels il baille le precieux corps de nostre Seigneur? Car il diēt aux Apostres par commandemēt expres, *Faites cecy en memoire de moy :* & le Prestre donnant la cōmunion aux personnes laïques ne leur diēt pas ces mots, d'autant qu'il n'a pas la puissance de les instituer Prestres, ains seulement l'Euesque.

Ceste raison pourroit seruir pour respondre à ceste impertinente conclusion de Loque, & toutesfois nous ne la voulons pas employer à cest effect. D'autant

que nous recognoissons qu'autresfois ceste coustume a esté en l'Eglise de bailler aux personnes laïques le corps de nostre Seigneur entre leurs mains; comme il se peut aisément recognoistre par l'histoire Ecclesiastique d'Eusebe & de Theodoret. Ce que ledit Loque allegue aussi du mesme Eusebe, mais trop temerairement, par ce qu'il dict que c'est du sixiesme liure de ladiète histoire chap. 33. où il n'en est touché aucun mot: chacun peut penser comment il est possible qu'un si grād controlleur des choses saintes se soit abusé si lourdement, si ce n'est qu'il a composé son liure de plusieurs memoires, tellement quellement rapportez par gens mal versez en la lecture de la saine doctrine de l'Eglise, lesquels il peut avoir employé a en descouvrir à veüe de pays, ce que leur lourd esprit conduit de Satan, & non de Dieu, leur en aura appris.

Or pour en parler sainement, deux causes sont principales pour lesquelles anciennement l'Eglise a permis à tous communians de manier & avoir entre leurs mains le precieux corps de nostre Seigneur: L'une pour enflammer d'avantage la deuotion des Chrestiens,



## Responce au 15.

D. Basil.  
ad Casa-  
viam pa-  
triciam.

Serm. 5.  
de lapsis.

lesquels par ce moyen se contraignoient de se retrancher de leurs mauuaises affections & sensualitez: l'autre pour leur subuenir promptement en vn danger de persecution, iour & nuict, quand ils estoient recherchez particulièrement à mort par les Payens & autres ennemis de l'Eglise, pour ne point deceder en tel danger sans ce souuerain remede des Chrestiens. L'vn & l'autre se peut recognoistre par les exemples & histoires alleguees par saint Cyprian en son sermon *de lapsis*: auquel sermon aussi se peut recognoistre la cause du retranchement de ceste liberté, qui ne fut iamais autre que l'indeuotiõ qu'on a apporté par succession de temps, à ceste frequentation du Sacrement, laquelle en fin est venue iusques là que c'est auiourd'huy le chef & principal poinct des doutes que mettent les libertins de ce siecle en auant cōtre la vraye & saine doctrine de l'Eglise, desquels la figure s'est apparue dès le commencement de ceste institution en ces Capernaïtes, lesquels ne voulans autres iuges de tout leur doubte que leur sens grossier, demandoyent mesme du temps de nostre Seigneur, leur promettant de leur bailler à manger son precieux

corps, Comment nous pourra cestuy-cy don-<sup>Ioan. 6.</sup>  
ner sa chair à manger? Dequoy faiët foy le  
Concile de Sarragosse en Espagne, qui fut  
tenu en l'an cinq cens dix-huiët, soub<sup>Can. 3.</sup>s  
le Pontificat du Pape Hormisda, & soub<sup>s</sup>  
l'Empire d'Anastase: où il est diët expres-  
sément qu'il faut receuoir ce Sacrement  
en l'Eglise, & le consommer là mesme,  
sans le reporter en autre lieu, & que si  
quelqu'un fait autrement doit estre tenu  
pour excommunié tout le temps de sa  
vie. Oultre ce, le passage préallégué de  
sainët Cyprian nous fait foy par les e-  
xemples & histoires qu'il met en auant,  
que l'irreuerence qu'on a apporté à ce Sa-  
crement a esté cause de la reuocation de  
ceste liberté, par laquelle on voyoit iour-  
nellemēt diminuer la deuotiō qui y estoit  
deuë.

Partant Loque, sus ceste coustume que  
l'Eglise, esmeuë de ceste iuste raison, a  
introduiët, de ne plus mettre le corps &  
sang de nostre Seigneur entre les mains  
des Laiques, ne doit point mettre en hai-  
ne des hommes, les Prestres, comme leur  
imputant de le refuser aux personnes: car  
les Prestres ne font pas ce refus de leur

## Responce au 15.

priuee autorité, ains gardans en l'administration de ce Sacrement l'ordonnance de nostre mere sainte Eglise, ils font ce qu'ils doyuent, & n'en doyuent estre blasmez. Mais ce n'est nouueauté de veoir ainsi les heretiques blasmer les Prestres à tout propos.

Sus ce mesme point de communion, parlant de la communion de l'autre espece, c'est à sçauoir, de celle qui se fait sous l'espece du vin, il reprend encores les Prestres, disant, qu'ils en priuent le peuple entierement.

Les propres mots desquels il vse, sont tels, *Touchant l'autre signe du Sacrement, qui est le vin consacré, le Prestre n'en priue-il pas entierement le peuple ?* Il recognoist donc qu'en ce Sacrement le vin est consacré. Or faut-il que la consecration y apporte quelque chose qui ne soit point propre ny conuenable au vin pur & naturel, autrement elle ne seruiroit de rien, & autant seroit la chose non sacree comme la chose sacree, ce qui ne se peut dire ny soustenir. Pourquoy donc, dict-il, qu'apres la consecration faicte le pain demeure pain, & le vin demeure vin, sans qu'il



y soit fait aucune alteration ou changement? Voilà comment il se coupe en la diuersité de ses discours: Cecy soit dit & reconnu en passant, puis qu'il nous en donne l'occasion.

Suiuons ce point comme luy.

Il dict premierement, que le Prestre donnant aux lais la communion sous la seule espece du pain, contreuient à l'ordonnance de nostre Seigneur, lequel dict en saint Mattheu à ses Disciples, parlant du Calice, *Beuvez en tous*: Suivant lequel commandement saint Marc adioute, *que tous en beurent*: & poursuivant ce mesme propos, il allegue quelques passages de saint Augustin, de saint Cyprian, du Pape Gelase, & du droit canon, lesquels disent formellement que la communion doit estre faite sous toutes les deux especes, & qu'il faut que ce sacrement soit pris entier, d'autant que (comme il est dit au canon, *comperimus*,) *la diuision d'un mesme mystere ne peut estre faite sans un grand sacrilege.*

*Matth. 26.*

*Marc 14.*

*de cōsec.  
dist. 2.*

En tous ces passages, Loque parle selon son intention particuliere, & de vray il desguise l'intention des auteurs, desquels ils sont tirez: Et premierement

## Responce au 15.

quand au passage de l'Euangile par lequel nostre Seigneur a dict à ses Apostres, leur baillant le Calice, *Beuvez en tous*: Il est tout apparent qu'il n'a pas adressé ceste parole à autres qu'à ses Apostres, lesquels il ordonnoit Prestres, leur donnant lors mesme la puissance, voire le commandemēt de consacrer à son exemple & imitation: Et quand aux autres passages par lesquels il est dict qu'il faut communier sous toutes les deux especes, ou point du tout, ils s'adressent à aucuns Prestres lesquels cōsacroient par le passé, & ne cōmunioient point du tout, ou bien ne communioient que sous l'une des deux especes. Or par les saincts canons, ceste maniere de faire est appelee sacrilege: Et ce qui se dict des Prestres lesquels consacrent en l'autel, le faut il tirer en precepte pour tous, c'est à dire, autant pour les laïcs, que pour les Prestres? C'est abuser trop euidentement.

Or, qu'il soit ainsi, c'est chose toute apparente par le canon precedent, lequel se commence, *Relatum est*: extrait du 12. Concile de Toledé, sur la fin duquel se trouuent ces mots, *Ergo modis omnibus est tenendum, ut quotiescunque sacrificans corpus & sanguinem Iesu-Christi domini nostri in al-*

*tario immolat, toties perceptionis corporis & sanguinis Christi participem se præbeat*: Qu'il faut necessairement que le Prestre qui immole en l'Autel le corps & le sang de nostre Seigneur Iesus-Christ, cōmunie aussi le corps & le sang d'iceluy: cela se dit notoirement du Prestre lequel consacre, & non de tous ceux qui communient: Et s'il faut parler par autorité de l'escriture, de choses de telle importance, que Loque nous trouue vn passage formel en icelle, par lequel il soit dict que tous communicants soient obligez à communier sous toutes les deux especes: N'alleguera il point cestuy-cy de saint Iean, *Si vous ne mangez ma chair, & si vous ne beuvez mon sang, vous n'aurez point de vie en vous*? Si ce passage oblige vn chacun à communier sous toutes les deux especes, pourquoy donc nostre Seigneur nous a il dict de la premiere espece seule, *Qui manducat hunc panem uiuet in æternum*? Qui mange ce pain, viura eternellemēt? Par la cōferēce de ces deux passages de l'escriture il se voit fort aisément que certaines personnes sont obligees de communier sous les deux especes, à sçauoir les Prestres qui sont les consecrateurs: & autres peuuēt commu-

Ioan 6.



## Responce au 15.

*1<sup>re</sup> Cor. 11.* nier soubs vne seule espece, à sçauoir les  
lais, ausquels toutesfois en la primitiue  
Eglise la communion a esté donnee soubs  
toutes les deux especes, & maintenant el-  
le n'est donnee que soubs l'espece de pain  
pour certaines bonnes & raisonnables  
considerations, & specialement pour ob-  
uiuer à l'inconuenient prouenu autresfois  
de la negligence ou indeuotion des lais,  
lesquels en receuant ceste espece en lais-  
soient tomber hors du Calice: & n'a esté  
sans raison & sans bon fondement de l'es-  
criture que l'Eglise l'a ordonné pour eui-  
ter cest inconuenient, pource que nostre  
Seigneur a dict separement de la commu-  
nion de la premiere espece, *Celuy qui man-  
ge ce pain viura eternellement*: La raison est  
*Ioan 6.* que nostre Seigneur est tout entier en l'y-  
ne & en l'autre espece: & neantmoins ce-  
luy qui consacre offence mortellement,  
s'il ne communie soubs toutes les deux  
especes: & la personne laïque qui vou-  
droit communier soubs toutes les deux  
especes ne se contentant de la premiere,  
offenseroit, comme contreuenant aux  
resolutions & ordōnances de nostre me-  
re sainte Eglise, laquelle considere en ce  
sacrement deux choses, c'est à sçauoir l'i-

mitation de l'action de nostre Seigneur, en tant qu'il a cōsacré le premier de tous, & son intention : Le Prestre doit en la cōsecration de ce sacrement imiter de point en point l'action de nostre Seigneur, c'est à dire, consacrer separement, puis communier l'une & l'autre espece, & s'il faisoit autrement, il commettrait sacrilege: & c'est ce que disent les susdicts canons, *Relatum est, & comperimus* : Mais le peuple lequel est composé de toutes sortes de personnes, c'est à dire, de vieils & de jeunes, & de tout sexe, obeissant au mandement de l'Eglise, & communiant sous la seule espece du pain, cōme aussi les Prestres, qui n'ont consacré ou qui ne consacrent point, & ceux qui sont seulement Diacres & sous-Diacres en l'Eglise de Dieu, ensuiuent l'intention du premier consecrateur qui est nostre Seigneur, laquelle requiert toute reuerence & deuotion en ce sacrement, plustost que non pas vne exterieure correspondance de l'œuvre, telle qu'on la pourroit desirer, en disant que puis que nostre Seigneur & ses Apostres ont communie sous toutes les deux especes, qu'il faut aussi que tous fassent de mesme, tant laïcs qu'eccle-

## Responce au 15.

siaistiques: ce qui ne se peut maintenir: car nous voyons mesme par la pratique de l'Eglise que le Prestre communie seulement sous l'espece du pain le iour du Vendredy Sainct: & pourquoy? c'est pour ce qu'il ne consacre point ce iour là, rememorant la passion & mort de nostre Seigneur, laquelle emporte vne cessation de tous œuures exterieurs.

Ceste pratique de communier sous la seule espece du pain, se tire de la pure & expresse parole de nostre Seigneur, & aussi de l'exemple qu'il nous en a donné:

- Ioan 6.** Personne ne peut nier qu'il n'ait dict, *Le pain que ie vous donneray est ma chair pour la vie du monde. Qui mange ce pain viura eternellement*: Esquels deux passages il n'est parlé que de la premiere espece: Et nostre Seigneur en saint Luc, a il pas de ses propres mains donné la communion de ce sacrement aux deux pellerins qui estoient
- Luc 24.** allez en Emaus? Saint Luc le tesmoigne par la mesme phrase & maniere de parler en son Euangile, & en l'histoire des actes des Apostres: en son Euangile il dict, que nostre Seigneur se voulant faire cognoistre à ces deux Pellerins quand il fut entré avec eux en l'hostellerie, & qu'il



se fut mis en table avec eux, print du pain, il le benit, & le rompit, & leur presenta: Et en l'histoire des actes des Apostres, n'est il pas dict, *Erant perseuerantes in doctrina Apostolorum & cōmunicatione fractionis panis & orationibus:* Que les Chrestiens perseueroient en la doctrine des Apostres, & en la communication de la fraction du pain, & en oraisons? Et peu apres il est dict des mesmes premiers Chrestiens, *Erant quotidie perdurantes unanimiter in templo, & frangentes circa domos panem:* Qu'ils perseueroient d'un mesme cœur & d'une mesme volonté iournellement au temple, rompans le pain en chacune maison: On dira que selon la forme & maniere de parler, de laquelle vse saint Luc en l'un & en l'autre endroit, il n'est point parlé de la consecration qui se fait en ce sacrement, ains seulement de la fraction: mais si saint Paul est digne de foy en la declaration qu'il fait de la pratique que les premiers Chrestiens tenoient en l'exercice & administration de ce sacrement, il faut confesser qu'en l'escriture, ce mot de rompre ou de fraction se prend pour le mot de consecration: car quand il dict, *Panis quem frangimus nonne* 1 Cor. 10.

## Responce au 15.

*participatio corporis domini est?* Le pain que nous rompons, n'est-ce pas la participation du corps de nostre Seigneur? Il n'a pas dict, *Panis quem consecramus verbis domini*: Le pain que nous consacrons par la parole de nostre Seigneur: mais, le pain que nous rompons. Partant, si par ce mot de *fraction*, s'entend ou se presuppose la fraction selon l'intelligence de saint Luc & de saint Paul, il faut dire que nostre Seigneur a donné ce sacrement aux deux Pellerins qui estoient en l'hostellerie d'Emmaus, sous la premiere espece seulement, & que par cest exemple là, & aussi par les passages susdicts, il a enseigné à son Eglise la pratique de bailler ceste communion à certaines personnes, & en certaines occasions, sous vne seule espece.

IOHN 6.

C'est ce que demandent sus ce mesme passage de l'Euangile de saint Luc, Theophilacte, Beda, & Euthimius suiuanst ceste interpretation, *Vbi hic audis calicem post panem à Christo porrectum?* Où est-ce que vous entendez ce passage, que nostre Seigneur ait présenté ou donné à ses deux Disciples le Calice apres le pain?

in 14. c.  
Inc.

La resolution de ceste question est  
fort

fort clairement donnée au Concile general de Constance, auquel les Peres assemblez ont prononcé & arresté d'un commun consentement, que la coustume de l'Eglise laquelle a permis la communion de ce sacrement sous les deux especes, seulement aux Prestres qui consacreroient, & aux autres sous la premiere espece seulement, doit estre tenue pour loy inuiolable: Et de faict, ledict Concile prononce sentence d'excommunication à l'encontre des cōtreuenants, comme infracteurs des loix & ordonnances de l'Eglise, & iurez ennemis d'icelle, soient les Prestres se laissant aller aux importunités des laïcs qui voudroient communier sous toutes les deux especes, soient les laïcs mesmes qui les voudroient importuner de ce faire: Autant en est dict *scilicet* au Concile de Basle.

Par apres, Loque continuant à se moquer de ceste communion qui se faict en la Messe, dict qu'il n'y en a point du tout: & pour verifier son dire, il recherche la signification de ce mot de communion, disant qu'elle se faict entre plusieurs: & que toutesfois le Prestre en celebrant sa Messe, il se communie seul, & ne baille à



## Responce au 15.

communier de ce qu'il cōsacre, à personne, ains qu'il cōsume luy mesme seul tout ce qu'il a cōsacré. Se fondant, outre-plus, sus la forme des paroles de nostre Seigneur, laquelle est repetee par le Prestre en sa consecration, & porte ces mots en parlant du pain, *Prenez & mangez-en tous*: Et si le Prestre le mange seul (dict Loque) quelle apparence de communion y a il? Et pour fortifier d'avantage son dire il represente la semblable forme & maniere de parler en la consecration de la seconde espece, en laquelle nostre Seignr dit à ses

Mat 26.

1 Cor. 11.

Disciples, *Prenez & beuvez-en tous*: Dont il cōclud le semblable, disant, si le Prestre seul reçoit la seconde espece, qu'elle apparence de communion y a il?

Sus ceste forme & maniere de parler de laquelle vse le Prestre à l'imitation de nostre Seigneur, il presume le presser en montrant, ou plustost supposant vne difference de l'actiō de nostre Seigneur, & de celle du Prestre sus le fait de la communion; disant en premier lieu, que l'ordonnance de nostre Seigneur est cōtraire à ceste action du Prestre, parce que nostre Seigneur a institué ce sacremēt à ce que la distribution en fut faite à tous les assistāts fideles & ca-

pables d'iceluy : & ne la donné à vn ou à deux de ses Disciples , mais à tous , disant , *Prenez , mangez , prenez & beuvez-en tous.* Or , distribuer aux autres & retenir tout pour soy , sont choses repugnantes , dit Loque : & quand Iesus-Christ a commandé l'un , il a defendu l'autre.

Il fortifie ceste opinion de l'autorité de S. Hierosme , lequel dit , *Dominica coena* <sup>in c. 11. 13</sup> *debet esse omnibus communis , quia ille omnibus* <sup>Cor.</sup> *discipulis suis qui aderant equaliter tradidit sacramenta :* Que la table de nostre Seigneur doit estre commune à tous , pource qu'il a donné les sacrements de pain & de vin à tous ses Disciples qui estoient avec luy. S. Hierosme dict cela de vray , mais il le faut entendre sainement comme luy , & croire que nostre Seigneur a eu tousiours intention de faire recevoir avec deuotiõ & reuerence ce sacrement à ses Disciples : Partāt , il leur a bien baillé à tous ce sacremēt : mais il ne se trouue point escrit en l'Eua-gile qu'il leur ait cōmandé de le bailler à tous indifferemment , & n'a point eu intē-tion de leur cōmander de se faire , nō plus que de cōmander aux meschāts & peruers de le recevoir en leur meschāceté ; d'autāt qu'il leur vaudroit mieux n'estre point

## Responce au 15.

1 Cor. 11.

nais au mōde que d'en abuser sciemment: Il a tousiours eu intētion de le faire distribuer à tous, presuppōsé vne digne & bonne preparation, & nō autrement: Ce que S. Paul dit tres-bien en ces mots, *Probet autem seipsum homo antequam de hoc pane edat et de calice bibat*: Que l'hōmes'esprouue deuant que manger de ce pain & boire de ce Calice: Il n'y a point de doute que S. Paul en ceste sentence n'ait suyui l'intention de nostre Seignr, à laquelle il ne faut moins auoir esgard qu'a l'institution de ce sacrement: Et au cas que les assistants (bien que fideles) ne soient dignement preparez, ou qu'ils n'aient volōté de cōmunier à ce sacremēt, le Prestre les forcera-il de le recevoir? ou bien delaissera-il d'offrir ce sacrifice à l'Autel, & d'ensuiuir le commandemēt de nostre Seigneur, lequel a dit (apres auoir cōsacré,) *Hoc facite in meam cōmemorationem*: Faites cecy en memoire de moy? Voilà l'indiscretiō de Loque, lequel voulant faire ceste communion generale en chacune celebration, se trouue formellement contraire ou à l'institution ou à l'intention de nostre Seigneur.

Il allegue par apres ( mais fort temerairement ou plustost malicieusement ) vn



passage de S. Iean Chrysostome ( qu'il appelle simplement Chrysostome, pour le peu d'honneur qu'il rend aux Saints ) par lequel il luy impose qu'il a dict ce qui ensuit, *Quand il faut user des saints Sacrements, le Prestre n'est en rien different du commun populaire: Car nous nous sommes tous faits dignes de participer à iceux. Ce n'est point maintenant en l'Evangile, comme iadis sous la loy, là ou le Prestre seul mangeoit des sacrifices, & n'estoit point licite au commun peuple de participer es choses esquelles les Prestres participoient: Mais maintenant en l'Evangile il n'est point ainsi, ains une mesme viande & un mesme breuvage nous est propose & donné à tous, en quoy est declaree la grace de nostre Seigneur Iesus-Christ.*

N'en desplaise à Loque, cela ne se trouve point en la susdite Homilie de S. Iean Chrysostome par luy alleguee: & n'y a point d'apparence qu'il ait iamais dit vne sentence si manifestement faulse, par laquelle il est dit, *Que nous nous sommes tous faits dignes de participer au saints Sacrements: Car il est tout notoire que beaucoup s'en rendent indignes: & S. Paul mesme le dict en ces mots, Qui manducat & bibit indignè iudicium sibi manducat & bibit, nō diiudicās corpus domini: Que celuy qui reçoit ces sacremēt*

*in l. ad  
Cormth.  
Ho. 8.*

*1 Cor. 11.*

## Responce au 15.

indignement, il reçoit son iugement & sa condemnation, cōme ne discernāt pas le corps de nostre Seigneur: Et outre-plus, que S. Iean Chrisostome ait dit, *Que quand il faut vser des saincts Sacrements, le Prestre n'est en rien different du commun populaire*: Il y a peu d'apparence: car le Prestre consacre premierement, puis il communie: mais le cōmun populaire n'a pas la puissance de cōsacrer, en quoy il est tout apparēt qu'il y a grāde difference du Prestre au cōmun populaire: Et outre-plus, le Prestre (apres auoir consacré) cōmunie soubs toutes les deux especes, & le commun populaire lequel autresfois a communié soubs icelles pour plusieurs bonnes raisons, maintenāt est réduit à ne communier plus qu'en vne seule espece, c'est à dire, en la premiere, & ce avec bonnes & iustes considerations, & ne peut autrement faire sans cōtredire à l'Eglise vniuerselle, laquelle (cōme nous auons dit cy dessus) là ainsi iustement déterminé. Nous sommes bien d'accord de ce que dit Loque, qu'en la loy de Moyse le Prestre seul mangeoit des sacrifices, & qu'en l'Euāgile le peuple participe à ce sacrifice: mais il y a difference entre le Prestre & le peuple en ceste participation: &

dire q̄ le Prestre & le peuple y participe, ce n'est pas affermer qu'ils y participent d'une mesme sorte: Il est vray semblable que Loque a cōposé à son aduātage ceste sentence, & qu'il l'a imputé à S. Iean Chrysostome pour luy donner autorité: Il l'a imputé aussi impudemment au Concile d'Antioche second, cha. 2. auquel toutes-fois il n'en est faict aucune mention: mais telle est la liberté des heretiques.

Il l'allegue par apres du 4. Concile de Toledé, disant qu'il excōmunie tous ceux <sup>can. 17.</sup> qui seront en l'Eglise durant le tēps qu'on celebre le S. Sacremēt, & ne cōmuniqēt point au pain & au vin avec le Prestre: Voions la verité par le texte expres dudit Cōcile, qui est tel, *Nonnulli sacerdotes statim post orationem dominicam communicant, quod deinceps interdiciamus: Sed data benedictione ad populū tunc corporis & sanguinis domini sacramentū sumatur, eo videlicet ordine, ut sacerdotes & leuite ante altare cōmunicent, in choro clericus, extra chorū populus:* Le sens est tel, sans y rien chāger, adiouter, ny diminuer, *Aucuns Prestres cōmunient incōtinent apres l'oraison dominicale, ce que deormais nous defendons: mais apres que la benediction aura esté dōnee au peuple, on recevra le sacrement du corps et*



## Responce au 15.

sang de nostre Seigneur, sçauoir est en cest ordre, que les Prestres & Diacres communierōt deuāt l'Autel: le Clerc cōmuniera dedās le cœur, & le peuple hors le cœur: Quand il est dit en ce canon, On receura le sacrement du corps et sang de nostre Seigneur, cela s'entēd des Prestres seulement, puis il s'accōmode au Diacre, au Clerc, & au peuple, ou selon la liberté du tēps (s'il se trouue par l'histoire Ecclesiastique q̄ pour lors elle ait esté telle cōme en la primitiue Eglise) ou à vn chacun selō le reglement q̄ l'Eglise y auroit donnē pour lors, c'est à sçauoir, l'ayant permis aux Prestres sous toutes les deux especes apres la consecration par eux faite, & aux autres, sous la premiere espece seulement, cōme l'Eglise la pratiqué lōguemēt deuāt qu'en faire l'ordonāce qui est escripte és Cōciles de Cōstāce & de Basle: Voilà cōmēt Loque abuse aussi hardiment de l'autorité des Cōciles, comme de l'escriture, & des saints Docteurs de l'Eglise, pour tousiours fauoriser son erreur, & renuerfer la doctrine del'Eglise.

De pareille impudēce il dit auoir leu en la 1.<sup>e</sup> ep. du Pape Alex.<sup>s</sup>. intitulee du mistere du corps & s̄ag de Iesus Christ, *Que celui qui prēd le pain et le benit, & le rōpt, & ne le distribue point aux assistās, il ne fait point ce q̄ no-*

*stre Seigneur a fait, et ne celebre point la memoire de sa mort : car nostre Seigneur a dit : Faites cecy, c'est à dire, Rompez, donnez, & distribuez le pain & le vin en memoire de moy ; & pource (adiouitte-il) la fraction du pain sans la distribution est vaine & inutile.* Il impute ces propos au Pape Alexandre 5. lequel n'a esté en son pontificat que dix mois huiët iours, & n'a rien escrit en si peu de temps : bien auoit-il escrit sus les sentences de Petrus Lombardus auant que paruenir au pontificat, auquel il fut appellé & canoniquement esleu, l'an de nostre salut, 1409. environ lequel temps comme longuement parauant, sçauoir est du temps de saint Cyprian, de Tertullian, d'Origene, de S. Basile, de saint Ambroise, l'vsage de la communion sous la seule espece du pain estoit coustumier en l'Eglise, & à cause des doubtes qui s'esmouuoient sur ce point par aucuns ennemis des bonnes & loüables coustumes de l'Eglise, fut estably en loy avec commination d'excommunier fort peu de temps apres l'eslection dudiët Pape, sçauoir est, par le susdiët Concile general de Constance, lequel cōmença l'an de nostre salut 1414. voila ce qui verifie le mensonge de Loque, se voulant attribuer la gloire de nous auoir combatu

## Responce au 15.

par l'autorité des Conciles & des Papes, comme s'assurant de nous presser par telles autoritez. Mais nous les receuons entant qu'elles sont vrayes, & non supposées ou imputees.

*De consec  
dist. 2.*

Il allegue aussi le canon *peracta*, tiré des constitutions du Pape Calixte, ( aucuns tiennent selon les anciens exemplaires, qu'il est tiré de la premiere epistre du Pape Anacletus) auquel il est dict, *Peracta consecratione omnes communicent qui noluerint ecclesiasticis carere liminibus. Sic enim & Apostoli statuerunt, & sancta Romana tenet Ecclesia*, La consecration paracheuee, que tous communient s'ils ne veulent estre reiettez de l'Eglise; Car ainsi l'ont ordonné les Apostres, & l'Eglise Romaine l'observe. Il a mieux allegué ceste constitution que les autres: car, de verité elle est ainsi couchee au decret, & n'y a pas failly d'un mot, mais il l'a mal appliqué: Car il veut tirer de là, qu'il faut sur peine d'estre retranché de l'Eglise, que chacun communie sous toutes les deux especes: Ne luy en desplaïse, le canon ne dict pas, *Omnes communicent sub utraque specie, qui ecclesiasticis carere noluerint liminibus*, Que tous communient sous toutes les deux especes s'ils ne veulent estre re-



tranchez de l'Eglise ; mais il dit simplement que tous communient, c'est à sçavoir, chacun en son endroict, suyuant le reglemēt & la pratique de l'Eglise. Les Prestres qui auront consacré, sous toutes les deux especes, & les autres sous la premiere espece seulement.

Or, pour nous brauer d'avantage, Loque s'adresse à vne responce, qu'il suppose luy pouuoir ou deuoir estre faicte, par le Prestre, cōme se sentant pressé des susdicts arguments par luy alleguez, lequel pourra dire qu'il communie non pas pour foy seulement, mais au nom de tous les assistans. Et dict Loque que le Prestre veut tirer cela du canon *Episcopus*. Le Prestre le peut bien dire sans se fonder sus ce canon, auquel n'est faicte aucune mention de cela : mais Loque pense par ceste alleguation imputer vne notable lourdisse au Prestre, comme prenant vn si maigre fondement. *De conséc.  
dist. 1.*

Nous accordons donc que le Prestre dira fort bien quand il fera ceste responce. Voyons ce que Loque a à dire au contraire.

Il demande, quel cōmandement il a de nostre Seigneur de faire cela. Sus quel pas-

## Responce au 15.

sage de l'escriture il est fondé. Quel exemple de ce faire il en peut tirer : à sçauoir si nostre Seigneur estoit seul pres d'un autel mangeant & beuuant seul au nom de tous ses disciples, ou biē s'il estoit en la table en laquelle il institua ce Sacrement; il print le pain, il le benist, le rompant, & le vin aussi le consacrant & distribuant à ses disciples, leur disant, *Cecy est mon corps, Cecy est mon sang*. Loque n'vse pas de tous ces mots, mais en lieu d'iceux, il dict que nostre Seigneur fait la sainte cene, que nous appellons iustement la feinte cene.

Secondement il demande si le Pasteur peut receuoir les Sacremēts pour ses brebis, s'il est procureur pour icelles en cēt endroit, attendu que sous la loy, l'un n'a point esté circōcis pour l'autre, & q̄ iamais aucū n'a mangé l'Aigneau Paschal par procureur: & que mesme en l'Eglise Romaine (dit-il) chacun est baptizé, confirmé, promeu aux saints ordres, absout par penitence, & marié avec vne femme en propre personne: & de mesme moyen (dit-il) nul ne peut receuoir ce Sacrement pour autrui, & luy appliquer le fruit d'iceluy.

Voilà prou de gosseries, prou de paroles vaines, & qui conuiennent plustost à

vn homme malin , que non pas à vn bon Logicien , & parfaict ouurier de syllogismes, tel que s'est dit Loque au commencement de son liure.

Puis donc que ce bon Logicien nous demande souuent tesmoignage de l'escriture, il luy faut respondre avec authorité de l'escriture.

L'escriture fait foy que nostre Seigneur s'est offert volontairement en la croix pour la remission de nos pechez. Elle dict aussi que nostre Seigneur ayant consacré & distribué son precieux corps & sang sous les especes de pain & de vin à ses Apostres leur a commandé de consacrer & imiter de point en point ceste sienne action en perpetuelle memoire de luy ; tellement que le Prestre celebrant ceste sienne actiõ de nostre Seigneur par la sainte Messe, rememore sa mort qu'il a souffert pour no<sup>s</sup>, suyuant ce que dict S. Paul, *Toutes & quantes fois que vous mangerez ce pain & boirez ce calice , vous annoncerez la mort de nostre Seigneur insques à ce qu'il vienne.* Nostre Seigneur donc lequel a vne fois enduré pour nostre redemption, a commandé à ses Apostres de faire ceste consecration & distribution de ce Sacrement, & par consequent à tous



## Responce au 15.

Idan. 6. Prestres qui consacreroyent. A quel effect? n'est-ce pas pour nous appliquer le fruit de ceste oblation sanglante qu'il a faict vne fois pour nous en la croix? & que ce soit pour ceste fin, il nous le monstre luy mesme disant, *Si vous ne mangez ma chair & beuvez mon sang vous n'aurez point de vie en vous entendant la vie eternelle.*

Hebr. 7. Il me semble que i'entends Loque se gaussant & concluant de ces mots, pourquoy donc voulez vous, que l'assistance qu'a le Prestre en sa Messe reçoynie ce Sacrement par luy comme par Procureur: Voyons vn peu ce que nous en dict saint Paul, *Christus non habet necessitatem quotidie (quemadmodum sacerdotes) prius pro suis delictis hostias offerre, deinde pro populi*: que nostre Seigneur n'a point besoin, comme les autres Prestres, d'offrir tous les iours des sacrifices pour ses pechez, puis pour les pechez du peuple: *Hoc enim fecit semel se offerendo*: pource qu'il a faict cela vne fois, sçauoir est, en s'offrant soy-mesme pour nous.

La difference donc qui est entre le sacrifice de nostre Seigneur & celui du Prestre, est, que nostre Seigneur n'a offert sacrifice qu'une fois, sçauoir est le sacrifice

sanglant de son corps pour nostre redemption: le Prestre ( comme dict saint Paul ) offre tous les iours ce sacrifice non sanglant sous les especes de pain & de vin. Nostre Seigneur a offert son sacrifice non pas pour soy ( attendu qu'il est tout innocent & exempt de macule de peché ) mais pour nous qui sommes remplis d'iniquité: le Prestre offre ce sacrifice non sanglant du corps & sang de nostre Seigneur pour ses pechez, & pour les pechez du peuple: & d'autant que le peuple ne se trouue pas tousiours en estat de communier, reellement, actuellement & de fait, le Prestre lequel offre pour le peuple ( selon le dire de saint Paul ) communie aussi pour le peuple: car si le Prestre consacrant est obligé ( en consequence de la consecration ) de communier, pourquoy ne rapporterons nous pas aussi bien au profit du peuple la communion du Prestre, cōme son oblation? Si donc le Prestre offre seul, pourquoy ne communiera-il pas seul? Et ( si nous voulons reuenir aux friuoles questiōs de Loque ) où est-ce que saint Paul a trouué que le Prestre a procuration pour offrir pour le peuple? où en a-il trouué le commandement & l'exemple? Et toutes-

## *Responce au 16.*

fois saint Paul n'a point dict cela sans bõ-  
ne cognoissance de cause : c'est vne chose  
toute claire que le deuoir du Prestre est de  
offrir pour soy & pour le peuple ; la pra-  
ctique a tousiours esté telle , comme il se  
peut voir en l'ancien Testament:& quant  
à ce propos , tout ainsi comme c'est vne  
chose particuliere à nostre Seigneur Iesus-  
Christ d'endurer en la croix pour la redem-  
ption du monde, ainsi c'est vne chose par-  
ticuliere au Prestre (qui est mediateur & in-  
tercesseur enuers Dieu pour les pechez des  
hommes) d'offrir sacrifice & communier,  
en priant pour son assistance, & luy bailler  
ceste mesme communion, au cas que tous  
s'y trouuent disposez. Et voilà comme le  
Prestre selon son institution peut appli-  
quer à son assistance , voire à toute l'Eglise  
le fruiet de l'oblation sanglante de nostre  
Seigneur par son oblation non sanglante  
qu'il fait à l'Autel.

### *Nullité du seiziesme pretendu Abus.*

**P**Our seiziesme abus qu'il dict estre en la  
celebration de la Messe il s'arreste sus le  
mot de sacrifice qui est attribué à ceste o-  
blation que fait le Prestre à l'Autel, pour  
la remis-



la remission des pechez, disant, que le Prestre pense offrir Iesus-Christ à Dieu le Pere, & qu'il ne l'offre pas, & qu'il s'abuse en cela. Et pour le mot de sacrifice & intention d'iceluy, il allegue la priere que faict le Prestre en ces propres termes: *Offerimus tibi hoc sacrificium pro redemptione animarum, pro spe salutis & incolumitatis. Hanc oblationem placatus accipias.* Et allegue aussi ce que dict le Prestre en l'action de graces: *Hoc sacrificium quod obtuli, tibi sit acceptabile, mihi que & omnibus pro quibus illud obtuli, sit te miserante propiciabile*; comme disant le Prestre à Dieu, Nous vous offrons (Seigneur Dieu) ce sacrifice pour la redemption des ames, & pour l'esperance de salut: Recevez donc ceste oblation estant tout appaisé: Ce sacrifice que j'ay offert vous soit agreable, & par vostre misericorde me tourne à propiciation; & à tous ceux pour lesquels ie l'ay offert.

Voilà ce qu'il allegue du canon de la Messe, pour verifier que nous la prenons pour sacrifice propiciatoire. Nous sommes d'accord de celà, & il n'auoit qu'à faire de prouuer que nous tenons ceste doctrine. Venons aux moyens & raisons qu'il tient pour renuerser ceste mesme doctrine.

*Responce au 16.*

Premierement il demande au Prestre, s'il entend que le sacrifice qu'il dict offrir en la Messe est celuy là mesme que nostre Seigneur a offert en la croix : & d'autant qu'il s'attend bien que nous dirons que c'est celuy-mesme qu'il a offert en la croix, & aussi celuy qu'il a offert à son pere, lors qu'il l'a consacré & distribué à ses Apostres, & par consequent celuy mesme qui est offert en la celebration de la sainte Messe, il dit cela mesme, & le préd pour fondement & suiet de sa dispute.

Voyons donc quel moyen il tient pour contredire ce poinct.

Il dict que quand mesme la Messe feroit la cene du Seigneur (en quoy nous ne pouuons conuenir avec luy, attendu que la cene est vne inuention des nouueaux E-uangelistes) si ne pourroit-on dire en verité que ce qu'on y offre soit le mesme sacrifice que nostre Seigneur a offert en la croix, autrement il faudroit que nostre Seigneur se fust sacrifié soy mesme, quand il donna ce Sacrement à ses Apostres, le iour de deuant sa mort: ce qui ne se peut maintenir, dit-il, d'autant que ce qu'il feist, n'est pas cela mesme qu'il feist le lēdemain en la croix: Car sont choses bien differen-

tes, mourir vraiment, & ordonner quelque chose en memoire de la mort. Partāt ce qu'on pretend qu'il offrit quand il consacra, n'est pas le mesme sacrifice qu'il offrit en la croix.

A quoy nous respondons sans vser de si long langage, que nostre Seigneur consacrant le iour de deuant sa mort, offrit à son Pere le mesme sacrifice qu'il offrit le lendemain en la croix, mais diuersemēt: Car quād il consacra il l'offrit non pas en sa propre espee, c'est à dire en chair & en os, & en ses dimensions naturelles, mais sous espee estrangere, c'est à dire, sous l'espee de pain: & le iour de sa passion & mort, il offrit son corps en sa propre espee & en son estre naturel en la croix: & c'estoit neantmoins ce mesme corps qu'il auoit donné à ses Apostres le iour precedent sous l'espee de pain, lors qu'il leur dit, *Accipite & comedite, Hoc est corpus meum, quod pro vobis tradetur*, prenez, mangez, cecy est mon corps lequel sera liuré pour vous: il n'y a point d'obscurité en ces paroles: elles disent que nostre Seigneur donnoit à ses Apostres ce mesme corps qu'il deuoit offrir tost apres en la croix, bien que nō en sa propre espee na-



turelle, mais en Sacrement. Si Loque veut des termes plus expres, il se monstre trop difficile à contenter, & trop rigoureux iuge de l'escriture.

Poursuyuant ses subtilitez, il dit par apres que si nous recognoissons la saincte Messe pour sacrifice non sanglant, comme de faict nous maintenons, disants, que nostre Seigneur consacrant s'est sacrifié à son Pere, il conclud en ceste sorte contre no<sup>r</sup>. Si nostre Seigneur s'est sacrifié lors qu'il a consacré, il s'ensuit qu'il se soit sacrifié deux fois, d'autāt que le lendemain il se sacrifia en la croix. Et s'il s'est sacrifié deux fois, dit-il, l'un des deux sacrifices a esté inutile & superflu, ou bien vn seul des deux ne pouuoit estre suffisant. Si l'un des deux a esté superflu, il faut donc dire que nostre Seigneur ayt sacrifié en vain pour ceste fois là. Si vn seul n'a point esté suffisant l'Apostre donc a dict faux, *Act. 10.* quand il a dict, *Que vous sommes sanctifiez par l'oblation du corps de nostre Seigneur vne fois,* & que nostre Seigneur, *Vnam pro peccatis obtulit hostiam*, a offert vn sacrifice pour les pechez.

Pour couper chemin à toutes telles subtilitez, nous disons & recognoissons

que nostre Seigneur a fait vn seul sacrifice de son corps naturel en la croix pour la remission des pechez: laquelle est generale, c'est à dire suffisante pour tous. Mais d'autant qu'elle n'est pas generally appliquée à tous, cōme pour exemple aux refractaires & ennemis de son Euangile, il faut veoir le moyen de l'appliquer à ceux qui en voudront receuoir le fruit. Or ce moyen nous est enseigné par luy mesme quand il dit, *Si vous ne mangez ma chair & beuvez mon sang, vous n'aurez point de vie en vous. Qui mange ce pain viura eternellement.* Et com̃mēt mangerons nous sa chair, & beurons nous son sang si nous ne l'auons? & comment le pourrons nous auoir, s'il ne nous le donne? & comment nous le donne-il sinon en ce Sacrement? & comment est-il en ce Sacrement? il y est com̃me il l'a dict en consacrant par ces mots, *Hoc est corpus meum quod pro vobis tradetur. Cecy est mon corps qui sera liuré pour vous.* Si c'est ce mesme corps qui est liuré pour nous, ce n'en est donc pas vn autre. Ce qu'il auoit jà dict assez clairement en ces propres termes, *Le pain que ie vous donne-*

*Ioan. 6.*

*Math. 26.*

*Ioan. 6.*

## Responce au 16.

pain comment est-ce chair? si c'est chair comment est-ce pain? c'est pain non pas en nature & substance, dict saint Cy-

*Ser. de ex-  
na Do.*

prian, *panis, propter nutrimenti congruentiam*, Le nom de pain luy est attribue à cause de la vertu & force de nourrir qui y est, pource qu'il nourrit à vie eternelle, car

*Ioan. 6.*

*Qui mange ce pain, dict-il, viura eternellement.*

Que peut desirer Loque plus clair que cela, *c'est ma chair pour la vie du monde*: Nostre Seigneur donc a fait premierement vne oblation ou sacrifice de son corps à son pere, qui n'estoit point sanglant, instituant la Prestrise de sa loy Euāgelique par cest exemple d'offrir, qu'il a donné, pour nous appliquer le fruit de ceste oblatiō sanglante ou sacrifice sanglant de son corps qu'il deuoit faire le lendemain en la croix. Et auoit predict luy-mesme la necessité d'appliquer ce fruit dudiect sacrifice sanglant par la reception de ce Sacrement qu'il vouloit instituer: & si ceste oblation n'est sacrifice, où sera donc le sacrifice de la loy Euangelique & la Prestrise qui y doit conuenir? où sera la Prestrise de nostre Seigneur selon l'ordre de Melchisedech, c'est à dire, en l'oblation de pain & vin? Loque desnie le sa-



crifice pour desnier la Prestrie, & des-  
niera la Prestrie pour desnier la loy mes-  
me. Et que vaudroit la loy Ehangeli-  
que si elle ne propofoit recompense à  
ceux qui obeyroyent, & punition à ceux  
qui la transgresseroient avec opiniastre-  
té; & reconciliation aux pecheurs qui de-  
manderoient reconciliation? Il dira. (cō-  
me les autres de ce temps qui sont de  
mesme farine) ceste reconciliation a esté  
faicte vne fois par le sang de nostre Sei-  
gneur; nous le confessons, par icelle no-  
stre Seigneur a estendu sa misericorde  
sus nous, mais il faut que le fruiet en soit  
appliqué sus ceux qui s'en trouueront ca-  
pables, pour y apporter de leur part ce  
que nostre Seigneur mesme a ordonné,  
qui est la communion de ce Sacrement,  
laquelle ne sert de rien & ne peut estre ap-  
pliquee avec son effect à ses ennemis, biē  
est-elle à leur condamnation, ce dict saint  
Paul. Et comment pourra estre appliqué  
cest effect sans ce Sacrement: & qui don-  
nera ce Sacrement sinon le Prestre qui est  
expressément ordonné pour le dōner aux  
autres apres auoir consacré: & comment  
le Prestre pourra-il consacrer s'il n'offre  
sacrifice? & quel sacrifice peut-il offrir si-

1 Cor. II.

## Responcé au 16.

non celuy que nostre Seigneur a voulu estre iournallemēt offert iusques à la fin du monde, sçauoir est, en ce saint Sacremēt en memoire de sa passiō & mort, qui est le sacrifice sanglāt qu'il a offert pour nous en la croix? car il a dict, *Hoc facite in meā commemorationem*, Faites cecy en memoire de moy.

D'auantage si ceste oblation de pain & de vin qui sont preparez pour la consecration (en laquelle est recognuë la semblance du sacrifice de Melchisedech, & de celuy qui est fait en la sainte Messe) n'est sacrifice par lequel le precieux corps & sang de nostre Seigneur sont offerts au Pere pour nous appliquer le fruit de ce sacrifice sanglant qu'il a offert en la croix pour la remission des pechez, où est l'hostie que le Prestre Euangelique offre pour ses pechez, & pour les pechez du peuple selon le dire de saint Paul? Si Loque est si entier à desnier le sacrifice non sanglant, qu'il nous monstre donc quel est ce sacrifice duquel il a esté dict

Heb. 7.

Maluc. 1. en l'ancien Testament, *A solis ortu vsque ad occasum magnum est nomen meum in gentibus, & in omni loco sacrificatur & offertur oblatio munda, quia magnum est nomen*

*meum in gentibus* : Depuis le soleil leuant iusques au soleil couchant , mon nom est grand entre les Gentils, & en tout lieu est sacrifiée & offerte en mon nom vne oblation nette, pour ce que mon nom est grãd entre les Gentils: Si ceste oblation qui deuoit estre offerte par tout au nom de Dieu, n'est le vray corps de nostre Seigneur au sacrifice de la Messe , quel sera donc ce sacrifice? ce ne sera pas le sacrifice sanglant qu'il a offert en la croix : car ce sacrifice là n'a pas esté offert en tout lieu , ains en vn lieu determiné, sçauoir est en Hierusalem: car ce corps, comme il se comportoit en son propre estre naturel , ne pouuoir endurer & mourir qu'en vn lieu , ainsi qu'il ne deuoit mourir pour nous , & pour nous racheter qu'une fois : Dire que ce passage de Malachie s'entend de quelque autre sacrifice vniuersel , c'est à dire , qui deuoit estre celebré & reconnu par tout, c'est chose trop absurde : car il ne faut point attendre d'autre sacrifice que celui que nostre Seigneur nous a ordonné pour estre celebré & reconnu par tout le monde , pour nous estre appliqué par l'usage d'iceluy, le fruit & effet de ce sacrifice sanglant qu'il a offert vne fois en la croix.



## Responce au 16.

En sommaire, pour couper le fil à toutes ces subtilitez ou plustost vanitez de Loque, nous recognoissons deux choses en ceste dispute du sacrifice propiciatoire, sçauoir est l'action de nostre Seigneur lequel a operé le mystere de nostre redemption en la croix; & l'application du fruit d'icelle: L'action est de luy seul: car c'est luy seul qui nous a racheté par le sacrifice qu'il a fait de son corps en la croix pour nous: l'application du fruit d'icelle est en partie de luy, en tant qu'il nous a donné vn souuerain moyen d'obtenir le fruit de sa mort ou de ce sacrifice sanglant, sçauoir est le commandement de participer à son precieux corps & sang au sacrement de l'Autel, ce qui ne se peut faire, sinon par le sacrifice de la Messe, auquel se fait & accomplit le commandement qu'il a donné à ses Apostres, & par eux aux Prestres, de consacrer & administrer son precieux corps & sang aux autres: en partie aussi de nous, en nous y disposant dignement selon le commandement de saint Paul: La participation du sacrifice, conioint & vnit la creature avec son createur, pourueu que la creature s'y dispose dignement. Le Ministre de ce sa-

crifice est le Prestre, lequel offre le sacrifice pour ses pechez, & pour les pechez du peuple, comme dict saint Paul : le peuple <sup>Heb. 7.</sup> est reconcilié avec Dieu par le ministère du Prestre, lequel prie & offre le sacrifice à Dieu pour les pechez d'iceluy peuple: Si donc Loque oste de la loy Euangelique le sacrifice de la Messe, ne reconnoissant autre sacrifice en icelle, que le sacrifice sanglant fait par nostre Seigneur Iesus-Christ en la croix: Il n'y a dōc point de moyen en icelle loy Euangelique, par lequel ( depuis l'Ascension de nostre Seigneur ) l'homme puisse estre reconcilié à Dieu apres auoir offensé: Il ne faut point donc de Prestre, ny de reconciliatiō avec Dieu: Pour neant nostre Seigneur aura il baillé à saint Pierre la charge de son troupeau, la puissance de lier & deslier, & aux autres Apostres, voire à toute son Eglise <sup>Ioan 21.</sup> la puissance de deslier, & de lier ou excommunier: Pour neant aura il commandé aux Apostres apres auoir fait la consecration & distributiō de son precieux corps & sang, de faire le semblable: Pour neant aura il commandé sus peine de damnatiō <sup>Mat. 18.</sup> de receuoir & manger sa chair en ce sacrement, & boire son sang, s'il ne faut <sup>Mat. 26.</sup> <sup>Ioan 6.</sup>

## Responce au 17.

point de Prestre qui le consacre & offre à son imitation : Voilà les absurditez auxquelles Loque precipite tous ceux qui desnient avec luy le sacrifice non sanglant du corps & sang de nostre Seigneur en la sainte Messe.

### *Nullité du pretendu dixseptiesme abus.*

**L**E dixseptiesme abus qu'il dict trouuer en la celebration de la Messe, a vn bien debile fondement: car il dit q̄ c'est abuser lourdement, voire blasphemer, prier Dieu (apres la cōsecration faicte) qu'il ait pour agreable ceste oblatiō du precieux corps & sang de son Fils Iesus-Christ, comme si c'estoit chose qui luy peut aucunement desagreer.

Or pour ne manquer point de preuue, il allegue mot pour mot, la priere que fait le Prestre au S. canon de la Messe, apres auoir consacré, disant,

*Supra quæ propitio  
ac sereno vultu respi-  
cere digneris & acce-  
pta habere, sicuti acce-  
pta habere dignatus es*

Sus lesquelles choses vous plaise regarder d'vn visage propice & ioieux, & les auoir agreables,



<i>munera pueri tui iusti</i>	ainsi qu'il vous a
<i>Abel, &amp; sacrificium</i>	pleu auoir agrea-
<i>Patriarchæ nostri A-</i>	bles les dons d'A-
<i>brahæ, &amp; quod tibi ob-</i>	bel vostre enfant iu-
<i>tulit summus Sacerdos</i>	ste, & le sacrifice de
<i>tuus Melchisedech san-</i>	nostre Patriarche A-
<i>ctum sacrificium, im-</i>	braham, & le saint
<i>maculatam hostiam.</i>	sacrifice de l'Hostie
	immaculee que vo-
	stre grand Prestre
	Melchisedech vous
	a offerte.

Puis aussi il allegue à mesme fin l'oraison secrete de la Messe, laquelle se celebre au septiesme Dimanche d'apres la Pentecoste, de laquelle la forme & teneur est telle.

<i>Deus qui legalium</i>	Dieu qui auez esta-
<i>differentiam hostiarum</i>	bly la difference des
<i>unius sacrificij perfe-</i>	Hosties legales par
<i>ctione sanxisti, accipe</i>	la perfection d'un
<i>sacrificium à deuotis</i>	sacrifice, receuez
<i>tuis famulis, &amp; pari</i>	ce sacrifice de vos
<i>benedictione sicut mu-</i>	seruiteurs deuots, &
<i>nera Abel sanctifica,</i>	le sanctifiez de pa-
<i>&amp; c.</i>	reille benediction

*Responce au 17.*

qu'avez sanctifié les  
dons d'Abel, &c.

Nous remarquons que pour deux raisons il a voulu adiouster ceste seconde oraison, la premiere, pour ce qu'il y est parlé d'Abel, comme en la precedente: La seconde pour ce qu'en icelle le Prestre requiert Dieu le Pere qu'il luy plaise sanctifier ceste oblation qui se fait en la Messe: & c'est ce point sus lequel il pretend fonder le blaspheme duquel il veut reprendre l'Eglise en telles prieres, spécialement en cest endroit de la Messe.

Il dit donc pour monstrier qu'il y a apparence de blaspheme en ces deux prieres, que c'est blasphemer, en offrant Iesus-Christ, prier & interceder pour luy enuers le Pere, afin qu'il le sacrifie, & afin qu'il l'ait pour agreable, comme il a eu pour agreable les choses corruptibles qui luy ont esté offertes par Abel, Abraham, & Melchisedech: Ce qui ne se peut dire sans blaspheme, attendu que nostre Seigneur est assez Saint de soy-mesme, sans qu'on luy doive ou puisse desirer quelque nouvelle sanctification, ou augmentation outre celle qui luy est naturelle: & pour

preuue, il allegue les passages de la sainte  
 escriture, pour verifier la sainteté natu- Luc 1.  
Mat. 8.  
Marc 5.  
1 Cor. 12.  
 relle de nostre Seigneur, disant qu'il est  
 conceu du saint Esprit, & que les diables  
 mesmes (bien que ses ennemis iurez) ont  
 esté contraincts de confesser sa sainteté:  
 comme aussi, selon le dire de saint Paul,  
 c'est chose toute recognuë que toute la  
 sainteté des hommes depend de la sien-  
 ne, en tant qu'elle leur peut estre attri-  
 buée.

Outre-plus, il demande si le Prestre a  
 ceste charge de prier & interceder pour  
 nostre Seigneur Iesus-Christ, & s'il est as-  
 sez iuste pour auoir accez de soy mesme à Ioan 14.  
 Dieu pour faire ceste priere, attēdu qu'au  
 cōtraire de ce, nostre Seigneur dit que nul  
 ne peut venir au Pere, sinon de par luy:  
 Dont il s'ensuit que le Prestre ne se peut  
 excuser de temerité, quand il veut que par  
 luy Iesus-Christ paruiēne au Pere: Aquoy  
 toutesfois saint Paul contreuient mani-  
 festement, quand il dict, *Per Christum offe-* Heb. 13.  
*ramus semper hostiam laudis Deo:* Que par Ie-  
 sus-Christ nous deuons offrir sacrifice au  
 Pere. Par ces belles subtilitez Loque s'ef-  
 force de calomnier ces deux formes de  
 prieres cy dessus alleguees.



*Responce au 17.*

Mais nous luy demandons s'il pense que l'Eglise, laquelle a baillé & ordonné aux Prestres qui doiuent celebrer la Messe, ceste forme de prier, leur a appris à blasphemer le nom de Dieu: Car d'auoir son action contre le Prestre & le blasmer, il ne le peut, puis qu'en ceste forme de prier il obeit à l'Eglise, laquelle il reconnoist pour Mere: Or dire que l'Eglise, laquelle a tousiours esté conduite du saint Esprit, que nostre Seigneur (estant monté au ciel) luy a baillé pour guide & conducteur, ait enseigné à blasphemer c'est faire iniure à nostre Seigneur, & au saint Esprit qui l'a conduit, & mesme c'est blasphemer.

*Propos ridicule de Loque.*

Or venons à la qualité du blaspheme que Loque dict trouuer en ceste priere: Le Prestre, dit-il, prie Dieu le Pere, auoir pour agreable nostre Seigneur Iesus-Christ, & le sanctifier: & au contraire cest par nostre Seigneur Iesus-Christ, que le Prestre & le peuple peut estre rédu agreable à Dieu le Pere, & estre sanctifié: Nous luy respondons qu'en l'oblation de ce sacrifice qui est fait & offert en la celebration de la Messe; deux choses sont à considerer, sçauoir est l'excellence & valeur de l'Hostie

l'Hostie qui est offerte; & l'indisposition, tant du sacrificateur qui est le Prestre qui l'offre, que du peuple ou du particulier, pour lequel ce sacrifice est offert par le Prestre. Et quand le Prestre prie & requiert Dieu de vouloir auoir pour agreable sacrifice, il ne demande pas cela pour penser qu'il y ait en iceluy sacrifice quelque insuffisance: car ce seroit trop euidentement cōtreuenir au tesmoignage que Dieu le Pere a dōné à nostre Seigneur Iesus-Christ son Fils, duquel il a dit, *Hic est filius meus dilectus in quo mihi complacui*: Cestuy est mon Fils auquel i'ay pris mon bō plaisir: & auquel parlant par le Psalmiste, il dit, *Ex utero ante luciferum genui te*: le t'ay engendré du ventre deuāt Lucifer: & par ces deux passages est condamné celuy qui voudroit dire qu'il y a quelque defectuosité en ceste Hostie ou en ce sacrifice qui le rend defectueux de soy-mesme: Dōt nous disons selō ces deux passages de l'escriture, en faisant cōparaison de l'Hostie du nouveau Testamēt (qui est nostre Seigneur Iesus-Christ mesme) & des hosties de l'anciē Testament, nostre nouvelle Hostie, c'est à dire, Iesus-Christ en ce sacrement, est tres-agreable à Dieu le Pere: & nō nostre sa-

*Titel. in  
expo. sac.  
canonis.*

*Mat. 3. 17.  
Psalm. 10. 2.*

Responce au 17.

crifice que nous offrōs en la celebratiō de la saintemesse, qui est nostre Seigñr mesme, par nostre particuliere & propre action (qui est ceste celebratiō ou cōsecratiō) est tousiours agreable à Dieu le Pere, attendu que le Fils ne nous a point commandé de continuer ce sacrement à son exemple & imitation, pour nous faire faire chose qui fut desplaisante à son Pere. Mais s'il faut regarder à nostre capacité & suffisance requise pour exercer dignement ce ministration ou office, il y a tousiours quelque chose à redire sus nous, principalement quand il est question de comparer nostre vilité & infirmité avec vne chose si haute & prouenāte de la benificence de Dieu. Et pour ce regard, non pour le premier, nous supplions Dieu le Pere auoir pour agreable ce sacrifice que nous luy offrons, bien qu'indignes, & indignement de nostre part, à cause de l'excellence d'iceluy, c'est à dire, de son Fils Iesus-Christ qui en est l'auteur: & que telle soit l'intention de l'Eglise & du Prestre qui tient de l'Eglise ceste forme de prier, celà se voit par la comparaisō qui est faite de ce sacrifice avec les sacrifices des anciens Peres, *Abel, Abraham, & Melchisedech*: Comme si le



Prestre faisant comparaison de son sacrifice, ou plustost du sacrifice de la loy Euāgelique avec les sacrifices de ces trois Peres anciens, disoit, Il n'y a point de doute que ce sacrifice auquel est offert Iesus-Christ Fils de Dieu, ne soit infinimēt plus receuable deuant la face de la diuine Majesté, que n'estoient les sacrifices de ces Peres anciens. Or, est il ainsi que les sacrifices de ces Peres anciens auxquels estoient seulement offertes des creatures, ont esté agreables à Dieu; à cōbien plus forte raison luy sera agreable cestuy-cy, auquel est offert le Createur mesme? Tellement qu'en ceste comparaison il y a seulement similitude ou cōuenance en ce mot de sacrifice, auquel conuiennent & cōmuniquent les choses qui ont esté offertes avec nostre Seigneur qui est offert en la celebratiō de la Messe, lequel aussi est appelé sacrifice, d'autant qu'il y est offert: ou bien il y a cōuenance en egalité d'acception, cōme le Prestre par ordonnance de l'Eglise requerant à Dieu le Pere par ceste priere, qu'il luy plaise auoir pour agreable ce sacrifice, & le receuoir benignement de ses mains, cōme il a receu les sacrifices de ces Peres susdits, c'est à dire, en remissiō des pechez,

## *Responce au 17.*

& octroy de grace celeste, ayant eu esgard à leur deuotion & intétion : car le Prestre requiert aussi Dieu le Pere auoir esgard à sa deuotion & intention ( bien qu'insuffisante ) pour obtenir quelque chose de Dieu, dont il se trouue tousiours indigné, si la dignité & excellēce de ce sacrifice n'y interuenoit pour en suppleer le defaut.

Ceste demande dōc ne dit rien de l'indignité de ce sacrifice si excellent , auquel nostre Seigneur Iesus-Christ , infiniment bon & excellent est offert , mais seulemēt elle exprime & confesse l'incapacité des pecheurs qui offrent , & pour lesquels est offert ce tres-digne sacrifice, en suppliant Dieu le Pere n'auoir esgard à leur indignité & insuffisance , ains à la dignité & excellence de celuy qui est offert seulemēt, qui est nostre Seigneur son Fils. Si Loque veut emploier son esprit à recognoistre les deux parties de ceste comparai-son, & les discerner l'vne d'auec l'autre, il ne trouuera point de blaspheme en ces deux oraisons , ains vne vraye humilité , & confession des defectuositez des pecheurs qui offrent ce sacrifice , cōme aussi de ceux pour lesquels il est offert.

De ceste responce laquelle faißt foy de l'humilité que rend le Prestre à Dieu, quand il offre ce sacrifice , & non d'une entreprise que face le Prestre sus la grandeur de nostre Seigneur Iesus-Christ, qu'il offre à Dieu le Pere : Le Lecteur pourra iuger cōbien friuoles sont les questions que faißt Loque sus ce propos, quand il demande si le Prestre a charge & commission d'interceder pour Iesus-Christ, & s'il est assez iuste pour auoir ac-  
*Temeraires questions de Loque.*  
cez à Dieu de foy-mesme : Sont questions faißtes à plaisir , & de la bouche d'un lequel compte sans parler à sa partie : lequel veut faire confesser au Prestre, bon gré, mal gré, qu'il entreprend sus la grandeur de nostre Seigneur Iesus-Christ, vray Fils de Dieu , le recommandant à Dieu le Pere, par la forme & teneur de ces deux oraisons qui se disent en la Messe : Ainsi se veut-il donner carriere, & se cha-rouiller pour se faire rire : mais s'efforcer d'empescher les impudentes moqueries des heretiques, vaut autant comme se tra-uailer d'empescher le cours de l'eauë du torrent.

Pour se monstrier encores plus subtil en sa dispute , il feint & suppose qu'à ces



## *Responce au 17.*

belles questions qu'il a faiët cy dessus, le Prestre pourra respondre qu'il prie, non point pour nostre Seigneur Iesus-Christ, mais pour nous, à sçauoir, à ce qu'il plaise à Dieu receuoir Iesus-Christ son Fils, pour satisfaction de nos pechez, par le merite de sa mort & passion.

Ceste responce nous peut estre suspecte, cōme venant de la boutique de nostre aduersaire, lequel se veut donner champ agreable & aduantageux pour nous combattre : & aussi comme estant manque & deffectueuse, en ce qu'elle tait & passe sous silence le principal point de nostre iuste defence, qui est, que nous supplions Dieu le Pere par ces oraisons susdites en l'oblation que nous luy faisons cōme Prestres, soit pour nos pechez, ou pour les pechez du peuple, ou pour tous les deux, n'auoir esgard a nostre incapacité, prouenante de nos fautes, ains au merite de la mort & passion de son Fils que nous offrōs en sacrifice, en la celebratiō de la Messe : car ce n'est pas assez de prier pour nous à ce que nous puissiōs estre participāts au merite de la mort & passiō de nostre Seigneur; mais il faut, pour participer à ce fruit, que nous confessions que de nostre part nous som-

mes insuffisants & incapables d'y paruenir, si Dieu liberalement ne nous remet nos fautes, par le merite d'icelle mort de nostre Seigneur son Fils. Ceste humilité de confession & recognoissance de soy mesme, flechit Dieu à nous departir sa misericorde, attendu que S. Paul dit, *Non ex operibus iustitiæ quæ fecimus nos, sed secundum misericordiam suam saluos nos fecit.* Tib. 3. Que Dieu ne nous a pas sauué par les œuvres de iustice que nous ayons cōmis, mais par sa misericorde & bōté souueraine : Selon laquelle sentēce nous disons que Dieu veut departir sa misericorde par la mort & passiō de son Fils à ceux qui la demandent avec recognoissance de leur faute & humilité, mais non aux rebelles, selon ce qu'il a dit luy mesme, que son sang deuoit estre respandu pour ses Apostres, & pour beaucoup d'autres, en remission des pechez : que si c'estoit pour tous indifferemmēt, il n'eut pas dit que son sang deuoit estre respandu pour plusieurs, mais pour tous indifferemment, & sans exception : & pour mōstrer que ceste cōdition est necessaire, ne dit il pas, *Ad quem respiciā nisi ad pauper-* Esa. 66.  
*culum & contritū spiritu & tremementem sermones meos?* Sur qui regarderay-ie, sinon sur le

*Responce au 17.*

paure, contrit d'esprit, & sur celuy qui craint mes paroles?

Or, donc sur ce beau champ que se donne Loque par ceste demie responce qu'il impute au Prestre, sans regarder à ceste protestation d'humilité, que nous disons deuoire estre cōcurrente avec le merite de la mort & passion de nostre Seigneur : il dit contre ceste mesme respōce, qu'il suppose, comme venāt de la bouche du Prestre, qu'il n'y a point d'apparence en sa priere contenuë en ces deux formulaires alleguez cy dessus, que son intention soit telle de demander à Dieu le Pere qu'il luy plaise receuoir Iesus-Christ son Fils pour satisfaction de nos pechez, par le merite de sa mort & passion, & qu'il n'y a en ces deux prieres premises vn seul mot qui y tende : mais si ainsi est, que vaut donc la comparaïson de ce sacrifice avec les sacrifices anciens ? ne sert elle pas à monstrier de combien ce sacrifice de la Messe surpasse les anciens ? car par les anciens sacrifices estoient offertes à Dieu des creatures pures & simples, & à quelle fin ? c'estoit pour rendre Dieu propice & fauorable à ceux qui les offroient, & à ceux aussi pour lesquels ils estoient of-



ferts : & comment cela se peut-il faire sans la remission des pechez, lesquels mettent diuision entre Dieu & les hommes? & comment se peut departir aussi la grace de Dieu aux pecheurs, sinon par moyen de la remission de leurs pechez? Car le peché & la grace de Dieu ne peuvent compatir ensemble. En tant donc que par ces deux formulaires de prieres, Dieu est supplié vouloir auoir pour agreable ce sacrifice, nō, pour le regard de nostre Seigneur Iesus-Christ, lequel le Pere ne peut auoir pour desagrecable, mais pour le regard de l'insuffisance du Prestre & du peuple fondee sus ses pechez & iniquitez, que se peut-il trouuer de mal dict?

Persistant en ses belles subtilitez, il nous dit, que presenter à Dieu le Pere, le merite de Iesus-Christ son Fils & luy offrir Iesus-Christ mesme, sont choses differentes : Nous le voulons bien, attendu que (sans contredit) la personne & l'actiō, ou l'oeuvre d'icelle sont choses differentes : mais pour celà elles ne laissent pas d'estre concurrentes & particulierement en ceste celebration : ce que nostre Seigneur a exprimé apres qu'il eut consacré,

## Responce au 17.

*Mat. 26* disant: *Hæc quotiescunque feceritis in mei memoriam facietis*, Toutesfois & quantes que vous ferez cecy, vous le ferez en memoire de moy. Mais que veut cōclure Loque de ceste difference contre nous? Il ne le sçait pas luy-mesme, car il est vray-semblable que s'il l'eust sceu il ne nous l'eut pas celé.

Outre plus il dit que le Prestres en ces deux formulaires de prieres, dit le contraire de ce qu'il cuide faire: Car offrant Iesus-Christ (comme il dit l'offrir) il ne se contente pas de l'oblation sanglante qu'il a fait pour nous en la croix; ains il dit l'offrir encores & sacrifier actuellement avec la propiciation & remission des pechez des viuants & des morts. Il est vray, mais c'est vne oblation differente, c'est vne oblation non sanglante, c'est ce sacrifice que Daniel Prophete appelle *inge sacrificium*, sacrifice continuel & par lequel nostre Seigneur a promis à son Eglise de demeurer continuellement avec elle, disant à ses Apostres, c'est à dire à son Eglise qui estoit lors & qui deuoit estre par apres,

*Mat. 28* *Ego vobiscum sum, usque ad consummationem seculi*; Je suis avec vous iusques à la consommation du monde.

Et quant à ce qu'il notte en passant que le Prestre dit offrir ce sacrifice pour la propitiation & remission des pechez des viuants & des morts , il pense nous attaquer de superstition, comme se mocquât de ce que l'Eglise applique ce sacrifice de la Messe aux viuants & aux morts: mais a-il si peu prouffité en lisant l'Euangile qu'il n'ait pas bien notté & recogneu que Marthe a prié nostre Seigneur pour le Lazare son frere lequel estoit defunct, non d'une superstition ou folle opinion de femme, comme il pourroit dire , mais suyuant la louable coustume & pratique des Iuifs? N'a-il pas bien recogneu aussi que nostre Seigneur a prié pour le Lazare mort, auât que le resusciter? Et si par ce texte il est tout apparent que la simple priere n'est pas inutile aux defuncts , pourquoy le saint sacrifice de la Messe par lequel nostre Seigneur est offert, ne fera-il employé avec la priere, pour le remede des fideles trespassez?

Après cela il nous reproche que nous mettons avec le merite de nostre Seigneur Iesus-Christ, les merites des Saints, qu'il appelle merites imaginaires : les pardons & indulgences des Papes, & les satisfactions



*Response au 17.*

factions des peines de Purgatoire: ce que il dit seulement en passant, & pour preuve de cecy il nous renuoye à ce qu'il a dict cy dessus.

Nous luy pourriõs respondre de mesme, & le renuoyer aussi aux responces que nous auons faiet cy deuant à ses reproches qu'il nous a donné sus les poincts de la doctrine de l'Eglise. Toutesfois nous luy respondrons particulierement à chacun poinct, & sans prolonger ce discours.

Premierement nous luy disons que nous ne meslons point les merites des Saints avec le merite de nostre Seigneur, & que nous sçauons bien poiser & considerer (comme ne voulans flechir en la doctrine que nous tenons de nostre mere l'Eglise) combiẽ il y a à dire entre les choses finies & infinies; entre le merite de Iesus-Christ qui est infiny, & les merites des Saints, lesquels ne reçouyent point de comparason avec iceluy: bien luy confesserons nous aussi que comme iugeants de nous-mesmes, combien nous auons offensé nostre createur, & que nos offenses sont infinies, nous ne pouuons estre dignes de nous-mesmes de paruenir à la misericorde de nostre Seigneur, ny mes-

me de luy offrir ou faire offrir pour nous & pour le peuple ce sacrifice qui est de vertu inestimable, ce qui est cause que nous y employons les merites des Saints qui sont amis de Dieu, & hors de la voye d'offenser, esperants par ce moyen que nostre deuotion & affection sera plus receuable deuant nostre Seigneur Iesus-Christ, lequel nous offrons en sacrifice, & consequemment deuant Dieu le Pere, auquel nous offrons le merite de nostre Seigneur, par l'intercession des Saints, que nous interposons entre luy & nous. Et quant à ce qu'il appelle les merites des Saints imaginaires, nous le renuoyons au traicté que nous en auons fait cy dessus, en luy faisant responce sus l'innocation des Saints, laquelle est comprise en l'absolution qui se fait au commencement de la celebratiõ de la Messe apres le *Confiteor*.

Il dict oultreplus que nous y meslons les indulgences des Papes : cela luy plaist à dire, pour tousiours nous donner quelque attaque, mais s'il veut bien rechercher depuis le commencement de la celebration de la Messe iusques à la fin, il trouuera que c'est vne charité qu'il nous preste.

*Responce au 17.*

Mais pour verifïer en quelle boutique il a composé & fabriqué sa nouvelle doctrine, il falloit qu'il parlaſt contre leur Sainteté. Nous tenons en verité avec l'Eglise, les indulgences donnees par les Papes, mais nous ne les meſſons pas avec le merite de noſtre Seigneur Jeſus-Chriſt, pour y faire tort, c'eſt à dire, pour penſer qu'il en puiſſe accroître : & ne doutons aucunement que noſtre Seigneur Jeſus-Chriſt qui eſt Pere de miſericorde & de tout bien ne ſoit luy-meſme authœur de pardon & indulgence, pluſtoſt que de prendre accroiſſement de ſon merite par les pardons & indulgences des ſaincts Peres.

Et quant à ce qu'il dit auſſi que nous meſſons avec le merite de noſtre Seigneur les ſatisfactions des peines de Purgatoire, il a deu dire ouuertement en quel endroit du ſainct canon ou de la celebration de la Meſſe il en eſt faiât mention, & nō pas le dire ſimplement, en paſſant. Quand il voudra coter le paſſage de la Meſſe, auquel il en eſt faiât mention, il ſera temps de luy reſpondre.

Venons au principal argument qu'il met en auant cōtre le Preſtre qui offre ce



sacrifice à Dieu le Pere, Il dict en ceste forte.

Quiconque se vante en quelque acte que ce soit d'estre plus agreable à Dieu que Iesus-Christ, blaspheme horriblement.

Le Prestre se vante en sa Messe d'estre plus agreable à Dieu que Iesus-Christ.

Le Prestre donc en sa Messe blaspheme horriblement.

Voilà vn argument qui sent ce que son auteur a en son cœur, en tant qu'il attribue la Messe au Prestre, & non à nostre Seigneur premierement, puis aux Apostres premiers Peres de l'Eglise : & d'autant que l'assomption de ce beau syllogisme est à prouuer, il l'approuue par ceste autre raison.

Le Prestre se vante d'offrir en sa Messe Iesus-Christ à Dieu.

Donc il se vante d'estre plus agreable à Dieu que Iesus Christ.

Et passant plus oultre, il dict que la force de ceste consequence depend de ce que Dieu regarde plus à la personne de celuy qui offre quelque chose, qu'à la chose mesme qui luy est offerte, selon ce qui

## Responce au 17.

se peut remarquer par la difference du sacrifice d'Abel & de Caïn , d'autant que l'escriture parlant de l'un & de l'autre, dit, *Respexit Dominus ad Abel & ad munera eius, ad Cain autem & ad munera illius non respexit* : Que Dieu regarda à Abel & à son oblation , mais qu'il ne regarda point à Caïn ny à son oblation; c'est à dire ( comme il allegue de saint Irenee) que l'oblation d'Abel fut receuë de Dieu, & nō celle de Caïn.

Gen. 4:  
li. 4. con-  
tra Hier.  
Valent.  
cap. 34.

Par ce passage & par la raison qu'en tire Loque, il se iuge & condamne soy-mesme : car premierement il introduict vne egalité entre le sacrifice de la loy Euangelique, & celuy de Caïn & Abel , qui fut faict en la loy de nature, & nous disons au contraire qu'il n'y a point d'egalité entre le sacrifice de la loy Euangelique, que nous appellons le sacrifice de la Messe, & les sacrifices anciens soyent de la loy de nature ou de la loy Mosaique : car au sacrifice de la Messe est offert Iesus-Christ qui est le createur mesme, & es sacrifices de l'ancien Testament estoient offertes seulement des creatures. Et pour ce que toutes creatures ont esté faictes pour le bien & vsage de l'homme , Dieu  
ancienne-

anciennemēt regardoit plustost au cœur & à l'intention de l'homme qui offroit le sacrifice, que non pas à la creature qu'il offroit pour sacrifice, comme preferant l'homme à la creature qui estoit faicte pour l'homme: & voilà pourquoy l'écriture dist que Dieu regarda premiere-ment à Abel, c'est à dire, à la deuotion & à la iustice qui le recommandoit, qu'à son oblatiō: mais en la loy Euāgelique en laquelle nostre Seigneur Iesus-Christ est cōtinuellement offert en l'Autel en Sacrement pour memoire de ce sacrifice sanglant de son corps qu'il a vne fois offert en la croix pour les pechez du monde, selon le commandement qu'il en a donné, disant, *Faiçtes cecy en memoire de moy,* *Math. 26* qui sera le temeraire qui dira que le Prestre obeissant à ce commandement de nostre Seigneur, par ceste qualité de sacrificateur ou de Prestre, presume estre plus que nostre Seigneur mesme? ce sera celuy qui ignore l'excellence & prerogative qu'emporte ce sacrifice de la loy Euangelique par dessus tous les anciens sacrifices.

En apres, Loque presumant estre iuge suffisant & capable pour approuuer ou improuuer ces deux sortes de prieres cy



*Responce au 17.*

dessus alleguees, faict de l'ignorant à son escient, & ne veut pas considerer que le pretexte que prend le Prestre par ordonnance de l'Eglise pour offrir ce sacrifice non sanglant à Dieu le Pere, est le iugement qu'il fait luy-mesme de son indignité & de ses demerites prouenans de ses offences; à l'occasion desquelles sentant en sa conscience, que ny luy, ny ceux pour lesquels il implore l'ayde de Dieu n'en peuuent estre dignes, il offre à Dieu le Pere en Sacrement le plus digne sacrifice qui fut iamais & qui puisse estre, en rememorant & representant le merite de sa passion, selō ce que luy-mesme a commandé estre faict continuellement, nous faisant veoir par ce commandement que c'estoit ce sacrifice continuel qui deuoit durer iusques à la fin du monde, predit, & prophetizé par Daniel, comme nous auons remarqué cy dessus. Il falloit que Loque se donnast ceste carriere pour ne laisser passer aucun point de la celebration de la Messe, sans blasmer les Prestres desquels il est iuré ennemy.

*Nullité du prétendu abus dixhuitiesme.*

**I**L fonde par apres son prétendu dixhuitiesme abus sus ceste priere que faict le Prestre estant courbé bien bas, & disant,

<i>Supplices te rogamus,</i>	Nous vous priõs
<i>omnipotens Deus, iube</i>	humblemēt (ô Dieu
<i>hæc perferri per manus</i>	tout-puissant) que
<i>sancti Angeli tui in</i>	vous commandiez
<i>sublime altare tuum in</i>	que ces choses soiēt
<i>conspectu diuinæ maiestatis tuæ.</i>	portees par les
	maines de vostre S.
	Ange dessus vostre
	Autel en la presen-
	ce de vostre diuine
	Majesté.

L'abbus donc qu'il y trouue est, qu'il semble au Prestre que nostre Seigneur Iesus-Christ ne puisse monter au ciel sinõ par sa priere, car ceste priere tend là, puisqu'elle requiert Dieu le Pere que ce sacrifice qui n'est pas de pain & de vin, ains du mesme corps de Iesus-Christ soit porté au ciel deuant la Majesté diuine, par les mains de l'Ange. Car puis qu'ainsi il le re-

## *Responce au 18.*

quiert , il entend donc que maintenant en ce sacrifice Iesus-Christ ne peut monter tout seul au ciel , & sans l'ayde des Anges , ou toutesfois il est monté de sa propre vertu & sans aucune ayde apres sa Resurrection.

Voilà vne belle subtilité.

Loque inferant vn si lourd blaspheme de ceste belle priere se monstre ou ignorant ou meschant.

Ignorant, d'autant que c'est vne trop lourde ignorance à vn homme qui entreprend de disputer des choses saintes, de penser que l'Eglise ( laquelle a ordonné & autorisé ceste priere que fait le Prestre celebrant la Messe ) sente si mal de nostre Seigneur & luy attribué vne telle defectuosité , disant que depuis qu'il est monté au ciel apres sa resurrection, il luy soit deormais impossible d'y monter en ce Sacrement sinon par l'ayde des Anges & par le moyen de la priere du Prestre, comme si depuis ceste Ascension glorieuse par laquelle il y est monté quarante iours apres sa Resurrection , il en descendoit autant de fois que la Messe est celebree icy bas pour y remonter par l'ayde des Anges & par le moyen de ce-



ste priere que fait le Prestre: Ce seroit opiner de Dieu trop charnellement, & le reduire au naturel defectueux de la creature terrestre & infirme.

Si il n'est point trauaillé de ceste si lourde ignorance, ce qui est plustost à croire qu'autrement, il y a donc de la malice grande en son faict: car c'est imputer à l'Eglise (de laquelle ceste priere est authorisee) que sous pretexte de louer Dieu en la celebration de la Messe, elle le blaspheme si estrangement, sçauoir est, en attribuant au Fils de Dieu, qui est nostre Seigneur Iesus-Christ, vne impuissance d'estre au ciel & au Sacrement de l'Autel en mesme instant, vne necessité de descendre du ciel, auquel il est monté vne fois en son corps naturel, pour se trouuer au Sacrement de l'Autel, & vne impuissance consecutiuë d'y remonter sans l'assistance des Anges, comme si depuis sa resurrection il espousoit encores quelque infirmité & defectuosité.

Entendons donc ce que veut dire l'Eglise en ce formulaire de priere, pour recognoistre de là combien est friuole l'opinion de Loque sus icelle.

L'escriture nous dict que *l'oraison de ce* Ecc. 35.

*Responce au 18.*

*luy qui s'humilie outre-passe les nuees , Il s'en-  
suit donc du contraire , l'oraison de l'or-  
gueilleux ne peut passer les nuees , c'est à  
dire, paruenir iusques à Dieu , pour estre  
par luy exaucee. Donc d'autant que le  
Prestre comme pecheur par vne iuste  
deffiance tant de son peché que de ceux  
pour lesquels il offre le sacrifice de la  
Messe, craint de n'offrir pas dignement ce  
sacrifice, & par consequent de n'estre pas  
exaucé de Dieu, il requiert iustement, que  
son oblation soit portee par les mains des Anges  
deuant la Majesté diuine, c'est à dire, il requiere  
& demande estre reconcilié avec Dieu pour ob-  
tenir ses demandes par nostre Seigneur Iesus-  
Christ, lequel il offre au Pere , & estre aydé par  
le ministère des Anges.*

Ce n'est donc pas pour nous repre-  
senter ce que Loque nous impute en ce-  
ste priere, que nostre Seigneur ( lequel est  
tres-agreable à son Pere ) puisse estre ren-  
du plus agreable ou recommandable à  
Dieu son Pere par le ministère des Anges,  
mais c'est pource que nous desirons que  
l'insuffisance qui est en nous par nos fau-  
tes & demerites, soit leuee & ostee par l'in-  
tercessiō des Anges, & que par leur mini-  
stere nos prieres soyent portees deuant

Dieu, afin que l'hostie que nous offrons nous tourne à plus grand bien & soulagement, ce qui se peut iuger par l'exposition des deux prieres cy dessus exposees, lesquelles Loque a calomnié de mesme sorte que celle-cy. Car tout ainsi comme nous croyons que nos prieres sont renduës plus agreables à Dieu par le ministere & intercession des Anges, ainsi tenons nous (en ce qui est de nostre part) que ceste oblation que nous offrons, ou laquelle est offerte pour nous, nous tourne à plus grand bien par leur mesme intercession. Ainsi est exposé ce passage par Titelman sus cest article du saint canon de la Messe.

De pareille ignorance ou plustost malice Loque nous obiecte que le Prestre par ceste priere monstre faire deux choses contraires, parcé que communiant ce Sacrement il le retiët en son corps, & prie qu'il soit porté par les Anges au ciel, qui sont choses contraires: mais si sont choses contraires", l'escriure sera elle trouuee mensongere en ce qu'elle diët, *Cælum mihi sedes est, terra autem scabellum pedum meorum?* Le ciel est mon siege, & la terre est l'esca-

*Esa. 66:*



## *Responce au 19.*

remplit le ciel & la terre: celà s'entend de la vertu diuine (dira Loque) laquelle remplit le ciel & la terre: mais cela ne dit pas que le corps de nostre Seigneur soit en mesme instant au ciel & en terre; non pas en mesme sorte: Mais aussi disons nous q̃ le mesme corps de nostre Seigneur qui est au ciel en sa propre espee & nature avec ses dimensions naturelles, est en ceste oblation en espee estrangere, sçauoir est, sacramentalemēt, sous l'espee du pain.

*Ser. de coe-  
na Do.*

comme dit saint Bernard: Nous passons sous silence l'enorme blaspheme que Loque prononce en cest endroit, contre le corps precieux de nostre Seigneur, d'autant que le repeter icy se feroit publier de rechef au scandale du lecteur Chrestien & deuot, ce qui luy doit plustost estre en desdain.

## *Nullité du dixneufiesme pretendu Abus.*

**L**E dixneufiesme abus que trouue Loque en la celebration de la Messe est la commemoration qui s'y faict pour les trespassez, par la priere laquelle est adressée à Dieu en ceste forme & maniere qui ensuit.

<p><i>Memento etiam domine famulorum famularumque tuarum. N. qui nos præcesserunt cum signo fidei, &amp; dormiunt in somno pacis: Ipsis domine &amp; omnibus in Christo quiescentibus, locum refrigerij, lucis, &amp; pacis ut indulgeas deprecamur, Per eundem do. &amp;c.</i></p>	<p>Souvenez vous aussi ( Seigneur ) de vos seruiteurs &amp; servantes N. lesquels nous ont precedé avec le signe de la foy, &amp; dorment au sommeil de paix. A iceux, Seigneur, &amp; à tous ceux qui reposent en Iesus-Christ, nous vous supplions donner lieu de rafraichissement, lieu de lumiere &amp; de paix, Par iceluy, &amp;c.</p>
---	--

Premierement, il dit qu'il y a vne toute notoire contrariété en ceste priere, en ce qu'il est requis qu'à ceux qui sont morts avec le signe de la foy, & qui dorment au sommeil de paix, & qui reposent en Iesus-Christ, soit donné de Dieu, lieu de rafraichissement, de lumiere, & de paix: & pour dilater son argument, en contredisant ceste priere, il demãde, qui sont ceux

*Responce au 19.*

là ausquels est desiré vn lieu de rafraischissement, de lumiere, & de paix ? Ce ne sont pas les bien-heureux, car ceux-là ont contentement : Ce ne sont pas aussi les damnez lesquels sont en enfer, desquels l'Eglise chante souuent, *In inferno nulla est redemptio* : Qu'en enfer il n'y a aucune redemption.

Il n'auoit q̄ faire de parler, ny des vns ny des autres, pour contredire ceste priere : car par la teneur d'icelle, il est tout euident qu'elle n'est, ny pour ceux-cy, ny pour ceux-là: Il deuoit poursuiure son point, & entrer droit en lice du premier coup, sans chercher ceste longueur: mais ce prolongement luy a seruy d'autant, pour remplir le papier, & pour en faire trouuer son liure plus gros: Comment donc prouuera-il qu'il y a de la cōtrarieté en ceste priere? ce sera peut-estre en disant, que si les morts desquels les ames sont en ce tiers lieu, qui est appelé Purgatoire, dorment au sommeil de paix, estants decedez avec le signe de la foy, ils sont contents, & par consequent, pour neant on prie Dieu leur donner lieu de rafraischissement, de lumiere, & de paix: Ioint que l'escriture dit,

*Apoc. 14. Bien-heureux sont ceux qui meurent en Dieu,*



*car ils ont repos de leurs labeurs* : S'ils ont dōc repos de leurs labeurs, quel besoin ont ils de rafraischissement? Voilà vn grād coup pour Loque, il a barre sur nous, ce luy semble: Il a bien euidemment, & de vifue raison combattu cest article de la celebration de la Messe: comment en eschapperons nous? il ne nous sera pas mal-aisé de sortir de ceste difficulté, pourueu que l'escriture nous soit pour guide, qui est la voye plus seure, selon Loque mesme.

Premierement donc nous luy demandons (pour esclaircir ceste difficulté) s'il ne veut pas confesser que l'escriture parle des damnez qui sont defuncts, quand elle dict, *Non mortui laudabunt te domine, ne- T[ra]. 113. que omnes qui descendunt in infernum* : Les morts ne vous rendront point de louange (Seigneur) ny tous ceux qui descendent en enfer: Nous luy demandons, outre-plus, s'il ne veut pas estre d'accord avec nous, de ce que dit nostre Seigneur, *Je ne suis point le Dieu des morts, mais des vi-* Marc 12.  
*uants*: Ce qui se verifie mesme par ce qu'il Exo. 3.  
dict à Moyse, *Je suis le Dieu d'Abraham, d'Isaac, & de Iacob*: Quand il dict cela à Moyse, il parloit de ces Patriarches, qui estoient

Responce au 19.

defuncts, lesquels neantmoins sont reputés pour viuants, encores qu'ils ne soient plus en ce monde: & pourquoy? pour ce que Dieu dict qu'il est leur Dieu, en les nommant, & nostre Seigneur dict que Dieu n'est point le Dieu des morts, ains des viuants.

Laissons donc les damnez à part, & parlons des autres defuncts lesquels ont jà payé le tribut de nature, & sont hors de ce monde: aucuns d'iceux sont jà en possession de la beatitude eternelle, lesquels parlant l'escriture, dict ces mots, *sequuntur agnum quocunque ierit*: Qu'ils suiuent l'Agneau quelque part qu'il aille: S'ils suiuent l'Agneau quelque part qu'il aille, c'est à dire s'ils adherent de particuliere familiarité à nostre Seigneur Iesus Christ, en sa gloire, ainsi comme en ce monde ils luy ont adheré en obseruant ses commandements, ils ne dorment donc pas, attendu que la beatitude ne consiste pas en oisiveté, & au dormir, ains en vn perpetuel contentement, & en perpetuelle contemplation de la bonté, & toute-puissance de Dieu: Et neantmoins il est tout certain que l'escriture parlant des morts, appelle aucuns d'iceux, dormants, comme

les autres (pour exemple les susdicts Patriarches) viuants: NostreSeigneur, disant, que le Lazare estoit mort, dict-il pas premierement, *Lazarus amicus noster dormit,* <sup>Ioan 11<sup>2</sup></sup> puis *mortuus est*: Qu'il dormoit, puis apres qu'il estoit mort? & voulant dire que la fille du Prince de la synagogue estoit defuncte, ne dict-il pas, *Puella non est mortua sed dormit?* <sup>Luc 8.</sup> Qu'elle n'estoit pas morte, ains qu'elle dormoit? & les assistants qui entendirent cela, se moquerent de luy, cognoissants bien que ceste fille estoit trespassee: Que vouloit-il donc dire du Lazare, & de ceste fille, lesquels il appeloit dormants? il vouloit dire qu'ils estoient decedez en la grace de Dieu, & par consequent qu'ils ne deuoient estre reputez du nombre des mal-heureux & damnez, lesquels n'ont pas reconnu Dieu en leur fin: Ainsi saint Paul dict aux Tessaloniens, *Nolo vos ignorare de dormientibus sicut & ceteri qui spem non habent:* <sup>1<sup>a</sup> Thess. 4.</sup> Je ne veux pas que vous soyez ignorants de ceux qui dorment, comme d'autres qui n'ont point d'esperance.

Or, est il à noter qu'en l'escriture, generalement tous ceux qui sont decedez en la grace de Dieu, d'autant qu'ils sont



## Responce au 19.

hors de damnation , sont appelez dormants, soient les bien-heureux qui jà iouyssent de la beatitude, soient ceux qui paracheuent leur purgation, comme n'ayants esté competemment & dignement repurgez de tous les ombrages, que la conuersation mondaine leur auoit mis en l'esprit auant leur decez : lesquels aussi bien que les bien-heureux , sont reputez dormir au sommeil de paix , bien que diuersement: car les bien-heureux sont jà au sommeil de paix, d'autant qu'ils iouyssent de la paix de Dieu, *Apost. 14. Amodo iam dicit spiritus vt requiescant à laboribus suis* : Ils sont hors des tra-uaux de ce monde , & les autres sont reputez dormir du sommeil de repos, pour ce qu'ils sont asseurez de la paix , & de la misericorde de Dieu , & sont jà exempts de toute l'inconstance , & de toutes les inquietudes de ce monde : Au reste, tous sont reputez dormir , pour ce que l'estat du dormir naturel se recognoist en eux : car , ainsi comme le dormir est bien en soy vne image & semblance de la mort, & toutesfois n'est pas vne vraye mort, ainsi eux semblent au monde estre morts , mais par la resurrection de gloire de laquelle ils sont asseurez , se reco-

gnoistra le contraire.

Nous adiousterons à la confusion de ceux qui ne veulent point croire de Purgatoire, & qui se moquent de la recommandation que faict l'Eglise par cest article du canon de la Messe, pour les ames qui sont en iceluy, en attendant la fin de leur purgation, que ce qui nous faict dire qu'elles dorment au sommeil de paix, c'est qu'elles ne sont point affligées par le ministere des diables, pour ce qu'avec iceux elles n'auroient pas le sommeil de paix : mais elles sont purgées par elles mesmes au feu, cōme l'or de soy mesme y est purifié, selon le dire de S. Paul, lequel parlant du suppleement de la perfection qui se trouuera requise en vn chacun pour entrer en possession de la beatitude, apres ceste vie mortelle, dict, *Vniuscuiusque opus* 1 cor. 13. *quale sit ignis probabit, si cuius opus arserit: Ipse tamen saluus erit, sic tamen quasi per ignem*. Le feu esprouuera quel sera l'œuvre d'un chacun, si l'œuvre d'aucun brusle: & toutesfois celuy-là sera sauué, toutesfois ainsi comme parmy le feu.

Reconnoissons donc de ceste distinction des morts, qu'il n'y a point de contrariété en ceste priere : Elle se faict pour

## *Responce au 19.*

ceux qui dorment au sommeil de paix, c'est à dire , qui sont decedez avec vne paix de leur conscience, sans peché mortel , hors de l'indignation & ire de Dieu, en la grace & bien-veillance de Dieu : & sont ceux-là auxquels sert l'oraison des vivants, lesquels par ordonnance de l'Eglise leur appliquent ceste oblation pour estre par la valeur & force d'icelle, plus facilement exaucez , & leur obtenir en lieu des peines qu'ils endurent d'eux mesmes au feu, la iouyssance actuelle de la beatitude: Et c'est ceste iouyssance de la beatitude, qui est entenduë par le lieu de rafraichissement, de lumiere & de paix , que nous leur desirons par ceste priere: Or, quelle contrarieté y a il entre ce sommeil de paix, qui signifie la grace & l'amour de Dieu (auquel ils sont decedez de ce monde) & le lieu de rafraichissement, de lumiere & de paix, que nous leur procurons par ceste priere: Si la beatitude des bien-heureux est repugnante à la grace & à l'amour de Dieu , il y aura contrarieté entre le sommeil de paix & ce lieu de repos mentionnez en cesté priere , & non autrement: Voilà la contrarieté imaginaire que trouue Loque en ceste priere.

Passons



Passons aux arguments, par lesquels il combat le Purgatoire, & il s'efforce d'oster & improuuer les prieres qui se font en l'Eglise, pour les trespassez.

Il tire son premier argument de l'escriture expresse, laquelle dict, *Iesus-Christ* Hebr. 1.  
1 Ican 16  
1 Ioan 2. *a fait par soy-mesme la purgation de nos pechez.* *Le sang de Iesus-Christ nous nettoye de tout peché: Iesus-Christ est la propiciation pour nos pechez, non seulement pour les nostres, mais aussi pour ceux de tout le monde: Il ne faut donc point d'autre Purgatoire que le sang de Iesus-Christ. L'antecedent ne se peut nier, mais la consequence n'en est pas bonne: ce qui se verifie par l'escriture mesme: car si vn chacun est sauué par le sang de nostre Seigneur, puis qu'il est, La propiciation pour le peché de tout le monde: Il faut donc que chacun soit sauué: & que personne ne soit damné: & dire qu'il n'y a point d'enfer, & que nostre Seigneur a mal parlé en la consecration de la seconde espee, quand il a dit, C'est cy le Calice de mon sang, du nouveau & éternel testament, lequel sera resspandu pour vous, & pour plusieurs en remission des pechez: S'il a dict, pour plusieurs, il n'a donc pas dit, pour tous: Comment donc s'accorde cela avec l'antecede-*

*Mat. 26.*

## *Responce au 19.*

dent de l'argument que Loque a tiré de l'escriture? cest antecédēt s'entēd moyennant le consentement de l'homme, pour lequel sauuer nostre Seigneur a respandu son sang: car nostre Seigneur lequel a dit, Si tu veux entrer en la vie eternelle, garde les commandemēts; donne assez a entendre qu'il ne sauuera pas ceux la lesquels desobeyront à ses commandements. Le sang donc de nostre Seigneur ne s'estend pas sus ceux-là, à cause de la resistāce qu'ils apportent contre la volonté & contre les commandements de nostre Seigneur: Il est prou suffisant pour sauuer tous les hommes, mais l'efficace de ceste suffisance ne s'estend que sus ceux qui s'accommodent aux conditions que nostre Seigneur mesme nous dōne en l'escriture, qui sont celles-cy; Estre baptisé, faire ce qui est contenués commandements, faire penitence, participer au S. Sacrement de l'Autel.

### *2. Argument.*

Pour conclure la mesme chose par vn 2. argument, il fait ce dilēme. Tous ceux qui meurent, ou ils meurent en la foy de Iesus Christ, ou sans icelle foy: S'ils meurent en la foy de Iesus Christ, ils sont sauuez; car il est escrit, *Qui croit au Fils a la vie*

*eternelle* : Et nostre Seigneur dit , *Celuy qui* Ioan 5.  
Luc 23.  
*oit ma parole , & croit à celuy qui m'a enuoyé , a*  
*vie eternelle , & ne viendra point en condemna-*  
*tion , mais il passera de mort à vie* : Ce qui est  
tout notoire du bon larron. Au contrai-  
re , ceux lesquels meurent sans la foy de  
Iesus Christ sont damnez : car il est dict,  
*Qui ne croit point est desjà condamné , car il n'a* Ioan 3.  
16.  
*point creu au Fils de Dieu , Aussi , Qui desobeit* Luc 16.  
*au Fils ne verra point la vie , ains lire de Dieu*  
*demeure sus luy* : Ce qui se cognoist par le  
mauuais riche. Il demande donc par la  
conclusion de ce dilemme, ou sera le Pur-  
gatoire, puis qu'il n'y a point de moyē en-  
tre la vie eternelle & la damnation, entre  
la foy & l'incredulité, ou obstination?

Nous luy respondons qu'il y a deux sor-  
tes de ceux qui croient: aucuns partent de  
ce monde avec vne ame pure & nette; &  
n'estant aucunement engagée au peché;  
mais en estant entierement repurgee; cō-  
me entre autres, les Martyrs lesquels ont  
souffert pour nostre Seigneur: Les autres  
en sortent n'estants encores repurgez du  
tout des mondanitez , & des affections  
charnelles, sinon par repentance & con-  
fession du nom de Dieu, lequel ils ont re-  
cognu & reclamé auant que mourir: &



## Responce au 19.

*To. 7. op.  
lib. 5. Hy-  
pognost.  
contra Pe-  
lag.* defunts: Et premieremēt, il allegue S. Au-  
gustin, disant que *Premierement la foy Ca-  
tholique croit suuant l'autorité de Dieu qu'il y  
a le royaume des cieux : Secondement la gehenne  
d'enfer, en laquelle tout apostat ou estranger de la  
foy de Iesus Christ souffrira tourment : De troi-  
siesme nous n'en sçauons point du tout, & ne  
trouuons point es escritures qu'il y en ait: Voilà  
vne autorité bien formelle pour oster le  
Purgatoire; ce qu'estant, il s'ensuit que les  
prieres qui se ferōt pour les trespassez serōt  
vaines: Par ainsi Loque aura tout gaigné.*

*Joan. 3.  
Marc ult.  
Mat. 28.* Pour respondre à cest argument, il faut  
sçauoir le fond de la dispute qu'a S. Augu-  
stin en cest endroit-là, cōtre les Pelagians:  
Il tend à prouuer que selon l'escriture,  
il est necessaire que l'homme soit baptisé,  
pourestre sauué, par ce q̄ les Pelagians di-  
soient & soustenoiet que les petits enfans  
pouuoient estre sauuez, sans estre baptizez  
& regenez de l'eauë, & du saint Esprit,  
& sans communiquer au S. Sacrement de  
l'Autel: & disoit aussi que, *Celuy qui n'est  
point baptisé, est exclus du royaume des cieux où  
est la vraye fontaine de vie eternelle, qui est no-  
stre Seigneur Iesus-Christ: Or outre ce lieu (dit-  
il) il ny a point d'autre lieu ou puisse estre vn  
repos eternel.*

Sainct Augustin donc improuuant & refutant ceste peruerse opinion des Pelagiens conclud en ceste sorte contre eux. Il n'y a que deux lieux esquels l'ame apres ceste vie mortelle puisse demeurer eternellement, à sçauoir le Royaume des cieux pour la vie & ioye eternelle, & l'enfer des damnez. Or est-il que nostre Seigneur Iesus-Christ, dit, *Que quiconque ne se-  
ra regeneré d'eau & du saint Esprit, n'entrera point au Royaume des cieux,* parlant generalement & sans exception d'aucun: partāt, à tort & sans cause les Pelagiens veulent exempter les petits enfans de la subiectiō de ceste loy du Baptesine. Ioan. 3.

Or nous demandons à Loque, à sçauoir, si quiconque dit ( comme fait saint Augustin en cest endroiēt ) qu'il n'y a que deux lieux d'eternité pour les ames apres ceste vie mortelle, sçauoir est, le Paradis des bien-heureux, & l'enfer des damnez, desnie qu'apres ceste vie mortelle, il y ayt quelque lieu de peines temporelles, pour les ames, lesquelles partent de ceste vie mortelle, estans encores redeuables à la iustice de Dieu. L'un n'empesche point l'autre. Mais telle a esté la subtilité de Loque, de prendre le dire de saint Augustin

## Responce au 19.

à l'aduantage de sa mauuaise cause, voulant oster la iustice temporelle de Dieu.

Il allegue encore vne autre sentence du mesme sainct Augustin en ceste sorte,

*Mensonge  
de Loque.*

*Les ames des bons separez des corps sont en repos & n'en faut nullement douter. Mais les ames des meschans sont punies iusques à ce que les corps de celles là resuscitent à vie eternelle, & les corps de ceux cy à mort eternelle.* Il dit auoir extrait ceste sentence du 13. liure de la Cité de Dieu, chap. 9. & toutesfois apres auoir leu ledict chapitre dudict liure de sainct Augustin, nous trouuons qu'il n'en dit rien. Toutesfois, apres auoir bien exaggeré ceste sentence, nous voulons que celuy qui en a si mal informé Loque, l'ait trouué en quelque autheur receuable, s'estant seulement abusé en la cotte du passage. Nous luy respondons, comme estans d'accord de la verité du contenu en ceste sentence, *Et disons que les ames des bons separez des corps sont en repos*, comme il est contenu en ceste sentence alleguee par Loque. Mais nous disons aussi suyuant l'accord & conformité qui se trouue au *memento* des trespassez, en lieu de la contrarieté qu'il dict y trouuer, qu'il y a deux sortes de repos pour les ames des bons qui sont defuncts.



Il y a le repos de gloire eternelle, qui consiste en la iouyssance de la vision de Dieu: & vn repos qui est seulement vne exemption de troubles, fascheries, tentations & incertitudes de la vie de ce monde: Le premier repos est pour les bienheureux, lesquels voyent Dieu en face, comme dict saint Paul; le second est des 1. Cor. 13. ames, lesquelles en partant de leurs corps se sont encores trouuees redeuables à la iustice de Dieu, n'ayant deuëment satisfait pour leurs fautes en ce monde: & voilà comment ce passage ne peut empêcher, ny le Purgatoire, ny les prieres qu'il faut faire pour les trespassez.

Après il allegue vn passage de saint Traict. 2.  
contra  
Demetr. Cyprian portant ces mots: *Quando isthinc excessum fuerit nullus iam locus pœnitentiæ est, nullus satisfactionis effectus.* Quand-on sera party d'icy, il n'y aura plus lieu de penitence, ny plus d'effect de satisfaction. Icy la vie est perdue ou gardee.

Ce qui nous montre que Loque ne sçait ce qu'il allegue, c'est, qu'il dict que ce passage est extrait du 4. liure des epistres de saint Cyprian en la quatriesme epistre Mensonge  
de Loque. *ad Demetrianum.* Et nous luy disons avec assurance qu'après auoir bien leu les epi-

## Response au 19.

stres de S. Cypriā no<sup>9</sup> n'en trouuōs aucune *ad Demetrianū*, & q̄ la 4. epist. du 4. liu. qu'il allegue n'est point *ad Demetrianū*, ains elle est, *ad Presbyteros & Diaconos*. Mais apres ce 4. liure des Epist. de S. Cyprian se trouue son traicté vnique, *contra Demetrianum*, qui est le premier de tous ses traictéz : & sus la fin d'iceluy traicté ceste sentence se trouue ainsi cōme elle est alleguee : Mais il falloit monstrier que Loque n'a point veu le passage qu'il escrit, & qu'il ne sçait pas l'intention de laquelle parle saint Cyprian; & partant qu'il le prend mal, comme le tenant de la bouche ou de l'escrit d'autrui, bien que mal allegué.

Or ceste sentence de vray estant en saint Cyprian, il nous la faut prendre selon l'intention de saint Cyprian, lequel en tous ses escrits n'a iamais eu intention de contreuenir à l'escriture sainte, & puis

**Lec. 13.** qu'en icelle nostre Seigneur nous dict, *Nisi pœnitentiam egeritis, omnes simul peribitis*, Si vous ne faictes penitence, vous perirez tous. Ceste penitence se doit faire en ceste vie mortelle, en laquelle il y a tousiours moyen de meriter & satisfaire, mais elle ne se peut pas accomplir egaleement en tous, attendu qu'aucuns ne le veulent pas, & de ceux qui le veulent & qui s'y

estudient les vns manquent tousiours de quelque chose en leur penitence, ou l'interrompent pour s'addonner trop ardemment aux affaires du monde, sans toutes-fois du tout abandōner & quitter la voye de salut, qu'ils ont commencé à prendre par leur penitence. Les autres sont preuenus de mort, & demeurent redeuables à la iustice de Dieu, de ce qui leur est manqué pour le paracheuement de leur penitence. Les autres (comme le bon larron) ont vne digne contrition de leur faute & font digne penitence laquelle Dieu a pour agreable, cōme cooperante avec le merite de la mort & passion de nostre Seigneur: car ainsi desire saint Paul que nous cooperions avec nostre Seigneur, quād il dit, *Coadiutores Dei sumus*, que no<sup>r</sup> sommes Luc 23.  
1. Cor. 3. coadiuteurs de Dieu.

Il faut donc du moins que le pecheur soit entré en repentance & en satisfaction deuant que deceder de ce monde: car l'ame estant partie d'avec le corps pour aller au iugement de Dieu, il n'est plus tēps de commencer à se repentir & à satisfaire, & n'y a plus moyen de faire du bien en recompense du mal qu'il a fait en son corps mortel, par lequel il faut



## *Responce au 19.*

meriter ainsi comme par iceluy nous auons offensé. La satisfaction donc ( selon saint Cyprian ) ne se peut pas faire apres ceste vie mortelle , & n'est plus temps alors de la faire : Raison , pour faire penitence & satisfaction , il la faut commencer, continuer , & acheuer, qui sont trois choses toutes differentes. Or le commencement du moins en doit estre en ceste vie mortelle, puisque le peché s'y est commis. Quant au reste, Dieu ayant esgard à la volonté des penitēs, les supporte, & supplée les defauts de ceste vie mortelle par sa misericorde, nous faisant apparoir par ce moyen qu'il met en oubly les fautes des pecheurs si tost qu'ils se conuertissent à luy , commuant les peines eternelles en temporelles , lesquelles il faut supporter partie en ce monde , partie en l'autre , le cas aduenant qu'en nostre mort nous ne soyons dignement purifiez, pour paruenir à la iouissance de gloire eternelle. Il faut donc du moins auoir fait jà en ce monde quelque partie de la satisfaction necessaire pour paruenir à la vie celeste. Voilà l'intention de saint Cyprian conforme à l'escriture.

De là Loque vient à alleguer vn passa-

ge de saint Basile, vn de saint Iean Chrysostome, deux de saint Hierosme, vn de saint Gregoire Nazianzene, lesquels tous portent le mesme suiet & disent la mesme chose qui est dicte en ce passage preallegué de saint Cyprian: Sçauoir est, qu'il faut faire penitence en ceste vie mortelle, & qu'il n'y a apres icelle, aucun moyen de satisfaire. Tous ces passages comme disants la mesme chose qui est contenuë en celuy de saint Cyprian meritent vne mesme exposition, & non autre; partant nous ne nous y arresterons point plus longuement.

Il met par apres vne autorité de Petrus Lombardus, disant, *Tout ainsi que anciennement ceux qui regardoyent au serpent d'airain esleué estoyent gueris de la morsure des serpents: Ainsi si par le droit regard de la foy nous regardons à IESVS-CHRIST qui pour nous a esté pendu au bois, nous sommes deliurez des liens du diable, c'est à dire, des pechez: voire tellement que mesme apres ceste vie il ne trouue en nous aucune chose qu'il punisse.* Ce passage est veritablement de mot à mot au lieu, & en l'auteur preallegué: mais Dieu soit loué de ce que Loquel'a voulu inserer pour nous faire veoir sa

*in moral.  
reg. 1. c. 2.  
Ser. 2. de  
Lazaro.  
in. 65. c. 65.  
in c. 6. ad  
Gal.  
in carm.  
sui.*

*li. 3. sent.  
dist. 19. 8.  
Nunc.*

## Responce au 19.

vergongne. Il dit que par la foy de nostre Seigneur nous sommes deliurez des liens du diable, de sorte qu'il ne trouue que punir en nous ny en ce monde ny en l'autre. Mais il ne diët pas qu'il n'y a point de Purgatoire pour accomplir & paracheuer les peines deuës aux ames des defuncts pour leur satisfaction, & que les peines deuës au peché sont acquittees en l'ame seule quand elle est separee du corps, sans le ministere du diable, lequel n'est employé qu'à la vengeance qui est deuë aux damnez. Partant ce passage duquel se pense ayder Loque ne fait rien cōtre le Purgatoire, ny contre les prieres qui se font en l'Eglise pour les trespassez.

En apres il allegue quelques passages de l'escriture desquels il dit que sa pretenduë conclusion de l'aneantissement du Purgatoire se peut tirer, & en propose trois particuliers, le premier, disant, *Qu'il nous faut tous comparoir deuant le throsne iudicial de Iesus-Christ afin qu'un chacun raporte en son corps selon qu'il aura fait, ou bien ou mal.* Mais ce passage luy sert de condamnation. Car s'il faut que chacun rēde compte deuant Dieu, premierement en son iugement particulier quand l'ame est separee



du corps: puis au iugement general, il ne faut douter que chacun ne reçoive iugement selon le merite ou demerite de ses œuvres. Or les œuvres de tous ne sont pas égaux, ny les bons, ny les mauvais, à cause dequoy il y a en la beatitude & en la damnation plusieurs degrez tous differēs. Semblablement aussi entre ceux qui auront amandé leur vie, les vns plus, les autres moins, les vns preuenus de mort, les autres nō, il se trouuera difference de peines à la proportion des pechez qu'ils auront cōmis, attendu qu'il est dit en la Cité celeste, *Non intrabit in eam aliquid coinquinatum*: *Apo. 21.* Dont il s'ensuit que là où le peché duquel la penitence aura cōmencé auant la mort corporelle, & n'aura pas esté dignement accomplie, le reste sera parfait au feu du Purgatoire, duquel dict saint Paul (comme nous auons notté cy dessus) *vnusquisque opus quale sit ignis probabit*: *1. Cor. 3.* Que le feu esprouera quel sera l'œuvre d'un chacun. Le second passage de l'escriture qu'il allegue est de l'epistre de saint Paul aux Galates, disant, *Ne vous abusez point, Dieu ne peut estre mocqué, Car ce que l'homme aura semé, il le moissonnera aussi*. *Gal. 6.* Ce passage aussi est favorable à nostre Purgatoire,

*Responce au 19.*

& contraire à l'intention de Loque : ce qui se peut recognoistre par la diuersité des pechez: Car il est certain que le peché auquel l'homme meurt le meine à damnation, aussi est-il tout certain que puis que Dieu a dict qu'à quelque heure que le pecheur deplorera son peché & le recognoistra, Dieu effacera son iniquité. Si donc Dieu lequel sçait bien balancer sa misericorde avec sa iustice, veoit l'homme mourant auoir regret de ses fautes, il en aura pitié, & toutesfois afin que sa iustice ayt lieu, il ne l'exemptera pas de toute peine, puisque il rend à vn chacun selon ses œuvres, & qu'il veut que chacun recueille selon les actions qu'il a semé: & celuy qui mourra en obstination finale il le punira eternellement, celuy qui sera trouué en sa mort bien repurgé il l'enuoyera à la gloire eternelle. Le troisieme passage qu'il allegue est tiré de l'Apocalypse, où il est dict, *Bien-heureux sont les morts qui meurent en Dieu, Ouy, dit l'Esprit, car ils se reposent de leurs labeurs, & leurs œuvres les suyuent.* Ils se reposent de vray de leurs labeurs, mais de quels labeurs? des labeurs de ceste vie mortelle, en laquelle ils estoient subiects à vne

Ex. 18.

Apoc. 14.

infinité de trauerses , de tribulations & tentations par lesquelles ils estoient sollicitez à mal faire: or ils reposent de tels labeurs: car mesme és peines qu'ils souffrent en Purgatoire , pour suppleer ce qui leur a manqué de leur satisfaction en ce monde, ils ne sont plus subiects aux assaults de ce monde: & quant à ce qui est dict, que leurs œuvres les suyuent, cela signifie qu'ils sont recompensez selon les diuers merites de leurs œuvres: ce qui n'apporte aucune contrariété à ceste doctrine du Purgatoire & des prieres qui se font en l'Eglise pour les trespassez: & toutesfois Loque estime que ces trois passages de l'escriture soyent formellement contraires à l'un & à l'autre.

De là, cōme pensant s'estre bien assuré par les autoritez des Peres de l'Eglise & de l'escriture, contre ceste doctrine, il fait son syllogisme en ceste sorte pour combler ceste belle dispute,

*Toute peine temporelle finit en ceste vie,  
Car elle ne s'estend point iusques apres la mort.*

*Toute peine que les Sophistes disent se deuoir souffrir en Purgatoire est temporelle.*

*Donc toutes peines que les Sophistes pensent se*



devoir souffrir en Purgatoire finit en ceste vie,  
 & par consequent il n'y a nulle peine qui doyue  
 estre soufferte en Purgatoire apres ceste vie, ny  
 nulle priere utile pour les trespassez.

II De ce syllogisme la maieure ou pre-  
 miere proposition est purement faulſe, &  
 par consequent elle ne peut engēdrer vne  
 bonne conclusion. Bien vray est que pour  
 luy donner quelque apparence de bon  
 syllogisme, il nous appelle Sophistes en la  
 mineure ou assomptiō, & en la conclusiō  
 d'iceluy. Si pour mōstrer au doigt & à l'œil  
 ses mensonges & impostures, nous som-  
 mes Sophistes, nous prendrons ce nom à  
 gloire, d'autāt qu'en cela consiste vne bō-  
 nne partie de ceste responce que nous fai-  
 sons à ses pretendus abus de la Messe.

III Pour se monſtrer encores plus braue  
 homme en ceste dispute du Purgatoire  
 il allegue quelques raisons par lesquel-  
 les se maintient le Purgatoire, puis les  
 contredit pour sembler n'auoir manqué  
 en rien en sa dispute.

I. *Argument, pour le Purgatoire.*

Il propose en premier lieu le passage  
 du second liure des Macabees auquel il  
 est dit, que *Judas Macabeen ayant fait vne*

*pretendu abus de la S. Messe. 251*  
collecte enuoya en Hierusalem douze mille drag-  
mes d'argent pour offrir en sacrifice pour les pe-  
chez de ceux qui estoient morts, iustement & re-  
ligieusement, pensant de la resurrection: Car s'il  
n'eust eu esperance que ceux qui estoient morts  
resuscitassent, il eust esté superflu & vain de  
prier pour les morts.

Pour contredire à ceste authorité, il re-  
spond à ce premier argument que ce liure  
des Macabees n'est point canonique, mais  
apocryphe, & partant nō receuable pour  
prouuer vn article de foy.

Voyons vn peu la subtilité, ou plustost  
l'asnerie de ceste belle responce: premie-  
rement il dit que ce liure des Macabees  
n'est point canonique: & nous luy de-  
mandons, d'autant que ce texte est du se-  
cond liure des Macabees, à sçauoir si le  
premier est canonique: S'il est canonique,  
pourquoy le second ne sera-il pas aussi  
bien que le premier. S'il ne l'est point,  
pourquoy a-il dict du second particulie-  
rement qu'il n'estoit point canonique,  
ains apocryphe: car en cela il donne oc-  
casion de disputer de l'egalité des deux  
liures. Secondement il dit que ce liure  
(comme estant apocryphe) n'est point  
receuable pour prouuer vn article de

## Responce au 19.

foy. Sus quoy nous luy pouuõs dire q̃ l'autorité du symbole des Apostres est suffisante pour prouuer vn article de foy, quand mesme il ne se trouueroit disertement exprimé en l'escriture : & pour le regard du Purgatoire , qu'il ne fait pas vn article de foy, attendu qu'il n'est point exprimé au symbole des Apostres , & que neantmoins l'Eglise nous oblige à le croire , pource qu'il est notoirement tiré de l'escriture.

Or, poursuiuant sa pointe, il s'arreste à prouuer par authoritez des Peres ou Docteurs de l'Eglise, puis aussi par raisõs, que ce liure des Macabees n'est point au rang des canoniques, ains qu'il est apocryphe : & premierement il allegue saint Hierosme disant, que l'Eglise lit bien les liures des

*Epiſt. ad Chrom. & Heliod. epis. de li. Salom. in lib. Prou. in prasat.* Macabees, mais qu'elle ne les tient pas au rang & des escritures canoniques, & qu'elle lit ces deux liures pour l'edification du peuple, & non pour donner autorité à aucune doctrine Ecclesiastique :

Voilà ce que dict saint Hierosme : mais Loque le prend à son aduantage , & se montre passionné en sa cause en rapportant le dire de saint Hierosme : car il recite que saint Hierosme a escrit en ce lieu préallegué que les liures des Macabees ne



doquent point estre leus sinon, &c. comme il est dict cy dessus: mais au contraire, saint Hierosme dit que l'Eglise lit les liures des Macabees à l'intention susdicte. Et quant à ce que Loque a dict que saint Hierosme testifie que les liures des Macabees ne sont point au rāg des canoniques, il est expliqué en sa preface des liures des Macabees, qu'ils ne sont point du canon des Hebrieux, & que toutesfois de l'autorité de l'Eglise ils sont nombrez entre les liures de l'histoire sainte, à cause des beaux & rares exemples qui y sont recitez. Et saint Augustin dit, que les liures des Macabees ne sont point du canon des Hebrieux, mais bien du canon de l'Eglise, à raison des beaux exēples de sainteté qui y sont mentionnees. Voilà ce qu'en dit saint Hierosme, & apres luy S. Augustin, & ce que Loque y a adiousté du sien.

*lib. 18. de  
ci. Dei. ca.  
36.*

Il allegue aussi saint Cyprian, lequel apres avoir nombré les liures canoniques dit, *Qu'il y en a d'autres lesquels ne sont point canoniques, mais qu'ils sont appellez Ecclesiastiques par les anciens; & entre iceux, il nomme les liures des Macabees, lesquels les anciens ont bien voulu estre leus en l'Eglise, mais non pas*

*in exposit.  
symboli.*

## Responce au 19.

*alleguez en autorité pour confirmation de nostre foy.* Voilà qui est bon : nous en sommes d'accord : Mais de ce passage de saint Cyprian nous tenons donc vne chose, qui est que l'Eglise veut bien que ces livres soyent leus au peuple : d'où nous tirons que ce n'est pas mal fait que de lire l'histoire de Iudas Macabeus que Loque a allegué pour nostre premier argument du Purgatoire. Et si l'Eglise iuge que ce n'est pas mal fait de lire ceste histoire en public, elle iuge donc aussi que ce n'est pas mal fait d'esperer ( comme esperoit Iudas Macabeen ) que les prieres & oblations des viuants puissent seruir au soulagement des defuncts : que si elle ne iugeoit cela, elle ne permettroit pas que ceste histoire fut leuë en public, attendu qu'elle ne permet de lire que ce qui peut seruir à la doctrine ou edification des Chrestiens, que si l'Eglise n'a pas improuué ( par ceste permission ou tolerance ) l'oblation de Iudas Macabeen, pour ses amis morts en la guerre, comment pourra-elle improuuer l'oblation du sacrifice de la Messe, quand elle se fera en faueur des trespassez. Voilà comment Lo-

que s'efforçant de nous oster ceste affection charitable de prier pour les morts, nous ouvre l'esprit, & la voye de nous y affectionner de plus en plus: car l'Eglise, comme nostre Mere commune, & desirant nostre salut, ne nous bailleroit pas à lire ceste histoire, si elle contenoit quelque chose qui fut preiudiciable à nostre foy, ou à nostre instruction, & à nostre salut.

En tiers lieu, il allegue l'opinion de S. Augustin, sus l'approbation de ces liures des Macabees, disant, *Qu'ils ont esté receus de l'Eglise Chrestienne, non inutilement, & nommément à cause de l'histoire des Macabees qui (comme vrais Martyrs) ont beaucoup souffert pour la loy de Dieu.*

Cela a son poids, dict Loque: mais le mesme Docteur adioust, *Si sobriè legatur & audiatur*: Si ceste histoire ou ce liure est leu & ony sobrement.

Il adioust du sien, au dire de saint Augustin, ces mots, *Si sobriè legatur & audiatur*: Et si il ne l'a adiousté, pourquoy a il cellé le passage où saint Augustin a dict celà? nous y aurions recours: mais apres avoir soigneusement recherché en quel endroit il a dict ces mots, que Loque luy



## Responce au 19.

attribuë , nous ne trouuons point passage auquel il parle plus clairement de l'autorité des liures des Macabees , que celuy que nous auons allegué cy dessus , en respondant à ce qu'il a allegué de saint Hierosme, contre le Purgatoire ; & là , saint Augustin ne diët point ces mots que luy impute Loque, *Si sobrie legatur & audiatur*: Quiconque allegue les Docteurs de l'Eglise en dispute, pour asseurer son dire, ne doit point estre honteux de coter les passages qu'il en tire , pour se fortifier , & maintenir son dire.

Pour quatriesme autorité, il met en auant vn denombrement des liures canoniques de l'escriture sainte , rapporté en vne epistre de Melito , Euesque de Sardes, à son frere Onesimus , en l'histoire Ecclesiastique d'Eusebe : en laquelle epistre le diët Melito ne faiët point mention des liures des Macabees: Il conclud donc de là que ces liures sont Apocryphes , nous ayants mieux tenir avec saint Cyprian, saint Hierosme, & saint Augustin, qu'avec Loque, nous sommes contents de tenir que ces deux liures sōt Ecclesiastiques, c'est à dire, du canon de l'Eglise , & partāt que nous nous en pouuons seruir aux fins

& intentions de l'Eglise, selon qu'elles sont declarees par les susdicts Docteurs d'icelle: De là il est tout apparent que Loque conclud fort mal de l'autorité du susdict Melito, comme disant: Melito au denombrement qu'il faict des liures canoniques de l'escriture, ne faict aucune-ment mention des liures des Macabees, partant nous ne nous en deuons point seruir? car quand telle auroit esté l'intention de Melito (ce que nous ne presumōs pas) l'autorité de l'Eglise, laquelle (selon saint Cyprian) veut qu'ils soient leus, seroit tousiours preferee à vn particulier.

Il vient en apres aux Conciles & decrets de l'Eglise, & allegue en premier lieu le Concile de Laodicee, qui fut tenu enuiron l'an de grace, 364. sous le Pape <sup>can. 59.</sup> Liberius, confirmé depuis, & approuué par le sixiesme Concile general, qui fut à Constantinople: auquel est dict expressement, qu'il est defendu de chanter en l'Eglise autres Pseaumes & Cantiques, que de l'escriture sainte & canonique; comme aussi d'y lire autres liures que de l'escriture canonique, & y sont nombrez les liures canoniques de l'escriture sainte, & là n'est point faict mention des liures des

## Responce au 19.

Macabees: celà est vray, mais là il n'est pas defendu à l'Eglise d'attribuer quelque autorité aux autres liures, desquels elle iugera qu'il se pourra tirer quelque edificatiō pour le peuple de Dieu: & que (toutes choses concernant l'aduancement du salut des ames, luy estants mises en sa disposition) elle n'ait tousiours eu l'autorité de nous bailler à lire ce qu'elle aura iugé nous estre salutaire: Puis que donc elle a trouué bon de se seruir des liures des Macabees, pour par les exēples des Iuifs, exciter vn saint zelle & amour de Dieu, & les rendre fermes & constants en leur religion: il ne faut point penser qu'elle ait rien fait au preiudice de ce Concile de Laodicee, ny que ce Concile face rien contre l'Eglise en ce qu'elle appelle ces liures Ecclesiastiques, c'est à dire, en ce qu'elle tient qu'ils sont du canon de l'Eglise. D'auantage, Loque lequel a cy dessus deferé à saint Hierosme, saint Cyprian, & saint Augustin, s'oubliroit il bien tant maintenant soubz l'autorité de ce Concile, de reuoquer ce qu'il a consenty & accordé avec eux, de l'autorité qu'il a attribué à ces liures des Macabees, sous le nom de ces bons Docteurs de l'Eglise.



En cinquiesme lieu, il met en auant le decret de Gratian, lequel en la seiziesme distinction monstre que les liures des Macabees ne sont point tenus pour canoniques, ains pour Apocryphes, & que par consequent il ne faut point conclure d'iceux les prieres qui se font en l'Eglise pour les trespassez: Il allegue Isidorus, disant en ceste sorte, *Les canons qu'on dict des Apostres, pour ce que le siege Apostolique ne les a point receus, ny les saincts Peres ne les ont point approuuez, d'autant qu'ils sont recogneus auoir esté composez par les heretiques, sous le nom des Apostres, combien qu'on trouue en iceux quelques choses utiles, neantmoins leurs actes sont esloignez del'autorité Catholique & Apostolique, & reputez entre les Apocryphes: Or Apocryphe (dict la glose) signifie, sans autheur certain, comme la Sapience de Salomon, le liure de Iesus fils de Sirach, qui est dit Ecclesiastique, le liure de Iudith & de Tobie, & le liure des Macabees: ceux cy sont appelez Apocryphes, & toutesfois on les lit, mais non point publiquement: Voilà que veut dire Loque par ceste allegation: Isidorus est autheur ancien, tres-renomé entre les Catholiques: Aussi est bien approuué par eux mesmes le decret de Gratian: & par tous les deux en ce*

*dist. 16.  
canones.*

*Responce au 19.*

passage susdict, sont declarez les liures des Macabees apocryphes, & par consequent de nulle autorité: Comment donc les Catholiques en presument-ils tirer vn argument pour prouuer les prieres qui se font en leur Eglise pour les trespassez?

Il a cause gaignee ce luy semble: mais nous le rembarrerons par la mesme distinction qu'il allegue, & par le mesme Isidorus, duquel il ne deuoit pas diuiser l'intention pour s'en seruir en son opinia-streté; ains il deuoit purement & simplement, selon qu'elle se trouue en ce canon, *Canones*: Puis apres au canon, *Clementis*, & au canon, *Placuit*.

L'intention dōc d'Isidorus, selon qu'elle est fort bien recognuë en la glose du premier canon de ladicte distinction, qui se commence, *Canones*, est, de vuidier & decider ceste question, à sçauoir, si les canons des Apostres, sont apocryphes, ou non. Premièrement donc pour fauoriser probablement l'affirmatiue, & soustenir qu'ils soient apocryphes, le decret allegue ce passage cy dessus proposé par Loque, qui est d'Isidorus, donnant quelque raison pourquoy il semble qu'ils ne sont canoniques, c'est à sçauoir: *Pour ce qu'ils*

ont esté composez par les heretiques sous le canon des Apostres : Apres celà , le mesme decret propose l'autorité cōtraire du mes-

me Isidorus, disant en ceste sorte , *Propter* <sup>ca. placens</sup> <sup>dist. 16.</sup>

*eorum auctoritatem cæteris conciliis præponimus canones qui dicuntur Apostolorum , licet à quibusdam apocryphi dicantur , quoniam plures eos recipiunt , & sancti Patres eorum sententias synodali auctoritate roborauerunt , & inter*

*canonicas posuerunt constitutiones :* Nous preferans les canons qui sont appelez canōs des Apostres à cause de leur autorité, aux autres Cōciles , combien que par aucuns ils soient reputez apocryphes, pour ce que plusieurs les reçoient, & les saints Peres ont confirmé de leur autorité les sentences d'iceux , & les ont tenu pour constitutions canoniques : voilà trois raisons que Isidorus oppose à ceux qui ont voulu dire que les canons des Apostres, ou qui sont nommez des Apostres , & tenus pour estre d'iceux, auoient esté composez & compilez par les heretiques. Loque pour faire tenir son opinion a pris la negatiue de ceste question , selon qu'elle est exprimee par Isidorus , & a voulu taire l'affirmatiue, laquelle toutesfois est fauorisee de trois raisons fort pertinentes :



## Responce au 19.

Voilà comment il abuse des escrits des Peres, & il ne les rapporte pas selon leur intention, chacun le peut iuger par ceste conference.

Et quand Isidorus auroit simplement proposé la raison de ceux qui disent qu'ils ont esté composez par les heretiques, si faudroit-il plustost adherer aux anciens qui en ont parlé longuement deuant luy, que non pas à ceste partie que tient Loque. Or, est il que le Pape 3. Epherinus, qui estoit enuiron l'an 198. en a parlé en ceste sorte, *Sexaginta sententias Apostoli præ-*  
*dist. 13. scripserunt, cum aliis plurimis Episcopis, & ser-*  
*c. sexaginta. uandas censuerunt* : Ce qui est allegué en la mesme distinction du decret de Gratian, que les Apostres ont publié & ordonné avec plusieurs autres Euesques, soixante sentences, & ont estimé qu'elles deuoient estre maintenües & gardees : & est à croire que quand Isidorus n'auroit pas tenu les canõs des Apostres pour canoniques, si ne les auroit il pas voulu tous condamner & reprouuer, sans exception, ains seulement ceux lesquels l'Eglise iugeroit auoir esté composez par les heretiques, comme il a esté dict du commencement; que c'estoit la raison pour laquelle aucuns  
ont

ont eu ceste opinion qu'ils estoient apocryphes.

Il adiousté encores trois raisons, pour lesquelles il maintient que ceste authorité des Macabees, voire tout le liure (dict-il) ne merite point de foy : La premiere est que ce passage n'est pas seulement suspect, ains aussi dangereux, comme contenant vne doctrine contraire aux liures canoniques : Mais nous luy respondons deux choses : La premiere, que ce passage ne contient point de doctrine, ou de precepte, mais bien vne louable exemple de prier pour les fideles trespassés : Et là, il demande d'où est ce que tient Iudas Macabeen, qu'il faut offrir pour les pechez des morts douze mille dracmes d'argent, qui sont enuiron 700. escus sol : A quoy nous luy respondons que ceste somme ne se trouue limitée & determinee par aucun commandement de Dieu, ny par aucun passage de l'escriture : mais nous luy demandons aussi s'il est necessaire deuant que telle deuotion se face, qu'il y en ait commandement expres en l'escriture : car si cela estoit, que deuiendroient, *Les traditions escrites, ou non escrites*, desquelles toutesfois saint Paul veut qu'on face estat,

*Responce au 19.*

comme de choses dignes de foy : Nous luy disons donc que Iudas Macabéen tenoit ceste deuotion , non d'offrir par nombre determiné d'argent , ou d'autre chose , mais bien par deuotion ce que Dieu inspireroit, pour faire prier pour les morts ; & que les Iuifs apprenoient ceste deuotion par la pratique de leurs Peres & anciens qui leur en donnoient exemple : Aussi disons nous q̄ cela a esté inspiré aux premiers Peres de ce peuple Iudaïque, lesquels par tout office funebre , ont honoré la memoire de leurs defuncts ; cōme nous lisons d'Abraham, Isaac, Iacob, Aaron, Moÿse , & autres : Or, pour sçauoir quelles ceremonies ils ont obserué , faut voir le dernier chapitre de Genese, auquel leur coustume & maniere de faire est amplement deduite.

Loque nous obiecte qu'aux liures canoniques de l'ancien Testament , il n'est point fait mention d'aucun sacrifice pour les morts : ce que recognoissans les grands maistres de la Messe ( ainsi appelle il par derision ceux lesquels premiers ont célébré la Messe , qui sont les Apostres ) en la Messe du iour des morts , ayāts fait vne leçon, ou epistre de ce passage , ils ont tracé



*pretendu abus de la S. Messe.* 258  
& biffé, ce mot, *Sacrificium* : Voilà son dire : Voyons-en la faufeté.

Premierement, il dit qu'en tout l'ancien Testament il n'y a point de commandement de prier & offrir sacrifice pour les morts : nous luy accordons cela : mais il faut aussi qu'il nous accorde que selon ce passage des Macabees , il apparoit que par tradition venuë des Peres anciens par succession de temps , les Macabees prioient & offroient sacrifice pour leurs morts , & qu'ils tenoient cela de pere en fils : Or, S. Hierosme parlant de la force & vertu des traditions, dit, *Cum exigit ubi quid scriptum sit, etiamsi scripturæ authoritas non subesset, totius orbis in hanc partem consensus instar præcepti obtineret: Nam & multa alia quæ per traditionem in Ecclesiis observantur, auctoritatem sibi scriptæ legis usurpauerunt, veluti in lauachroter caput mergitare, multaque alia quæ cum scripta nō sint, rationalis sibi observatio vindicauit:* Quand tu demandes où est escrit quelque chose, quand mesme l'autorité de l'escriture n'y seroit pas , le consentement de tout le monde a lieu en ce precepte & commandement expres : car beaucoup d'autres choses qui sont obseruees & pratiquees és Eglises par tradition , ont autho-

to. 2. ad-  
uersus  
Lucife-  
rianos.

## Responce au 19.

rité de loy escrite, comme plonger trois fois la teste au baptesme, & plusieurs autres choses, lesquelles n'estants point escrites sont fondees sus l'obseruatiō & pratique raisonnable: Voilà qui respond à ce que Loque dit, que les Macabees n'auoiēt point en tout l'ancien Testament de loy escrite de prier & offrir pour leurs morts.

Et quand à ce qu'il dit pour le regard de la coustume des Chrestiens, qui est d'offrir ce sacrifice, nō sanglant, en la celebration de la Messe, pour le soulagement & remede des trespassez, qu'en l'office de la commemoration des morts, apres l'epistre de la Messe, qui est de ceste histoire & passage des Macabees: il n'est fait aucune mentiō de ce mot, *Sacrificium*: cōme voulant inferer de là que l'Eglise n'entend point offrir de sacrifice pour les morts, il apparoit tout du contraire: car le mesme sacrifice qui est iournellement offert pour les viuantz, est offert aussi pour les morts, & de fait il n'y a point d'autre canon en la Messe qui se dit pour les morts, qu'en celle qui se dit pour les viuantz: & en toute Messe est fait memoire aussi bien des morts cōme des viuantz, d'autāt que ce sacrifice, nō sanglāt, est appliqué aux vns & aux autres,

cōme estāts tous membres de nostre Seigneur Iesus-Christ, & ayāts part à l'œuure & mystere de sa passion: &, si Loque auoit bien fueilleté les oraisons secretes, & le S. canon de la Messe, il y eut trouué ce mot, *Sacrificium*, qui signifie au contraire de ce qu'il a dict trop temerairement, que l'Eglise entend que ce sacrifice est aussi offert pour les morts.

Pour second argument, il dict que qui-conque ait escrit l'histoire des Macabees, soit Iosephe, comme saint Hierosme a <sup>contra Pe-</sup> pensé, soit quelque autre, il se dispense par <sup>lagianos.</sup> trop contre le droit: car il louë si haute- <sup>2 Macab.</sup> ment Razias Iuis, pour s'estre tué soy-mes- <sup>14.</sup> me, pour ne point tomber entre les mains de ses ennemis, qui est vne chose que Dieu defend expressement, quand il dict, *Tu ne tueras point*: comme aussi le droit canon le reprouue & condamne en termes expres, *Causa 13. quest. 5. can. si non licet.*

Pour responce, nous demandons à sçauoir si pour vne faute, ou mauuaise opinion d'un homme, il faut condamner ses autres actions, ou opinions, ou propos qui ne seront point à reprouuer. L'homme, par sa faute personnelle, ne



## Responce au 19.

peut changer la nature & bonté d'une chose : Que ceste faute là donc soit condamnée en l'historien qui a escrit les faits genereux & vertueux des Macabees, nous le voulons bien : mais s'il a dict, ou faict quelque chose de bon, il faut retenir de luy ce qui est bon, & condamner & reprouver le mal : Il en faut sentir avec saint Augustin, lequel dict, *Qu'és liures des Macabees Razias a esté grandement loué,*

80. 2. epist.  
61. ad dul-  
citium tri-  
banum.

*& estimé, mais son œuvre n'y est pas loué : & qu'il le faut plustost inger & condamner, que non pas imiter & ensuire :* C'est autre chose a vn hystorien de narrer simplement vn faict, & autre chose de l'approuver : Saint Augustin ne pense pas que l'intention de l'historien ait esté de louer & approuver le faict de Razias, & Loque dira du contraire : lequel des deux croirons nous ? Laissons passionner Loque en sa cause. Saint Hierosme a grandement blasmé Origene en ses mauuaises & sinistres opinions, comme il est tout notoire par ses deux epistres paschales : mais en fin il n'a pas condamné ce qu'il a bien dict en ses escrits : & pour preuue de ce,

80. 2. epist.  
ad Tran-  
quillinū.

*voyons ce qu'il en dict, Ego Origenem & consimiles propter eruditionem sic interdum le-*

*gendum arbitror, ut bona eligamas, vitemusque contraria, iuxta Apostolum dicentem, Omnia probate, quæ bona sunt tenete:* l'estime qu'il est bon quelquefois de lire Origene, & autres semblables, pour en tirer & eslire ce qui est bon, & de laisser le contraire, suiuant l'Apostre, lequel dict, Esprouuez toutes choses, & retenez ce qui est bon. Si donc ceste histoire de Lysias n'est point digne d'estre approuuee, il la faut reietter, & nō l'approuuer: mais pour celà, il ne faut pas reprouuer la louable coustume d'offrir pour les morts qu'auoient les Iuifs, par traditiō de leurs Peres anciens, pour estre recitee par l'autheur mesme, qui a escrit l'histoire de Lysias.

Le 3. argument qu'il nous allegue pour improuuer ce fait de Iudas Macabeē, voire toute l'histoire des Macabees, a vn debile fondement: Il est pris de l'excuse que l'autheur fait en la fin de son liure, en ceste sorte, *Si i'ay bien dit, & selon l'histoire, c'est mon desir: mais si i'ay parlé en bas & en petit stile, c'est tout ce que i'ay peu faire:* Qu'est ce que Loque trouue à reprendre & à blasmer en ceste excuse là? Il dira que les auteurs des liures canoniques, par la bouche desquels le S. Esprit a parlé, n'vsent point de ce lan-

2 Macab.  
15.

gage, & ne supplient point d'estre excusés enuers les hōmes, d'autant qu'ils sont assurés de ne mettre rien en auant qui ne doive estre receu cōme venāt de Dieu, ou cōme certaine parole de Dieu, venāt du ciel. Il est tout apparent que l'historien (quicōque il soit) ne s'excuse que du stile, & qu'il ne s'excuse pas du suiet duquel il a escrit en son liure: & encores que le haut stile ne soit pas requis en la descriptiō des choses saintes, & q̄ le S. Esprit soit guidé de ceux qui les mettent par escrit, & qu'il n'affecte pas le haut stile ny l'eloquēce, bien q̄ quelquefois aussi il parle par leur bouche d'un stile plus haut q̄ les plus excellēts orateurs de tout le mōde ne feirēt iamais; si se peut-il remarquer en l'escriture canonique, mesme és liures historiques d'icelle, quelque stile plus cōuenable à matiere, ou suiet des choses saintes, que celuy qu'a tenu & suiuy l'autheur qui a escrit l'histoire des Macabees: & pource que c'est vne histoire des Iuifs, il s'excuse enuers eux de n'auoir pas bien gardé, & obserué en ceste histoire le stile ordinaire & plus cōmun de l'escriture, afin que pour ce seul defaut ils ne delaissent de lire ceste histoire, laquelle pour cela ne leur sera pas moins fructueuse:



Donc ceste excuse que fait l'Autheur de ceste hystoire ne rēd pas son œuvre moins receuable entre gens de bien & affectiōnez à suyure les bons exemples des anciens. Que si cela estoit, il faudroit dire les epistres de saint Paul ne seroyent receuables entre les Chrestiens pour la mesme raison; pource qu'il dit qu'en sa façon d'Euangelizer il n'a point vsé d'eloquence ou sagesse de paroles, ains d'un stile simple, grossier & mal poly, d'autant que Iesus-Christ luy auoit prescrit vne telle maniere de proceder.

1. Cor. 2

2. *Argument pour le Purgatoire.*

Il propose pour second argument du Purgatoire ce que dict nostre Seigneur en l'Euangile, *Sois bien-tost d'accord avec ton aduerser partie pendant que tu es en chemin avec luy, de peur que ton aduerser partie ne te liure au Iuge, & que le Iuge te baille au Sergent, & que tu sois mis en prison. Je te dy en verité que tu ne sortiras point de là, iusqu'à ce que tu ayes rendu le dernier quadrin.* En ceste allegorie (dict Loque) l'aduerser partie c'est le diable ou le peché, nous nions cela avec saint Augustin. Le Iuge, c'est Dieu; le sergent, c'est l'Ange; la prison, c'est le Purgatoire, d'où

Math. 5.

## Response au 19.

nul ne peut sortir iusques à ce qu'il ait entièrement satisfait pour ses pechez, en souffrant au feu la peine qui leur est deuë. Nous sommes d'accord de ceste exposition, comme la tenants de saint Augustin mesme. Voions cōment Loque prouue que le Purgatoire ne se peut tirer de ce texte de l'Euangile.

To. 4. li. 1.  
de serm.  
Do in mō  
2e. cap. 21  
Euo. 1. li.  
2. de Gen  
contra  
Manich.  
6. 20.

Premierement il dit vouloir exposer sommairement le sens de ce passage de S. Mathieu duquel cest argument est tiré: puis il proteste descouurir les erreurs & absurditez d'iceluy argument. Or il baille vne autre exposition que celle-cy, & dit qu'en ce passage de l'Euangile nostre Seigneur parle de la reconciliation fraternele, & nous la recommande. Et pource qu'il arriue souuent que ceux qui ont fait tort aux autres sont plus difficiles à se reconcilier, il declare combien leur opiniastrété luy desplaist; c'est que celuy qui ne veut gracieusement entrer en accord, est finalement poursuyui à toute rigueur deuant le Iuge par sa partie aduerse. De là il s'arreste à verifiser que c'est la vraye exposition de ce passage, parce qui est dict par nostre Seigneur en saint Luc, *Quand tu vas au magistrat*, qui est la mesme chose

Luc. 12.

que celle-cy de saint Matthieu: cela n'est autre chose que le sens literal de ceste sentence. Mais cela n'empesche pas que le sens allegorique propose par saint Augustin ne soit suiuy, & en cela nous aymons mieux adherer avec luy qu'avec Loque. Voyons maintenant les erreurs & absurditez qu'il dit descourir en cest argument.

En premier lieu il dict qu'il y a erreur en ce que les Catholiques disent que nostre Seigneur a parle par allegorie, d'autant qu'il a parle simplement & par paroles claires & sans figures. Mais nous demandons à Loque quelle incommodité y-a-il de prendre ceste sentence de nostre Seigneur en son sens literal & simple premierement, puis apres en son sens allegorique? L'un n'empesche point l'autre. Il dit (selon saint Augustin) qu'il se faut bien garder de prendre vne locution figuree, comme si elle estoit dicte proprement, & au contraire vne locution proprement dicte, comme si elle estoit figuree: Nous en sommes d'accord, & aussi ne prenons nous pas l'exposition literale de ceste sentence, sçauoir est, en tant qu'elle conuient à la dilection du prochain, pour figuree:

*To. 3. de  
doctr. Chr:  
cap. 10.*



*Responce au 19.*

& celle par laquelle elle est accommodée au Purgatoire, nous ne la prenons pas pour literale, ains pour allegorique: & nous ne confondons pas l'une avec l'autre. Et si par ce passage de saint Augustin Loque vouloit dire qu'une sentence de l'écriture ne peut recevoir qu'une exposition, dequoy seruiroyent en l'Eglise de Dieu, & à tous ceux qui font profession de lire l'écriture, les diuerses expositions que recite saint Hierosme deuoir estre recognees en icelle? Il y a, dit-il, trois sortes de sens ou exposition en l'écriture, sçauoir est, le sens historique, par lequel est conserué & suyui l'ordre des choses qui sont escrites: Le Tropologique, par lequel apres auoir bien consideré le sens literal nous paruenons au sens moral & interpretons l'écriture selon les mœurs, c'est à dire, nous l'accomodons à la reformation des mœurs. Le sens spirituel ou theorique, par lequel nous montons à choses plus hautes, & delaissons les considerations terriennes, nous disputons de la beatitude & gloire celeste, afin que la meditation de la vie presente nous soit vne ombre ou imagination de la beatitude de future. Saint Augustin en recognoist

*Epist. 150  
ad Hedib.  
q. 10.*

*To. 3. lib.  
imperf. de  
gen. ad li-  
beram cap  
2. 6<sup>o</sup> To. 6  
li. de util.  
credendi  
ad Hono-  
raturum cō-  
tra Ma-  
nich. c. 3.*

quatre sortes, lesquelles neantmoins s'accordent fort bien avec les susdictes de S. Hierosme. La premiere, est l'historique, quand la chose est recitee selon qu'elle a esté faicte, soit qu'elle ayt esté faicte diuinement ou humainemēt. L'Allegorique, quand les choses qui ont esté dictes par figure sont ainsi entendues. L'Analogique, quand est demonstree la conuenance du vieil & nouveau Testament. L'Etymologie, quand est renduë la raison des choses qui sont dictes ou faictes. Sainct Thomas d'Aquin traittant des sens diuers de l'escriture se conforme plus à la distinction susdicte de saint Hierosme, selon laquelle il se peut iuger que plusieurs sentences de l'escriture se peuuent exposer sans aucune incommodité, en diuers sens: ce qui nous fait iuger que Loque a autrement entendu que saint Augustin, quand il en a allegué ceste sentēce, que ce qui se trouue dit figurement en l'escriture ne se doit point entendre figurement; & par consequent il a mal conclud que l'ordonnance de nostre Seigneur, par laquelle il commande au pecheur de s'accorder avec son aduersaire, ne se peut entendre, & litteralement de la dilection du prochain,

1. p. q. 1.  
art. 10.

Responce au 19.

& figurement ou allegoriquement du Purgatoire.

in 4. cap.  
epist. ad  
Gal.

Messonge  
de Loque.

Le second erreur qu'il dit trouuer en ceste exposition allegorique, est que ceux qui exposent ainsi ce passage, pretendent confirmer vn article de foy par vne allegorie: ce qui ne se doit faire, dit Loque, attendu que (comme il impute à saint Hierosme) *Les allegories ne doyuent point estre entendues selon la volonte de celuy qui les lit, ains selon le sens de celuy qui les a escrites.* Quand saint Hierosme auroit ainsi parle (ce qu'il n'a pas) voyons qui aura plus d'autorite: saint Augustin, lequel a expose ce passage allegoriquement, ou Loque qui maintient que ce passage ne se doit exposer que litteralement? Lequel des deux approche plus de l'intention de nostre Seigneur, ou lequel des deux s'est rendu plus capable d'en approcher? Au surplus saint Hierosme ne dit pas ce que Loque luy impute, & pour le remarquer, il se trouue par la lecture dudit commentaire, sus le quatriesme chapitre de l'epistre de saint Paul aux Galates, qu'il dispute contre Marcion & Manicee Heresiarques, lesquels pensoient que la loy ancienne deuoit estre autrement entendue qu'elle



n'estoit escrite: ausquels il respond qu'encores qu'ainsi soit que la loy doyue estre entenduë allegoriquement, comme il en est d'accord apres saint Paul, il ne la faut pas pourtant entendre à la volonté du lecteur, ains selon l'autorité de celuy qui l'a escrit. Il ne parle pas là de toute allegorie en general, ains seulement de l'allegorie de la loy ancienne: & quand il seroit question de toute allegorie en general, & non pas seulement de l'allegorie de la loy ancienne, il ne faudroit pas pourtant laisser l'allegorie que propose saint Augustin exposant le susdict texte de saint Mathieu, pour suyure celle que Loque nous voudroit bailler, au cas qu'elle en fut differente aucunemēt. Voilà ce que nous respondons au second erreur qu'il pretend imputer à l'exposition allegorique de ce texte. Venons au troisieme.

Pour troisieme erreur il dit que s'il se faut arrester à l'allegorie de ceste sentence Euangelique, qu'en icelle l'aduersaire signifie le diable ou le peché, en quoy il se trouueroit vne grande absurdité, qui est que cela estant, il faudroit necessairement faire alliance avec le diable ou avec le peché.

Responce au 19.

li. 1. de ser  
Do. in mō  
66. c. 21.

2. Petri. 5.

Or, q̄ par l'aduersaire il faille entēdre le diable ou le peché, nous luy niōs tres-biē ceste expositiō avec S. Augustin, pour ceste mesme absurdité en laquelle il faudroit necessairemēt tōber, cōme il dit; & pour euitter ceste absurdité, il dit, plus à propos que par l'aduersaire il faut entendre le commandement de Dieu, ou Dieu mesme, lequel le pecheur s'est rendu aduersaire quand il a offensé: Car tout ainsi cōme l'homme acquiert la grace de Dieu en obeissant à ses cōmandemēs, ainsi aussi il tōbe en disgrace enuers Dieu, quād il resiste à ses cōmādemēs; & ainsi cōme il resiste à Dieu, ainsi aussi Dieu luy resiste. Car il est escrit q̄ *Dieu resiste aux orgueilleux, & qu'il dōne sa grace aux humbles*, Or resister n'est-ce pas se mōstrer aduersaire? Partāt en suyuant l'exposition de saint Augustin, lequel reprouue celle de Loque, il reste que ledict Loque trouue vne autre absurdité pour alleguer contre l'exposition allegorique de ce passage Euangelique, duquel nous tirons le Purgatoire.

Pour quatriesme erreur il dit que si en cesusdict texte de saint Mathieu selon l'allegorie on entend Dieu, & par l'aduerse partie le diable, il s'ensuiura que nostre

Notre Seigneur Iesus-Christ nous commande de satisfaire au diable , pource que le debteur ne doit point satisfaire au iuge, ains à la partie aduerse qui le tire deuant le iuge. Voilà vne fausse conclusion tiree d'un antecedent de mesme: car nous auõs já nié qu'il faille entendre le diable par la partie aduerse. Item d'autant que en la partie aduerse ( selon saint Augustin ) il faut entendre Dieu, & que Dieu a donné à son Fils Iesus Christ tout pouuoir de faire iugement; Par le iuge nous entendons nostre Seigneur Iesus Christ, lequel viendra iuger les bons & mauuais. Et quant à ce qu'il dit que le debteur ne doit point satisfaire au iuge , nous disons que l'accusé, au contraire, doit satisfaire pour la dette & demande, à sa partie aduerse; & pour le regard de l'interrogatoire il doit satisfaire au iuge, c'est à dire, luy respondre par ordre, à propos, & sans riẽ desguiser de la verité; & à faute de ce faire il se perd soy-mesme : car s'il est trouué en contredict ou en mensonge, il n'en peut aduenir que sa condamnation & confusion. Voilà donc cest argument ou erreur pretendu , à val l'eauë.

En cinquiesme lieu, il dict, que si se-



*Responce au 19.*

lon ceste Allegorie ) les hommes sont tenus de satisfaire pour leurs pechez iusques au dernier quadrin , il s'ensuiura que Iesus-Christ n'a nullement satisfait pour nos pechez, chose fausse, dit-il.

Nous luy respondons que ceste consequence est nulle : la raison est , que si à cause de la satisfaction qu'a fait nostre Seigneur, les pecheurs n'estoyent aucunement tenus de satisfaire de leur part, chacun seroit sauué, & ne se trouueroit aucun damné, cōme nous auons obserué cy dessus : Il ne faudroit point aussi de iugemēt des bons & des mauuais, ce qui seroit formellemēt contraire à la parole de nostre Seigneur. Pournēat nostre Seigneur nous auroit-il commandé de faire penitence & de garder les commandemens pour paruenir à la vie eternelle. L'aduersaire dit, selon ce sens allegorique : Puisque celuy mesme doit satisfaire iusques au dernier quadrin lequel est en ceste prison de Purgatoire, dequoy donc luy seruira la Messe ou la priere d'autrui ? Nous luy disons Que tout ainsi comme quand quelqu'un est detenu en prison par son creancier pour la chose qu'il luy doit, si quelque sien amy veut payer pour luy, il est mis en

*Mat. 23.  
Luc. 13.*

liberté par le consentement de sa partie: Ainsi que Dieu relasche les ames de Purgatoire quand l'Eglise ou les amis par le sacrifice de la Messe, par prieres ou autres biensfaits les ont soulagé & secouru.

3. *Argument, pour le Purgatoire.*

Pour troisiésme argument il prend le passage de saint Mathieu par nous allégué cy-deuant, auquel il est dict, *Quicon-* *Math. 12*  
*que dira parole contre le Fils de l'homme, luy sera pardonné, mais qui dira parole contre le saint Esprit, il ne luy sera pardonné, ny en ce siecle, ny en celuy qui est à venir.* De là, dit-il, les Sophistes (ainsi nous appelle-il par plaisir) tirent cest argument.

*Si quelque peché n'est point pardonné en l'autre siecle, il s'ensuit donc que quelques autres pechez y soyent pardonnez.*

*Or, est-il, que quelque peché n'est point pardonné en l'autre siecle, c'est à sçavoir, le peché contre le saint Esprit.*

*Partant quelques autres pechez y sont pardonnez.*

Or, ce n'est point en Paradis, d'autant qu'il n'y entre aucun peché: ce n'est point aussi en enfer, car en enfer il n'y a point de redemption: c'est donc en Purgatoire.

## *Responce au 19.*

Voilà l'argument qu'il nous attribué, disant, que nous soustenons le Purgatoire. Voyons ce qu'il y trouue à reprendre.

En premier lieu, il nie la proposition de ce syllogisme, & allegue pour raison qu'il n'y a regle de Logique qui enseigne que d'une proposition negative on puisse recueillir une autre proposition affirmative, nommément es propositions qu'on appelle subcontraires : non pas quand on voudroit faire conuenir choses contraires en vn mesme suiet : car il est certain que proprieté ou accidents contraires ne peuuent pas compatir en vn mesme suiet. Et de faict ce braue Logicien qui fait estat de reduire les propositions de Theologie aux loix de la Logique, & les faicts de Dieu aux loix de nature, n'a pas oublié pour donner couleur à ceste belle raison qu'il a alleguee contre la premiere proposition du susdit syllogisme, de proposer vn exemple de deux propositions subcontraires en vn mesme suiet, auquel il attribue chose qui est du tout contraire. C'est vne chose asseuree qu'il est repugnant à la nature de l'homme d'estre beste : & toutesfois sus ceste contrariété ou repugnance, il a formé sa consequence



pour monstrier que d'une proposition negative on n'en peut pas recueillir vne autre affirmative; principalement, comme il a dit, és propositions subcontraires, & dit, Quelque homme, à sçavoir, Pierre, n'est point vne beste, Quelques autres donc sont des bestes : la consequence n'est pas bonne. Il est vray : mais ce n'est pas à cause de la subcontrarieté de ces deux propositions : ains à cause de la repugnance qui est entre le sujet & la chose attribuee : Car vne mesme chose ne peut estre homme & beste. Mais s'il eust voulu attribuer quelque chose à ce subiect d'homme qui n'eust point de contrarieté à sa nature, comme, estre blanc, ou noir, bon ou mauuais, c'est à dire, en la qualité des mœurs & de la vie; ce seroit bien conclure. Quelqu'homme est bon, il y en a donc aucuns de mauuais. Et de vray c'est vne proposition toute vsitee en Logique, *Contrariorum contraria sunt consequentia*, qu'à subiects contraires il faut attribuer choses contraires. Prenons donc pour exemple deux subiects contraires qui seront l'hōme & la beste, nous dirons donc & conclurons en ceste sorte en propositions contraires, l'homme est capa-

*Responce au 19.*

ble de raison ; la beste donc est destituee  
& priuee de raison. Mais le cas aduenant  
que la chose attribuee au suiet soit vn ac-  
cident ou qualite accidentaire & nō sub-  
stantielle ou essentielle , nous conclu-  
rons d'une proposition negative vne au-  
tre affirmatiue; & dirons que de ces deux,  
la derniere ensuit & se conclud de la pre-  
miere; Quelque homme ne court point,  
quelque homme donc court; quelque  
homme n'estudie point, quelque homme  
donc estudie; quelque homme n'est pas  
bon & vertueux, quelque homme donc  
est bon & vertueux. Voilà comment Lo-  
que fait du bon Logicien à son aduātage.

Au surplus de ce texte de sainct Ma-  
thieu auquel il est dict, que *le peché contre le  
sainct Esprit ne sera remis, ny en ce monde, ny  
en l'autre*, Loque prend suiet de calomnier  
le iugement & la decision de l'Eglise uni-  
uerselle, laquelle conclud de ce passage en  
ceste sorte, s'il y a quelque peché qui n'est  
remis ny en ce monde ny en l'autre, com-  
me est le peché contre le sainct Esprit, il  
s'ensuit donc qu'il y ayt quelque peché  
qui se remet en ce monde, & quelque pe-  
ché qui se remet en l'autre, Ainsi le con-  
clud sainct Gregoire Pape. Et Luther

bien qu'heretique de nostre siecle, tient ceste mesme conclusion, & l'allegue de saint Gregoire mesme, disant en ceste sorte, *Ego credo fortiter, imo ausim dicere scio* <sup>in disput.</sup> *Purgatorium esse. Facile persuadeor in scripturis* <sup>lyes.</sup> *de eo fieri mentionem, quemadmodum illud Mathei inducit Gregorius in dialogi libris, non remittetur in hoc seculo, neque in futuro, volens quaedam peccata remitti in Purgatorio.* Je croy d'assurance, voire j'ose dire, ie scay qu'il y a vn Purgatoire, & ie me persuade qu'il en est fait mentionés escritures, selon ce passage duquel se sert saint Gregoire en ses liures du dialogue, disant, que le peché contre le saint Esprit ne sera remis, ny en ce monde, ny en l'autre, voulant dire par là, qu'il y a quelques pechez qui sont remis & pardonnez ou effacez en Purgatoire. Loque expose ce passage d'une autre sorte. Il dict que le peché qui n'est point pardonné en ce monde, ne sera point aussi pardonné en l'autre. Mais quelle apparence y-a-il en ceste exposition? Il vaut trop mieux suyure celle de S. Gregoire, à laquelle Luther mesme aduerfaire de l'Eglise, pressé de l'esguillon de sa conscience, n'a osé contredire. Et ne sert de rien d'alleguer yne pretendue



*Responce au 19.*

*Marc. 3.*

exposition de ce texte de S. Mathieu par vn autre passage de l'Euangile de saint Marc, auquel il est dit de ce peché mesme, *Non habet remissionem in eternum*, qu'il ne sera iamais remis: car si ce peché n'est iamais remis ny en ce monde, ny en l'autre, il ne faut pas conclure qu'il soit ainsi de tous autres, & que nul autre ne puisse estre remis ny en ce monde, ny en l'autre, non plus que cestuy-cy.

Oultre-plus il dit qu'en ce mot de peché il y a erreur: Car il n'y a point de doute (dict-il) que nostre Seigneur n'entend parler de la remission de la coulpe du peché; que si ainsi est, ce passage ne sert de rien pour le Purgatoire. Nous luy respondons que nostre Seigneur entend que le peché duquel la coulpe est remise en ce mode, ne laisse pas quelquefois d'estre imputé en l'autre, pour la peine qu'il conuient y endurer, en cas que la satisfaction n'en ayt pas esté dignement faicte en ceste vie mortelle: & si, nous luy demanderions volōtiers d'où il a appris qu'au susdit passage de S. Mathieu nostre Seigneur n'entend parler que de la remission de la coulpe, veu que les Saints Docteurs qui ont plustost eu l'esprit de Dieu que luy, en-

redēt en ce passage la remissiō de la coul-  
pe en ce monde, & la remission de la pei-  
ne en l'autre. Il nous obiecte ce que S. Jean to. 5. serm.  
de panit.  
& cōfess.  
Chrisostome dict, *Nullus remittit qui puni-*  
*re vult*: Personne ne pardonne ayant vo-  
lonté de punir. Et de là il demande, com-  
ment donc est il possible que Dieu par-  
donne en ce monde la coulpe du peché,  
& le punit par apres en l'autre? il y a con-  
trariété entre pardonner & punir. Il ne  
regarde pas bien à quelle intention saint  
Jean Chrisostome a dict cela: il parle là  
de l'ire de Dieu cōtre son peuple d'Israël,  
pour lequel Moyse supplioit Dieu, & le  
requeroit de pardonner à ce peuple: Or,  
saint Chrisostome nous representant de  
quelle sorte, & à quelle intention Dieu  
pardonne à son peuple, ou bien au pe-  
cheur: nous propose ceste similitude;  
Ainsi comme nous mesmes quand nos  
seruiteurs nous ont offensé, & que nous  
les trouuons dignes de punition, nous ne  
les voulons pas punir, & aussi nous ne les  
voulons pas exempter de la crainte qu'ils  
doient auoir d'estre punis; nous prions  
nos amis de les oster de nos mains, afin  
que par ce moyen ils ne soient point ba-  
tus, & qu'ils ne laissent pas d'auoir crainte

*Responce au 19.*

d'offenser à l'aduenir : ainsi Dieu, qui vouloit punir son peuple, avec misericorde toutesfois, luy disoit (cognoissant que son intention estoit le supplier de pardonner à ce peuple) laisse moy courroucer contre ce peuple; à ce que ce peuple ne deuint plus prompt & enclin à offenser désormais son Dieu, le cas aduenant qu'il n'eut point esté puny, ou qu'il fut demeuré sans crainte apres son peché : & Dieu disant cela à Moÿse, retient ce peuple en crainte : C'est ce que diët saint Chrysostome, Celuy qui pardonne du tout ne punit pas, c'est à dire, celuy qui ne punit pas en forte quelcōque, & qui remet du tout le peché sans imposer aucune peine, rend le pecheur plus enclin à recidiner, & continuer en son peché : ce que Dieu ne voulant pas faire, il diët à Moÿse, laisse moy courroucer contre ce peuple : car celuy qui punit ( diët saint Iean Chrysostome) il se courrouce, non que le courroux soit vn affection cōuenable à Dieu, mais pour ce qu'il demōstre vne peine que Dieu enuoye à ceux qui l'ont offensé ? Loque a donc abusé de ceste sentence de S. Iean Chrysostome, & ne l'a pas pris selon l'intention de l'auteur.



*4. Argument pour la transsubstantiation.*

Pour quatriesme argument, il prend le  
texte de saint Paul que nous auons cy  
dessus allegué, par lequel il diét, *Si quel-* *1. Cor. 3.*  
*qu'un bastit sur ce fondement, or, argent, pier-*  
*res precieuses, le feu esprouuera quel sera l'œuvre* *scr. 41. de*  
*d'un chacun: Saint Augustin entre autres* *sanctis.*  
expose ce passage du feu de Purgatoire.  
Or, de ce passage il tire ceste raison pour  
les Catholiques qu'il surnomme les Ro-  
mains: *Les ames qui passent en l'autre siecle*  
*avec leurs pechez, ne peuuent entrer au royaume*  
*de Dieu, qu'elles ne soient purgees de toutes leurs*  
*ordures: Partant il faut que celles que Dieu veut*  
*sauuer, passent par le feu de Purgatoire, afin qu'e-*  
*stants là esprouuees, leurs pechez soyent consu-*  
*mex & bruslez par ce feu là, & que finalement*  
*estant lauees de leurs macules elles montent pures*  
*& nettes au ciel: Voilà vne raison fort lour-*  
*dement bastie pour vn braue Logicien; &*  
*pour ceste cause nous la luy laissons libre-*  
*ment, pour l'assurance que nous auons*  
*quil l'a bastie expres de ceste façon pour*  
*se donner carriere, & s'esgayer à nos def-*  
*pens. Cependât nous ne laisserons de tirer*  
*vne autre raison de ce passage de S. Paul,*  
*& puis nous mettrons peine de respon-*  
*dre aux belles raisons de ce bon Logicien,*

## Responce au 19.

*La peine due au peché doit estre proportionnee à iceluy peché pour lequel elle est imposée : C'est vne supposition qui seruira de fondemēt à nostre raison : laquelle premise, nous concluons le Purgatoire en ceste sorte: Les pecheurs qui decedent de ce monde, ont dignement satisfait à la iustice de Dieu pour leurs fautes, ou non : S'ils y ont satisfaiēt, sans doute ils montent à la gloire celeste: S'ils n'y ont satisfaiēt selon la mesure de leurs fautes, il faut q̄ leur purgatiō soit paracheuee apres ceste vie mortelle: Or ceste purgation ne se faiēt pas au ciel, d'autant que là il n'y a ny peché ny tourment: elle ne se faiēt pas aussi en enfer, d'autant que les peines d'iceluy sont eternelles: il reste donc que ceste purgation se face en quelque tiers lieu: & comment pourra estre mieux qualifié ce lieu, que du nom de Purgatoire? & c'est ce lieu là duquel parle sainēt Paul, quand il diēt que l'œuure d'un chacun de quelque sorte qu'il soit sera esprouué par le feu, selon son demerite, & par ainsi que le pecheur sera sauué, comme par le feu: Voilà la raison que nous tirons de ce passage de sainēt Paul.*

Or, Loque desirant contredire ceste

exposition, s'efforce de nous faire croire qu'il faut prendre ce texte de saint Paul, selon le sens literal, lequel il dict estre tel: Que saint Paul veut declarer par ce texte le merite de la doctrine des Pasteurs & Docteurs de l'Eglise, laquelle il veut estre telle qu'elle accorde du tout à l'Evangile, & qu'elle ne puisse renuerfer les fondements de la foy, comme fait l'heresie. Et saint Paul (dict-il) pour exposer plus à plain son intention, donne vne similitude de prise des Architectes, & de la matiere de laquelle ils se seruent en leurs bastiments, laquelle (si elle est bonne) demeure; sinon, elle perit: Là se raporte ce qu'il dict de l'or, de l'argent, & des pierres precieuses d'un costé: & de l'autre, ce qu'il dict du bois, du foin, & du chaume: & pareillement le feu dont il parle, par lequel il signifie la vertu & efficace du saint Esprit, qui en fait l'espreuve: Nous sommes bien d'accord de ceste exposition là; d'autant que plusieurs des nostres la tiennent, & entre autres, saint Hierosime: mais elle n'empesche pas l'autre que nous auons proposee de saint Augustin: & qu'ainsi soit le texte y est formel, auquel saint Paul dict, *Si cuius opus arserit detri-*



## Responce au 19.

li. 4. dial.  
cap. 39.

*mentum patietur, ipse autem saluus erit, sic tamen quasi per ignem* : Si l'œuvre d'aucun brulle, il fera perte, mais il sera sauué, toutesfois ainsi comme parmy le feu : c'est parler assez ouuertement du feu de purgation, sans chercher autre exposition. Sainct Gregoire Pape exposant ce passage de saint Paul, dict, que combien qu'il se puisse entendre du feu de tribulation, qu'il nous conuient endurer pour nos fautes en ce monde: toutesfois il s'entend aussi du feu de la purgation future, par lequel ne seront pas sauuez ceux qui bastiront sus le fondement de la foy, des pechez mortels, qui sont comparez au fer, à l'airain, & au plomb, qui sont matieres plus dures; mais bien ceux qui n'y bastiront que les plus legers pechez, qui sont les pechez veniels, & sont comparez au bois, au foin, & au chaume, qui sont matieres qui se consomment fort facilement au feu, & par lesquelles il est entendu aussi que les pechez veniels seront aisément purgez par le feu: Voilà l'exposition que dōne saint Gregoire sus ce passage apres S. Augustin. Or voyons comment Loque improuue ceste exposition.

Il employe derechef la raison mesme

qu'il a employé cy deuant , disant , que ce qui est dict par allegorie & similitude , ne doit point estre pris simplement , & ne faiët point de foy pour establir & prouuer vn article de foy. Or, ce qui est dict du feu en ce passage de saint Paul , est dit par allegorie & similitude: Parquoy il ne doit estre pris simplement pour dire que le feu de Purgatoire est vray feu.

Nous luy respondrons donc comme parauant , que ceste doctrine du Purgatoire n'est point vn des douze articles de la foy ; & que toutes fois il depend de la foy , & est de la foy , & que tout Chrestien le doit croire: & qu'il n'y a point d'inconuenient de prendre simplement ce qui se peut dire par allegorie , attendu qu'un mesme passage de l'escriture peut auoir plusieurs diuerses expositions , comme nous auons dict cy deuant : donc s'ensuit que si le passage susdict de saint Paul , s'explique des diuers œuures , & merites des Prelats, & Docteurs de l'Eglise, il n'est pas inconuenient pour cela qu'il ne s'entende aussi bien du feu de Purgatoire.

Pour ne s'oublier point de nous donner des attaques iniurieuses, sus ce propos il dict en passant que la cause pour laquel-

le les Prestres maintiennent que ce feu de Purgatoire, est vray feu , c'est qu'il est necessaire en leur cuisine pour faire mieux leurs affaires, & pour leur attirer , or , argent , & pierres precieuses : Mais sur ce propos, nous luy demandons si c'est ceste doctrine du Purgatoire, & du vray feu d'iceluy , qui faisoit venir à nostre Seigneur, pour luy & pour sa compagnie les dons & hōnestetez ordinaires des gens de bien, iusques à telle mesure qu'il auoit vn boursier qui referroit & gardoit tout ce qui estoit donné à ce saint College , pour l'employer aux necessitez d'iceluy ? Si Iesus-Christ a promis à son College qu'en vaquant aux choses saintes, rien ne luy manqueroit , & à ceste fin il a suscité des gens de bien & craignants Dieu, lesquels en recognoissance des œuures spirituelles ont secouru de leurs moyens temporels ceux qui procuroient le salut d'un chacun; à sçauoir , s'il a limité ce secours temporel de son Eglise au temps des Apostres, pour le faire cesser incontinent apres leur mort ? Mais ce n'est merueille de voir le mesdisant cōtinuer à tout propos ses mesdisances : car tout ainsi comme les serpents, crapaux, & araignees , &  
autres



autres animaux venimeux cōuertissent naturellement toute bōne nourriture en venin; ainsi les heretiques interpretent ordinairement toutes bonnes choses sinistrement, & en mauuaise part, comme nous auons dict cy dessus.

Il s'arreste encores à quelques autres expositions de ce mot de feu, pour contredire celle que nous auōs tiree de saint Augustin, & de saint Gregoire Pape, qui est du feu du Purgatoire: & premierement il allegue le mesme saint Augustin, & saint Jean Chrysostome sus ces mots du Psalme 66. *Imposuisti homines super capita nostra, Psal. 66. transiimus per ignem & aquam, eduxisti nos in refrigerium*: Par lesquels le Psalmiste dit à Dieu, Tu as mis les hommes sur nos testes, nous auons passé par le feu & par l'eau, & nous as mené en refrigeration: Il dict que par ce mot de feu en ce passage du Psalmiste, est entendue l'affliction, selon la similitude de laquelle vse saint Pierre en ceste matiere d'afflictions, quand il dict, *L'esprouue de vostre foy beaucoup plus precieuse que l'esprouue de l'or (qui perit, & toutesfois est esprouuée par le feu) vous tournera à louange, honneur, & gloire quand Iesus-Christ sera reuelé*: Mais nous demandons

à Loque si ceste exposition de saint Augustin peut faire croire au vray Chrestien que le mesme saint Augustin ait mal parlé, quand il a dict aussi qu'en ce passage de saint Paul il est parlé du Purgatoire? Saint Augustin peut auoir entendu ce mot de feu en l'une & en l'autre sorte, sans se contredire: Ce qui nous faict resoudre que c'est mal conclure à ce bon Logicien Loque, dire que saint Augustin sus le Psal. 66. entendât par ce mot de feu, l'affliction, le Purgatoire ne doit point estre entendu par le susdit texte de saint Paul.

in Psal.  
118.

Il donne par apres vne autre exposition de ce mot de feu, laquelle il tire de saint Ambroise, escriuant sus ces mots du Psalmiste, *Ignitium eloquium tuum*: Là où il dict que ce feu duquel entend parler le Psalmiste, est la parole de Dieu, laquelle eschauffe & ne brusle point: Nous sommes d'accord que saint Ambroise ait donné ceste exposition de ce mot de feu sus ce texte du Psalmiste, mais il ne s'ensuit pas de là, que l'exposition que nous auons donné cy deuant du Purgatoire, & du feu d'iceluy, ne soit bonne: l'une n'empesche point l'autre.

De là il vient à faire vne question sur ce feu de Purgatoire, & demande qui sont ceux lesquels y souffrent apres ceste vie mortelle : car il faut (dict-il) ou que ce soient les Pasteurs & Ministres de l'Eglise, ou bien tous les fideles en general : Si on dit que ce soient les Pasteurs & Ministres de l'Eglise : il faut donc dire que les Apostres & Docteurs anciens de l'Eglise, comme saint Pierre, saint Paul, saint Ambroise, saint Augustin, & mesme les Martyrs qui nous ont precedé y soyent descendus : ce qui est vne grande absurdité, attendu que le canon dict, *Iniuriam facit Martyri qui orat pro Martyre* : Que celuy fait iniure au Martyr, lequel prie pour le Martyr : Si on dict que ce soient en general tous les fideles qui descendent au feu de Purgatoire, il y a de l'absurdité encores, dit-il : car aussi tost y descendroient les Saints & esleus de Dieu, comme ceux desquels la sainteté ne se trouueroit tant recommandable au iugement de Dieu : ce qui seroit encores trop absurde : Que si sont aucuns seulement, & non tous les fideles, il faut donc sçauoir qui sont ceux-là : car si sont aucuns d'iceux distinctemēt, & non tous, comment les viuants leur

c. 13. q. 2.  
can. Tem-  
pus.



## Responce au 19.

pourront il appliquer leurs prieres , oblations, ou Messes, & autres bien-faiçts, s'ils ne sçauent quels ils font ? A quoy nous luy respondõs, sans auoir esgard à toutes ces belles subtilitez qu'il met en auant, qu'en general tous ceux-là descendent à ce feu de Purgatoire, lesquels auant leur mort corporelle, apres auoir reconnu Dieu, n'ont pas dignement & competemment satisfaiçt au iugement de Dieu pour leurs fautes, de quelque estat, ordre, ou qualitez qu'ils puissent estre, sans que le rang qu'ils ont tenu en ce monde y puisse apporter empeschement, d'autant que chacun esgalement est subiet au iugement de Dieu. Et quand à ce qu'il dict que pour biẽ assseurer les prieres que nous voulons faire pour les trespassez, il faudroit préallablement sçauoir en quel estat ils sont, pour ce que les prieres des viuants ne seruent en rien, ny aux bien-heureux, ny aux damnez, Nous luy disons que nous deuõs tousiours nous employer de secourir les trespassez par nos prieres, oblations ou Messes, & autres bien-faiçts, pour autant que s'ils sont en estat auquel ils n'en ayent que faire, le bien & le merite ou fruiçt de nostre priere nous reuient

*D. Aug.  
serm. 44.  
ad fra. in  
Eremo.  
to. 10.*

toufiours , felon ce que dit le Pfalmifte, *Pfa. 34.*

*Oratio mea in sinu meo conuertetur:* Mon oraison retournera en mon fein.

Loque ne penferoit pas auoir affez difputé contre le Purgatoire, & contre le feu de purgation, s'il ne s'attaquoit au fondement d'iceluy , qui eft la diftinction du peché en peché veniel , & en peché mortel, & la difference de deux chofes qui doiuent eftre cōfiderées en tout peché, ſçauoir eft de la coulpe & de la peine , & la reduction du peché mortel en peché veniel, par le moyen de la repentance qu'en a le pecheur en ce monde , encores qu'auant ſa mort il n'en ait pas dignement & competemēt ſatisfait au iugement de Dieu, lequel proportionne la peine au peché, comme il a eſté dit cy deſſus.

Donc ſus ce que nous luy difons que Dieu remet bien la coulpe du peché, faiſant par ce moyen que le peché qui eſtoit mortel auant cefte remiſſion, ſoit ſeulement veniel , & que la peine ſeule en demeure , au cas que le pecheur n'y ait pas competemment ſatisfait ſelon la iuſtice de Dieu: Il ſe prend à noſtre fondement, c'eſt à ſçauoir à la diſtinction du peché, en peché veniel, & en peché mortel; & la de-

bat fort & ferme par deux arguments, dōt le premier est tel.

Toute distinction, laquelle repugne à l'escriture sainte, est faulse.

La distinction qui porte, que des pechez, les vns meritent la mort eternelle, & les autres non, repugne à l'escriture sainte.

Parquoy vne telle distinctiō est faulse.

Il prouue l'assumption par ces passages  
*Rom. 6.* de l'escriture, *Les gages du peché, c'est mort.*  
*Ezech. 18.*

*L'ame qui aura peché, mourra :* Ces passages (dit-il) signifient que tout peché est mortel. Respondons à la belle subtilité de ce syllogisme. Premièrement, nous dirons que la maieure proposition n'est point necessaire, pour autant que les choses naturelles se comportent souuent autrement que les diuines; & il peut aduenir que quelque propositiō ou distinctiō se trouue vraye en nature, & contraire à la sainte escriture, selon ce qu'elle se comporte en nature; & toutesfois selon la vertu diuine elle ne sera ny faulse, ny impossible. Et quand à l'assumption nous pouuons dire qu'il y a deux sortes de mort, sçauoir est la mort temporelle ou corporelle, laquelle est le gage du peché, selō le dire de S. Paul:



& la mort eternelle, qui est la damnation, & celle-là est la punition du peché mortel, auquel l'homme decède sans recognoistre Dieu: & quand au peché veniel, il oblige seulement à la peine temporelle en ce monde, ou en l'autre; & quelquefois en l'un & en l'autre; c'est à sçauoir, quand le pecheur n'a pas competemment souffert en ce monde selon l'exigence du peché, pour la satisfaction d'iceluy.

Il forme contre ceste mesme partie de nostre distinction son 2. argument en ceste sorte.

Toute transgression de la loy merite la malediction de Dieu.

Tout peché est transgression de la loy.

Tout peché dōc merite la malediction de Dieu.

Il prouue l'assumptiō par les paroles de la loy, exposees par S. Paul, *Maudit est qui-  
conque n'est permanent en toutes les choses qui  
sont escrites au liure de la loy, pour les faire:* Et pour mōstrer que ceste malediction traîne avec soy la mort, ou damnation eternelle, il allegue le mot grec, qui est, *ἐμὴν ὀ-  
ρέστω*, qui signifie execrable, maudit: & outre il allegue le dire de S. Iean, que *Peché*<sup>1 Ioan 3.</sup>  
*est ce qui est cōtre la loy:* Le voilà ce luy sem-

ble au deſſus de ſon entrepriſe, ayant conclu en apparence q̄ tout peché eſt mortel, & partant q̄ c'eſt folie de diſtinguer le peché, en peché mortel, & en peché veniel.

Nous reſpondrons donc qu'il y a pluſieurs ſortes de trāſgreſſion & de malediction: & que la malediction eſt correſpondante & proportionnee à la tranſgreſſion ſelon la iuſtice de Dieu, laquelle requiert, que *Secundū mēſurā delicti ſit plagarū modus*:

Deut. 25.

Que la peine ſoit impoſee ſelō la grauité & enormité du peché: & d'autant qu'és actions des hōmes il y a difference entre celles qui procedent d'vne volōté deliberee, & celles qui procèdent d'vne pure ignorance, ou inaduertence & meſgarde: elles ne doiuent pas toutes eſtre eſgalemēt imputees à faute, mais aucunes d'icelles ſont plus excuſables, & les autres moins: dōt le prouerbe cōmun dit, *Quicquid agant homines intentio indicat omnes*: Que l'intētiō dōne iugement des actions des hommes: Partāt nous reſpondons aux parties de ce beau ſyllogiſme: & premieremēt à la majeure, laquelle dit, *Toute tranſgreſſion de la loy merite la malediction de Dieu*: Pourueu que ce ſoit vne tranſgreſſion deliberee, c'eſt à dire, qui procede d'vne volōté deliberee, & certaine malice, d'al-

ler au contraire de la loy : car telle transgression merite damnation eternelle , qui est ce qu'entend Loque par la malediction de Dieu. A l'assomption laquelle dit, *Tout peché est transgression de la loy.* Nous disons en tant qu'il est volontairement commis: car le pecheur qui n'a point intention d'aller au contraire de la loy , encores qu'il face quelque chose contre la loy , ou n'accordant point avec la loy , n'est point reputé deuât Dieu pour transgresseur de la loy: bien qu'au iugement de Dieu , pour sa negligence, ou pour son ignorance procédante de sa faute il merite quelque peine , mais non pas telle que celuy qui de propos deliberé aura outrepassé la loy. Ala conclusion donc nous dirons que tout peché merite la malediction de Dieu, l'un plus, l'autre moins, & que l'un est remissible, l'autre irremissible, sçauoir est le peché qui est contre le saint Esprit. Cest argument , pour dire en vn mot ce qui en est , ne tend qu'à induire & persuader vne egalité entre tous les pechez, chose manifestement fausse, & contre l'escriture , laquelle n'eut iamais prononcé qu'il faut proportionner chacune peine à chacū peché, si tous pechez estoient



*Responce au 19.*

egaux. Que si l'aduersaire dit ne desnier pas qu'il y ayt quelque inegalité entre les pechez mortels, pour desnier ceste distinction du peché, en peché mortel & peché veniel, & que des pechez mortels aucuns soyent plus enormes & damnables, les autres moins: Pour le moins aurons nous cela sus luy, qu'il faudra que tout peché quel qu'il soit, merite damnation, si ainsi est, comme veut Loque que tout peché soit mortel & contre la loy. C'est ce qu'il se vante de conclure en *Baroco*, en ceste sorte,

*Tous les pechez meritent la mort:*

*Les pechez veniels ne meritent point la mort*, ce disent les Sophistes. (Ainsi nous qualifient ceux qui sont amateurs de confusion, & qui reprouuent nos distinctions.)

*Donc les pechez veniels ne sont point pechez.*

Nous exposons la maieure de ce syllogisme, selon ce qui a esté dict cy dessus, & disons que tout peché merite la mort, corporelle, ou temporelle, & non la mort eternelle; & ce depuis le peché du premier pere: & quand à la mort eternelle, nous disons que c'est celle qui donne le

nom au peché mortel: de sorte que tout peché qui merite la mort, ou damnation eternelle, doit estre appellé peché mortel. Or comme nous auons dict cy dessus, il n'est pas vray-semblable que tout peché merite la mort eternelle: & il faut considerer de quelle volonté ou cause il est procedé pour le iuger mortel. C'est donc mal conclure, dire que les pechez veniels ne sont point pechez, pource qu'ils ne meritent point la mort eternelle: car tout ce qui n'est point selon la loy est peché, & toutefois il n'est pas necessaire que tout ce qui n'est point selon la loy soit transgression de la loy: car il peut aduenir que quelques personnes qui ne sont pas selon la loy n'ayent pas pour cela intention de transgresser la loy.

Il dispute en apres contre la distinction qui se trouue en la remission des pechez, c'est à sçauoir quand à la coulpe, & non point quant à la peine, selõ laquelle nous tenons que Dieu remet bien la coulpe, & non la peine, laquelle à ceste occasion il nous conuient souffrir en Purgatoire, s'il nous reste & manque quelque partie de la satisfaction deuë pour nos pechez, desquels la coulpe nous a esté remise, quand

## Responce au 19.

nous nous sommes retournez vers Dieu apres l'auoir offensé & irrité contre nous. Or il combat ceste distinction de quatre arguments , desquels le premier est tel,

*Toute distinction laquelle repugne à la sainte escriture, est faulse.*

*La distinction entre la remission de la coulpe & de la peine repugne à la sainte escriture. Donc elle est faulse.*

Nous auonsjà respondu à la maieure ou premiere proposition au premier syllogisme que Loque a employé cy deuant contre la distinction du peché, en peché mortel & peché veniel. Quand à l'assomption, pource que nous la nierons tousiours, il s'efforce de la prouuer par l'escriture, alleguant premierement ce que dit

*Esay. 43.* Dieu à son peuple d'Israël par le Prophe-  
te Esaye en ces mots , *Je suis celuy qui efface  
tes iniquitez à cause de moy, & n'auray pas sou-  
uenance de tes pechez,* Puis ce que dict le

*Psal. 32.* Psalmiste, *Bien-heureux est celuy auquel Dieu  
n'impute point son peché,* Puis aussi ce que dit

*Rom. 1.* saint Paul, *Il n'y a nulle condamnation à ceux  
qui sont en Iesus-Christ.* Desquels passages il  
tire cest argument,

*Quand Dieu a remis les pechez, s'il en re-*



*quier la peine & ne la pardonne point avec la coulpe, il s'ensuit donc qu'il s'en souvient, qu'il l'impute, & qu'il y a condamnation en ceux qui sont en Iesus-Christ.*

*Or, quand Dieu a remis les pechez il ne les impute point, il ne s'en souvient point, il n'y a point de condamnation en ceux qui sont en Iesus Christ.*

*Donc, quand Dieu a remis les pechez il n'en requiert point la peine, ains il la pardonne avec la coulpe.*

Pour respondre à cest argument, nous presupposerons qu'en l'escriture ce mot de *condamnation* signifie vne obligation à souffrir peine perpetuelle pour le peché mortel; & que ceste peine perpetuelle estant commuee en peine temporelle pour accomplir la iustice de Dieu (laquelle ne laisse aucun peché impuni, & neantmoins est accompagnée de la misericorde par la commutation de la peine eternelle en temporelle) ceste obligation & condamnation cesse: & par ainsi le peché qui meritoit peine eternelle n'est plus imputé, sçauoir est, la condamnation estant cessée. Ce que presupposé nous nions la premiere proposition de ce syllogisme: & quant à la mineure ou assomption nous

*Response au 19.*

la confessions & tenons pour vraye, en l'exposant selon nostre supposition, c'est à dire en interpretant le mot de condamnation, comme dessus : la conclusion se trouue purement faulse, comme prouenant d'une maieure ou proposition purement faulse.

Continuant ce mesme poinct, il met en auant ce second argument.

Si remettre le peché est oster le peché, il s'ensuit que du peché remis, il ne reste aucune peine.

Or, remettre le peché est oster le peché.

Partant, du peché remis il ne reste aucune peine.

Pour respōdre à ce syllogisme, nous luy nions la maieure ou premiere propositiō, cōme estant purement faulse; & pour l'en esclaircir dauantage nous le renuoyons à la susdicte supposition en laquelle a esté expliqué ce mot de condamnation: Et à l'assomption nous luy respondons suyuant ladicte supposition, que remettre le peché, c'est oster le peché; c'est à dire, faire qu'il ne soit plus ce qu'il estoit auant la remission: car il estoit mortel, & apres la remission il n'est plus mortel: Il obligeoit

à peine eternelle, & apres la remission faite, la peine n'en peut plus estre que temporelle par vertu d'icelle remission.

Il met par apres vn troisieme argument en ceste sorte.

Si nous auons pleine redemption & pleine remissiõ de nos pechez par le sang de Iesus-Christ, il s'ensuit que ceste redemption & remission s'entend non seulement de la coulpe, mais aussi de la peine. Or est-il que nous auons pleine redemption & remission de nos pechez par le sang de Iesus-Christ, tesmoing saint Paul. Donc il s'ensuit que ceste redemption s'entend non seulement de la coulpe, mais aussi de la peine.

*Ephes. 1.  
Coloss. 1.  
Héb. 1.  
Ioan. 1. 6.  
1. Cor. 1.*

Nous respondons premierement que la maieure est fausse. Car ce mot de *pleine* ne s'entend pas de toutes les choses qui sont concurrentes en l'obligation & condamnation du peché, cõme sont la coulpe & la peine: mais il nous remet en memoire vne comparaison de la perfection & integrité de la grace qui nous est donnee en nostre Seigneur Iesus-Christ, avec l'insuffisance qui se trouuoit és sacremens sacrifices & oblations de la loy Mosaique; d'autant qu'anciennement estoit seule-



ment promise en nostre Seigneur Iesus-Christ la remission & redemption: Mais elle est accomplie entierement en nostre Seigneur: & voilà ce que veut dire ce mot de plenitude, lequel mal entendu par Loque est cause qu'il a tres-mal faict son argument, tirant d'une proposition fausse, vne conclusion de mesme. Toutesfois il s'arreste à prouuer ceste maieure ou premiere proposition, & la faire entendre, tant de la remission de la peine que de la coulpe, pour dire vniuersellement que par le sang de nostre Seigneur nous auons pleine redemption & remission tant de la peine que de la coulpe: & allegue ce

To. 10. de  
verb. Do.

Serm. 37.

que dict saint Augustin, *Christus suscipiens do pœnam & non suscipiendo culpam, & culpam deleuit & pœnam*, Que nostre Seigneur ayant pris la peine & non point la coulpe, a effacé la coulpe & la peine. Mais s'il l'a voulu alleguer, il l'a deu aussi entendre comme luy. Considerons donc à quelle peine estoit obligé l'homme par le peché. Sans doute il estoit obligé à vne peine eternelle & infinie, pour ce que son peché estoit infiny. Son peché estoit infiny pource qu'il estoit commis contre la bonté de Dieu qui est infinie. Nostre Seigneur

Iesus

Iesus-Christ a aboly ceste peine infinie, ayant satisfait pour icelle d'une satisfaction infinie, ce qu'un autre homme n'eut peu faire ny mesme tout le monde: & toutesfois ceste satisfactiō infinie qui est procedee de sa bonté infinie, n'a point aboly sa iustice; & où seroit la iustice, si il n'y auoit aucune peine temporelle apres le peché? Car c'est du moins que peut faire le pecheur de demander avec vne repentance remission de son peché: & si ceste repentance n'est trouuee suffisante au iugement de Dieu, il faut selon la iustice de Dieu qu'elle soit accompagnee de quelque peine, soit en ce monde ou en l'autre; afin que la iustice de Dieu soit tousiours compassee avec sa misericorde, & que le pecheur reconnoisse que la misericorde de nostre Seigneur, bien qu'infinie, ne derogé point à sa iustice. Quand donc saint Augustin dit, que *nostre Seigneur ayant pris la peine & non point la coulpe, a effacé la coulpe & la peine*, cela tend à nous faire cognoistre que la peine eternelle deuë au peché, nous estant remise par le sang de nostre Seigneur, est commuee à vne peine temporelle; nous pouuons dire avec toute assurance qu'il a effacé la coulpe & la peine.

ne absolument: pource que la peine temporelle n'est rien estimee au regard de la peine eternelle, selõ ce que disent les Physiciens, *finiti ad infinitum nulla est proportio*, qu'il n'y a point de comparaisõ ou de proportion d'une chose finie à vne chose infinie: & voilà comment Loque abuse du passage de saint Augustin.

Pour quatriesme argument il propose ce syllogisme,

*Quiconque exige le payemẽt d'une debte quittee & remise, est iniuste.*

*Quiconque exige la peine du peché quitte & remis, cestuy-là exige le payement d'une debte quittee & remise. Partant il est iniuste.*

Or tel seroit Dieu si apres la remission de la coulpe il obligeoit encores l'ame ou le pecheur à quelque peine temporelle.

Or, (ce dit Loque) cest argument est ferme: car la peine n'est point iuste sinon à raison de la coulpe. Ostez donc la coulpe, vous ostez ensemble la peine. Si Dieu donc redemande la peine, il s'ensuit qu'il n'a point remis la coulpe: car il est souuerainement iuste.

Cest argument pourroit valoir, s'il estoit question d'une mesme sorte de peine tãt auãt qu'apres la remissiõ de la coulpe. Or



est-il (cōme nous auons dit) que la coulpe meritoit vne peine infinie, & que ceste peine infinie par la remission de la coulpe est renduë finie, & qu'une peine finie ou temporelle n'est rien au regard d'une peine eternelle & infinie. En ceste comparaison il se trouuera que Dieu apres la remission de la coulpe obligeāt le pecheur à quelque peine limitee ou temporelle n'est point iniuste, ains au contraire par ce moyen il fait reluire sa iustice avec sa misericorde. Par ainsi l'argument de Loque est nul

Or, d'autant que Loque, se voyant conuaincu par l'experience des iugemēts de Dieu que nous voyons temporellement s'accomplir sur les pecheurs en ce monde, se trouuoit manque en sa dispute, il allegue & contredit quelques raisons, lesquelles font croire ceste difference de coulpe, & de peine. Et premierement il propose vn argument tiré de l'experience des iugemens de Dieu qui se pratiquent ordinairement sus les pecheurs, mesme apres la remission de la coulpe, & dit en ceste sorte.

Après la remission des pechez les fideles souffrent neantmoins des peines

## Responce au 19.

temporelles, comme des afflictions, des douleurs, des maladies, & la mort mesme, lesquelles choses sont peines du peché, comme il appert en Genese 3. chapitre.

Donc la coulpe des pechez estant remise, il ne s'ensuit pas que la peine soit remise, mais il la faut payer en ceste vie ou en Purgatoire.

Pour respondre à cest argumēt, il examine l'antecedent, lequel a deux parties, desquelles il accorde la premiere, par laquelle il est dit, que les afflictions, douleurs, maladies & mesme, la mort suruiennent aux fideles, apres la remission du peché: & il nie la derniere, par laquelle il est dit que ces choses sont peines du peché. Et pour faire apparoir que iustement il nie ceste derniere partie, il nous represente trois sortes de peine, & dict que toute peine est ou peine de supplice, c'est à dire, punition du peché, ou peine d'esprenue, ou de chastiment & correction. Il dict pour exemple, que la peine du peché se rapporte à ceste sentence de saint Paul,

*Rom. 6.*

*Le salaire du peché c'est mort: & à la peine d'esprenue se rapporte ce qui est dict par*

*Iac. 1.*

*1. Pet. 1.*

*saint Iacques & par saint Pierre, Que*

les fideles sont esprouuez, & leur foy par leurs afflictions, comme l'or est esprouué par le feu. A la peine du chastiment & correction, ces passages, *Bien-heureux est l'homme* (Seigneur Dieu) *lequel tu au-* <sup>Psal. 94.</sup>  
*ras chastié & instruit par ta loy. Il m'est bon que* <sup>Psal. 112.</sup>  
*i'aye esté humilié, afin que i'apprenne tes sta-*  
*tuts. Dieu chastie celuy qu'il ayme, comme le* <sup>Prou. 3.</sup>  
*pere l'enfant, lequel il a à plaisir. Quand nous* <sup>1. Cor. 11.</sup>  
*sommes iugez, nous sommes enseignez de Dieu*  
*afin que ne soyons condamnez avec le monde. Il*  
*est certain que toute peine est de l'une de*  
*ces trois fortes. Mais dire qu'il n'y a que la*  
*mort qui soit peine du peché, est chose*  
*trop absurde, & esloignée de raison: Car*  
*quand Dieu dict, Je suis ton Dieu fort & ia-* <sup>Exo. 20.</sup>  
*loux visitant les iniquitez des peres sur les en-*  
*fants en la troisieme & quatrieme generation,*  
*dit-il que la mort seule soit le moyen de*  
*la visitation qu'il fait des iniquitez des pe-*  
*res sur les enfans? Car si cela estoit, il s'en-*  
*fuyuroit que ceux de la cinquiesme &*  
*suyuantes generations ne fussent point*  
*suiets à la mort. Et d'auantage, puis qu'il*  
*visite & chastie temporellement les pe-*  
*chez des peres sur les enfans, n'est-ce pas*  
*chose certaine que la coulpe estant remi-*  
*se, il veut neantmoins que la peine soit*



Gen. 4.

payee? Et d'auantage apres auoir pardon-  
né le peché à Adam & Eue, n'en fait-il pas  
toufiours continuellement porter la pei-  
ne à la posterité, selō la malediction qu'il  
a donné à l'un & à l'autre, voulant que  
l'homme soit en perpetuel trauail en ce  
monde, & que la femme enfante avec  
douleur & non autrement? Pour auoir  
donc verifié ces trois sortes de peine, il ne  
s'ensuit pas que la mort seule soit la peine  
du peché, & qu'apres la remission de la  
coulpe, il ne demeure encores quelque  
peine à souffrir en ce monde ou en l'autre,  
pour satisfaire par ce moyen à la iustice  
de Dieu.

li. 4. ep. 4

Il propose des passages des Perés pour  
continuer son propos, tendant toufiours  
à nier qu'apres la remission de la coulpe  
il reste quelque peine à souffrir pour sa-  
tisfaire à la iustice de Dieu. Et premiere-  
ment il allegue sainct Cyprian, disant,  
que *Dieu nous chastie afin de nous amander, &*  
*nous amande afin qu'il nous sauue.* Cela est bō,  
mais il ne s'ensuit pas de là, que nous ne  
deuions souffrir quelque peine pour nos  
pechez: ce que ce mesme auteur dit fort  
clairement de la mesme epistre en ces  
propres termes, *Hæc patimur delicto &*

*merito nostro, sicut præmonuit diuina censura, Psal. 88. dicens, Si dereliquerint filij mei legem meam & in iudiciis meis non ambulauerint; si iustitias meas profanauerint, & mandata mea non custodierint, visitabo in virga iniquitates eorum, & in verberibus peccata eorum; misericordiam autem meam non dispergam ab eo, neque nocebo in veritate mea.* Nous endurons toutes ces choses par nos offenses & par nos demerites, selon que la iustice diuine nous en a preallablement aduerty, disant, Si mes enfans laissent ma loy, & s'ils ne cheminent point selon mes iugemens: S'ils violent mes iustices & ne gardent point mes commandemens; Je visiteray leur iniquité avec la verge, & leurs pechez à coups de fouets: Mais ie ne luy osteray point ma misericorde & ne luy nuiray point en ma verité. Si Dieu menace de peine, & ensemble il promet de ne point substraire sa misericorde, ne fait il pas bien apparoir par là qu'il ballance & contrepoise tellement sa misericorde avec sa iustice, que par sa misericorde il remet la coulpe, & par sa iustice, il enuoye la punition? Ceste authorité donc de saint Cyprian ne dit pas que Dieu ayant

## Responce au 19.

pardonné & remis la coulpe n'enuoye point par apres la peine laquelle il faut souffrir en ce monde ou en l'autre.

*Ser. de poe  
nit, & con*

Il allegue aussi saint Iean Chrysostome, disant, *Dieu nous impose la peine non point pour exiger le supplice de nos pechez, mais pour nous aduiser pour l'aduenir.* Voicy la seconde fois qu'il allegue ce passage, d'autant que il le trouue fort fauorable pour maintenir son erreur. Mais s'il y auoit regardé de pres, il ne le trouueroit pas si fauorable comme il le pense. Il deuroit regarder à l'intention de l'autheur, lequel dit formellement que Dieu est debonnaire, & qu'il cherche en nous toute occasion de nous faire cognoistre sa debonnaireté, puis il nous en donne preuue: car afin qu'à faute de punition nous ne deueniõs point pires que par auant, il ne nous remet pas la peine, ains il nous la fait souffrir & endurer, afin qu'elle soit occasiõ de nostre amandement. Voilà l'intention de saint Iean Chrysostome. Cela est bon: Mais la consequence est-elle bonne? Dieu ne nous laisse pas impunis, afin que la punition qu'il nous enuoye serue à nostre amandement: partant



ceste peine n'est point peine du peché qu'il a remis, c'est à dire, de la coulpe? Si ceste consequence estoit bonne, il faudroit donc dire, qu'autant sa iustice se pratiqueroit sus le iuste, que sus l'iniuste, & autant vaudroit il amender le bon que le mauuais. Or est il ainsi qu'il n'est besoin d'amender que ce qui n'est pas bon: En l'amendement donc qu'il conuient faire, deux choses sont à considerer, sçauoir est l'estat du passé, & l'aduenir: l'estat du passé, c'estoit le desordre & le peché: l'estat de l'aduenir, c'est la correction & l'amendement: Il ne seroit pas besoin de correctiõ & amendement s'il n'y auoit point de peché qui meritaist telle correction & amendement: dont s'ensuit infalliblement que la peine que Dieu enuoye au pecheur tendant à sa correction & à son amendemēt, est aussi la peine de la coulpe, encores que par la misericorde de Dieu icelle coulpe soit remise.

Il dit encores trouuer vn autre erreur en ceste mesme conclusion, qui est, qu'estant icy question du Purgatoire particulierement, & non des autres peines que Dieu faict souffrir aux pecheurs apres la coulpe remise, par icelle conclusion nous

*Responce au 19.*

appelons les afflictions & la mort, peines du peché; qui est, dit-il, plus mettre en la conclusion qu'aux premisses : d'autât que les afflictions de ce monde, & la mort que nous disons estre differentes du Purgatoire, sont peines du peché, ou de la coulpe aussi bien comme le Purgatoire : & c'estoit assez de prouuer que le Purgatoire seul, ou separement, deuoit estre peine de la coulpe apres la mort corporelle du pecheur. Voilà vne fort pertinente cōplainte de Loque, dire que nous cōcluons plus que nous ne deuons. Nous luy demandōs si en prouuant, que tant les afflictions temporelles, & la mort, que le Purgatoire, sont peines de la coulpe, nous manquons de preuue pour le Purgatoire : qui prouue tous les deux ensemble, prouue bien l'vn des deux, & ne manque de rien en sa conclusion : mais ce que nous alleguons des afflictions & de la mort avec le Purgatoire, tēd à prouuer que tant en ce monde qu'en l'autre, il y a quelque peine qui est deuë pour payement de la coulpe, sçauoir est, les afflictions, & la mort corporelle en ce monde, & le Purgatoire en l'autre.

Il vient par apres à nostre second argu-

ment, par lequel nous maintenons que quelque peine temporelle est deuë à la coulpe, ou au peché qui est remis, pour le seul regard de la coulpe d'iceluy, qui est qu'après que Dauid a confessé & reconnu son adultere & homicide, il a bien eu & receu remission de son peché: mais neantmoins il a esté depuis puny par la mort de son fils, bien qu'il en eut ieusné & ploré: Il auoit donc obtenu remissiõ de son peché, quand à la coulpe, & non quand à la peine.

L'aduerfaire dict qu'il y a erreur en cest argument, en l'equiuoque de ce mot de peine: par ce que ce mot de peine, dit-il, en ce lieu, signifie peine de probation, & de chastiment, & non la peine du peché: Pour preuue de son dire, il allegue saint Augustin, parlât de ceste punition du peché de Dauid, & disant, *Si Dieu auoit menacé Dauid à cause de son peché, pour l'humilier par son fils, pourquoy est-ce qu'après luy auoir remis son peché, il a neantmoins accompli sa menace?* tom. 7. de pecca. me. & remis. l. 2. c. 34. Je respons que Dauid a obtenu la remission de son peché, afin qu'il ne fut point empesché de recevoir la vie eternelle: mais que l'exemple de sa menace a suivi, afin que la pieté de Dauid fut exercée & esprouuée en icelle humilité: Il note



## Responce au 19.

pour donner encore plus grande apparence de verité à son dire, que ceste sentence est amplifiée au decret, *De pœnitentia dist. 1. can. sicut*: Nous voulons bien qu'ainsi soit: Venons au fond, & par les termes de Loque mesme, pour luy verifier que luy-mesme dict, que ceste peine, qu'il appelle peine de probation, est la peine de la coulpe du peché: Il appelle ceste peine, peine de chastiment & de probatiō. Nous luy demandons, pourquoy est elle peine de chastiment? est-ce pas de chastiment de la coulpe du peché? car si l'homme n'auoit point peché, il n'y pourroit escheoir de chastiment, attendu que Dieu ne chastie point sans cause, & sans suiet: Car pourquoy est-ce qu'il menace de visiter de sa verge de correction, ses enfans, sinon à l'occasion de leur peché, & transgression de ses commãdements? Venons aux propos de saint Augustin: Il dit qu'apres que Daud a obtenu remission de son peché, l'exemple de la menace de Dieu a fuiuy, afin que la pieté de Daud fut exercee & esprouuee en son humilité. De là s'ensuit il que la punition qui luy est aduenüe par la mort de son fils, n'ait point esté la punition de son peché, ains seulement pro-

bation de sa pieté ? Loque le veut ainfi maintenir. Voyons donc comment il en est. Dauda uoit mis en doute sa pieté, & humilité accoustumee par sa transgressiõ: Ceste trãsgression par laquelle il a encouru l'ire & indignation de Dieu, est son peché: Il estoit besoin qu'il se restablit par penitence, en la grace de Dieu, de laquelle il estoit décheu par ce peché: Il n'y pouuoit estre restably, sinon par vne satisfaction: Il falloit que ceste satisfaction fut agreable à Dieu: & pour la rendre agreable à Dieu, il falloit rentrer en la grace de Dieu: ce qu'il feit par la confession de son peché, d'autant que par icelle son peché luy fut remis: Restoit la peine, laquelle regardoit, & le passé & l'aduenir: le passé, auquel elle seruoit de chastiment, qui est le terme duquel Loque mesme se sert en cest endroit: l'aduenir, pour le garder de retomber en son peché, pour ce que la souuenance des rigueurs de la iustice de Dieu, sert de bride aux pecheurs, pour empescher l'effect de leurs mauuaises volonteiz en leurs tentations; Dieu faisant par ce moyen que ceux qui ne se retranchent pas de leurs sensualitez par vn vray amour qu'ils luy doiuent, s'en depar-

*Responce au 19.*

tent du moins par l'apprehension des peines qui en ensuiuent,

*Oderunt peccare boni virtutis amore,*

*Oderunt peccare mali formidine poenæ.*

Les bons craignent d'offenser, par l'amour de la vertu qui les retient.

Les meschants craignent d'offenser, pour la crainte qu'ils ont d'estre punis.

Pour nostre troisieme argument il alle que ce qui ensuit.

Si la remission de la peine des pechez est tousiours coniointe avec la remission de la coulpe, il s'ensuit donc que quand l'homme a obtenu la remission de la coulpe de ses pechez, il n'en doit souffrir aucune peine.

Or, est il que tel a obtenu la remission de la coulpe de ses pechez, lequel neantmoins en souffre la peine par le Magistrat, ou par le Consistoire.

Partant, la remission de la peine des pechez n'est pas tousiours coniointe à la remission de la coulpe.

Loque se trouue fort empesché à respondre à ce syllogisme : car il ne sçait bõnement à quelle partie d'iceluy se prendre pour l'improuuer: Tantost il se prend à l'assumption, tantost à la proposition:



puis de rechef à l'assumption. Il dit donc premierement, que ce syllogisme peche en la forme, pour ce qu'il met plus en l'assumption qu'il n'y a en la proposition: car elle faict mention de la peine que souffre le pecheur par le Magistrat, ou par le Cōsistoire; mesme apres que par vne repentance volontaire la coulpe de son peché, luy est remise de Dieu: surquoy il argumente en ceste sorte: La souffrance de la peine des pechez est, ou pour satisfaire à Dieu, ou pour satisfaire aux hommes. Or, dit-il, c'est mal argumenter, quand on cōfond le tribunal de Dieu avec la police ecclesiastique, ou ciuile.

Surquoy nous luy disons, que sans cōfondre le tribunal de Dieu avec la police ecclesiastique, ou ciuile, nous pouuonstirer vn argument de la iustice de Dieu, par la iustice des hommes, en ceste sorte, *Le pecheur qui a offensé son Dieu, n'est point moins redenable à sa iustice, que celuy qui a offensé le Magistrat, ou le Consistoirey est redenable.* Or, est-il que si quelqu'un ayant offensé le public reçoit grace, & la peine de mort corporelle qu'il meritoit par son offense, luy est quelquesfois cōmuee en peine temporelle, par l'autorité du Magistrat, ou du Consistoire, & est contraint de la

## Responce au 19.

*souffrir , mesme apres la remission de sa coulpe, laquelle luy est faicte à ceste condition : Il n'est donc point inconuenient qu'en la iustice de Dieu, la coulpe estant remise au pecheur , il y demeure redenable de quelque peine temporelle : Pour neant donc se donne il de peine de se refoudre , s'il doit laisser passer la proposition de ce syllogisme, en l'entendant seulement de la iustice de Dieu, & de la satisfaction que le pecheur est tenu d'y faire:& reprendre l'assumption, & l'improuuer, en tant (dit-il) qu'elle contient les termes qu'elle ne doit point contenir, & qu'elle ne cõtient pas les termes qu'elle doit cõttenir : car elle faict mention de la peine que le Magistrat, ou le Consistoire impose au criminel, apres la remission de son peché, c'est à dire, de la coulpe; laquelle remission il peut auoir obtenu de Dieu, par sa repentance : & elle ne parle point de la peine du Purgatoire, de laquelle il est question : qui est tout ce qu'il a à dire contre ceste assumption : mais il ne voit pas, ou bien il ne fait pas estat de voir que la iustice de Dieu n'est pas moins parfaite, & entiere que celle des hommes : & que la iustice des hommes ne doit point estre estimee plus grande, & plus parfaite*

ete que celle de Dieu. Si dōc la iustice des hōmes est si rigoureuse, qu'encores qu'elle voye par l'exterieur la repentance du pecheur ( par laquelle il est certain que Dieu luy remet la coulpe de son offense) elle ne laisse pas toutesfois de luy imposer quelque peine temporelle, ou grande, ou petite à souffrir : Comment Loque peut-il penser que la iustice de Dieu soit moindre que celles-là ? Nous confessons bien que Dieu est misericordieux : mais aussi il est iuste.

*Nullité du pretendu 20. abus.*

**I**L met en auant , pour son pretendu 20. abus, la fraction del'Hostie , que le Prestre estime, & dict estre le corps de nostre Seigneur Iesus Christ. Il deuoit dire, que le Prestre, voire toute l'Eglise de Dieu, croit estre le vray corps de nostre Seigneur Iesus Christ: mais il a voulu vser de ce mot, *estime*, pour monstrier que ny luy , ny toute sa secte ne l'estime , ny le croit : Car au contraire de luy , l'Eglise apres la consecration faicte, chante , *O salutaris Hostia*: appellant ceste Hostie salutaire.

Or, il se donne grande peine sus ceste



fraction , & pensant qu'elle se face au corps de nostre Seigneur, il tasche à prouuer par la rubrique de la Messe, que le Prestre, voire l'Eglise Catholique (de laquelle il est authorisé) faict la fraction du corps de nostre Seigneur; c'est à dire, qu'il entend la faire: & à ceste intention il allegue icelle rubrique, en ces propres termes.

*Hic, accipiat corpus Christi cum reuerentia, & frangat super calicem in tribus partibus.*

Icy, qu'il prenne le corps de nostre Seigneur en reuerence, & le rompe dessus le Calice en trois parties.

N'en desplaie à Loque, en ceste rubrique, nous ne lisons pas ces mots, *In tribus partibus*: mais bien lisons nous, *In tres partes*: ainsi se garde-il bien de laisser passer vne occasion sans nous donner quelque traitt de ses subtilitez.

Sus ceste occasion, comme nous pensant tenir en ceste opinion, il dispute, & s'efforce de prouuer que la fraction du corps de nostre Seigneur ne se peut, ny doit faire, prenant son argument sus l'hi-

stoire du crucifiement d'iceluy, & disant: Quand Iesus-Christ fut crucifié, les gens-d'armes ne luy rompirent point les iam-  
bes, afin que l'escriture fut accomplie, qui dict, *Pas vn de ses os ne sera cassé*: Mais Ioan 19.  
Exo. 12. le Prestre (dict-il) est icy plus audacieux, & plus cruel que les gens-d'armes: car il ne faißt point de scrupule, ny de difficulté de mettre Iesus-Christ en trois parts: (il dict, *enttrois quartiers*, pour rendre ceste fraction plus odieuse, & le Prestre, par consequent, comme contreuenant à la figure qui estoit anciennement, l'Agneau Paschal, duquel aucun os ne deuoit estre brisé) chose expressement defendue par la parole de Dieu: Voilà le crime qu'il trouue en nous sus le suiet de ceste fraction.

Or, il dict, que pour nous sauuer de cest argument, si fort, & si subtil, nous cherchons vneeschappatoire par les accidents du pain & du vin, lesquels nous soustenons demeurer apres la transubstantiation faicte, & que nous disons que la fraction ne se faißt point au corps de nostre Seigneur, ains és accidents: & pour nous attribuer plus hardiment ceste opinion, il dict, qu'elle est de Ga-

## Responce au 20.

in 4. sent.  
dist. 12. q.  
2. 3. 1.

briel Biel, Docteur scolastique, duquel l'autorité est receuë entre nous : Mais, ne luy en desplaise, Biel ne diët pas cela, mais il vſe de ces propres termes latins, *Ista fractio non est in corpore Christi quod integrum ac totum sub qualibet diuisionis particula continetur, sed est in speciebus. Illæ enim species quia extensæ sunt, & partes habent situ & loco distinctas quæ realiter ab inuicem separantur, frangi possunt* : Ceste fraction n'est point au corps de nostre Seigneur, lequel est entier en chacune partie de la diuision, mais elle est és especes : Car d'autant que les especes ont leur estenduë, & ont leurs parties distinguees de situation, & de lieu, elles peuuent estre rompuës & separees l'une de l'autre. Loque à fort varié en alleguant Biel : Premièrement il luy a imputé qu'il disoit, que ceste fraction se faisoit és accidents : & de là il a tiré vne absurdité bien subtilement, ce luy semble, quand il a diët que la fraction ne se peut faire, sinon en vn corps, & qu'un corps n'est point accident, comme aussi vn accident n'est point corps : Puis il a diët que Biel tenoit que ce sont seulement les accidents & especes de



L'Hostie qu'on rompt. C'est trop varier, car le mot , *d'accident* , est trop general au regard du mot d'espece : car l'espece exprime la quantité de la chose, comme l'a fort bien declaré Biel , & le *ibid.* mot , *d'accident* , s'estend à d'autres choses qu'à la quantité : Il signifie aussi bien la qualité , & autres affections qui peuvent conuenir & se rencontrer en vn mesme subiect. Donc par ce mot , *d'accident* , il a pensé rendre le dire de Biel ridicule , comme si Biel auoit voulu dire que quelque accidēt fut corps, pour estre capable de fraction: Et voilà sa pretenduë subtilité.

Il impute aussi aux Catholiques qu'ils veulent entendre que ceste fraction se face au mesme corps de nostre Seigneur, par ce qu'en aucuns Missels , en lieu du corps de nostre Seigneur , on liēt , *L'Hostie* : Et allegue expressement le canon, *Cum frangitur Hostia* , duquel il tire ce-  
*de consec. dist. 2.*  
ste raison : L'Hostie est ce que rompt le Prestre quand il fait la fraction de ce sacrement. Or , est il , que l'Hostie est le corps mesme de nostre Seigneur, Partant , le Prestre entend rompre le corps de nostre Seigneur , & non autre chose.

Responce au 20.

Aquoy nous luy respondons ce qui est en la glose du susdict canon, *Cum frangitur Hostia*, qui est que sus ces mots, la glose dict, *Hoc totum referas ad species exteriores, & secundum hoc dices ipsa accidentia frangi*: Qu'il faut rapporter celle fraction aux especes exterieures, & en ce sens, c'est à dire, à raison d'icelles especes, on peut dire que sont les accidents qui sont rompus, & non la substance du corps de nostre Seigneur: Et pour le faire voir à Loque, nous luy demandons quelles sont les choses concurrentes en vn corps, pour le regard de sa quantité? ne sont ce pas la longueur, la largeur, & la profondeur? & la diuision ne se faiet elle pas en ses trois dimensions? & ces trois dimensions sont elles substances, ou accidents? puis qu'elles sont quantitez, elles ne sont donc pas substances. Par consequent, combien que toute diuision se doive faire en vn corps, il ne s'ensuit pas de là (comme le pense Loque) que la diuision ne se puisse faire en l'accident: & en cela est l'abus de sa pretendue absurdité.

Il vient par apres à vne autre subti-

lité : nostre Seigneur ( dict-il ) ne consacra point , sinon apres auoir fait la fraction du pain : & le Prestre au contraire , consacre auant que venir à la fraction : il n'ensuit donc pas l'action , & l'exemple de nostre Seigneur , & ne s'accorde pas avec luy. A quoy nous respondons , que la cause pour laquelle nostre Seigneur fait la fraction auant que consacrer , fut qu'à l'instant de sa consecration il donnoit son corps & son sang à communier : & aussi l'Eglise a aduisé , & resolu que la fraction se feroit assez tost , si elle se faisoit immédiatement deuant la communion : car nostre Seigneur ne rapportoit pas ceste fraction qu'il fait à la consecration qui suiuoit immédiatement apres , mais seulement il la rapportoit à la communion qu'il vouloit faire faire à ses Apostres. Et par consequent , au contraire de ce que dit Loque, le Prestre faisant ceste fraction lors qu'il est proche de communier, ne desroge aucunement à l'institution de nostre Seigneur , ains il la pratique fort bien.

Quand au mystere de ceste fraction , il allegue plusieurs opinions d'iceluy , pour



## Responce au 20.

*ser. in ex-  
na do.*

s'en moquer, comme de vray verbalement il s'en moque, mais il ne l'improue par aucune raison: il est à croire que c'est faute de subiect, ou de moyen: S'il auoit quelque moyen de monstrier son gentil esprit, il se deuoit adresser à la premiere de toutes les raisons d'icelle fraction, laquelle se trouue alleguee selon le commun iugement de l'Eglise, par saint Bernard, disant, que les trois portions de l'Hostie qui se font en l'Autel, c'est à dire, comme il a esté exposé cy deuant, de l'espece du pain, ont vne signification mystique: car le corps mystique de nostre Seigneur Iesus Christ est toute l'Eglise vniuerselle, sçauoir est, le chef avec les membres. La premiere fraction se faict en deux parties, desquelles, l'vne signifie le chef, & l'autre signifie les membres: Le chef estjà resuscité, & ne meurt plus, & ne peut plus endurer: L'autre part qui signifie les membres de ce chef, est de rechef diuisee en deux, desquelles l'vne signifie les membres qui sontjà au repos de gloire eternelle, avec le chef susdict: & l'autre, c'est à sçauoir, celle qui est mise dans le sang de nostre Seigneur au Calice,

signifie les autres membres de nostre Seigneur, qui sont encores en tribulation ou qui endurent encores oppression en ce monde.

Or il dit qu'il laisse à penser à tous fideles si ceste fraction, quelque mystere qu'on y imagine a rien de semblable à ce qu'a fait nostre Seigneur quand il a consacré. Mais nous luy demandõs s'il y trouue quelque chose de dissemblable ou de repugnant. Outre-plus nous luy demandons si nostre Seigneur n'a pas laissé ce Sacrement à son Eglise: & si ceste Eglise, à laquelle il a baillé son saint Esprit pour conduicte, a mal fait de représenter par ceste fraction, & par ces trois portions, ce qu'elle a de commun avec son chef qui est Iesus-Christ, attendu que nostre Seigneur a dict à son Eglise, *Toutes & quantes fois que vous ferez cecy, vous le ferez en memoire de moy.* Or n'y a-il rien plus proche au chef que ses membres. Si Loque sçauoit quelque chose qui peut mieux représenter l'vnion des membres avec son chef, c'est à dire, de l'Eglise, avec nostre Seigneur Iesus-Christ en la communion de ce sacrement qu'il nous a si estroittement commandé, il nous le deuoit apprendre

## Response au 20.

& non se moquer.

Math. 28

Loué soit Dieu de ce qu'il n'a sceu autre chose faire cōtre ceste sainte institutiō que se moquer : cela monstre combien sa nouvelle doctrine est foible pour defraciner celle que nostre Seigneur Iesus-Christ conducteur de son Eglise luy a donné, pour l'entretenir & soustenir iusques à la fin du monde, fuyant sa promesse, par laquelle il l'a asseuré qu'il est avec elle iusques à la consommation du monde.

### *Nullité du pretendu abus vingtvniesme.*

**L**E vingt-vniesme abus qu'il diēt trouver en la Messe luy semble se deuoir remarquer en la mixtion d'une des parties de l'hostie rompuë, avec le sang de nostre Seigneur : & prouue ceste mixtion par la rubrique du Missel, en laquelle il est diēt, selon qu'il allegue d'aucuns Missels qu'il se vante auoir leu.

*His dictis, mittat particulam hostiæ, cum qua signauit, in sanguinem, dicendo. Hæc* Ces choses dites qu'il mette la part de l'hostie avec laquelle il s'est signé



<i>sacrosancta commix-</i>	du signe de la croix,
<i>tio corporis &amp; sangui-</i>	dedans le sang, en
<i>nis Domini nostri Iesu</i>	disant: Ceste sainte
<i>Christi, fiat mihi &amp;</i>	& sacree mixtion
<i>omnibus sumentibus</i>	du corps & du
<i>salus mentis &amp; corpo-</i>	sang de nostre Sei-
<i>ris, &amp; ad vitam æter-</i>	gneur Iesus-Christ
<i>nam capefscendam præ-</i>	me soit faicte, & à
<i>paratio salutaris. Per</i>	tous ceux qui en
<i>Christum Dominum</i>	prendront, salut de
<i>nostrum.</i>	l'esprit & du corps,
	& soit vne prepara-
	tion salutaire pour
	receuoir la vie eter-
	nelle. Par nostre Sei-
	gneur Iesus-Christ,
	&c.

Nous sommes d'accord de ceste mixtion qu'elle se fait, & qu'il est dict expressement en la rubrique qu'elle se doit faire: & que ceste forme de priere est expressement mise & escrite apres ladite rubrique. Reste de veoir ce qu'a à dire Loque contre ceste mixtion.

Il dict qu'en icelle le Prestre n'ensuit aucunemēt l'exemple de nostre Seigneur, lequel a donné à ses Apostres l'un & l'au-

## Responce au 21.

tre à part, & sans mixtion: & que si le Prestre dit qu'il a donné à Iudas le morceau de pain trempé, ce n'estoit pas pour rapporter ceste action à l'institution de ce Sacrement, ains seulement pour designer le traistre Iudas qui auoit resolu de le trahir.

Epist. ad  
Episc. per  
Aegyptiū,  
constitutus  
101.

Car alors de verité, il ne consacroit pas encores. Ce qu'il rapporte de l'autorité du Pape Iules; nous tenons cela avec luy pour tout certain & indubitable, quand mesme il n'auroit pas allegué l'autorité dudit saint Pere. Mais d'autant qu'alleguant ladicte autorité il en veut tirer argument contre ceste mixtion qui se faict en cest endroict de la Messe, voyons sus quoy il se fonde. Il en allegue ces mots expres, *Illud vero quod pro complemento communionis intinctam tradunt Eucharistiam populis nec hoc prolatum ex Euangelio testimonium receperunt, ubi Apostolis corpus suum commendauit & sanguinem: seorsum enim panis et seorsum calicis commendatio memoratur. Nam intinctum panem aliis Christum prae-buisse, non legimus; excepto illo tantum discipulo qui intincta buccella, magistri proditorem ostenderet, non quæ sacramenti huius institutionem signaret.* C'est à dire, quand à ce que pour l'accomplissement de la communion, ils

baillent au peuple l'Eucharistie trempee, ils n'ont point receu cela au tesmoignage de l'Euangile où Iesus-Christ a donné aux Apostres son corps & son sang: Car il est faict mention à part de chacune espee, c'est à dire, du pain & du calice. Et ne lit on point que Iesus-Christ ayt donné le pain trempé à autre qu'au disciple, lequel par ledict morceau trempé estoit designé traistre de son maistre, & non point qu'il se rapportast à l'institution de ce Sacrement. Cecy est rapporté du Pape Iules en la distinction seconde *de consecr.* au canon *cum omne crimen.*

Il est à noter qu'en ce canon là, sont repris ceux qui erroient & abusoient en l'oblation de ce saint sacrifice de la Messe, auquel les vns offroyent du laiët en lieu de vin: les autres en la communion bailloyent au peuple l'Eucharistie trempee dans le calice: Ce que reprend le Pape Iules au susdict canon.

Or nous demandons si c'est bien conclure, dire, le Pape Iules reprend ceux qui bailloyent en la communion au peuple l'Eucharistie trempee dedans le calice ou dedans le sang: & partant le Prestre voulant communier ne doit point tremper



*Responce au 21.*

vne partie de l'hostie dedans le calice? d'où vient ceste consequence? où est-elle fondee? il est defendu de la bailler telle au peuple, s'ensuit-il qu'il soit defendu au Prestre de la tremper & la communier telle en la fin de sa celebration? cela ne conclud point en Logicien, tel que Loque se vante estre. Mais puis qu'il est d'accord avec nous de ce que dit l'escriture que nostre Seigneur a dict à ses Apostres en leur donnant ce Sacrement, *Faites cecy en memoire de moy*, sans leur limiter particulierement en quoy il vouloit que son Eglise fait memoire de luy: Il ne faut trouuer estrange que l'Eglise (laquelle est conduite du saint Esprit) rapporte le mystere de la celebration de ce Sacrement, tant à la memoire de la passion & mort de nostre Seigneur qu'à sa resurrection, pour le regard desquelles deux choses nous deuons considerer icy non seulement ce qui est signifié par la fraction susdicte; mais aussi ce qu'entend l'Eglise par la mixtion du pain & du calice selon que parle le Pape Iule au lieu susdict. La fraction nous represente que par la celebration de ce Sacrement nous deuons e-

stre enluminez pour recognoistre par icelle nostre Seigneur, ainsi comme le recogneurent par icelle les deux disciples en Emaus. En la mixtion l'espece de vin represente & contient le sang de nostre Seigneur qui fut respandu en sa passion, & l'espece du pain, son precieux corps. Le corps & l'ame de nostre Seigneur furent separez en sa mort, le corps fut mis au Sepulchre, & l'ame alla aux limbes, & tous les deux furent reunis ensemble à la resurrection. Cecy veut dire, que par la celebration de la sainte Messe, nous devons entrer de plus en plus en la vraye & parfaite recognoissance de nostre Seigneur, comme aussi en esperance de la resurrection, de laquelle nous devons prendre assurance sus la sienne: & voilà le but de la mixtion, rapportant à l'intention de nostre Seigneur, lequel veut que par la communication que nous prenons de ce Sacrement, nous ayons tousiours memoire de luy comme vray autheur de nostre redemption. Luc. 24.

Secondement, il reprend ceste forme de priere, d'autant qu'en icelle le Prestre requiert que ceste mixtion luy soit salutaire, & à tous ceux qui doyent commu-

*Responce au 21.*

nier, & à tous ceux qui en doyuent prendre ou qui en prendront avec luy. Or le Prestre (dit-il) communie tout seul apres ceste mixtion faicte. Car qui sont ceux qui prennent de ceste tressacree mixtion sinon le Prestre seul ? Voila la question qu'il fait sus ceste forme de priere.

En ceste question nous noterons en passant, qu'il appelle ceste mixtion tressacree. S'il la tient pour telle, pourquoy la veut-il improuuer? s'il ne la tient pour telle, il s'en mocque donc, qui en est la cause? C'est qu'il ne voit & ne cognoist pas l'intention pour laquelle l'Eglise pratique ceste mixtion. C'est qu'il n'aspire pas à la gloire de resurrection laquelle est fondee en la resurrection de nostre Seigneur que nous auons dit estre designee par ceste mixtion. Or pour autant que nous disons que le Prestre communie pour tous les assistans, il dict que c'est vne chose trop ridicule de se persuader cela. Mais, puis que la communion du Prestre suit son oblatiõ & qu'elle en depend. Pourquoy Loque trouuera-il plus estrange que la communion du Prestre serue à tous ses assistans, que son oblation? Qu'y a-il en l'oblation plus qu'en la communion qui puisse estre  
cause



cause que l'oblation soit pour tous plus tost que la communion? C'est vn mesme Iesus-Christ qui est offert & qui est pour communion. Toutesfois, il y a quelque differēce en ceste communion du Prestre & des assistāts, puisque le Prestre seul prend ceste mixtion, qui est que le Prestre qui a consacré en bon estat reçoit ce sacrement avec son effect, c'est à dire, il reçoit & le sacrement & la chose du sacrement. Ce que saint Thomas d'Aquin appelle m<sup>a</sup>nducation <sup>3.p.q. 80. art. 1.</sup>reelle & spirituelle. Et les assistans qui ne recoiuent le sacrement, & lesquels neantmoins y apportent la deuotion avec la foy, y participent spirituellement, & par ceste manducation spirituelle (bien que non reelle ny corporelle) ils sont conioints avec nostre Seigneur par foy & par charité, comme remarque le <sup>ibid.</sup> mesme autheur.

Tiercement sus ceste mixtion, Loque accuse le Prestre d'vn blaspheme insigne, d'autāt qu'il prie que ce meslinge du pain avec le Calice soit fait salut de l'esprit & du corps tant à luy qu'à ceux qui en prendront: Or ce meslinge (dit-il) c'est vn œuvre de la main du Prestre. Puis il demande si le salut despend d'vn tel œuvre: & à sça-

## *Responce au 22.*

*Rem. 4.*

uoir s'il ne despend pas plustost de l'œuvre de Iesus-Christ, cest à dire de sa passiō, de sa mort, de son merite, attendu que saint Paul dit que, *Iesus-Christ a esté liuré pour nos pechez, & est resuscité pour nostre iustification*. Si Loque eut voulu entendre par ceste mixtion (qu'il appelle meslinge) la reünion qui s'est faiçte de l'ame de nostre Seigneur avec son corps en sa resurrection, comme il a esté exposé cy dessus, il n'eut pas pensé à ceste friuole question, & se fut bien empesché d'attribuer à l'œuvre du Prestre, ce que l'Eglise rapporte à la puissance & vertu que nostre Seigneur a tesmoigné en sa resurrection, quād il s'est resuscité soy mesme sans prendre vertu ny force d'autrui. Mais toutes bonnes choses sont ordinairement desaggreables à tels ouuriers. Voilà les belles subtilitez de Loque en son pretendu 21. abus de la Messe.

### *Nullité du pretendu 22. abus de la Messe.*

**I**L falloit pour consommation de ce beau traitté, que le 22<sup>e</sup>. & dernier pretendu abus tesmoigna de quel esprit a esté poussé Loque en tout cest œuvre; sçauoir

est par le maigre sujet qu'il a pris pour mesdire de la Messé aussi librement en sa fin comme au commencement & au meilleur. Il falloit ainsi que la fin couronna l'oeuvre. Ce sujet est plaisant : Il le prend sus la priere que faict le Prestre par l'ordonnance de l'Eglise quand il est prest de communier. Or il allegue premierement ladite priere tant en Latin qu'en François comme elle s'ensuit, puis il la blasme. Il dict donc,

*Perceptio corporis tui, domine Iesu Christe, quam ego indignus sumere præsumo, non mihi proueniat in iudicium & condemnationem: Sed pro tua pietate prosit mihi ad tutamentum animæ & corporis, & ad medellam percipiendam. Qui vivis, &c.*

La reception de vostre corps, Seigneur Iesus-Christ, laquelle moy indigne i'ose prèdre, ne me soit tournee en iugement & condemnation. Ains par vostre bonté, qu'elle me proufite à la defence de mon ame, & de mon corps, & me soit medecine. Qui vivez, &c.



*Responce au 22.*

Ce qu'il trouue à redire sus ceste priere, est que le Prestre en icelle entend receuoir le propre corps de nostre Seigneur Iesus-Christ : Et neantmoins il requiert que la perception d'iceluy ne luy soit point en iugement & cōdamnation. Nous luy demandons, quel mal faict le Prestre quand il prie Dieu que la communion ou perception du corps de nostre Seigneur, ne luy soit point en iugement & condamnatiō? N'est-il pas certain qu'aucuns le reçoieūt indignement, & que quiconque le reçoit indignement ne le reçoit qu'à son iugement & à sa condamnatiō? Il veut dire que si le Prestre en ceste priere vsoit du mot de pain, & que s'il prioit que le pain qui est signe du corps de nostre Seigneur en ce sacrement, ne luy tourna point en iugement & condamnatiō, il auroit quelque raison de faire ceste priere, pour

*1. Cor. 11. ce que Sainct Paul dit, que quiconque mange ce pain & boit ce calice indignement, il mange & boit son iugement. Mais que pretend il par cela, sinon dire qu'apres la consecration & transsubstantiation le pain demeure, bien que significatif du corps de nostre Seigneur? Nous luy demandons s'il y auroit plus grand peché à recevoir ce pain*

indignement, qu'à receuoir le mesme corps de nostre Seigneur qui seroit signifié par ce pain, si ceste opinion de nos Loqueteux auoit lieu? Le vray corps de nostre Seigneur seroit tousiours plus à redouter que le signe qui le signifieroit; ainsi comme la personne de l'homme ou du Roy, est plus que le tableau qui le represente. Il falloit que Loque pour faire respondre la fin de son liure au commencement & au milieu, se donna encores ceste carriere, & desnia encores de rechef ceste verité du precieux corps & sang de nostre Seigneur en ce sacrement, par la transsubstantiation qui s'y fait en prononçant les mots sacramentaux que nostre Seigneur nous a enseigné. Ainsi il pensé auoir sappé la Messe iusques à son fondement: Mais nous sommes assurez par la

*Math. 16.*

parole de nostre Seigneur que *portæ inferi non præualebunt aduersus eam*, Les portes d'enfer, c'est à dire tous les assauls des heretiques & du monde ne la renuerferont point, d'autant que c'est le vray fondement de l'Eglise à laquelle nostre Seigneur a fait ceste promesse quand il l'a planté sus la foy & confession de saint Pierre, & quand il a dit à ses Apostres represen-

*Resp. au 22. pret. abus de la S. Messe.*  
rans son Eglise, qu'il est avec icelle ius-  
ques à la consommation du monde. Dieu  
face la grace aux ennemis de la Messe de  
desseiller leurs yeux, & d'addonner leur  
esprit non point aux nouveautez & cu-  
riositez de ce monde, mais à la pure veri-  
té, laquelle est en la doctrine de l'Eglise  
Catholique, Apostolique, Romaine,  
vraye mere de tous fideles Chrestiens; &  
vueille maintenir les bons en icelle & les  
faire prosperer de vertu en vertu, pour  
paruenir à la iouissance de la gloire im-  
mortelle, qui nous est ouuerte par son fils  
Iesus-Christ, vray auteur de la Messe,  
tant assaillie par les ennemis de sa Croix.  
Ainsi soit il.

*IN LOQVEVM.*

*Cœnosus dicere, simul scelerosus ab illa  
Cœna quam iactas: est tua cœna scelus.*





## SONNET.

Au Sieur Burlat.

**A**insi qu'un bon Pasteur gardant sa Bergerie  
De la fureur des loups garentit son troupeau,  
Ayant mieux espouser un honneste tombeau  
Que de ne résister à leur grande furie.

Ainsi vostre labour, vostre grande industrie,  
Vostres-doctes escrits, vostre divin cerneau,  
Nous serviront de guide & de luisant flambeau  
Pour combattre Calvin avec sa compagnie.

Vous refusez l'erreur des nouveaux reformez,  
Vous monstrez en la foy qu'ils sont mal informez,  
Et qu'ils sont menacez d'un perilleux naufrage.

Plaise à Dieu ce mal-heur de leur chef destourner,  
Et au port de salut soudain les amener,  
Les preservant ainsi des vents, & de l'orage.

D. CHOPPIN.



## SONNET.

**D**uin troupeau, dont l'ancienne race  
De pere en fils a conserué la foy,  
Que Iesus-Christ par sa diuine loy,  
Nous ordonna toute pleine de grace,

Ne tremble point sous une fiere audace,  
Ny sous la voix d'un aboyant effroy,  
Vis constamment, & ne sois en esmoy  
Oyant des loups la grondante menace.

Voicy Burlat qui sera ton pasteur,  
Qui par ce liure espouuante l'erreur,  
Le sacrilege, & l'ardente furie,

L'impieté, le blaspheme, & l'orgueil  
De celuy la, de qui le meschant œil  
Vise à gaster ta sainte bergerie.

NIC. GUYET.



# LES NOMS DES AVTHEVRS ALLEGVEZ EN CE LIVRE.

## A

**A**bdias.  
S. Ambroise.  
S. Augustin.  
Arnobius.  
Alexander ab Alexan-  
dro.

## B

S. Basile.  
S. Bernard.  
C  
Clemens Alexandrinus.  
S. Cyprian.

## D

S. Denis Areopagite.  
Denis Cartusian.

## E

Eusebe.

## G

S. Gregoire Nazianzene.  
S. Gregoire Pape.

## H

S. Hierosme.

S. Hillaire.

## I

S. Iean Chrysostome.  
S. Iean Damascene.  
S. Ignace.  
Innocent 3. Pape.

## L

Tite Lue.

## N

Naucleere.

## P

Prochorus martyr.  
Pasquier, Abbé de Cor-  
bie.

Petrus Lombardus.

## S

Sigebert.

## T

Tertullian.

Theodoret.

S. Thomas d' Aquin.

Titelman.





# TABLE DES PRINCIPALES MATIERES CONTENUES en ce liure.

A



Doration, de trois sortes. f.61.2.

Adoration & service differents. 62.2.

Adoration de la Croix referee à nostre Seigneur crucifié. 64.1.

Autels en vsage. f.3. & 4. pourquoy non commandez en l'Euangile. f.4.2.

Autels materiels, tesmoignages de la foy. 5.1.

Autel signifie nostre Seigneur Iesus-Christ crucifié. 64.1.

C

Les Calices de l'Eglise, pourquoy d'or ou d'argent. f.79.

la Cene n'a aucun fondement en l'escriture. 23.2.

la Communion du Prestre sert au peuple. 215.2. & 216.1.

Confessio publique & particuliere. f.9.1.

Confession auriculaire. 9.2. desplait à l'heretique. 19.1. visitée en l'ancié & au nouveau Testament. 10.1.

la Consecration qui se

# TABLE.

faict en la Messe est  
oblation. 6.2.  
pourquoy elle ne se  
faict au vendredy  
sainct. 207.2.  
le signe de la Croix,  
est de grande vertu.  
31.2.  
pourquoy on adore la  
Croix. 38.2.  
le Corps de nostre Sei-  
gneur est au ciel &  
en terre. 191.

Canons des Apostres  
de quelle autorité.  
f.255.2.& 256.

## E

L'Encens beny, sert à  
chasser les diables.  
f.84.2.  
le mot d'Espece s'en-  
tend en deux sortes.  
195.2.  
coustume d'Encenser  
tres-ancienne. 86.2.  
l'Escripture s'expose en  
trois, voire quatre  
sortes. 262.

## F

LA Foy est le seul  
moyen de parue-  
nir à la cognoissan-  
ce des sacrements.  
f.109.  
la Fraction de l'Ostie  
se fait en l'espece du  
pain & non au corps  
de nostre Seigneur.  
290.

## H

Heretiques, pleins  
de blasphemies  
fueillet 5.1.  
Heretiques ennemis de  
la Croix, fueillet 34.  
ennemis de la Vier-  
ge Marie, 33. des  
Saints. 25.1. de no-  
stre saint Pere le  
Pape. 60.  
Heretiques imposent à  
l'escriture. 26.  
ils tournent en derision  
toutes bonnes cho-  
ses. 80.2.  
ils sont ouuriers d'im-  
poser aux Docteurs  
de l'Eglise pour se

# TABLE.

faire croire. 65. 1. 23. 2. 56. 2.

104. 2. 124. 1.

ils confondēt l'operation de Dieu avec celle de nature, ce qu'il leur aueugle. 175. 2.

ils se perdent, iugeants les choses saintes & sacrees par le sens exterieur. 191. 1.

ils approuuent les distinctions en tant qu'elles leur peuuent seruir, non autrement. 194. 2.

l'Homme doit coopérer avec Dieu pour son salut. 45. 2.

il peut aussi bien meriter par ses œuvres que demeriter. 47. 2.

## I

**N**ostre Seigneur Iesus-Christ par qui liuré à mort. 4. 1.

Images des Saints pourquoy honorees par encens. 67.

Inuocation des Saints fondée en l'écriture.

## L

**L**ivres de l'écriture doivent estre declarez canoniques par l'Eglise. 142.

## M

**L**A Manducation sacramentale & spirituelle se doit recognoistre au sacrement de l'Autel.

la Vierge Marie, Royne & mere de misericorde & neantmoins aduocate des Chrestiens enuers Dieu. 23. 2.

Merite de deux sortes. 50. 1.

l'Homme peut Meriter quelque chose de Dieu. 54. 1.

Melchisedech, quel homme. 4. 2.

la Messe fondée en l'écriture. 23. 2. sacrifice ordinaire de



# TABLE.

l'Eglise. 215.  
la Messe publique &  
priuee, aduouee par  
Loque. 30.1.  
les noms de la Messe.  
ibid.

les Ministres de testent  
les Docteurs schola-  
stiques. 50.2.

Mixtiō de vin & d'eauē  
au sacrifice de la  
Messe, 74. mixtion  
des deux especes,  
que signifie? 297.

les Morts sont apellez  
dormants, par l'e-  
criture, pourquoy?  
238.

## O

**O**blation de la Mes-  
se d'oū elle prend  
sa vertu. 43.1.

Oeures meritoires de  
deux sortes. 49.2.

## P

**L**es Pechez ne sont  
egaux, cōme pen-  
sent les Ministres.

271.1.  
Prestres, quels ancien-  
nement. 4.2.  
Purgatoire, qu'est-ce?  
246.1.  
raison du Purgatoire.

170.2. & 249.2. ap-  
prouuē par Luther.  
267.2. les ames qui y  
sont ont repos de  
leurs labeurs. 246.1.  
& 249.2.

## R

**R**eliques des Saints  
pourquoy miles  
sous les Autels. 58.2.  
pourquoy sont en hon-  
neur. 61.2.

quelle vertu en icelles.  
65. & 66.

en quoy consiste icelle  
vertu. 67.1.

elles operent des mira-  
cles. 24.

Resurrection des corps  
25.2.

## S

**S**acrements du vieil  
& nouveau Testa-  
ment, differents. 136.

Sacrements du nou-  
veau Testamēt pour-

Q q iij

# TABLE.

quoy contiennent actuellement ce qu'ils signifient. 146.	ce de la Messe. 232. & 233.
Sacrement de l'Autel nous fait vn avec nostre Seigneur, par grace & non par voye de nature. 120.	Sacrilege de Iudas. 42. 2.
il sert au corps & à l'a- me. 179. 2.	en la loy Euangelique se trouue Sacrifice sanglant & non san- glant d'vn mesme corps de nostre Sei- gneur. 219. & 220.
il requiert nostre foy, nostre esperance & preparation. 181. 1.	les Saints ne sont point morts. 24. 2.
il est espouuantable au diable. 16.	ils sont mediateurs en- uers Dieu pour nous. 28.
le Sacrifice de Melchi- sedech. 3.	inuocation des Saints aduouee par les bri- seurs d'images. 25. 1.
le Sacrifice non sanglant de nostre Seigneur. ibid.	T
le Sacrifice de la sainte Messe est spirituel & materiel. 5. 2.	<b>T</b> Raditions. 16. 2.
il sert aux viuants & aux morts. 230. 1.	<b>T</b> escrits, & non es- crits. 85.
il nous applique le fruit du sacrifice sanglant, c'est à dire de la pas- sion de nostre Sei- gneur. 215. 2.	la Trans-substantiation au sacremēt de l'Au- tel procede de la pa- role de Dieu. 118. 2.
Sacrifices anciens sont différents du sacrifi-	V
	<b>L</b> A Vierge Marie a plus de pouuoir d'obtenir pour nous que les autres Saints. 33. 2

F I N.

## Fautes à corriger.

**F**ueillet 2. page 1. li. 26. c'est. pa. 2. l. 9. saint Augu-  
 stin & Clement Alexandrin. f. 5. p. 1. l. 14. vœus. p.  
 2. l. 12. es. l. 12. syllogisme. pa. 6. l. 3. ordonnez. l. 6. la  
 forme. l. 15. & la forme consiste. li. 16. es. p. 2. l. 1. ini-  
 quitatis. l. 20. Seigneur Qui. f. 8. p. 1. l. 28. en l'autel p.  
 2. l. 1. en. l. 8. nie. f. 12. p. 1. l. 6. S. Pontian. f. 18. p. 2.  
 l. 20. d. faite. f. 20. pa. 1. l. 25. apud Deum. f. 31. l. 6. p. de  
 corps. f. 32. l. 21. iadis tenuis pour Docteurs. f. 37. p. 1. l.  
 18. Quid. f. 37. p. 2. l. 17. recouure. f. 38. l. 2. p. 1. d. ny.  
 f. 39. p. 2. l. 9. les. fueillet 50. l. 8. procurer. f. 62. p. 2.  
 l. 12. Si λατρευεῖν f. 66. p. 1. l. 9. multimoda. f. 69. p. 2. l.  
 4. sacree. f. 109. p. 1. l. 9. lequel. f. 110. l. 7. tu reçois.  
 f. 123. p. 2. l. 4. mira. f. 124. l. 11. au chap. f. 125. 2. l.  
 24. il estoit. f. 141. p. 2. l. 6. par les Donatistes. f. 150. p.  
 2. l. 23. est celebré. f. 152. p. 1. l. 5. on l'a celebré. fueillet  
 176. p. 1. l. 5. s'entendent. f. 81. p. 1. l. 1. Maozin. f. 84.  
 p. 1. l. 10. il a donné. l. 20. & 21. emploient. f. 183. p. 1.  
 l. 28. tropes. 86. l. 2. p. 2. tropes. f. 92. p. 1. l. 12. du. f.  
 257. l. 13. un. f. 260. l. 9. Razias. l. 16. Razias. f. 271.  
 p. 1. l. 19. du feu 283. p. 2. l. 27. en la mesme. 287. p. 2.  
 l. 9. il allegae. 249. l. 13. de. 256. 2. l. 11. Zepherinus.



Handwritten text, likely bleed-through from the reverse side of the page. The text is illegible due to extreme fading and blurring.



Le jeune

de la

Le jeune



willis

